

**А. Велиулаева**

# **КЪЫРЫМТАРАР ВЕ ДЖИАН ЭДЕБИЯТЫ**

**ИНТЕГРИРЛЕНГЕН КУРС**

*Окъутув къырымтатар тилинде алып барылған  
мектеплер ичөн*

**5**

**СЫНЫФ**

*Дерслик Украина тасиль ве илим, генчлик ве спорт Назирлиги  
тарафындан төвсие этильди*



Къырымдевокъувпеднешир

2013


**ББК83.3(Крмтат)-922  
B27**

*Рекомендовано Міністерством освіти і науки, молоді та спорту України  
(Наказ № 265 від 28 лютого 2013 р.)*

*Видано за рахунок державних коштів. Продаж заборонено*

Такъризджилер:

- В.И. Вернадский адына ТНУ-нинъ къырымтатар эдебияты кафедрасынынъ уйкен оджасы **Кокиева А.**;
- Акъмесджит шеэри № 29 умумтасиль мектеби къырымтатар тили ве эдебиятынынъ уйкен оджасы **Зияйтдинова Д.М.**



**Велиулаева А.**

**B27 Къырымтатар ве джиан эдебияты. Интегрирленген курс. Окъутув къырымтатар тилинде алып барылгъан мектеплер ичюн. 5-инджи сыныф.** — Симферополь: КъДЖИ «Къырымдевокъувпреднешир» нешприяты, 2013. — 208 с. : ресимли. — Къырымтатар тилинде.

ISBN 978-966-354-557-8

**ББК83.3(Крмтат)-922**

**Веліулаєва А.**

**B27 Інтегрований курс «Література» (кримськотатарська та світова) для загальноосвітніх навчальних закладів з навчанням кримськотатарською мовою. 5 клас.** — Сімферополь: КРП «Видавництво «Кримнавчпреддержвидав», 2013. — 208 с. : іл. — Кримськотатарською мовою.

ISBN 978-966-354-557-8

**ББК83.3(Крмтат)-922**

ISBN 978-966-354-557-8

© Веліулаєва А., 2013

© Акімова З., ілюстрації, 2006

© Татарісова Л., ілюстрації, 2013

© КРП «Видавництво «Кримнавчпреддержвидав», 2013

## **Азиз талебелер!**

Сиз бу сене мектепнинъ экинджи басамагъына адым аттыныңыз. Бу йылдан башлап сиз чокъ яңы фенлер оғренеджексиз.

Йыл-йылдан сизинъ бильгилеринъиз артаджакъ ве кенълемешеджек. Мектепни битиргенде, бильгили, медениетли яшлар ве къызылар оларакъ, къолунъызға кемалатлыкъ, пишигинлик шадаңтамесини алырсыз. Бу къыйметли шадаңтаме сизинъ келеджектеки яшайышынъызға ёлланмадыр. Сизлер ичюн алий окъув ве зенаат алув юртларының къапулары ачылыр, истеген зенаатынъызды оғренирсиз.

Озъ истек-ниетлеринъизге, арзуларынъызға иришмек ичюн, терен бильги саиби олмакъ керек. Терен бильги алмакъ ичюн, бугуньден башлап гъайретнен окъумагъа тырышмалысыз! Дерслерде дикъкъатлы олып, берильген вазифелерни единип беджермелисиз.

5-инджи сыныфта да къырымтатар халкъ йырлары, масаллары, эфсане, риваетлерини, бедиий эдебияттымызынъ оғренюв девам этеджек. Сиз халкъымыздынъ тарихы, медениети, урф-адетлеринен таныш олурсыз.

Бу окъув йылы девамында сиз дюнья халқъларының масаллары ве меракълы эсерлерни окъуп, файдалы ве зөвкълы малюматлар алырсыз, чешит халқъларның яшайышы, урф-адетлеринен таныш олурсыз.

Китап ве дерсликлер даима энъ якъын достларының, етекчи ве ёлдашынъыз олса, сиз, иншалла, арзуниетлеринъизге ириширсиз.



## ВАТАНСЫЗ АДАМ — КЪАНАТСЫЗ КЪУШ



### ВАТАНЫМ

Танъ аткъанда  
Чыкътым чёльге,  
Белим сарды когетлери.  
Ана юртум,  
Тувгъан ерим,  
Бер опейим эллеринъ!

Бардым денъиз ялысына,  
Эсти салкъын ельчиклери.  
Ана юртум,  
Тувгъан ерим,  
Бер опейим эллеринъ!

Ай-Петрге алып барды  
Кунешнинъ алтын теллери.  
Ана юртум,  
Тувгъан ерим,  
Бер опейим эллеринъ!

*Нузет Умеров*



Шаир Ватанына севги, урьметини насыл сёзлернен ифаде эте?  
**Бер опейим эллеринъ** сёзлерининъ манасыны насыл анълай-  
сыз? Не ичюн шаир бу сёзлерни шиирде текrar-tekrar къуллана?

## ВАТАН

Кырым — бизим Ватанымыз.  
Ватан — бизим Анамыз.  
Биз Ватаны бу дюньяда  
Энъ мукъаддес саямыз.

Мында асыл олды халкъым,  
Шекилленди тилимиз.  
Дагъы-ташы айтып турға —  
Будыр бизим Илимиз!

Козъяш чешме, Хансарайы,  
Абиделер, дюрбелер...  
Мында олар бизге мирас,  
Гоньольге рух берелер.

Мында эр шей бизимкидир,  
Мында Ер, Кок бизимдир...  
Ватан — бизим Анамыздыр,  
Анамыз — бу Ватандыр.

*Идрис Асанин*



Кырым манзарасынынъ ресимлерини япынъыз, сыныфынъызда ресимлер ярышыны кечиринъиз. Мектебинъизде «Гузель Кырым» ресимлер сергисинде иштирак этинъиз.



«Ватан» ширинде шаир Ватаны не ичюн Ананен теньештире? Не ичюн инсанлар ватаныны мукъаддес саялар? *Ватансыз адам* — *къанатсыз къуш* аталар сёзюнинь манасыны насыл анълайсыз? Кырымнынъ харитасына бакъып, улу дагълар, озенлер ве шеэрлерниң адларыны айтынъыз ве ерлешкен ерлерини тапынъыз. Къайсы шеэр Кырымнынъ тарихий меркези сайыла ве не ичюн? Бу шеэрде насыл мешур абиде бар? Кырымтатар халкъынынъ сюргөнликтен Ватаны-Кырымгъа къайтувы огърунда куреште фааль иштирак эткен адамлардан кимлерни билесиз? Олар акъкында икяе этинъиз? Сиз насыл тюшөннесиз, Ватанымыз даа гузель олмасы ичюн нелер япмакъ керек?



## Севинъиз китапны!

Китап! Не адтайип сёз. Не адтайип шей! Китап энъ буюк муджизедир, чонки китапта эр шей акъкъында окъумакъ мумкцион. Инсанитетниң асырлар девамында араштыргыан, топлагъан бильгилери — эписи китапларда сакълыдыр. Сиз неге авесленсөнъиз, ненен меракълансанъыз — эр шейни китаплардан окъуп бильмек мумкцион. Китап битmez-тюкенмез бильги чокърагъыдыр. Китап инсанының бутюн омюри бою садыкъ досту ве улу оджасы олмалыдыр.

Севинъиз ве окъунъыз китапны. Рафларынъыз китап толсун. Топланъыз ве сакъланъыз оларны. Сизге эр шейни огратеджек, омюрде догъру ёл косытереджек — китаптыр.

## КИТАП

Китаптыр адтайип якъын дост ве къардаш,  
Къыйсынмай китапны къолгъа ал, аркъадаш!  
Китаптыр — дюнъяда энъ буюк муджизе,  
Китаптыр — эр шейни ограткен къарт тизе.  
Джеверден<sup>1</sup>, алтындан палыдыр къыймети,  
Кунештен айдындыр китапнынъ эр бети.

Ёлсузгъа о даим ёлуны корьсетир,  
Китапны алдынъа, сен достум, тез кетир.  
Санъа о тилинъни, сёзюнъни огратир,  
Зульметлер<sup>2</sup> ичинде чыракъынен юрьсетир,  
Сен китап, окъувгъа селикъа<sup>3</sup>, авес къой!  
Китапны озюнъе дост этип, окъуп той!

Юнус Темиркъая

<sup>1</sup> джевер — къыйметли таш

<sup>2</sup> зульмет — къаранлыкъ

<sup>3</sup> селикъа — тырышув, истек



# КЪЫРЫМТАТАР ХАЛКЪ АГЪЫЗ ЯРАТЫДЖЫЛЫГЪЫНДАН



*Эвель оғренгенлеримизни хатырлаймыз*



## САЮВЛАР



Балалар, чешит оюнлар ойнагъанда, невбет тизмек ичюн, **саювлар** уйдурып сыйыша эдилер. Энъ сонъки къалгъан бала оюнны башлай эди. Меселя, «Сакъланмакъ» оюныны ойнагъанда, сонъки къалгъан бала козюни юма, къалгъанлары исе сакъланалар. Саювлар окъунарлы, енгиль эзберленген къыскъа шиирлердир. Лякин мана ве мундеридже джеэтинден эксерий саювлар анълашылмагъан, манасыз ве шакъалы олалар.

Эвелеме, девелеме,  
Деве къушны къувалама.  
Аппул, уппул,  
Чыкъ да, къуртул.

Ине-ине, Изет ине,  
Бекир ине,  
Шама-шара, кумюштен пара,  
Стамбулдан къыз кельген,  
Бурумчыкъынен туз кельген,  
Орул, ёрул,  
Уч да, къуртул.

Алмалыкъ, ал къылыч!  
Арада сув, атлап кеч!  
— Ай, дым терек, дым терек!  
Бизден сизге ким керек?  
— Айше керек!



## ТЕЗАЙТЫМЛАР



**Тезайтымлар** — айтмасы къыйын олгъан давушларның сыкъсыкъ текрарланмасы эсасында къурулгъан мешгъулиеттири.

Тезайтымларны тез-тез ве бир къач кере текрарлап айтмакъ керек. Бойле мешгъулиет сизге ана тилимизде дөгъру ве сербест къонушмагъя ярдым эттер.

Бир далда эки къартал,  
Бири — къарт къартал.  
Бири — яш къартал.  
Яш къартал  
Дал къакъар,  
Къарт къартал  
Дал тартар.

Ашамалы, ичмелі,  
Шашмаламамалы.

Къартбабам къаргъаны  
Къорадан къувды,  
Къоркъудан къарт къаргъа  
Къанатын къырды.

Дагъ тюбюнде къарт чокъракъ,  
Сувуны иче чокъ топракъ,  
Эм туварлар, эм къушлар,  
Кийик, турна, кокюшлер,  
Къурт, къарынджа, йыланлар,  
Эм де дагъда олгъанлар,  
Орманджы эвлятлары,  
Орманджының атлары,  
Терлеп шыр сув олгъанлар,  
Ёрулгъан эм солгъанлар.



Буюклерден сорап тезайтымлар ве саювларны топланызыз.  
Бегенгенлеринъизни эзберленьиз.



Ана тилемизде къонушкъанда, лакъырды эткенде, окъутъанда сеслерни ве сёзлерни дөгъру ве айдын айтмакъ керек. Тезайтымлар бизге насыл ярдым этелер? Къырымтатар тилинде къайсы сеслерниң айтылувы къыйын? Ойле сеслер чокъ къулланылгъан сатырларны, шиирлерни сечип зазберленъиз ве тез-тез айтмагъа арекет этинъиз.

Хусусан халкъ йырларында къыйын сеслер чокъ расткеле. Меселя «Къалайлы къазан», «Бозторгъай» ве дигерлери. Бу йырларны къошулып йырласакъ, пек файдалы мешгъулиет олур.

## *Ифадели окъумагъа оғренемиз*

### **Ифадели окъувның къайделери**

Эдебий эсерниң мундериджесини динълейиджилерге еткизмек ичюн, меракъландырмакъ ве белли дүйгъу, фикирлерни дөгъурмакъ ичюн, эсерни ифадели окъумакъ керек. Ифадели окъувның бир сыра къайделери бар:

- сеслерни ве сёзлерни дөгъру, ачыкъ-айдын айтынъыз;
- сёзлерни ашыкъмайып, анълайышлы окъунъыз;
- динълейиджилер окъуйыджының давушыны яхшы эшиитмелилер;
- эсерни окъугъанда, давушынъызын керек еринде котеринъиз.



## **АТАЛАР СЁЗЛЕРИ ВЕ АЙТЫМЛАР**



Аталар сёзлери ве айтымлар чокъ асырлар девамында яратылгъан, несильден несильге кечип, бугуньки куныге етишип кельгенлер. Аталар сёзлеринде ве айтымларда халкъының тюшюндженелири, къыйметли фикирлери ифаделенген. Аталар сёзлери ве айтымлар къысқа, мергин<sup>1</sup> ве терен маналы ибарелердир.

<sup>1</sup> мергин — отъюор

## **ВАТАН, ХАЛКЪ ВЕ БИРЛИК АКЪКЪЫНДА**

Тувгъан ана — бир,  
Тувгъан Ватан — бир.

Къушнынъ да тувгъан юvasы бар.

Халкъ юръген ёлдан юръ.

Халкъкъа — бирлик, къушкъа — къанат.

Тек бабанънынъ огълу дегиль,  
Халкънынъ да огълу ол.

Къайда бирлик, анда тирилик.

Балыкъкъа — сув, къушкъа — ава,  
Айвангъа — орман, инсангъа исе Ватан керек.

## **ИЛИМ, БИЛЬГИ, УНЕР, ЭМЕК АКЪКЪЫНДА**

Билеги кучлью бирни йыкъар,  
Бильгиси кучлью бинъни йыкъар.

Илим къазаны отсуз-оджакъсыз янар.

Бильмемек айып дегильдир,  
Огренмемек айыптыр.

Зенаат — алтын билезлиktир.

Бугуньки ишни ярынгъа къалдырma.

Ярынки ишке бугуньден давран.

## **ДОСТЛУКЪ, ЯХШЫЛЫКЪ, ЭДЕП ВЕ ТЕРБИЕ АКЪКЪЫНДА**

Достсуз адам — къанатсыз къуш.

Къуш къанатына ишана,  
Инсан — доступна.

Яхшылыкъ яманлыкътан къуветлидир.

Яхшыдан унер ал, ямандан узакъ къал.

Инсаннынъ урьмети озъ элинде.

Сыра бильсенъ, сырдан къалмазсынъ.

Буюкнинъ сёзюни тутмасанъ,  
Буюк ёлгъя чыкъалмазсынъ.

Догъру сёз къылычтан кескин.



1. Юкъарыда берильген аталар сёзлери ве айтымлардан бегенгенлеринъизни сайлап, дефтеринъизге язынъыз ве эзберленъиз.

2. Дерсликте берильген аталар сёзлери ве айтымларнынъ маналарыны озъ сёзлеринъизнен анълатынъыз.

3. Эвде къартана, къартбабаларынъыздан, ана-бабаларынъыздан, сой-акърабаларынъыздан сорап, аталар сёзлери ве айтымлар топланызыз. Оларны айры бир дефтерчикке язынъыз ве мевзуларыны къайд этинъиз.

4. Сыныфынъызда **«Ким чокъ аталар сёзлери ве айтымлар биле?»** мевзуда ярыш кечиринъиз.



Эки-учь аталар сёзлерини серлевә оларакъ алыш, къыскъя икяечиклер уйдурынъыз ве дефтеринъизге язынъыз.



## ТАПМАДЖАЛАР



Тапмаджанынъ джевабы мундериджесинде гизленип бериле.  
Тапыладжакъ несне<sup>1</sup> исе башкъа несне ве адиселерге ошатыла.

### ТАБИАТ АДИСЕЛЕРИ АКЪКЪЫНДА ТАПМАДЖАЛАР

1. Акъ сандыгъым ачылды,  
Ичинден нур сачылды.
2. Акъшам олса, корюнир,  
Саба олса, джоюлыр.
3. Дагъ ичинде анасы,  
Чыкъып къача баласы.
4. Кетсе кельмез,  
Ёрулмакъ бильмез.
5. Сувда батмаз, атеште янмаз.
6. Де корюнир, де батар,  
Тийген ерини якъар.
7. Козю ёкъ — агълай,  
Дудагъы ёкъ — куле,  
Агъызы ёкъ — йырлай,  
Озю бир ерде турмай.

### ИНСАН ВЕ ЧЕШИТ НЕСНЕЛЕР АКЪКЪЫНДА ТАПМАДЖАЛАР

1. Пенджерем бар къапакълы,  
Чевре-чети сачакълы.
2. Эки ананынъ он баласы бар,  
Он баланынъ бир <sup>2</sup> ады бар.
3. Ашкъа къатылмаз ,  
Базарда сатылмаз,  
Ондан да татлы шей олмаз.
4. Алма берсем, алмаз,  
Озю артымдан къалмаз.
5. Еди агъа-къардаш бар,  
Яшлары бир, адлары башкъа.

<sup>1</sup> несне — шей (*ruscha*: предмет, вещь)

<sup>2</sup> къатылмаз — къошуулмаз

6. Къат-къат — къапыста дегиль,  
Тикиши бар — антер дегиль,  
Бенеги<sup>1</sup> бар — басма дегиль.
7. Узун агъачны ойгъанлар,  
Ичине бульбуль къойгъанлар.
8. Бир бардагым<sup>2</sup> бар — эки тюрлю суву бар.
9. Бир кузьгюм бар, ичинде  
Бутюн дюньяны корем.
10. Эм яза, эм йырлай,  
Айткъянынъы текрарлай.
11. Гедже-куньдюз чокъмар<sup>3</sup> ашай,  
Озю ольмей, кене яшай.



**сачакъ** — мында: пускуль

**дамсыз** — мында: тёпесиз



1. Тапмаджалар насыл тизиле? Тапмаджанынъ джевабыны тапмагъя не ярдым эте?
2. Тапмаджалар не акъкъында олалар? Чешит мевзуда тапмаджаларны буюклерден сорап, язынъыз.



1. Озюнъиз яńы тапмаджалар уйдурмагъя арекет этинъиз, бегенгенлеринъизни дефтеринъизге язынъыз ве сыныфдашларынызға окъунъыз.
2. Сыныфынъызда тапмаджа ярышыны кечиринъиз.

### ***Ифадели оқыумагъа оғренемиз***

Токътав ишаретлерине риает этинъиз:

- виргуль къюолгъан ерде къыскъа токътав олмалы;
- нокъта къюолгъан ерде исе токътав девамлыджа ола;
- эсерде тасвирленген къуванч, языкъсынув, разылыкъ, ачув, къоркъу, къайгъы киби дүйгүларны динълейиджилерге сес ифаделиги вастасынен еткизмеге арекет этинъиз;
- эсерде тасвирленген адисе, левхаларны динълейиджилерниң козю огүнде джанландырмагъя тырышынъыз.

<sup>1</sup> бенек — къара нокъталар

<sup>2</sup> бардакъ — савут

<sup>3</sup> чокъмар — давул чалмакъ ичюн бир уджу къалын этип ясалған таякъ



## БЕШИК ЙЫРЛАРЫ



Бешик йырларыны халкъ «Айненни» деп адландыргъан. «Айненнилер» назик ве муляйим сеснен йырлана. «Айненни» сёзю сатырларның сонъунда текрарланып келе ве балагъя юкълатыджы тесир эте.

Аналар балаларыны «Айненни» йырлап юкълаткъанлар. Огъул балагъя айтылгъан «Айненни»де анасы огълуның кучълю олып осъкенини, келеджекте таянч олгъаныны арзлап, бойле сёзлерни айта:

Огълунъ олса бахыттыр, айненни  
Къартайгъанда таякътыр, айненни  
Пенджереге къапакътыр, айненни  
Къаранлыкъта чыракътыр, айненни.

Къызыны исе анасы гуль багъчада коре:

Меним къызыым оседжек, айненни  
Гуль багъчада кезеджек, айненни.

Аналар «Айненни»де балаларына олгъан севгисини, эйи насиатларыны, оларгъа бахытлы аят истегенлерини, умют ве ишанчларыны ифаде эткенлер. Бешик йырлары кичкенелерге терен тесир эте, оларгъа севги, къуванч, бахт дуйгъуларыны ашлайлар. Балалар аналарының йырлагъан «Айненни»лерини динълеп, татлы ана тилининъ давушларына альшалар, ана тилини оғренелер. «Айненни» баланың омюринде биринджи меракълы дерстир.

## АЙНЕННИ

Багъчада къурдым салынджакъ, айненни,  
Кельген, кечкен саллайджакъ, айненни.  
Элине бердим оюнджакъ, айненни,  
Меним огълум ойнайджакъ, айненни.

Аяя, аяя, аяя, ай,  
Юкъла, балам, сен.

Огълунъ олса, бахыттыр, айненни,  
Къартайгъанда таякътыр, айненни,  
Пенджереге къапакътыр, айненни,  
Къаранлыкъта чыракътыр, айненни.

Айя, айя, айя, ай,  
Юкъла, балам, сен.

## АЙЯ ДЕСЕМ, ЯРАШЫР

Айя десем, ярашыр, айненни,  
Гуль багъчалар долашыр, айненни.

Гуль багъчанынъ ичинде, айненни,  
Алтын бешик ярашыр, айненни.

Айя, айя, айясы, айненни,  
Не заман тиер файдасы, айненни.

Яз тиймese, къыш тиер, айненни,  
Ашыкъмасын анасы, айненни.

Айя, балам, юкъласын, айненни,  
Кырымызы гуллер къоқъласын, айненни.

Осип, буйип юрьген сонъ, айненни,  
Эр кес онъа сукълансын, айненни.

Меним къызым оседжек, айненни,  
Гуль-багъчада кезеджек, айненни.

Айя, айя, айя, ай,  
Юкъла, балам, сен!



1. Бешик йырларында ананынъ насыл дүйгүлары ифаделене?
2. Не ичюн балалар «Айненни»лерни севелер? «Айненни» балаларгъа насыл тесир эте?
3. Ананызыз, къартананызыз насыл «Айненни» йырлайлар? Сёзлерини язып алыннызыз, ограйнинызыз.
4. Ана огълан баланы юкълаткъанда насыл сёзлерни айта? Не ичюн къызы баланы юкълаткъанда башкъа сёзлерни айта?

## **Халкъ агъыз яратыджылыгъы огренювини девам этемиз**



Азиз балалар! Сиз бешиктен халкъ агъыз яратыджылыгъынен таныш олып башлайсыз. Аналар, аптелер, къартаналар, баланы юкълаткъанда, «Айненни», эглендирмек ичюн масаллар, эфсанелер, риваётлер, тапмаджалар айталар. Булар эписи халкъ агъыз яратыджылыгъыдыр. Балалар багъчасында тербиеджилер, мектепте исе оджалар балаларгъа халкъ агъыз яратыджылыгъындан чешит эсерлер окъуйлар. Балалар, окъумагъа оренген соңь, озылери окъуп чокъ шейлерни билелер.

Халкъ агъыз яратыджылыгъына фольклор да дейлер. **Фольклор** (инглиз тилинден алынгъан сөз) — **халкъ агъыз яратыджылыгъы** демектир. Эр бир халкъының озюне хас фольклоры бар. Къырымтатар халкъының да зенгин агъыз яратыджылыгъы бар. Фольклор эсерлеринде халкъының яшагъан ери, тарихы акъкъында малюмат, урф-адетлери, дуйгъу-фикирлери, арзу-истеклери, табиат чизгилери ифаделене.

Халкъ агъыз яратыджылыгъы эвельки девирлерде пейда олып, агъзавий шекильде яшай ве асырлар девамында халкъ арасында кенъ даркъала. Фольклор эсерлеринин мүэллифи белли дегильдир. Халкъ ичинден чыкъкъан бу истидатлы адамларның адлары унутылгъан, эсерлерини исе халкъ сакълагъан, зенгинлештирген, яраштыргъан ве янъы несиллерге еткизген. Демек, халкъ яратыджылыгъының осювине эр бир несиль озы исесини къошкъан. Шимдики девирде истидатлы икяеджилер, масалджыларның агъызындан пек чокъ эсерлер язылып алынгъан ве нешир этильгендир.

Халкъ агъыз яратыджылыгъының озюне хас тюрлери бар. Бу: **масал, эфсане, риваёт, лятифе, йыр, чынъ, мане, аталар сёзлери ве айтымлар, тапмаджа, саюв, тезайтым, айненилер.**

Миллий фольклор эр бир халкъының буюк зенгинлигидир. Къырымтатар халкъ агъыз яратыджылыгъы асырлар девамында илерилеп, инсанларгъа мераметлилик, джесюрлик, адалетлик, инсаниетлик, эйилик киби чизгилерни ашлагъан. Эр бир янъы несиль бу къыйметли мирасны оренмек, сакъламакъ ве келеджек несиллерге еткизмек керек.

<sup>1</sup> мирас — несильден несильге авушкъан зенгинлик



## ХАЛКЪ ЙЫРЛАРЫ



Халкъ йырлары халкъ агъыз яратыджылыгъынынъ муим ве зенгин къысмыдыр.

Халкъ йырларында халкъынынъ аяты, тарихы, адамларнынъ дүйгүү, фикирлери, арзу-истеклери тасвирлене.

Халкъ йырлары мундериджесине коре бир къач тюр оладар: **лирик**, **тарихий** ве **шакъий** йырлар. **Лирик йырларда** адамларнынъ чешит дүйгүлары: севги, асретлик, къуванч, къасевет, гъам, я да табиат левхалары тасвирлене. **Тарихий йырларда** исе бир де-бир вакъия ифаделене. **Шакъий йырларда** инсан аяты, адамларнынъ мунасебетлери, оларнынъ менфий чизгилери кулончли шекильде тасвирлене.

Той-джыйынларда, байрамларда халкъ йырларыны йырламакъ эвель заманлардан адет олып кельген. Той-дюгюнде, байрамда йыр инсанны шенълendirе, зевкъландыра, агъыр вакъытта исе кучь-къулет бере, рухландыра, адамларнынъ гонълюни котере.

Яшлар, балалар халкъ йырларыны топламакъ, огренмек, йырламакъ, келеджек янъы несиллер ичюн сакълап къалдырмакъ керек, чюнки халкъ йырлары миллеттинъ рухий байлыгъыдыр.

### БОЗТОРГЪАЙ

Эв алдында гуль терек те,  
Ель эскенде саллана.  
Устюне минген бир къушчыкъ,  
Эй, аруым,  
Йырлай, йырлай тавлана.

Бозторгъай деген айваннынъ,  
Джылгъада болур юvasы.  
Джавун да джавса, сель алыр,  
Эй, аруым,  
Джылай да къалыр анасы.

Бир кичкене бозторгъай,  
Тары сепсем ашамай.  
Сизинъ якъынынъ къызлары,

Эй, аруым,  
Бизим якъкъа ошамай.

Бир кичкене алаша<sup>1</sup>  
Шу Кырымны долаша,  
Бизим якъының кызлары,  
Эй, аруым,  
Къайда барса яраша.

## КЪАЛАЙЛЫ КЪАЗАН

Къалайлы къазан ичинде къаз баласы,  
Къызыны манъа севдирген — озь анасы.

Къалайлы къазан ичинде къаз этимииз,  
Тойда, джыйында ойнамакъ адетимииз.

Белиме къушакъ яптырдым, чевреси сырма,  
Анавгъя-мынавгъя козъ атып, бойнумы урма.

## АМАН, ДЕГИРМЕНДЖИ

— Аман, аман, дегирменджи,  
Джаным-козюм дегирменджи,  
Сырма сачлар сенинъ олсун,  
Ал, чек богъдайны.

— Олмаз, джаным, олмаз,  
<sup>2</sup> Улукълар сувгъя толмаз.  
Невбетчилер разы да олмаз,  
Ал къайт богъдайны.

— Аман, аман, дегирменджи,  
Джаным-козюм дегирменджи.  
Ал янакълар сенинъ олсун,  
Ал, чек богъдайны.

<sup>1</sup> алаша — ат

<sup>2</sup> улукълар — тахтадан ясалғын сув ёллары

— Олмаз, джаным, олмаз,  
Улукълар сувгъа толмаз.  
Невбетчилер разы да олмаз,  
Ал къайт богъдайны.

— Аман, аман, дегирменджи,  
Джаным-козюм дегирменджи,  
Эля козълер сенинъ олсун,  
Ал, чек богъдайны.

— Олмаз, джаным, олмаз,  
Улукълар сувгъа толмаз.  
Невбетчилер разы да олмаз,  
Ал къайт богъдайны.

— Аман, аман, дегирменджи,  
Джаным-козюм дегирменджи,  
Къалем къашлар сенинъ олсун,  
Ал, чек богъдайны.

— Олур, джаным, олур,  
Улукълар сувгъа толур.  
Невбетчилер разы да олур,  
Ал кель богъдайны.

## СЫЧАН

Коръдинъизми сычанны,  
Рафтан долапкъа къачанны.  
Элинде къапыста къочаны —  
Бостанджы олгъан бу сычан.

*Багълама:*

Ай, сычан, вай, сычан,  
Эки де козю кёр сычан,  
Бал еmezнинь балына  
Далар чыкъар бу сычан.

Къапу артында такъыр-тукъур,  
Мен зан эттим кетен<sup>1</sup> токъур.  
Алмыш элине китабын, окъур,  
Окъумыш олгъан бу сычан.

*Багълама.*

## АЙШЕМ

Айшем, сендеки сачлар менде олайды,  
Сачлары сенден, тарамасы менден,  
Олерим, айрылмам ич сенден.

Айшем, сендеки эллер менде олайды,  
Эллери сенден, билезлиги менден,  
Олерим, айрылмам ич сенден.

Айшем, сендеки къашлар менде олайды,  
Къашлары сенден, сюрьмеси менден,  
Олерим, айрылмам ич сенден.

Айшем, сендеки козълер менде олайды,  
Козълери сенден, опьмеси менден,  
Олерим, айрылмам ич сенден.



1. Халкъ йырларында не тасвиrlenе?
2. Халкъ йырлары мундериджесине коре насыл тюрлерге болюоне?
3. Лирик йырларда не тасвиrlenе?
4. Шакъий халкъ йырларында омюр адиселери ве адамларның мунасебетлери, чизгилери насыл тасвиrlenе?



Сыныфынъызда йырлар ярышыны кечиринъиз.

<sup>1</sup> кетен — басма



Не ичюн халкъ йырлары эбедий яшайлар ве несильден несильге кечелер? Не ичюн яш несиль халкъ йырларыны огремек ве сакъламакъ керек? Сиз насыл халкъ йырларыны биле ве севесинъиз? Сизинъ къорантанъызда халкъ йырларыны йырлагъанлар бармы? Озюнъиз бегенген йырларынызынди иджра эте билесинъизми? Бегенген халкъ йырларыны къошуулыш йырланъыз? Халкъымызынъ севимли йырджыларындан кимлерни билесиз?

Халкъ йырларына багъышлангъан чешит телевизион яйынлар косытериле. Къайсы яйынларны сиз зияде бегенесиз? Къайсы яйынларны сиз дайма сейир этесиз? Сизинъ мектебинъиз, сыныфынъыз бойле телевизион яйынларда иштирак этеми? Телевизион яйынларнынъ халкъ йырларыны огремек ве сакъламакъ ичюн буюк эмиети бармы?



## ЧЫНЬ ВЕ МАНЕ



Чынълар ве манелер халкъ агызы яратыджылыгъынынъ муим ве меракълы бир шеклидир. Чынъ ве манелерде, йырдаки киби, инсанларнынъ дүйгъу-фикирлери, бири-бирине мунасебетлери, арзу-истеклери ифаделене. Лякин чынъ ве манелер йырлардан фаркълашалар. Чынъ ве манелерни иджра этювнинъ тертиби бар. Чынъджалар ве манеджилер, эки тарафкъа болюнип ве къаршы-къаршыгъа турып, чынъ ве мане айтышалар. Тойларда, джыйын ве байрамларда чынъджалар ве манеджилер ярышыны кечирюв адеп олгъан. Чокъусы чынъ ве манелер бойле ярышларда уйдурылгъандыр. Чынъ ве манелер халкъ хазинесининъ битmez-тюкенmez зенгинлигидир. Денъиздеки къум киби, чынъ ве манелерниң сайысыны эсапкъа алмакъ мумкун дегильдир.

Чынълар чөль тарафында, мане исе дагълыкъ тарафында даркъалгъандыр.

Чынъ ве мане шекиль джеэтинден де фаркълаша. **Чынълар эки сатырдан, манелер исе дөрт сатырдан ибараттири.**

## **ЧЫНЬЛАР**

Бугунь бизде джыйын, той — буюрынъыз,  
Эвимизниң төрү бош — отурынъыз.

Яшлар, къызлар тюзенген, безенгенлер,  
Чынъ-манеге, оюнгъа <sup>1</sup> бельсендөнгөнлөр.

Чешит къушлар, бульбуллар озың тилинде сёйлене,  
Той-джыйында яшлар-къызлар бир-бирини бегене.

Эвель яшлар чынъ айтып танъ аттыргъан,  
Озыларине эш-достны шай арттыргъан.

Той-джыйында чынълашмакъ пек керектир,  
Чынъның къайнакъ чокърагъы тек юректир.

## **МАНЕЛЕР**

Мане, мане, манелер,  
Бахт кетире баарълер.  
Озен бою ешерген  
Къадифе тюс нанелер.

Багъчаларда топ нане,  
Топладым дане-дане.  
Ах, нанениң къокъусын,  
Пек северим, догърусы.

Биз ойнайыкъ, кулейик,  
Ёлда догъру юрейик.  
Осаллыкълар керекмей,  
Тек яхшылыкъ билейик.

Мектеп олсун багъчамыз,  
Китап олсун акъчамыз.  
Биз мектептен чыкъканда,  
Бильги толсун богъчамыз.


---

<sup>1</sup> бельсендөнгөнлөр — азырлангъанлар

Тептим, сандыкъ ачылды,  
Десте гуллер сачылды.  
Окъуйыкъ, яшлар, окъуйыкъ,  
Бизлерге ёл ачылды.

Чатырдагъының чешмеси,  
Салкъын сувун ичмеси.  
Окъумакъ-язмакъ пек гузель,  
Вай, асретлик чекмеси.

Эв алдында экинлик,  
Экинликте бар кийик.  
Окъу, эвлядым, окъу,  
Окъувдадыр зенгинлик.





**нане** — къокъулы осюмлик  
**аят** — мында: омюр, яшайыш  
**сагъынув** — асретлик



- Шакъалы халкъ йырларыны огренип йырланъыз. Сиз даа насыл халкъ йырларыны билесинъиз?
- Эксерий чынъ, манелерде не акъкъында айтыла? Не ичюн чынъ ве манелер енгиль окъула ве тез акъылда къалалар?
- Чынъ ве манелерде расткельген ифадели сёзлерни сечип алынъыз ве дефтеринъизге язынъыз.



Буюклерден сорап чынъ ве манелерни топланъыз. Озь коюнъиз ве мектебинъиз акъкъында чынъ ве манелер уйдурмагъя арекет этип бакъынъыз. Чынъ ве мане ярышыны кечиринъыз.

### Шиир ве несир акъкъында

Шиирий эсерде сатырлар белли бир тертиpte тизилелер. Сатырдаки эджалар сайысы тенъ олмасы шарт. Меселя, манелер дёртлюклер олып, чынълар исе экиликлер олып тизильгенлер. Мане сатырлары еди эджадан, чынъ сатырлары исе он бир эджадан ибараттири:

Мане, мане, манелер, (7 эджа)  
 Бахт кетире баарьлер. (7 эджа)  
 Озен бою ешерген (7 эджа)  
 Къадифе тюс нанелер. (7 эджа)

Бугунь бизде джыйын, той — буюрынъыз, (11 эджа)  
 Эвимизнинъ тёрю бош — отурынъыз. (11 эджа)

Несир эсерде джумлелер сербест, лакъырды тилинде олгъаны киби тизилелер: «Эрте баарьде нанелер ешере. Олар инсангъа бахт кетирелер. Нанелер озен боюнда къадифе киби тёшельгенлер ...»



## КЪЫРЫМТАТАР ХАЛКЪ МАСАЛЛАРЫ

### Халкъ масаллары акъкъында

Масаллар халкъ агъыз яратыджылыгъының кенъ даркъалгъан муим бир тюрюдир. Къырымтатар масаллары къадимий девирлерде мейдангъа кельген ве асырлар бою къырымтатар халкъының тарихыны, омюрини къаплад алгъан эсерлердир.

Масалларны эр кес балалықтан биле. Масал — бу зевкълы, муджизели икяе. Масалларны эм икяе этмек, эм окъумакъ мумкун. Масалның муим хусусиетлери бар:

- масал аджайип, муджизели икяедир. Омюрде олмагъан вакъиалар, арекетлер, шейлер, чокъ уйдурмалар масалларда тасвирлене;
- масалларда иштирак эткен айванлар инсанлар киби лаф эте, арекетлер япалар;
- осюмликлер, неснелер де озылерини инсанлар киби туталар, лаф эте ве арекетлерде булуналар;
- масалларда адий адамлар девни, аждарханы, джадыларны еңөлөр;
- масалларда акъикъат, эйилик, догърулыкъ яманлыкъыны даима енъе, инсанларгъа виджданлыкъ, садыкълыкъ, джесюрлик, темиз гоньюллик киби чизгилер ашлана;
- масалларда, эксерий алларда, бир сой сатырлар, ибарелер, джумлелер текрарлана: *Бир заманда бар экен, бир заманда ёкъ экен...*; *Заман, заман экенде...*; *Кунълерден бир кунъ...* ве дигерлери. Масалның сонъунда исе бойле сёзлер олмасы мумкун: *Асретине къавуша...*; *Мурадына ирише...*; *Къыркъ кунъ, къыркъ гедже той ола, яшнен къыз бири-бирине къавушалар* ве дигер ибарелер.

Акъыллы кирпи, айнеджи тильки, къоркъакъ тавшан, ахмакъ къашкъыр, мераметли къырмыскъа къырымтатар масалларында энъ сыкъ расткельген айванлардыр.

Ярамазлыкъ, хиянетлик киби къара кучълерни чешит девлер, джадылар, йыланлар, аждархалар ифаде этелер.

Масалларның къараманлары чешит тылсымлар ярдымынен менфий шахсларны, ярамазларны, хиянет адамларны, къара кучълерни — аждарха, джадыларны еңөлөр ве озы ниетлерине етелер.

# АКЬЫЛЛЫ КИРПИНЕН АЙНЕДЖИ ТИЛЬКИ

(масал)

Заманларның бириnde акъыллы кирпинен бир айнеджи тильки бар экен. Бу эки достының ашы Косе акъайның тавукълары экен. Олар геджелери Косенинъ кумесине далып, тавукъларыны хырсызлай экенлер.

Кирпинен тилькиниң хырсызлыгъы сонъ-сонъунда Косенинъ джаныны якъа<sup>1</sup>, ве о, хырсызларны дубарагъа оғъратмакъ<sup>2</sup> къара-рына келе. Кумесниң оғюне терен бир чукъур къаза да, устюни тобанинек орьтеген.

Къаранлыкъ геджелерден бириnde кирпинен тильки, тавукъ эти ашайджакъларына тамшанып, силекийлерини акъыза-акъыза, кумеске якъынлашалар. Этрафта кимсе олмагъанына эмин олыш, кумесниң къапусына келелер. Келелер амма, къапуны ачайым дегенде, эки дост чукъургъа юварланып кетелер.

Достлар, башларыны асып, чокъ вакъытлар тюшюнип отуралар. Ахыр-сонъу кирпи айта:

— Эй, меним джандан севимли достум тильки, — деп башлай.  
— Косенинъ кескин пычагъы богъазымызгъа сапланаятыр. Бир чарелер корымек керек. Ана, дейим де, сен мени агъызыны алып, чукъурдан төпеге котерип атсанъ, сонъ мен де бир йипчик таптып сени чекип алсам, яхшы олмазмы экен?

Тильки акъыллы достуның теклифине разы ола ве тикенли достуны, агъызыны яра этсе де, төпеге котерип ата. Кирпи сербестликке чыкъкъянынен:

— Сагъ ол, достум, савлыкъиң къал! — деп, чыкъыш кете.

Тильки, неге оғырагъаныны бильмей, чукъур ичинде шашып къала.

Саба да якъынлаша башлай. Ана, тезден Косе акъай пейда олур ве тилькиниң богъазына кескин пычагъыны чекип, сонъ терисини сыйдырып алыр.

Энди не япмалы?

Белли я, тильки айнеджиликни бир вакъыт базардан сатын алмай, оның ичи-багъры айнеджиликнен толу.

— Токъта, шу Косени бир алдатайым амма, омюр-билля мени

<sup>1</sup> джаныны якъа — мында: даянып оламай

<sup>2</sup> дубарагъа оғыратмакъ — мында: тутмакъ

унутмасын, — дей де, агъызыны кемшетип<sup>1</sup>, беденини солукъдырып, ольген бир айван киби, чалкъа тюшип<sup>1</sup> ята.

Чокъ кечмеден, танъ ата ве кумес оғюнде Коце акъай пейда ола. Бакъса, не корысөн, чукъурның ичинде олю бир тильки ята. Коце къуванып:

— А-а, къапкъангъа тюштинъми, айнеджи, гебердинъми, хынзыр, чокъ тавугъымның башына еттинъ, энди баре акъкынъдан келейимчи<sup>2</sup>, — дей. — Теринъ де пек яхшы экен, чокътан чекмениме якъялыш къыдыра эдим.

Коце, бу сёзлерни айтып, тилькини чукъурдан тартып чыкъара да, бир кенаргъа котерип ата.

Тильки исе, чукъурдан чыкъканы киби, козълерини джылпыл-дата берип:

— Сагъ ол, Коце акъай, амма терими бир даа тюшкенде алышынъ, — деп, зувып къача.

Бу белядан соң тильки чокъ қуньлер дагълар ичинде доланып юре. Куньлерден бир кунь, эльдиректен, кирпиге расткеле. Ачувланып:

— Сенинъ достлугъынъ бойлеми? — деп дарыла.

Кирпи, джаны агъыргъандан олып:

— Алла-алла, достум, худжур бир айван экенсинъ де, меним санъа не ярдымым тие билир эди? — дей.

Тильки даа зияде ачувланып:

— Сендайын достум олгъандже, ич де олмагъаны даа яхшы! — деп кирпини ташлап кете.

Кирпи онынъ артындан бакъып:

— Сен олмагъан олсанъ, мен де чукъургъа барып тюшmez эдим, — дей.

Тильки, кирпиден айрылгъан соң, чокъ вакъытлар доланып, аш къыдырып юре, лякин бир шей тапамай. Не япсын, кене де айнеджиликке башурмагъа къаарар бере. Гизленип, ёл кенарларындан юре баштай. Бир даа бакъса, не корысөн, денъиз беттен ёл бойлап, бир араба балыкъ кетирмектелер.

Тильки:

— Балыкъ эти де тавукъ этинден яман дегильдир, — дей де, арабанынъ алдына чыкъып, агъыз-бурнуны копюритип, ольген бир айван киби, ёлнынъ ортасында чалкъа ята. Арабаджы, оны корыгенинен, тюшип ала да, балыкъларның устюне ата. Айнеджи тилькиниң бек-

<sup>1</sup> чалкъа тюшип — аркъасы устюне

<sup>2</sup> акъкынъдан келейимчи — джезалайымчы

легени де бу экен. Араба кетмекте ола, о исе бирер-бирер балықъларны ёл бою чыбырта бере<sup>1</sup>. Соң арабадан сыптырылып тюше де, кейф чатып балықъларны ашамагъя башлай.

Бу арада шу ерден кечеяткъан къашкъыр тилькиге якълаша:

— Достум, манъя да бир балыкъ берчи! — деп ялвара.

Тильки бере. Къашкъыр балыкъны бегенип:

— Достум, бир балыкъ даа берчи! — дей.

Тильки:

— Бар озюнъ тут да, аша, — деп къашкъырнынъ риджасыны ред эте.

— Я балыкъны насыл туталар?

Тильки, бу къоркъунчлы достундан къуртулмакъ ниетинен, онъя балыкъ тутмакъны огрете.

— Озен ялысына бар, бузны теш де, къуйругъынъны сувгъа батыр. Балыкълар къуйругъынъа сарылырлар, ана шу вакъыт къуйругъынъны чекер де алышынъ.



Ахмакъ къашкъыр ойле де япа. Къуйругъыны сувгъа йиберген соң тильки ондан:

— Соң, насыл, бир шейлер дуюлмаймы, балыкълар сарыла башламадымы? — деп сорай.

Балыкъ ашамагъя тамшанып турған къашкъыр:

— Ёкъ, даа ич бир шей дуюмайым, — дей.

Бираздан соң тильки кене де суалини текрарлай. Къашкъыр къуванып:

— Бир шейлер чымырдай, гъалиба, балыкълар топлана башлады, — дей.

Тильки:

— Сен, къашкъыр акъай, къуйругъынъны бираз даа терендже йибер, балыкъ чокъча сарылыр, — деп огютлей.

<sup>1</sup> чыбырта бере — ташлай бере

Къашкъыр шай да япа. Япа амма:

— Уф! — деп сувукътан дирильдеп башлай. — Тильки акъай, энди яхпы чымырдан башлады, балыкъларны тартып чыкъарсам олмазмы? — деп сорай.

— Ашыкъманъыз, сабыр этинъиз, эки кере къуйрукъ батыргъанджек, балыкъларнынъ эписини бирден тартып чыкъарынъыз.

Къашкъырнынъ къуйругъы сув ичинде бузлап-къатып къалгъан соң, тильки энъкъастан этрафына бакъа да, яйгъара къопарып:

— Вай, къашкъыр акъай, копеклерини артына такъып, авджы келеятыр да, — деп багъыра. — Тез олунъыз, къачып кетейик, джанымызын къуртаратайыкъ.

Тилькини тапсань ал, зувып къача, ахмакъ къашкъыр исе не япаджагъыны бильмей, шашыпкъала. Къуйругъыны сувдан чыкъармакъ ичюн не къадар тырышса да, чаре олмай — къуйругъы бузлап къалгъан. Бу арада онынъ къулагъына копек авулдагъан киби бир сеслер эшитиле. О, джан-аляметинен<sup>1</sup>, кученип, чабдырыла<sup>2</sup>. Чабдырыла амма, къуйругъы буз ичинде узюле къала. Къуйрукъ аджысына даянамагъан къашкъыр, сёгүнмеге башлай:

— Эй сени, айнеджи тильки, манъа япаджагъынъ бу эдими? Токъта сен, мен сени къолгъа тюшюриrim, о вакъыт эсаплашырмыз, — дей ве тилькини арамагъа кете. Азмы арай, чокъмы арай, эр алда куньлерден биринде тилькини дагъ ичиндеки голь янында якъалай.

— Тутулдынъмы, хынзыр! — деп тишлерини къайрай. — Япаджагъынъ мени къуйрукъсыз къалдырмакъ эдими?

Тильки, гунасы олмагъан<sup>3</sup> бир адам киби:

— Алла-алла, къашкъыр акъай, къуйругъынъынъ не къадар балыкъ котереджегини бильмегенинъ меним къабаатыммы? Чокъ нефисхор олмагъай единъ, — дей.

Къашкъыр, кесен-кес этип:

— Сен мени аселет алдадынъ, — дей. — Мен сеннен эсаплашмакъ истейим. Мен сени ашайджагъым.

Тильки шашып къала. Эткенлерине пешман ола, лякин энди не япсын! Э, тилькини айнеджиликтен башкъа даа неси бар да, бу къоркъунч джанавардан къуртула бильсин?

— Меним этимден сен ич бир лезет алмазсынъ, эм де тоймазсынъ. Сен эйиси анавы байнынъ багъчасы ичинде отлап тургъан къойны аша. Коресинъми, къуйругъы салынып тап ерге тюшкен.

<sup>1</sup> джан-аляметинен — пек къоркъып

<sup>2</sup> чабдырыла — бар кучюнен къуйругъыны тарта

<sup>3</sup> гунасы олмагъан — къабаатсыз

Багъчада яткъан къой дегиль де, балабан бир копек экен. Лякин къашкъыр буны фаркъ этмей ве догъру копекниң устюне бара. Копек исе къашкъыргъа аман атыла ве оны бөгъып ташлай.

Бойледжесине, тильки къашкъырдан да къуртула.

Арадан яз кече, кузь кече, сувукъ къыш келип къала. Бир озю кезип юрьмектен бэзип усангъан тильки, кирпи достуны арап булмакъ ичюн, ёлгъа чыкъа. Кунь кете, гедже кете, экинджи куню уйле маалинде кирпини озен янында, терек тюбюнде коре. Селямлашалар, башларына келип кечкенлерни айтышалар. Олар лаф этип тургъан арада, агъзында бир топач ягъ олгъан бир къаргъа терек пытагъына келип къона. Къаргъа ягъны ашамагъа азырлангъанда, тилькинен кирпини корип къала да, къоркъусындан агъзындахи ягъны ерге тюшюре. Экиси де — кирпи де, тильки де ягъгъа атылалар.

Тильки:

— Ягъ менимдир! — дей.

Кирпи:

— Ёкъ, ягъ менимдир! — дей.

Эки дост давалашмагъа башлайлар. Даванынъ сонъу олмайджагъыны анълагъан кирпи:

— Бойле олмаз, достум, — дей, — меселени акълыджасына<sup>1</sup> чезмек керек. Эр ерде буюклерге урьмет олгъаны ичюн, ягъны да буюгимиз ашамакъ керек. Айт, бакъайым, сен къач яшындасынъ?

Тильки:

— Ёкъ, башта сен айт, сонъ мен айтыйрым, — дей.

Кирпи:

— Сен буючке корюнесинъ, санъа урьмет этип, биринджи айтманыны риджа этем, — дей.

Тильки озюни акъикъатен кирпиден буюк беллеп:

— Эй, достум, — дей, — мен аз заманынъ къарты дегилим. Мен ер такъыр, кок бакъыр олгъанда догъгъан эдим.

Кирпи, бу сёзлерни эшиткенинен, козълеринден инджи киби яшлар тёкип агъламагъа башлай.

Тильки апансыздан пейда олгъан бу козь яшларына шашып:

— Не олды, достум, неге агълайсынъ? — деп сорай.

Кирпи, даа зияде окюрип:

— Сен сорама да, мен айтмайым, достчыгъым, — дей. — Сен озюнънинъ догъгъан йылынъны айткъанда, меним акъылымга кучюк

<sup>1</sup> акълыджасына — догъру

огълум тюшти де, агълап ѹибердим. Меним огълум тамам шу йылы, ер такъыр, кок бакъыр олгъанда, догъгъан эди. Амма, заваллыгъыкъ, чокъ яшамады, ольди де кетти. Алла рамет эйлесин, демектен башкъа не чаре бар.

Кирпи, «Алла рамет эйлесин» дегенинен, ягъ топачыны агъзына кетире де, кейф чатып, ашамагъа башлай.



**башына еттинъ** — мында: ашадынъ

**эльдиректен** — апансыздан

**нефисхор** — бир шейге тоймагъан

**инджи** — къыйметли беяз боюнджакъ



1. Акъыллы кирпи ве айнеджи тильки насыл дубарагъа огърайлар?

2. Кирпи чукъурдан насыл чыкъты? Не ичюн кирпи тилькини чукъурда къалдыра?

3. Тильки насыл айнеджиликлер уйдура? Къашкъырнынъ насыл табиат чизгилери ачыла? Къашкъырнынъ ольмесине ким къабаатлы?

4. Тильки, дагъда кирпинен корюшкенде, онъя насыл сёзлерни айта? Кирпи насыл джевап берे? Диалогны роллерге болюнип окъунъыз.



*Дубарагъа огъратмакъ, чарелер корымек, ред эте, энъкъастан, заваллы, риджа этем сёзлер ве ибарелерине синонимлер тапынъыз ве дефтеринъизге язынъыз.*



Насыл этип акъыллы кирпи айнеджи тилькини алдата? Не ичюн биз кирпиге акъыллы, тилькиге айнеджи деймиз? Фикринъизни, масалдан мисаллер кетирип, исбатланъыз. Сиз акъыллы кирпи ве айнеджи тилькини арекетлеринен разысынъызмы? Оларнынъ субетине насыл къыймет кесесиз? Бу масалнынъ башкъа масалларгъа ошагъан ерини ве фаркъыны къайд этинъиз. Башкъа халкъларнынъ масалларында къашкъыр ве тильки насыл тасвиrlenелер? Хатырланъыз. Масалгъа озь мунасебетинъизни беян этинъиз.

## АЛТЫН БАШНЕН ХЫЯР БАШ

(масал)

Бир заманда бар экен, бир заманда ёкъ экен, бир адамның къарысы ве бир де къызы бар экен. Бу къыз ай десенъ айдан, кунь десенъ куньден дюльбер экен. Мал дегенде, тек бир бузавчыкълары бар экен.

Кель кунь, кет кунь, бу къызычыкъ баягъы яшларына келе. Къыз энди балабан олгъанда, анасы агъыр хасталана.

Къызның анасы акъайыны чагъыра да, васиетини айта:

— Мен ольген сонъ къызычыгъымны хорлатма, бузавчыгъымызыны онъа бер! — дей.

Чокъкъа бармадан къызычыкъының анасы оле. Бабасы, къарысының васиетини тутып, бузавны къызына бере. Лякин къыз, анасына пек янып, гедже-кунъдюз агълап чыкъа.

Къызның бабасы:

— Эв къадынсыз олмаз, — деп тюшюне. — Къызым анасыны сагынып агъласа керек, эвленсем, бельки эфкяры чезилир<sup>1</sup>.

Шай дей де, къызы олгъан бир къадынгъа эвлене. Бу къадын пек ярамаз экен. О, эвге кельгенинен къызның урбаларыны чекип ала, озъ къызына кийсете. Огей къызның шай дюльбер олгъаныны пахыллап<sup>2</sup>, оны эр кунь хорлай, ач тута, бутюн агъыр ишлерни онъа буюра. Къызычыкъ кунъдюзлери бузавны отлата, юнь ишлей, акъшамлары да бош отурмай.

Бойледжесине эки йыл кечип кете. Куньлерден бир кунь къызычыкъ саба эрте турып, бузавны отламагъа алыш кете. Кете-кете бир озенчикнинъ янына барып токътай. Къызычыкъ озъ анасыны хатырлай да, инджи киби яшлар тёкип, агъламагъа башлай. Бираздан юрги ятышып<sup>3</sup>, юқълап къала. Бузав исе отлай-отлай озенниң о бир тарафына кече. Къызычыкъ, козълерини ачкъанынен, бузавның узакълаша башлагъаныны корип, оны къайтармакъ истей. Лякин озенден кечеяткъанда, урчугъы сувгъа тюше. Огей анасындан көрджең джезасыны тюшюнип, даа зияде агъламагъа башлай.

Бу озенниң янында бир къартанайчыкъ яшай экен. Къартанай, къызычыкъының агълагъаныны эшиктенинен, оның янына келе де:

— Не агълайсынъ, къызым, санъа не олды? — деп сорай.

<sup>1</sup> эфкяры чезилир — гонълю тынчланып, яныгъыны унутыр

<sup>2</sup> пахыллап — куньлеп

<sup>3</sup> юрги ятышып — юрги тынчланып



— Не агъламайым, — дей къызычыкъ, — мен эр кунь бузав отлатып, урчукънен юнь ишлейим. Мына бузавымны къайтарайым деп, озенден кечеджекте, урчугъым сувгъа тюшти. Акъшам эвге къайткъанда, огей анам ким биле насыл дарылыр.

Къартанай къызычыкъны пек аджый.

— Агълама, къызым, — дей, — мен сени бахытлы этерим. Сен отур да, меним башымны бакъ. Мен сенинъ тизлеринъде бираз юкълайым. Озенде сары сув акъкъанда, уятырсынъ.

Къартанай, башыны къызычыкънынъ тизлерине къойгъанынен, юкъугъа дала.

Къартанай уянгъан сонъ, къызычыкънынъ башыны сары сувнен юва.

— Сакът ол, къызым, башынъны чезме, къайда ювдынъ деселер, айтма, — деп тенбилий.

Къызычыкъ, кунь къона башлагъан бир маальде, эвлериине къайтып келе. Огей анасы, къызынынъ къолунда урчукъ олмагъаныны корип, ондан сорап биле отурмай, къызычыкъка дарылмагъа башлай.

Геджелерниң бириnde, эв ичинде эписи юкъугъа далгъан бир вакъытта, огей ана уяна да, корыгенлерине шашып къала. Къаранлықъ эвниң кошеси яп-ярыкъ экен. Аман атылып тура да, огей къызының янына бара. Бакъса не корысун, къызының сачлары алтын теллерге чевирильген.

— Тез айт, сачларың неден бойле олды? — деп джекире о.

Заваллы къызычыкъ, не япаджагъыны бильмегенинден, айтмагъа меджбур ола:

— Озен янында бир къартанайчыкъ яшай. Ана о меним башымны сары сувнен ювып, явлукънен багълады. Сачларымның йылтырагъаны да шуның ичюн олмалы.

Бу сёзлерни эшиткен огей ана саба ачылмасыны дёрт козынен беклей<sup>1</sup>.

Саба ачылгъанынен, озь къызыны уяnta да, ишни онъа анълата.

Огей ананың къызы бузавны айдап, озен янына алыш бара ве аласы дегени киби япа: озенден атлайджакъ олып, урчугъыны сувгъа ташлай да, соң аселет агъламагъа башлай. Агълав сесини эшитип къартанай келе.

— Не агълайсынъ, къызым, санъа не олды? — деп сорай

— Не агъламайым, — дей къыз, — мен эр кунь бузав отлатам ве урчукънен юнь ишлейим. Мына шимди бузавымны къайтарайым деп, озенден кечеяткъанда урчугъымны сувгъа тюшюрдим. Акъшам эвге къайтып кельсем, огей анам ким биле насыл котеклер.

Къартанай къызының айнеджилигини анълап:

— Сен отур да, меним башымны бакъ, — дей. — Мен сенинъ тизлеринъде бир чырым алайым<sup>2</sup>. Озенде ешиль сув акъып башлагъанда, мени уянтыйсынъ. Къыз къартананың башыны бакъмагъа башлай. Озенде ешиль сув акъып башлагъанда, уяnta. Къартана тура да, къызының башыны ешиль сувнен юва. Къыз къувана-къувана эвлериine къайтып келе.

Геджениң бир маалинде аласы уянып, къызының башыны чезе. Чезе амма, бакъса не корысун, къызының сачлары ешиль оркенлерге чевирильген, бу оркенлерде де хыярлар осе экенлер.

Иште, бу куньден соң шу къызының ады «хыяр баш къыз» ола. Онъа кимсе айланып бакъмай. Амма алтын баш къыз кунь сайын дюльберлеше.

<sup>1</sup> дёрт козынен беклей — сабырсызлыкънен беклей

<sup>2</sup> бир чырым алайым — азчыкъ юкълап алайым

Куньлерден бир кунь хыяр башнынъ анасы озъ къызынен тойгъа кетмеге азырланалар. Алтын баш къызы:

— Мени де алъынъыз, — дей.

— Тойда сенинъ ишинъ ёкъ, эвни бакъ, юнь ишле, — дей огей анасы.

Алтын баш къызычыкъ, эвде ялынъыз бир озю къалып, козъ яшларыны тёкип агълап тургъанда, озен янында яшагъан къартанай келе.

— Не ичюн агълайсынъ, къызычыгъым? — сени кене кимдир ынджааттымы?

— Огей анам мени эвде къалдырып, озюнинъ хыяр баш къызыны тойгъа алыш кетти, шунынъ ичюн агълайым.

— Сен, къызычыгъым, агълама, шимди бир чаре тапарыкъ. Къана, бир ань ичинде къыз ичюн бир къат урба ве эки атлы араба азыр олсун! — деп эмир эте.

Ойле дегенинен, къызынынъ устюне алтын нагъышлы къафтан, башында алтын тизили къадифе фес, къолларында билезликлер, пармакъларында юзюклер, къулакъларында купелер ве оғонде эки атлы араба пейда ола. Къыз къартанайнен, арабагъа отурып, тойгъа кетелер. Араба, хыяр башнен анасы кетеяткъан гъыджырдавукъ маджарынъ артындан ете, тоз чангъытып оны кечип кете.

Той азбарына киргенде, оларны къаршылап алалар, алтын баш къызычыкъын келин янына отурталар.



**джеза** — къыйнав

**урчукъ** — юнъден ийп ишлемек ичюн агъач алет

**эмир этмек** — буюрмакъ

**vasiet** — олюмден эвель айтылгъан истек, ниет



1. Не ичюн озен боюнда яшагъан къартанай оксюз къызынынъ башыны сары сувнен ювып, онынъ сачларыны алтынгъа чевире? Огей ананынъ къызына исе ачувлана ве онынъ сачларыны ешиль сувгъа ювып хыярларгъа чевире?

2. Къартанай оксюз къызгъа даа насыл ярдымлар эте?

3. Масалнынъ эсас фикри насыл? Не ичюн къартанай оксюз къызычыкъын бахытлы эте, огей ананынъ къызыны исе джезалай?

4. Бу масалда насыл тылсымлы арекетлер олып кече?

5. Бу масалнынъ мундериджесине якъын олгъан даа насыл халкъларнынъ масалларыны билесиз? Хатырланызыз.

## **Умумий суаллер ве вазифелер:**

1. Насыл эсерге масал дейлер? Масалларның насыл хусусиетлери дикъкъатынъызын джельп эте?
2. Насыл айванлар масалларда чокъча расткеле? Кырымтатар масалларында, сизниң фикринъиздже, тасвирленген айванларның къайсылары севимлиdir?
3. Айванлар акъкъында масаллардан гъайры даа насыл масаллар бар?
4. Масалларның насыл бир хусусиетлерини сиз зияде бегенесинъиз?



Масалларда тасвирленген айванларның ресимлерини япынъыз. Сыныфынъызыда ресимлер сергисини тешкиль этинъиз.



Не ичюн къадимий девирде халкъ чокъ масаллар уйдура эди? Масалларда халкъ насыл дүйгүуларны, фикирлерни ifаде эте? Насыл тюшюнесинъиз, не ичюн масалларның чокъусында айванлар тасвирлене? Сиз масал къараманларындан кимлерни севесинъиз? Не ичюн? Масаллар сизге насыл тесир эте? Козюнъиз оғонде насыл левхалар джанлана? Не ичюн балалар масалларны севелер, авесликтен окъуйлар ве динълейлер?

## **Иfadeli okъumagъa огренемиз**

### **Манаджа ургъу акъкъында**

Джумледе къулланылган сёзлер манасына коре тень дегиллер. Эсерде я да оның бир къысмында эсас фикирни бильдирген сёзлер ола. Бойле сёзлерни окъуйыджы сесини котерип ве къуветленидирип окъумакъ керек. **Муим сёзлернинъ сесни котерип ве къуветленидирип къайд олунувына манаджа ургъу** дейлер.

Манаджа ургъу эсернинъ мундериджеси ве эсас фикринен багълыдыр. Эсерни ifadeli okъumakъ ичюн, оның мундериджесини терен анъламакъ, муим сёзлерни бельгилемек ве манаджа ургъуларны дөгъру къоймакъ керек.



# ДЮНЬЯ ХАЛКЪЛАРЫНЫНЪ МАСАЛЛАРЫ



## КЪАШКЪЫР, ЧЫКЪЧЫКЪБАЛАБАН ВЕ КИЙИК КЪУРТЛАР

(франсыз халкъ масалы)

Куньлерден бир кунь къашкъыр орман ичинден кечип кетеяткъанда чыкъчыкъбалабаннынъ устюне баса. О заманларда айванлар адамлар киби даа къонуша эдилер. Чыкъчыкъбалабан да къашкъыргъа шай дей:

— Недай ярамазсынъ, къашкъыр! Мен киби кучьсоз айванны нечюн басып кечесинъ? Не шай къопаясынъ? Эгер истесем, сенден де тез чапарым, артымдан еталмазсынъ. Кель, инанмасанъ, къавиль этейик<sup>1</sup>: сен де, къашкъыр достларынъ да пешимден чапып асла етип оламазсынъыз.

— Эй, гъарип, акъылдан тайдынъмы<sup>2</sup>, биз артынъдан етип оламамыз дейсинъми?

— Шай, ярын танъ аткъанда мында достларынънен берабер кель, озен ялысына ким биринджи барып чыкъаджагъыны корермиз.

— Яхшы, гъарип, ярын корюширмиз.

Къашкъыр ёлуны девам эте. Амма чокъкъа бармай энди кийик къурт юvasына да баса. Кийик къуртлар ювадан чыкъып:

— Ярамазлыкъ этме, къашкъыр, ювамызын таптама, — дейлер. — Бизлер уфакъ олсакъ да сенден къоркъмаймыз. Биз истесек сени де, къашкъыр достларынъны да сувгъа батырып йиберирмиз. Эгер инанмасанъ, кель, къавиль этейик.

— Ха-ха, къурт-къырмыскъа бизни сувгъа батыраджакъ эмиш, олмайджакъ шей, — деп къашкъыр оларнынъ устюнден куле.

— Айса ярын танъ аткъанда сен де, достларынъ да мында келинъиз, сизни озенде насыл батыраджагъымызын корерсинъиз.

— Яхшы, келирмиз.

Къашкъыр озь достларына хаберни аман еткизе. Чыкъчыкъбалабан исе кийик къуртларнынъ янына бара:

— Достлар, аранызыдан эр кеске хабер этинъиз, мен де бутюн чыкъчыкъбалабанларны ярынгъа чагыраджам. Сиз танъ аткъанда озен ялысында осыкен таллар ичинде сакъланынъыз. Къашкъырлар о ерге чапып кельгенде, сиз оларны бир къалдырмай тишлиенъиз.

<sup>1</sup> къавиль этмек — *русча*: заключить пари

<sup>2</sup> акъылдан тайдынъмы... — акъылынъны гъайып эттинъми...; дели олдынъмы...



— Яхшы, чыкъчыкъбалабан, шай да япармыз.

Кийик къуртлар башкъаларны чагъырмакъ ичюп учып кеткен сонъ, чыкъчыкъбалабан озы достларыны чагъыра. Олар озен ялысына къадар бутюн ёлда, адым сайын ерлеше.

Эртеси куню танъ аткъанда къашкъырлар анълашылгъан ерде<sup>1</sup> топланалар.

— Сен мындасынъмы, чыкъчыкъбалабан? — деп сорайлар.

— Мындар, къашкъырлар. Башлайыкъ.

Къашкъырлар чевре-четке бакъмайып озенге таба тез-тез чапалар ве токътамайып чагъыралар:

— Къайдасынъ, чыкъчыкъбалабан?

Ёл бою сакълангъан чыкъчыкъбалабанлар исе:

— Мындар, къашкъырлар, — деп арды-сыра джевап берелер.

Къашкъырлар озен ялысына барып чыкъкан сонъ, тал япракълары артындан пейда олгъан бинълернен кийик къуртлар оларны вызылдай-вызылдай тишлеп башлай.

Заваллы къашкъырлар шашып-шашмалап, ашыкъя-ашыкъя сувгъа

<sup>1</sup> анълашылгъан ерде... — эвельден бельгилентген ерде...

кирелер. Къашкъырлар бус-бутюн сув ичинде сакъланалар, тек бурунларының уджу тышта къала.

— Бурунларыны, бурунларыны тишленъиз! — вызылдай кийик къуртлар ве къашкъырларның бурунларына инелерини батыра берелер.

Бойле этип къашкъырларның эписи сувда бөгүула. Чыкъчыкъбалабан ве кийик къуртлар исе гъалебе къазаныш, кене ормангъя къайталар.

*Рус тилиндөн терджиме эткен С. Сулейман*



1. Бу франсыз халкъ масалында башкъа халкъларның масаларында сийрек расткельген насыл айванлар иширак этелер? Сиз оларның арекетлерине насыл къыймет кесесиз?

2. Къашкъырлар бу масалда насыл тасвирленелер?

3. Къашкъыр башкъа халкъларның масалларында насыл айван оларакъ косытериле? Бильген масалларының къияс этип, озы фикирлеринъизни беян этинъ.

## ДЕНЬИЗДЖИ СИНДБАД АКЪКЪЫНДА МАСАЛ

*Экенджи сеяат  
(къыскъарттылгъан)*

Тезден Синдбад бир ерде отурмакътан безип, кене дюнья кезмеге, узакъ диярларгъа сеферлер япмагъя истей. Яхшы ниет — яры девлет, дегенleri киби, Синдбад кене керекли маллардан сатын алып, Басрагъа бара да, анда энъ буюк ве энъ къавий бир гемининъ саибинен анълаша. Деньизджилер Синдбадның малларыны гемиге тамам эки кунь ташып ерлештирелер. Учюнджи кунюне исе геми капитаны, нияет, ленгерни котере ве геми ачыкъ деньизге чыкъа, елькенлерине ель толдурып сеферни башлай...

Синдбад о сеферинде пек чокъ адаларгъа аякъ баса, ад-эсапсыз шеэрлер, мемлекетлерни коре. Азмы-чокъмы ёл юрген сонъ онынъ гемиси белли олмагъан, амма гъает дюльбер бир аданынъ саилине келип янаша. Адада буллюр сувлы ирмакълар акъа, ири мейвалы буюк тереклер осе экен.

Синдбад ве онъя ёлдаш олгъан Багъдатлы туджджарлар ерде кезинмек ичюн ялыгъа тюшелер ве сеир-сейране авеслигинде ада бойлап даркъалалар. Синдбад кезе-кезе бираз ёрулгъан сонъ талдалы бир ер тапып, гурь осъкен алма тереги астына отура. Бир-

эки къапынмакъ ичюн торбасындан къызартылгъан тавукъ парчасы ве бир къач пите алыш ашай, сонъра ешиль отлар устюне узаныш ята да, шу ань козю юкъугъа кете.

О юкъудан уянып тургъанда, кунеш артыкъ уфукъта чабакъланмакъта э肯. Синдбад аман аякъ устюне къалкып, гемиге таба ашыкъа, амма ялыгъа барыш чыкъкъан соң бакъса не корьсин: геми энди кеткен. Энъ элемлиси — геми капитаны да, денъизджилер де, башкъа туджджарлар да Синдбадны унутып къалдыргъанлар.

Бойледже, заваллы Синдбад адада бир озю къала. О озюниң аджыныкълы алына тап агълап йибере, озю-озюни аджып:

— Ильк сеферимде де бойле дубарагъа оғърагъан эдим. Лякин о сефер джанымны къурттаргъан, мени озъ юртума алыш кетеджек адамларны расткетирген эдим. Шимди исе бу адада менден гъайры кимсе ёкътыр. Мени энди кимсе тапып оламаз... — дие окюне.

Синдбад акъшам къаранлыгъына къадар ялыда турып, деньизге бакъа, оны унутып къалдыргъан аркъадашлары къайтып келеджеклерине умют эте, амма геми къайтып кельмей... Орталыкъка къаранлыкъ тюшкен соң Синдбад ерге ята да, къатты юкъугъа дала.

Саба кунеш догъмасынен Синдбад да уянып, аданың ичерисине ёл ала: о озюне ашайт, ичмеге сув тапмакъ керек эди. Синдбад тосат-тосат юксек тереклерге тырмашып, чевре-этрафкъа козь эте, лякин дагълар ве деньизден гъайры ич бир шей корьмей.

Вазиет кет-кете кедерли ве атта къоркъунчлы олып башлай. Десене, о къалгъан омюрини бу кимсесиз адада яшап битирежек? Ёкъ, Синдбад озюни къолгъа алыш, ярамай тюшонджелерни къувмагъа тырыша:

— Языкъсынып отурмакътан не файда! Къол къавуштырып отурсам, кимсе келип мени къурттармаз. Мен озюм озюмни къурттармакъ кереким! Яхшысы, орманның ичерисине кирип бакъайым... Не бермеген Алла, бельки, бир де-бир адамны расткетиририм...

Арадан бир къач кунь кече. Бир кере Синдбад кене юксек бир терекке тырмашып чыкъа да, узакъта балабан беяз бир къуббени (купол) коре. О къуббе кунеш нурларындан пек парылдай э肯. Синдбад юректен къувана ве: «Бу, бесе-белли, шу ерниң падишасы яшагъан сарай олса керек. Къана, бакъайыкъ, бельки о манъа Багъададгъа къайтмагъа ярдым этер», — деп тюшюне.

О, теректен чалтлыкъынен тюшип, беяз къуббе олгъан тарафкъа кете. Амма якъынджа кельген соң коре ки, о асылында беяз куррени коре. Эм о курре ойле буюк э肯 ки, атта тёпеси корюнмей э肯. Синдбад куррени тёгерек этрафындан айланып чыкъа, лякин



курренинъ не бир къапысыны, не бир пенджересини коре. Соңра курренинъ устюне тырмашып чыкъмагъя истей, амма онынъ устю пек тюз ве тайгъакъ олгъаны ичюн бунынъ чаресини тапамай<sup>1</sup>.

— Бу да насыл қурре экен? — деп шаша Синдбад.

Апансыздан чевре-чет къараныкълаша. Синдбад кокке козъ ташлай ве тамам тёпесинде буюктен буюк бир къуш учкъаныны коре. Къуш о къадар буюк экен ки, онынъ къанатлары, дерсинъ, булут киби, кунеш нурларыны къапата. Синдбад башта пек къоркъя, лякин капитаныны Рухх деген бир къуш озъ явруларына филлерни кетирип ашаткъаны акъкъында иклясини хатырлап, бираз тынчлана. Иште, бу беяз қурре де Рухх къушынынъ йымыртасы олгъаныны энди анълай. Синдбад аман шу ерде пысып ята. Рухх къушки исе авада бираз авелеген соң, тамам йымыртасы устюне къона да, оны къанатларынен орьтип, юкъугъя кете. Къуш Синдбадны абайламай. Синдбад исе йымырта янында къыбырдамай ята да:

— Мен бу ерлерден къуртулып къачмакъынъ ёлуны таптым, гъалиба. Энди энъ муими — къуш уянмасын да, мени абайламасын! — деп тюшюне.

Синдбад бираз даа беклеп, къушынынъ артыкъ къатты юкълагъа-

<sup>1</sup> чаресини тапамай — чыкъып оламай

ныны коре ве башындаки сарыгъыны чезип, онынънен озюни Руххнынъ аягъына багълай. Къуш ич бир шей сезмей, чонки Синдбад онынъ янында санки бир къарынджа киби эди. Синдбад исе къушнынъ аягъында онъайтлыджа ерлешип, озъ-озюне шойле дей:

— Ярын, къысмет олса, къуш кене учып кетер де, бельки мени адамлар яшагъан бир ерге еткизир. Барыш да, ерге йыкъылып парчалансам биле, кимсесиз адада олюм беклемектен яхшыдыр.

Сабанынъ саары вакътында<sup>1</sup> Рухх къуши уянып, шатыр-тудюр иле къанатларыны къакъа ве узун юксек сеснен бир кере къычырып алгъан сонъ кокке уча. Синдбад къоркъыанындан козълерини юма да, къушнынъ аягъына къаттыджа сарыла. Къуш булутларгъа къадар котерилип, узакъ-узакъларгъа уча, деръя-денъизлер, къаралар устюнден кече, Синдбад исе эп онынъ аягъына багълы олгъаны алда, ашагъы бакъмагъа биле къоркъа. Ниает, Рухх энип башлай ве козълеген ерине къонып, къанатларыны топлай. Синдбад да сакъынып, къоркъа-пыса сарыгъыны чезе.

Амма къуш Синдбадны шай да абайламай. Факъат о панджасынен ерде яткъан узун ве къалын бир шейни къапкъачлап ала да, кене авагъа уча. Синдбад онынъ артындан бакъып къала ве Рухх панджасында энъ буюк теректен де узунджа ве къалынджа олгъан бир йыланны туткъаныны коре.

Синдбад бираз ял алгъан сонъ чевре этрафыны козъден кечире. Рухх къуши оны терен ве кенъ бир дереге кетирген. Дере ойле терен экен ки, онынъ эки янындаки дагъларнынъ уджлары, дерсинъ, булутларгъа барып тиреле эди.

— Бир белядан къуртулып, даа бетерине огърадым, — дей Синдбад агъырдан кокюс кечирип. — Кимсесиз адада ич олмадым мейва-емиш, татлы сув бар эди. Мында исе не бир ютум сув, не бир терек бар...

Синдбад энди не япаджагъыны бильмей, эфкярлы бир алда дерени кезе. Шу арада дагълар артындан кунеш котерилип, бутюн дерени ярыкълата да,dere парылдап башлай. Онынъ эр бир ташчыгъы парыл-парыл йылтырай, мавы, ал, сары, ешиль ренклеринен ойнай. Синдбад бир ташны элине ала. Бакъса, бу адий дегиль де, гъает къыйметли эльмаз тапы экен. Иште, бу дере эльмаз ташлар дереси олып, онынъ ташы-топрагъы эльмаздан ибарат экен.

Шу ань Синдбаднынъ огюне тап этип балабан бир эт парчасы тюше. Синдбад башыны котерип бакъа, амма кок ве къаялардан

<sup>1</sup> сабанынъ саары вакъты — сабанынъ пек эрте вакъты; танъ агъарып башлагъанда

гъайры ич бир шей корьмей. Тезден ерге даа бир парча, сонъра исе учонджи эт парчасы тюше. Тек шундан сонъ Синдбад не ерге келип тюшкенини ве бу дере насыл дере олгъаныны анълай.

Синдбад бундан эппейи вакъыт эвельси Багъдадда эльмазлар вадийси акъкъында икяесини эшиткен эди. Иште, шимди шу икяени хатырлап, пек къувана, чонки джаныны насыл этип къуртартмакъ мумкцион олгъаныны энди биле. О къойнуна сыгъгъаны къадар эльмаз къойып, башындаки сарыгъыны чезе де, энъ балабан эт парчасыны алып, оны шу сарыкъынен озъ беденине багълай. Арадан бир дакъкъа кечмей, дереге буюк бир дагъ къарталы къона ве панджасыны этке батырып, онынънен авагъа котериле. Юксек дагъынынъ тёпесине учып барып, анда этни чокъучлап башлагъанда бирден насылдыр гудюрди къопа. Бу гудюрдиден къоркъынан къуш эт парчасыны ташлап учып кете, Синдбад исе сарыгъыны чезип аякъ устюне турга. Гудюрди эп якъынлаша ве тезден тереклер артындан семиз кевдели, сакъаллы, туджджар киби кийинген къарт бир адам чапып чыкъа. О, Синдбадгъа атта бакъмай, аман эт парчасына атылып, оны эр янындан айландырып бакъа, амма бир данечик биле эльмаз тапамагъян сонъ ерге отурып, башыны тута да, ах-вах иле:

— Бу насыл огъурсызылыхъ, я! Мен энди бутюн бир бугъанынъ этини дереге ташладым, лякин къарталлар эписи эт парчаларыны юваларына алып кеттилер. Тек бир парчасыны къалдырдылар. Пахыл киби, онъа да бир данечик биле эльмаз япышмагъан. Ах, меним заваллы башым! — деп агъламсырай.

Шу ерде о ялынайакъ, кирли, къаннен былашкъан, йыртыкъ урбалы Синдбадны абайлай. Туджджар аи-зарларыны кесип, къоркъудан къатып къала. Сонъра озюне бираз келип, элине таягъыны ала ве Синдбаддан сорай:

— Сен кимсинъ, бу ерге насыл келип тюштинъ?  
— Сен менден къоркъма, эй, урьметли туджджар. Меним санъа заарым тиймез, — деп джеваплана Синдбад. — Бир заманларда мен де, сен киби, туджджар эдим. Амма башымдан пек чокъ белялар кечирдим, пек чокъ беляларгъа огърадым. Эгер манъа озъ юртума къайтмагъа ярдым этсөнъ, ич бир вакъыт корьмединъ къадар эльмаз беририм.

— Керчектен де эльмазларынъ бармы? — инанмай онъа туджджар. — Косътер, бакъайым.

Синдбад онъа эльмазларыны косътере ве энъ яхшы сойларыны туджджаргъа бере. Туджджар да пек къуванып, Синдбадгъа чокътан-чокъ тешеккюрлер айта, сонъра эльмаз арагъан дигер туджджарларны чагъырып кетире. Синдбад башына келип кечкенлерни оларгъа да икяе эте.

Туджджарлар онъа козьайдын айтып, яхшы-яхшы кийимлер кийдирелер ве озылеринен берабер алалар. Олар пек узакъ ёл юрелер, там-такъыр чөль ве къумлыкълардан, ем-ешиль вадийлерден, тюземлик ве дагълардан кечелер. Синдбад да озъ юртуна етип баргъандже нидже-нидже муджизelerни, шашыладжакъ вакъиаларны коре.

Не исе узакъ сефер сонъуна етип, Синдбад, ниает Багъадагъя кирип бара. Тувгъанлары оны севинч иле къарышылап, буюк-буюк козьайдын софralары донаталар. Чюнки, олар Синдбад ольгендиr, деп беллейлер ве артыкъ оны корип оладжакъларына умoot этмейлер. Шукюрлер олсун, янълышкъанлар. Синдбад исе къалгъан эльмазларыны сатып, кene алыш-веришнен мешгъуль ола.

Денъизджи Синдбаднынъ экинджи сефери, иште, бойле екционлене.

*Рус тилинден терджиме эткен Э. Бекиров*



**тиоз** — тегиз

**курре** — шар

**сефер** — мында: сеят

**ленгер** — русча: якорь

**туджджар** — алыш-вериши

**ял алмакъ** — раатланмакъ



1. Масалны дикъкъатнен окъунъыз, меракълы къысымларыны къайд этинъиз.

2. Бир озю къалгъан Синдбад нелерни тюшюне? Онынъ акъылына насыл фикирлер келе?

3. Балабандан балабан къуш йымыртасыны корыген сонъ, Синдбад нелерни хатырлай? Насыл къуртулув ёлunu тюшюнип тата? Онынъ фикирлери догъру чыкъамы?

4. Сиз Синдбаднынъ арекетлерине насыл къыймет кесесиз?

5. Сиз насыл сеятчылар акъкъында масаллар, икяелер окъуынъыз?

### **Умумий сүаллер ве вазифелер:**

1. Сиз дюнья халкъларынынъ насыл масалларыны билесиз?

2. Хатырланъыз, къайсы масаллар сизге терен тесир этти?

3. Дюнья халкъларынынъ ве къырымтатар халкъ масалларыны къяяс этинъиз? Оларнынъ арасында насыл якъынлыкъ, умумийлик ве насыл фаркъ олгъаныны къайд этинъиз.

4. Четэль халкъ масаллары эсасында чыкъарылган насыл фильмлер сейир эттинъиз? Олар сизде насыл теэссуратлар къалдырдылар? Бегенген кинофильмлер ве оларнынъ къараманлары акъкъында икяе этинъиз.



## ХАЛКЪЫМЫЗНЫНЬ УРФ-АДЕТЛЕРИ ВЕ БАЙРАМЛАРЫ



### ДЖЫЙЫН

Кырымтатар халкъынынъ чокъ меракълы ве зевкълы урф-адетлери бар. Олардан бири джыйындыр. Джыйынлар къыш вакъты, койлюлерниң азбарында, чайырларда ве багъ-багъчаларда, къызгъын ишлери биткен сонъ, кечириле тургъян. Яшлар ве къызлар бир де-бир достларынынъ эвинде къонушмакъ ве эгленмек ичюн невбетнен топлаша эдилер.

Балалар, сиз миллий тертипте донатылгъан оданы коръдинъизми? Мына, шимди ойле оданы козь оғюне кетиринъиз: кенъ ве рушен ода, къаршы дивар бойлап, бир кошеден дигер кошеге къадар сет къурулгъан. Сет устюнде сыранен дюльбер орнекли дивар ястыкълары тизильген. Оларнынъ устюне исе беяз орyme пешкир чекильген. Кошеде чешит ренкли йиплернен нагъышлангъан юзъбез асылгъан. Пенджереде бурьмели перде саркъып тура. Сыджакъ соба янында исе миндер тёшельген. Бойле бир одада джыйын кечириле...

Джыйынгъа кельген яшлар, къызлар сетлерге ерлешип отуралар. Оларнынъ артында, къарылгъач чипчелери киби, балалар тизиле, миндер устюнде исе эсли-башлылар отура. Сетлерде ер етмеген яшлар къапу тарафта скемлелерге ве курьсюлерге отуралар. Эр кес озынине ерлешкен сонъ джыйын башлай.

Топлашкъанлар къошулып, халкъ йырларыны йырлайлар. Яшлар шакъалаشا, лятифелер айтып кулюшелер.

Джыйында чешит зевкълы оюнлар ойнап эгленмек те адет олгъан. Яшларнынъ севимли оюнларындан: «Юзюк», «Телефон», «Къушакъ» оюнлары пек шенъ кече эди.

Истидатлы яшлар ве къызлар озылери уйдургъан чынъ, мане, шакъаларны койдешлерине такъдим эте эдилер. Джыйынларда булунмакъ, хусусан балалар ичюн, зевкълы ве файдалы эди. Олар халкъ агъыз яратыджылыгъынен джанлы сюретте таныш ола эдилер.

Бойлеликнен, къыйметли медений асабалыгъымыз несильден несильге авушып сакълана ве зенгинлеше эди.

## НАВРЕЗ БАЙРАМЫ

Наврез — шаркъ халкъларында Яныы йыл байрамы. **Наврез** сёзю эки сёзден ibaret: *нав* — *янъы*, *рез* — *кунъ*. Наврез байрамы кунъ ве гедже тень олгъан март айынынъ 21-инджи кунюне келе. Наврезде янъы йыл башлай ве баарь келе. Койлерде топракъ ишлери башлай. Кырымтатарларда Наврез байрамыны къадимий девирлерде шерифлен башлагъанлар.

Байрам арфесинде къадынлар эвлерини, азбарларыны джыйыштыра, яраптыралар, чешит къавалтылар, кобете, бурмалар пиширелер.

Байрам куню къартлар ве если-башлы адамлар сабадан намазгъя баралар, янъы йыл хайырлы ве берекетли олсун деп дуалар окъуйлар. Сонъра эвлерде байрам софралары донатыла.

Балалар топлашып эв эвден юрелер, Наврез йырыны йырлап, эв саиплерини хайырлайлар. Олар балаларны татлы емеклернен сыйлайлар.

## НАВРЕЗ

(йыр)

Кельди баарь нур сачып,  
Наврез къокъуй мор ачып,  
Ешерди чёллэр, дагълар,  
Эзан наврезим мубарек.

Наврез кельди корюньиз,  
Наврез акъкъын бериньиз,  
Дженнет олсун ериньиз,  
Эзан наврезим мубарек.

Кельди баарь, турунъыз,  
Бу наврезге бакъынъыз,  
Котерильсин башынъыз,  
Эзан наврезим мубарек.

Чыкъты чёльге батыр Алим,  
Зильфи къара дюльдюли,  
Ол Танърынынъ арсланы,  
Эзан наврезим мубарек.



**мор** — мавылы-къырмызы ренк  
**дюльдюль** — тылсымлы къанатлы ат

## НАВРЕЗ

*Наврез кельди, корюңиз,  
Наврез акъкъын беринъиз...  
(Халкъ йырындан)*

Бувлангъан топракъкъа санчылса сабан,  
Чёллерге къойларын джайдырса чобан,  
Севинем корип мен Наврез кельгенин,  
Аятны селямлап кунеш кульгенин.

Наврез о — тарлагъа биринджи адым,  
Юректен сездире хош эмек дадын.  
Наврез о — ильк баарь байрамы бизде,  
Энъ джошкъун дуйгъулар баштай Наврезде.

Шу куню дюньягъа сукъланып кезем,  
Эр ерде ильк баарь къокъусын сезем.  
Наврез о — кетире юрткъа ярашыкъ,  
Мен онъя яшлыкътан олгъаным ашыкъ.

*Риза Фазыл*



**юрт** — ватан  
**ашыкъ** — севда

## ХЫДЫРЛЕЗ БАЙРАМЫ

Хыдырлез байрамынынъ ады Хыдыр ве Ильяс эвлияларнынъ адларындан келип чыкъа. Хыдыр ве Ильяс талмай-токътамай бутюн дюньяны айлянып, инсанларгъа ярдым этелер, афатлардан, баҳытсызлықълардан къорчалайлар. Хыдыр онъ тарафтан келе, Ильяс исе сол тарафтан келе. Олар корюшкен ерде Хыдырлез байрамы кечириле.

Къырымда, та эски девирлерден башлап, Хыдырлез байрамы майыс айынынъ 6-нджы куню къайд этиле.

Байрам арфесинде эр бир эвде акъшамдан къалакъай, комеч, кобетелер пишириле. Эртеси куню сабадан балалар къалакъай, комечлерни алып, буюклернен берабер тепеликке чыкъалар. Хыдырлез шерифине дуалар окъулгъан сонъ, къалакъайларны, комечлерни байырдан ашагъы тыгъырталар. Эгер комеч, къалакъай усть тарафынен тюшсе, демек йыл огъурлы ве берекетли оладжакъ. Бундан сонъ балалар ве буюклер аланлыкъ ерде отурып кетирген емеклерини ашайлар. Сонъра Хыдырлез байрамынынъ шенъленнов къысмы башлана. Балалар ойналар, йырлайлар, курешелер, салынджакъларда салланалар, чешит бала оюнларыны ойнап зевкъланалар.

Хыдырлез байрамында азбарда ве бош ерлерде мейва тереклерини отуртмакъ ве чечек сачмакъ эвельден адет олгъан. Не къадар эйи ве гузель адет! Биз бу адетни күтсек, Къырымда бир адым бош ер къалмаз. Бутюн Къырым багъ-багъчагъа дёнер, даа да дюльбер ве ярашыкълы олур. Келинъиз, деделеримизден къалгъан адетни девам этейик.



1. Сиз къорантаньызда, мектеп ве сыныфыныңда халкъ байрамларыны насыл къайд этесинъиз?
2. Байрамлар не вакъыт ве насыл пейда олгъан?
3. Насыл диний байрамларны билесинъиз?
4. Къорантаньызда бу байрамлар насыл къайд этиле?
5. Дерсликте тасвиrlenген байрамлардан гъайры даа насыл халкъ байрамларыны билесинъиз?
6. Олар насыл къайд этиле?
7. Дервиза насыл адисеге багъышлана ве насыл отъкериле?
8. Байрамлар инсангъа насыл тесир эте ве не бере?



## ЭДЕБИЙ МАСАЛЛАР



### ЭДЕБИЙ МАСАЛЛАР АКЪКЪЫНДА

Биз балалықтан халкъ масалларыны авесликнен динълеймиз ве окъуймыз. Халкъ масалларында тылсымлы адиселер ве неснелер тасвирлене, айванлар исе инсан киби сёйлене ве арекет этелер. Балаларны зевкъландырмакъ, эглендирмек ичюн халкъ асырлар девамында чокътан-чокъ масаллар яраткъан. Бу сой масалларгъа халкъ масаллары дейлер, чонки оларны халкъ яраткъан. Халкъ масалларынынъ муэллифи<sup>1</sup> белли дегильдир.

Пек чокъ языджылар балалар ичюн масаллар яздылар, шимди де язалар ве эр вакъыт язаджакълар, чонки масалны балалар севелер, масал оларны зевкъландыра ве тербиелей.

А.С. Пушкин, Г.Х. Андерсен, Ш. Перро, Дж. Родари ве дигерлери бутюн дюнья балаларынынъ севимли языджыларыдыр. Оларнынъ балалар ичюн язған масаллары бутюн дюньягъа даркъалдылар. Чешит мемлекетлерде яшагъан балалар бу танылгъан языджыларнынъ терен маналы, меракълы ве зевкълы масалларыны окъуйлар ве яхши билелер.


Кырымтатар языджылары да балалар ичюн чокъ масаллар яздылар. Олардан З. Джавтобели, Э. Дерменджи, Э. Селямет, Э. Ибраим, Б. Мамбет ве дигерлери балаларгъа багъышлап чокъ меракълы ве зевкълы масаллар уйдурып яздылар. Языджылар масал язмакъны халкътан оренелер. Масал язмакъ ичюн халкъ ағызы яратыджылыгъыны яхши бильмек керек. Языджылар язған масалларгъа эдебий масал дейлер.

**Халкъ масалларынынъ муэллифи белли дегильдир. Оларны халкъ асырлар девамында яраткъан. Эдебий масалларны языджылар уйдурып язалар. Бу сой масалларынынъ муэллифи беллидир.**

<sup>1</sup> муэллиф — эсерни язған языджы



## КЪЫРЫМТАТАР ЯЗЫДЖЫЛАРЫНЫНЬ ЭДЕБИЙ МАСАЛЛАРЫ



ЭЮП ДЕРМЕНДЖИ

(1907 – 1945)

Эюп Дерменджи 1907 сенеси Ялта этрафында ерлешкен Кикинеиз көюнде дөгъды. Онынъ балалыгъы ве яшлыгъы дюльбер ялы боюнда кечти. Аджайип табиат манзаралары Эюпни эеджанландыра, онынъ тасавурына терен тесир эте эдилер, зевкъландыра, къуванч ве рух бере эдилер.

Кой мектебини битирген сонъ Эюп Дерменджи Ялтадаки оджалар оқъув юртунда окъуды. Онынъ биринджи шиирлери 1930-ындјы сенеси басылды. Эюп Дерменджи бала эсерлерини яратувда юксек усталыкъ косътерди. О, балалар ичюн чокъ шиирлер ве масаллар язды. Олардан энъ белли сойлары халкъ агъыз яратылдылыгъы эсасында язылгъан «Къартбабай ве онынъ Арслан копеги», «Айнеджи тилькининъ олюми» ве дигер эсерлердир.

«Айнеджи тилькининъ олюми» масалы да халкъ масалларынынъ шеклинде язылгъандыр. Айнеджи тильки такътакъкъушны, тавшанны ве хоразны алдатып парчалай. Лякин масалнынъ сонъу халкъ масалларындан фаркълаша. Халкъ масалларында айнеджи тильки эксерий алда гъалип чыкъа. Эюп Дерменджининъ масалында исе айванлар бирлешип, тилькини джезалайлар. Языдже муим бир фикирни исбат эте — ярамазлыкъка, хиянетликке, зулумгъа къаршы бирлешип курешмек керек.



**эксерий** — чокъусы

**гъалип чыкъа** — енъе

# АЙНЕДЖИ ТИЛЬКИНИНЬ ОЛЮМИ

(масал)

Бир кунь къурназ<sup>1</sup> тилькичик  
Ве тишенли кирпичик,  
Сёйлешелер юзюмге,  
Хырсызлыкъя кетмеге.

Кете, кете, кетелер,  
Этрафкъя козь этелер,  
Бир давуш «шырт» эткенде,  
Кирпи сорай: — Я о не?

— Не оладжакъ, — дей тильки,  
— Я бир къуштыр, я чиркий,  
Айды динълеп бакъайыкъ,  
Авджы олса, къачайыкъ.

Динълей, динълей, динълейлер:  
— Мында авджы ёкъ дейлер.  
Шу арада бир пытакъ  
Эте: такъ-такъ, такъ-такъ, такъ.

Олар къоркъя, къоркъя да,  
Сонъ сорайлар: — Ким анда?  
Такътакъкъуш дей: — Меним, мен,  
Къурт сайлайым теректен.

Бу арада энъкъастан<sup>2</sup>  
Тильки дей: — Вай, мен хастам.  
Къулагъымда бир къурт бар,  
Джаным къушчыкъ, кель чыкъар.

— Вай-вай, вай-вай, вай-вай, вай! —  
Тилькичик шай деп агълай.  
Къушчыкъ онъя инана,  
Айткъанына пек къана.

<sup>1</sup> къурназ — айнеджи

<sup>2</sup> энъкъастан — яландан

— Агълама, сен тилькичик,  
Мен барырым шимдичик,  
Къулагъынъдан бир къуртчыкъ,  
Чыкъарырым, — дей къушчыкъ.

Тилькиге якъын келе,  
Тильки тынмай эп инълей,  
Сонъ бирден-бир атыла,  
Тюше онынъ янына.

Къушчыкъ къачып еталмай,  
Бир адымчыкъ кеталмай.  
Къанатыны ачкъанджа,  
Тильки ура бир панджа.

Ве ырылдап-ырылдап,  
Къап-къап этип гъырылдап  
Парча-парча парчалай,  
Гъарипчикни къасапдай.

Бунынъ ичюн пек къыза<sup>1</sup>,  
Кирпичик озъ доступна:  
Тильки онъя: — Къызма, эй!  
Бир даа ич япмам, — дей.

Ве тюшелер тар ёлгъа,  
Ёл да десенъ, бир йылгъа<sup>2</sup>.

Кете, кете, кетелер,  
Этрафкъа козъ этелер,  
Сонъ бакъсалар бир джапта  
Недир бир шей чапмакъта.

Олар къоркъа, къоркъа да,  
Сонъ сорайлар: — Ким анда?  
Чал тавшан дей: — Меним, мен,  
Авджы къува пешимден.

<sup>1</sup> пек къыза — пек ачувлана

<sup>2</sup> йылгъа — дере



— Авджымы? — деп къоркъкъандай,  
Тильки бирден абдырай.  
Сонъра башлай къачмагъа,  
Кенъ-кенъ адым атмагъа.

Шайтип эппейи<sup>1</sup> кеткен сонъ,  
Къыр, дерелер кечкен сонъ,  
Тильки дей: — Эй, чал тавшан!  
Токътачы, дост, текаран.

Санъа дейджек шейим бар,  
Мында меним эвим бар.  
Юрь, мусафир олурсынъ,  
Бираз нефес алышынъ.

Санъа миндер ярым,  
Сыйлы софра къоярым.  
Меним сендей достум чокъ,  
Достны мендай севген ёкъ.

— Ойлеми? — дей тавшанчыкъ,  
— Мумкцион, тильки тувгъанчыкъ.  
Косътер, къайда сарайынъ?  
Беш-он дакъкъа къалайым.

— Мына меним сарайым,  
Мына меним араным, —  
Деп тилькичик косътере,  
Тавшанчыкъ оп секире.

Олар кире къапудан,  
Бир-бирининъ артындан.  
Алдатып чал тавшанны  
Тильки япа къапуны.

Сонъ тавшангъа атыла,  
Панджасыны батыра.  
Ве шай этип парчалай,  
Тавшанны да къушчыкъдай.

---

<sup>1</sup> эппейи — баягъы вакъыт, чокъ вакъыт

Бундан сонъ ашыкъмадан,  
Къайта кельген ёлундан.  
Ве кирпиге опкелей:  
— Не кельмединъ сыйгъя, — дей.

Бунынъ ичюн пек кызыза  
Кирпичик озъ доступна.  
Тильки онъя: — Къызма, эй!  
Бир даа ич япмам, — дей.

Ве тутушып къол-къолгъя,  
Тюшелер бир кенъ ёлгъя.

Кете, кете, кетелер,  
Этрафкъа козъ этелер.  
Недир, койден авлакъта  
Бакъсалар ер къазмакъта.

Олар къоркъа, къоркъа да,  
Сонъ сорайлар: — Ким анда?  
Хоразчыкъ дей: — Меним, мен,  
Ем къыдырам чёплюктен.

— Ем, — дей тильки, — менде чокъ,  
Ашамагъя киши ёкъ.  
Юрь, хоразчыкъ, барайыкъ,  
Бир къапынып къалайыкъ.

Санъа софра къоярым,  
Эм салынджақъ къуарым,  
Менде ашап ятарсынъ,  
Ку-ку-ри-ку айтарсынъ.

— Ойлеми? — дей хоразчыкъ,  
— Мумкюн, тильки тувгъанчыкъ.  
Косътер ёлны, барайым,  
Сенде къонакъ<sup>1</sup> олайым.

---

<sup>1</sup> къонакъ — мусафир

— Мына эвим, мына ёл,  
Кель де менде раат ол, —  
Деп тильки ёл корьсете,  
Хоразчиыкъ пыт-пыт кете.

Эппейи шай кеткен сонъ,  
Дагъ четине еткен сонъ  
Тильки дей: — Эй, чал хораз!  
Санъа сёзюм бар бираз.

Динъле, доступм, айтайым:  
Дюльберсинъ сен айдайын.  
Сени бильген тилькилер,  
Сеси даа хош дейлер.

Керчекми, чал хоразчиыкъ?  
Айт бакъайым бир йырчыкъ.  
Мен йыр, чынъны пек севем,  
Лякин агъыр эшитем.

— Ойлеми? — дей хоразчиыкъ,  
— Токъта, тильки тувгъанчиыкъ.  
Санъа якъын барайым,  
Бир йыр айтып бакъайым.

Дей де, келе тилькиге,  
Тильки дала тюркюге,  
Сонъ бирден-бир атыла,  
Тюше онынъ янына.

Ку-ку-ри-ку айткъанджа,  
Тильки ура бир панджа,  
Ве оны да парчалай,  
Тавшанчиыкъ эм къушчиыкъдай.

Бунынъ ичюн пек къыза.  
Кирпичик озъ доступна.  
Тильки онъа: — Къызма, эй!  
Бир даа ич япмам, — дей.

Сонъ айланып онъ къолгъа,  
Тюшелер бир чет ёлгъа.

Кете, кете, кетелер,  
Бир багълыкъкъа етелер.  
Бакъсалар не, багъджы ёкъ,<sup>1</sup>  
Юзюм десенъ, къумдан чокъ.

Кирпичик дей тилькиге:  
— Багъгъа сен кир илькиде,  
Мен тышында беклейим,  
Бирев кельсе, сёйлейим.  
  
— Пек яхшы, — дей тилькичик,  
— Мен кирейим шимдичик.  
Эгер тойып, пек быкъсам,  
Сен кирерсинъ, мен чыкъсам.

О дей де, кире багъгъа,  
Кирпи къайта гурь дагъгъа.  
Такътакъкъушкъа багъыра,  
Бир де тавшан чагъыра.

Кой янындан кечкенде,  
Арыкътан сув ичкенде,  
Бир хоразны алалар,  
Сонъ чалашкъа баралар.

Кирпичик дей: — Эй, достлар!  
Бу дагъда бир тильки бар,  
О чокъ юрьди, чокъ юрьди,  
Чокъ къуш, тавшан ольдюрди.

Биз оны джезалайыкъ,  
Къаравулгъа чакъайыкъ.  
— Яхшы, — дей къуш, тавшанчыкъ,  
— Мен разым, — дей хоразчыкъ.

---

<sup>1</sup> Къумдан чокъ — пек чокъ



Къушчыкъ къона чалашкъа,  
Хораз чыкъа бир ташкъа,  
Тавшан, кирпи чет къала,  
Олар бирден багъыра:

— Къаравул, чыкъ чалаштан,  
Къаравул чыкъ чалаштан!  
Багъда юзюмлер пишти,  
Онъа да хырсыз тиши!

Къаравул тез-тез чыкъа,  
Тюфекке къуршун тыкъа,  
Ве ачувиен: дань! ата,  
Тилькичик олип ята.

Тавшан къайта дагълыкъа,  
Къушчыкъ къона пытакъа,  
Хораз кете азбаргъа,  
Кирпи кире ювагъа.

- 
1. Айнеджи тильки такътакъкъушны, тавшанны ве хоразны насыл алдата?
  2. Кирпи не ичюн тилькиге ачувлана?
  3. Кирпи тилькиден ахтыман алмакъ ичюн, оны насыл алдата?  
Айванлар айнеджи тилькини насыл джезалайлар?
  4. Масалны роллерге болюнип окъунъыз.



*Айнеджи, этрафкъа, козъ этmek, абдырамакъ, къонакъ, хош сёэлтерге синонимлер тапып, джумлелер тизинъиз.*



«Айнеджи тилькиниң олюми» масалында иштирак эткен айванларның ресимлерини яптыңыз.



Сиз айнеджи тильки ве акъыллы кирпи акъкъында даа насыл масаллар билесиз? Оларның арасында насыл фаркъ бар? «Айнеджи тилькиниң олюми» масалының халкъ масалларындан насыл фаркъы бар? Сиз насыл тюшюнесинъиз, айванлар дөгъру иш яптылармы? Сиз языджының фикринен разысынтызмы? Разы олсантыз, не ичюн разы олгъанынызын анълатынызыз.



## ЗИЯДИН ДЖАВТОБЕЛИ

(1905 – 1991)

Зиядин Джавтобели 1905 сенеси Кырымнынъ Керчъ тарафындаки Джавтобе коюнде дөгъды. Кой мектебини битирген сонъ, Акъмесджиттеки тербие техникумында окъуды. Сонъра, Кырым педагогика институтынынъ кырымтатар тили ве эдебияты болугинде окъуды ве 1932 сенеси институтны битирди.

Зиядин Джавтобелининъ биринджи шиирлери 1923 сенеси «Енъи дюнъя» ве «Яш къувет» газеталарында басылды. О девирнинъ ишчи, койлю ве окъузыджы яшлары Зиядин Джавтобелининъ саде, халкъ тилинде язылгъан шиирлерини бегене эдилер.

Зиядин Джавтобели халкъ агъыз яратыджылыгъыны топлагъан, оренген ве темелли бильген языджылардандыр. О, озюнинъ эсерлеринде зенгин халкъ яратыджылыгъындан кениш файдалана эди. О, чокъ масаллар, эфсанелер, дестанлар, шиирлер язды.

Балалар ичюн язгъан эсерлеринде шаир яш несильге меракълы шекильде озюнинъ насиатларыны бере, омюрде инсан адалетли, мераметли, садыкъ олмасы керек. «Балыкъчи ве копек» шииринде шаир адалетлик ве мераметлик не къадар кучлю ве къыйметли олгъаныны косьтере.



**насиат** — тенби

**адалетлик** — дөгърулыкъ

**мераметлик** — ярдым этюв, ярдым къолуны узатув

## БАЛЫКЪЧЫ ВЕ КОПЕК

(масал)

Бар экен бир заманда къарт балыкъчы,  
Энъ севгени — эскирген къайычыгъы.  
Озю киби къарт экен апакъайы,  
Тишлиер тюшкен, бурюшкен бет, манълайы.  
Мавы денъиз ялысында олгъян эви,  
Басыкъ эвде яшагъян эп экеви.  
Мал дегенде, ашагъян шорба, отымек...  
Адеп эткен денъизге чыкъып кетмек.  
Къарт алышкъан, денъизге чыкъа эр кунь,  
Балыкъ авлап отькере бутюн кунюн.  
Дост яшайлар, кечиниши тар<sup>1</sup> олса да,  
Язда сыйджакъ, къыш къатты<sup>2</sup>, къар олса да.  
Копек эвни къаравлай — бош къалса эв,  
Босагъдан бастырмай яттан бирев.  
Шай да кече афталар, йыллар оте,  
Къартларнынъ омюри сонъуна ете.  
— Биз къартайдыкъ, копек де фарыды<sup>3</sup> пек,  
Файдасы аз, бир тамакъ эксик керек! —  
Дей къадыны укюмнен балыкъчыгъа, —  
Ат денъизге, алып бар къайыгъынъда!..  
Къарт ойланы: «Керчектен, арткъач тамакъ,  
Бес-бедава беслевден не оладжакъ?!»  
Деп кестире балыкъчы, олып разы,  
Бельки шай деп, манълайгъа язылгъян язы<sup>4</sup>.  
— Ярын саба минсетип къайыгъыма,  
Ташларым та денъизнинь узагъына!..  
Чеке курек, ёнеле эп къайыгъы,  
Кете денъиз тёрюне о баягъы.  
Сонъгулыкъка токъталып итке къарай,  
Гонълю тёзмей, аджына, башын сыйпай.  
— Не япмалы, яшайыш агъыр бизге, —  
Деп копекни усуулнен итей сувгъа,  
— Шукюр, къолай чезильди энди бу да<sup>5</sup>! —

<sup>1</sup> кечиниши тар — яшайышы агъыр

<sup>2</sup> къыш къатты — къыш сувукъ

<sup>3</sup> копек фарыды — копек къартайды

<sup>4</sup> манълайгъа язылгъян язы — такъдир, баш язысы

<sup>5</sup> къолай чезильди энди бу да — къолай олды бу иш

Деп къайыкъны чевире ялы тараф,  
Озю бир шей сёйлене арткъа къарап.  
Окелене тынч деньиз, къопа далгъа.  
Къайыкъ чёпдай саврула, далгъа сильке,  
Кя ичине шувулдан сув тёкюле.  
Деньиз турмай къутура, далгъа арта,  
Къартның эски къайыгъын тюпке тарта.  
Шу арада баш тёбен<sup>1</sup> тюше къайыкъ,  
Къарт да тая деньизге, къуртартгъан ёкъ...  
Шу арада джелькесин тута бир шей,  
Якъасындан чеккелей, ич индемей.  
Оны турмай итеклей бу кучь алдгъа,  
Огърамагъан балыкъчы бойле алгъа.  
Такъат биткен, заваллы умут джойгъан,  
Акъылына тек олюм хавфын къойгъан.  
Къарт далгъадан-далгъагъа сюйреклене,  
Сезе арттан чеккелей бир кучь кене.  
Азмы-чокъмы, баягъы вакъыт оте,  
Бинъ азаплы зорлукънен ялыгъа ете.  
Аят нуру киргенде назарына,  
Юварлана ялының кенарына.  
Козюн ачса, не корьсюн — янашада,  
Мугъайсырап, ёрулгъан ити ята.  
Бу юкъумы, бу тюшми, деп балыкъчы,  
Шашып къала, къальби де къайнап аджджы.  
О къучакълай копекни, сийпай охшап,  
Козъяшлары тыгъыра, дерди бошап.  
Къайта эвге, кетири копегини.  
Учъке боле шу куньлюк отьмегини.  
— Сен инсанлар достусынъ, азиз копек,  
Буюк, кучюк сени дост корымек керек! —  
Деп узата огюне локъмасыны,  
Ит де ёргъун узата панджасыны...  
Къадын-къоджа далалар бинъ пешмангъа,  
Яхшы досткъа яманлыкъ япкъанына.



**ят** — чет адам

**тёзмек** — даянмакъ, чыдамакъ

**индемей** — сес чыкъармай

**пешман** — япкъан яманлыгъына языкъсынув

<sup>1</sup> баш тёбен — авдарыла



1. Балыкъчи къарт озын къартийинен насыл яшай эдилер?
2. Не ичюн балыкъчи къарт копегини гыйяшып этмеге къаарар эте?
3. Балыкъчи къарт копегини денъизге атаджакъта, онынъ гонълюни насыл дүйгүулар сарып ала?
4. Балыкъчи къарт копегинен эвге къайткъан сонъ, олар насыл яшайлар?
5. Денъиз къартнынъ япкъан акъсыз ишине ачувланыш, оны сувгъа богъаджакъ ола. Къартны олюмден ким къуртара?
6. Сиз копекнинь арекетине насыл къыймет кесесиз? Акъикъий достлукъны сиз насыл анълайсыз?



Денъизде фуртуна левхасыны башта сёзлернен тасвир этинъиз, сонъра ресим сзынъыз.



Сиз насыл халкъ масалларыны зияде бегенесинъиз? Не ичюн? Халкъ масалларыны ким яраткъан? Эдебий масаллар ве халкъ масаллары арасында насыл фаркъ бар? Насыл эдебий масалларны билесинъиз? Къырымтатар языджыларынынъ насыл масалларыны окъудынъыз? Башкъа халкъларынынъ языджылары тарафындан язылгъан насыл масалларынен танышсыз? Бегенген эдебий масалынъызынъ мундериджесини сыныфта икяе этинъиз.

## *Ифадели окъумагъа оғренемиз*

### **Интонация акъкъында**

Интонация инсан сесининъ джанлы ифаделигидир. Окъуйыджы эсерде тасвирленген дүйгүу, фикирлерни озюнинъ дүйгүу, фикирлери киби акс этмели. Интонация вастасынен окъуйыджы эсернинъ мундериджесине озюнинъ мунасебетини бильдире.

Бир сёзни биле чешит интонациянен окъумакъ мумкун: къуванч, языкъсынув, ачув, нефret, къасевет, разылыкъ, инкяр ве иляхре. Интонация ифадели окъувынъ эсас вастасыдыр.

Эсер динълейиджилерге терен тесир этсин десек, окъуйыджы эсерде тасвирленген адиселерни джанлы суретте тасавур этип, озю де эеджанланмакъ керек.

Окъуйыджы эсерден алгъан теэссуратлары ве дүйгүуларыны сесининъ ифаделиги иле динълейиджиге еткизмели.



## ЧЕТЭЛЬ ЯЗЫДЖЫЛАРЫНЫНЬ ЭДЕБИЙ МАСАЛЛАРЫ



ХАНС КРИСТИАН АНДЕРСЕН

(1805 – 1875)

Бүтүн дүньяда танылгъян, мешур масалдьы Ханс Кристиан Андерсен балалар ичюн чокътан-чокъ икяелер, масаллар яратты. Онынъ терен манаалы, мундериджели, мераметлик, адалетлик дуйгъуларынен ашлангъян эсерлери чешит мемлекетлерге даркъалды.

Истидатлы языджы 1805 сенеси учь деньиз ялысында ерлешкен Уфакъ Дания девлетинде фукъаре къорантада дүньягъа кельди. Бу адтайип диярда чокъ белли алимлер, языджылар осип-етишти. Олардан бири Ханс Кристиан Андерсен. 14 яшыны толдургъян осымюр окъумакъ, чалышмакъ макъсадынен Даниянынъ меркези намлы Копенгаген шеэрине келе. Кристиан балалыктан шаир, актёр олмакъны арз эте эди. Чокъ йыллар чалыша, окъуй ве икяелер язып башлай. 1835 сенеси онынъ биринджи масаллар джыйынтыгъы нешир этиле.

Языджы озюне якъын олгъян масал жанрыны сайлап ала. Онынъ энъ меракълы ве белли эсерлери масал жанрында язылгъян. Олар эм балалар ичюн, эм буюклар ичюн меракълы ве файдалыдыр. Андерсеннинъ масалларында севимли ватанынынъ адтайип кошелери, шеэрлери, озъ юртуны севген ве къайгъыргъян адамлары тасвирлене.

Ханс Кристиан Андерсен чокъ мемлекетлерде булуна, белли языджыларнен корюше ве къонуша. Сеятларда корыген — эшиткенлери онъя масал язмагъя ярдым эте. О, бүтүн омюрини масал язуына багъышлай. Онынъ масаллары дүнья халкъларынынъ тиллерине терджиме этильди ве балаларнынъ энъ севимли эсерлери олдылар. Не ичюн Андерсеннинъ масаллары чокъ дүнья халкъларынынъ тиллерине терджиме этильген? Не ичюн олар

балалар ве буюклернинъ севимли эсерлери олды? Бу суальге джеваплар языдженесиң эсерлериндерди. Эр бир окъуышты дже-вапны тапа биле, тек дикъятынен окъуп, тюшюнмек, нетидже чыкъармасы керек.

Бойле бир меракълы, терен маналы эсерлерден бири «Къар къыралычеси»сидир.

## КЪАР КЪЫРАЛИЧЕСИ

(масал)

(къыскъартылгъан)

Бу масалда оғыланчыкъ Кай ве къызчыкъ Герданынъ садыкъ достлугъы акъкъында икяе этиле. Кай ве Герда дөгъмуш дюльбер шеэрлеринде баҳтлы олып яшай, зевкълы оюнлар ойнап шенълене ве къувана эдилер. Апансыздан олгъан фелякет оларны бири-биринден айыра, баҳтсыз эте. Къар къыралычеси Кайны озюнинъ буз сарайына алып келе ве бузлата. Герда доступны къурттармакъ ичюн, пек узакъ ёлларны кече, хорлана, чекише. Ахыр соңын макъсадына ирише.



**фелякет** — баҳытсызлыкъ

## ОГЪЛАНЧЫКЪ ВЕ КЪЫЗЧЫКЪ

Пек чокъ эвлер ве адамлар олгъан буюк шеэрде кичкене бағъча-чыкъ ичюн ер тапмакъ эр кесниң къолундан кельмей. Шунынъ ичюн де пек чокъ шеэрлилер череплер<sup>1</sup> ичинде чечек асрамагъа медж-бур олалар. Шойле шеэрлерден биринде фукъаре эки бала яшай эди, оларнынъ бағъчасы чечек черепинден бираз буюкче эди. Олар бири-биринен дөгъмуш олмасалар да, бири-бирини апте-къардаш киби севе эдилер. Оларнынъ ана-бабалары бири дигерине пек якъын тургъан эвлернинъ мансардаларында яшай эдилер. Эвлернинъ дамлары аман-аман бири дигерине тийип тура десенъ де оладжакъ. Пенджерени ачып къомшуларнынъ ачыкъ пенджерелеринден ичеги кирмек мумкүн.

Къышта пенджерелер къалын буз орнеклеринен ортюльген

<sup>1</sup> череп — чечек отуртылгъан савут

сонъ оларның бу оюнлары токътап къала. Лякин балалар оджакъ устюнде бакъыр капиклерни къыздыра ве бузлагъан пенджере джамларына тийсетелер — шу ань тос-тёгеречик тешик пейда ола, тешикте исе шенъ, къурназ козъчик пейда ола. Эр бири — огъланчыкъ ве кызычыкъ — Кай ве Герда озь пенджересинден бакъа. Язда олар бир атлагъанда бири-дигерининъ эвине мусафирликке бара биле эди. Къышта исе башта чокътан-чокъ басамакъларгъа басып ерге энмек керек ве шу къадар басамакъкъа басып юкъарыгъа котерильмек керек эди. Тышта авада къар данелери авелене эдилер.

— Беяз балкъурчыкълар<sup>1</sup> учушалар! — дей къарт битайчыкъ.

— Оларның да озь кыраличеси бармы? — деп сорай огъланчыкъ; акъикъий балкъуртларның кыраличеси олгъаныны огъланчыкъ биле эди.

— Эбет, бар! — деп джевап къайтара битасы. — Къар данечиклери оны сарып алалар, лякин о, олардан буюк ве ич бир вакъыт ерде къалмай — дайма къара булут узеринде булуна. О, шеэр сокъакълары узеринде сыкъ-сыкъ уча ве пенджерелерге бакъа, шуның ичюн де пенджере джамлары чечеклерге бенъзеген орънеклернен орътиюлелер!

— Коръдик, коръдик! — деп къычырыша балалар ве бу шей акъикъят олгъаныны инана эдилер.

Бир кереси кызычыкъ:

— Къар кыраличеси мында кире билеми? — деп сорады.

— Бир кирип бакъын! — деди огъланчыкъ. — Мен оны сыйджакъ оджакъның устюне отуртырым, о, ирип кетер!

Лякин битасы оның башыны сийпады ве лакъырдыны башкъа мевзугъа чевирди.

Акъшам устю Кай эвлерине къайтып кельди ве юкъламагъа ятмакъ ичюн урбаларыны чыкъарайткъанда, скемле устюне чыкъты, пенджере джамында ириген кичкене дайречикке бакъты. Тышта, пенджере артында къар данечиклери авелене; араларында бир къар данечиги башкъаларына бакъкъанда буюкче эди. Буюк къар данеси чечек черепнинъ четине къонды ве осымеге башлады, осе-осе, устюнде миллионларнен къар данелеринден токъулгъан назик беяз дюльбентке сарылы къадынгъа чевирильди. О, ойле де бир дюльбер, ойле де бир назик эди ки, козъ къамаштырыджы беяз буздан олгъанына бакъмадан тири эди! Козълери йылдызлар киби парылдасалар да, оларда не тынчлыкъ, не де сыйджакълыкъ бар эди. О, огъланчыкъка башыны саллады ве элинен ишмар этип

<sup>1</sup> беяз балкъурчыкълар — къар данелери

янына чагырды. Огъланчыкъ къоркъты ве скемледен атлап тюшти; пенджере артында балабан къушкъа бенъзеген бир шей учып кеткен киби олды.

Эртеси куню къатты аяз тюшти, сонъра исе къарлар ири-дилер, онынъ артындан баарь де кельди. Кунеш йылтырай, чечек череплери кене гурь ешилликлерге бурюндилер, сачакълар астында къарылгъачлар озь юваларыны къуралар, пенджерелер ачылды, ве балалар дамдаки багъчада отурмакъ имкяныны булдылар.

Гуллер ача... Бакъынъ, насыл дюльберлик,

Бакъынъ, насыл дюльберлик...

Яз пек адтайип девир, этрафкъа мис-гъамбер<sup>1</sup> сачып тургъан гуллер астында отурмакъ не де гузель! Дерсинъ бу гуллер ич бир вакъыт солмайджакълар, эбедий ачып тураджакълар!

Кай ве Герда отурып, айванлар ве къушларнынъ ресимлеринен яраптырылгъан китапны саифелемекте эдилер. Балабан къулле саати саат бешни чалды.

— Ай! — деп къычырды бирден огъланчыкъ. — Юрегиме бир шей санчылды, козюме де бир шей тюшти!

Къычыкъ онынъ бойнундан тутты, огъланчыкъ козюни юмып, ача, дерсинъ онынъ ичинде бир шей ёкъ.

— Бельки де, чыкъып кеткendir! — деди о.

Лякин козюнден ич бир шей чыкъмады. Юрегине ве козюне келип санчылгъан шей анавы шайтан кузъюсининъ эки парчачыгъы эди. Заваллы Кай! Онынъ юрги энди бир парча бузгъа чевирильгендир! Козю ве юргининъ агърысы кечти, амма парчачыкълар оларнынъ ичинде къалдылар.

— Не агълайсынъ? — деп сорады о, Гердадан. — Уу-уу, шимди сен не де джиренч корюнесинъ! Меним ич бир еrim агъырмай. Фу! — деп къычырды о бирден. — Мынавы гульни къурт кемире! Анавысы исе къыйыш осе! Не де джиренч гуллер!

Ве о, аягъынен черепни итерип йиберди, эки гульни къопарды.

— Кай, сен не япасынъ? — деп къычырды къычыкъ, о исе онынъ къоркъыланыны корип, даа бир гульни къопарды ве кичкене, назик Герданынъ янындан турып кетти ве озь пенджересинде козъден гъайып олды...

...Бир къач вакъыттан соң Кай балабан къолчакъларыны кийип, чанасыны тартып кельди ве Герданынъ къулагъы тюбюне:

— Манъа башкъа огълан балаларнен буюк мейданда таймагъа изин бердилер! — деп къычырды ве къачып кетти.

Мейданда пек чокъ бала бар эди. Бираз джесюрдже сойлары озь

<sup>1</sup> мис-гъамбер — гузель къокъулар



чаналарыны койлюлерниң чаналарының артына такъя ве бойлеликнен узакъкъа тайып кете эдилер. Шенълик къайнамакътан къайнай эди. Шенълик тамам къызгъан вакъытта мейданда беяз боянен боялангъан балабан чана пейда олды. Чанада беяз курк тонуна<sup>1</sup> комюльген адам отура эди. Башында да айны шойле беяз къалпакъ. Чана мейдан этрафында эки кере айланды; Кай чабиклиken озы чанасыны онынъ чанасы артына багълады ве чанасына отурды. Балабан чана сурьатыны арттырды ве бираздан мейданны кери къалдырып, аралыкъкъа кирип кетти. Балабан чанада отургъан адам, артына айланып бақъты, Кайгъа башыны саллады, дерсинъ Кай онынъ эски танышы. Кай озы чанасыны чезеджек олып, бир къач кере ынтылды, лякин адам онъа башыны саллай ве ёлуны эп девам эттириди.

Бу юксек бойлу, тюзгюн эндамлы, козъ къамаштырыджен де-

<sup>1</sup> курк тон — айван терисинден тикильген тон

реджеде беяз тенли къадын — Къар къыралеси; онынъ тону да, къалпагъы да къардан токъулгъан эди.

— Не де гузель кезиндик! — деди о. — Амма сен пек ушюгенсинъ. Кель, кир меним тонума сарыл!

Ве, огъланчыкъыны озь чанасына отуртып, тонунен сарды; Кай дерсинъ къар куртюгине комюлип кетти.

— Аля даа ушойсинъми? — деп сорады о ве Кайнынъ манълайындан опты.

Онынъ опюши буздан да сувукъ эди, сувукътан огъланчыкъынынъ эти-тени чимирдеп кетти, барып та юргине етти, онынъ юрги бойле де энди яры-ярыгъа бузгъа чевирильген эди. Бир ань Кай олерим деп белледи, лякин акси олып чыкъты, о озюни бираз енгильдже дуйып башлады, атта ушюмеси кечип кеткен киби олды.

— Меним чанам! Меним чанамны унутма! — деди Кай чанасыны хатырлап.

Кайнынъ чанасыны деминки беяз тавукълардан бирининъ аркъасына багълады ве олар балабан чана артындан учып кеттилер. Къар къыралеси Кайны бир даа опты, ве о Герданы да, битасыны да, джеми къоранта азаларыны да унутты.

— Бир даа сени опьмейджем! — деди о. Акс алда опе-опе ольдюре де билем!

Кай козълеринен къыраличени сюзьди; къыраличе керчектен де дюльбер эди! Шу ань Къар къыралеси Кайны алып кокке котерильди ве къара къуршун тюстеки булут узерине отурып, илериге догъру кетти. Боран эски тюркюлерни йырлагъан киби улуй ве инълей; олар орманлар ве голлер, деньизлер ве къаралар узеринде учалар; оларнынъ астында сувукъ еллер уфюрелер, къашкъырлар улуйлар, къар парылдай, къычырша-къычырша къара къаргъалар учалар, оларнынъ узеринде исе балабан ай йылтырай. Узун къыш геджелери Кай айтъа бакъып отура, куньдюзлери Къар къыралесининъ аякълары уджунда юкълай эди.



1. Кай ве Герданынъ яшагъан шеэри ве эвлери акъкъында икяе этинъ.
2. Балалар арасында къар къыралеси акъкъында насыл лафлар ола эди?
3. Кайнынъ козюне къар къыралеси насыл олып корюне эди?
4. Апансыздан Кай озюнде насыл деньишювлөр дуя?
5. Шеэр мейданында насыл вакъия олып кечти? Кай шеэрден насыл гъайып олды?
6. Сиз бу вакъиаларгъа насыл бакъасыз? Насыл къыймет кесесиз?
7. Къар къыралесининъ ресимини яптыңыз. Сизге о, насыл олып корюне?

## ЛАПЛАНД КЪАРТИЙИ ВЕ ФИН КЪАДЫНЫ

Сыгъын джампик<sup>1</sup> эвчик<sup>1</sup> янына келип токътады. Эвчикниң дамы алчакъ, сачакълары ерге тийейим деп тура, къапусы да алчачыкъ, ичериге кирмек ичюн дёртаякъламакъ керек эди. Эвде лампад ярыгъында балыкъ къавураяткъан лапланд къартийинден гъайры кимсе ёкъ. Шималь сыгъыны къартийге Герданынъ башындан келип кечкен шейлерни айтып бермезден эвель, озюнинъ башындан келип кечкен шейлерни тарифлеп берди. Герда къаарардан зияде ушюгендинен себеп, лаф этмеге чареси къалмагъан эди.

— Ах, гъарипчиклер! — деди лапланд къартийи. — Сиз даа чокъ ёл юреджексинъиз! Сиз юз мильден зияде ёл басып кечкен сонъ, Финмаркагъа етип бараджакъсынъыз, анда Къар къыраличеси озюнинъ дачасында яшай ве эр акъшам мавы бенгалъ атешлерини якъа. Менде кягъыт ёкъ амма, къуругъан треска балыгъынынъ устюнде бир шейлер язарым, сиз оны о ерлерде яшагъан фин къадынына алыш барып беринъиз. О, сизге не япмакъ кереклигини менден де яхши анълатыр.

Герда бираз къызып, аш ашагъан вакъытта лапланд къартийи къурутылгъан треска балыгъы устюне бир къач сёз язды. Сонъра: буны козь бебегинъ киби асра, деп мектюпни Гердагъа туттырды. Герданы сыгъыннынъ устюне отуртты. Герда шайтип кене ёлгъа атланды.

Баягъы ёл басып кечкен сонъ сыгъын Герданы Финмаркагъа алыш кельди. Герда фин къадынынъ эвине кельди. Эвнинъ къапусы ёкъ эди, шунынъ ичюн Герда эвнинъ баджасыны<sup>2</sup> оттюорди.

Онынъ одасы пек сыйджакъ эди. Алчакъ бойлу, усть-башы киркифос фин къадыны ода ичинде ярычыплакъ юре эди. О, Герданынъ урбаларыны, къолчакълары ве чызмаларыны тез-тез чыкъарды, акс алда къызычыкъ сыйджакътан пишер эди. Сыгъыннынъ мийи къайнап кетмесин деп, онынъ башына бир парча буз къойды. Сонъра къурутылгъан треска балыгъы устюндеки языларны окъуды. О, языларны сёзме-сёз учь кере окъуп чыкъты. Языларны яхши этип ээзберлеген сонъ, треска балыгъыны къайнап тургъан къазангъа ташлады — фин къадынында ич бир шей зая олмай — илля ки, мына шу балыкъ.

Сыгъын фин къадынына башта кенди башындан кечкен мусибетлерни айтып анълатты, сонъра Герданынъ башына келип

<sup>1</sup> джампик эвчик — алчакъ эвчик

<sup>2</sup> баджа — оджакътан тютюн чыкъъкан ер

кечкен шейлерни икяе этти. Фин къадыны акъыллы козълерини къымыш-къымыш алды, лякин агъзыны ачып бир шей айтмады.

— Сен пек акъыллы къадының! — деди сыгъын. — Мен билем: шкипер тююмлернинь бирини чезсе — куччюлөө ель эсө, дигерини чезсе — ава бозулып, къутурмагъя баштай, учонджиси ве дёртюонджисини чезсе тереклерни ёңгъаларгъя чевирип ийберген боран котериле; сен бир йипнен дёрт рузгярны багътай билесинь. Мынавы къызчыкъя он эки батырның кучюни бере биледжек антер тикип бере бильмезсиньми? Бойле антерни кийсе о, Къар къыраличесини мытлакъя енъер эди!

— Он эки батырның къувети! — деди фин къадыны. — Бундан deerлик файда ёкъ!

Бу сёзлерни айтып, о, рафтан бору киби сарылгъан балабан мешинни алды, йиплерини чезди, оғюне яйдырды: мешин табакъ устюнде насылдыр бир язылар бар эди. Фин къадыны оларны окъумагъя башлады, языларны къан терине баткъандже окъуды.

Сыгъын кене Герда ичюн риджа этмеге башлады. Герданың озю исе фин къадынына ялварыджы бакъышларынен бакъя. Фин къадыны козълерини юмып ачты, соңра сыгъынны четке чекти ве оның башына тазе буз къояркен, къулагъына фысылдады:

— Кай керчектен де Къар къыраличесининь узурында, лякин о озюниң яшайышындан гъает мемнүон, о, бундан да гузель ер ёкъ, деп тюшүнө. Буның эсас себеби оның юргеги ве козълеринде тургъан кузъгу парчачыкъларында гизли. Оларны чыкъарып алмакъ керек, акс алда о ич бир вакъыт адам олмаз ве Къар къыраличеси оның узеринде кенди акимиетини сакълап къалыр.

— Гердагъа оның акимлигини<sup>1</sup> темелинден гъайып этмеге ярдым этмезсиньми?

— Оның къуветине къувет къошып оламам. Оның не къадар къуветли олгъаныны корымейсиньми? Онъа эм адамлар, эм айванлар хызмет эткенини корымейсиньми? О, ялынаякъ яры алемни басып кечкенини корымейсиньми? О бизден дегиль де, биз ондан къувет сорамалымыз. Оның озю Къар къыраличесининь сарайына кирип, Кайның юргеги ве козълериндеки кузъгу парчачыкъларыны чыкъарып алмалы. Биз бунда онъа ярдымдажы олалмамыз. Бурадан эки миль авлакъта Къар къыраличесининь багъчасы башлана. Къызчыкъыны анда алыш бар, къырмызы емишлернен ортюоли балабан чалы янында къалдыр да, аман, кери къайт!

<sup>1</sup> акимлиги — падишалыгъы

Фин къадыны Герданы сыгъынның аркъасына отуртты. Сыгъын дөрт нал берип, чапып кетти.

— Вай, меним чызмаларым къалып кетти! Вай, меним къолчакъларым къалып кетти! — деп къычырды Герда бираз ёл кечкенлеринден соң.

Лякин сыгъын къырмызы емишлери олгъан чалыгъа барып етмендже токътамады, эп чапты. Сыгъын Герданы къырмызы емишли чалы янына кетирди. Герда ерге энди, сыгъын онынъ дудакъларындан опти, козълеринден балабан-балабан яш тамчылары акты. Сыгъын Герданынъ янында чокъ турмады, тез-тез кериге<sup>1</sup> къайтмагъа ашыкъты. Заваллы къызычыкъ, ялынаякъ, къолчакъсыз, чатлама аяза япа-яньгъыз къалды.

О, бар кучюни топлап огге дөгъру чапмагъа башлады; япалакъ-япалакъ къар данелери онъа къаршы учып кельмекте эдилер. Лякин олар коктен энмейлер, аксине ер устюндөн чапышып кельмекте эдилер.

Герда бойле къар данелерини даа корьмеген эди. Оларнынъ къыяфетлери, шекиллери дешетли олмакънен бирликте джанлы эдилер. Олар Къар къыраличесининъ Ордусынынъ аскерлери эди. Оларнынъ къыяфетине бакъсань, араларында мудхиш кирпилерге, юзбашлы йыланларгъа, тюклери чыбалыкъ аюв балаларына ошагъан сойлары пек чокъ эди. Олар бир чешит парылдасалар да, кене де тири къар данелери эдилер...

Ниаэт, Герда Къар къыраличесининъ мухтешем сарайына етип кельди.

Кай бу вакъыт не япа, ненен огъраша эди? Кай Герда акъында тюшүнмек бу ерде турсын, атта онынъ мында, сарай къапуларынынъ янында олгъаныны акъылына биле кетирмей эди.



1. Лапланд къартийнинъ къыяфетини ве эвнинъ корюнишини тасвар этинъиз.
2. Сыгъын ве фин къадыны арасындаки субетни дикъкъатнен окъунтыз ве эр бирининъ фикир, арекетлерине къыймет кесинъиз.
3. Фин къадыны Гердагъа насыл ярдым этти?
4. Герда насыл алда Къар къыраличесининъ сарайына етип кельди?
5. Шималь сыгъынынынъ ресимини япынъыз.

<sup>1</sup> кериге — арткъа

## КЪАР КЪЫРАЛИЧЕСИНИНЬ САРАЙИНДА НЕЛЕР ОЛА ВЕ СОНЬРА НЕЛЕР ОЛГЪАН ЭДИ

Къар къыралличесининь сарайыны къар боранлары къургъан, пенджере ве къапуларыны кучълю рузгярлар<sup>1</sup> ясагъан эди. Шималь ышыгъынен айдынлатылгъан юзлернен къоджаман заллар бири дигери артындан узанып кеткенлер; оларнынъ энъ узуны чокътан чокъ мильге узанып кеткен. Бем-беяз залларнынъ ичи сувукъ ве титис эди. Бу ерлерде шенълик юва къурмагъан! Шималь ышыгъы не вакъыт къуветленеджегини, не вакъыт зайыфлайджагъыны дакъкъа дакъкъасына бельгилемек мумкун. Энъ буюк залнынъ ортасында бузлап къалгъан голь бар. Гольниң бузы бинълернен тем-тегиз, дос-догъру парчачыкъларгъа болюнген. Гольниң ортасында Къар къыралличесининь тахты тура. Гольниң юзюни Къар къыралличеси акъыл кузъгиюси деп сая эди. Ве, сарайына къайтып кельгенинде тахтына отура, онынъ фикириндже мезкюр акъыл кузъгиюси ер юзюнде энъ яхшы кузъгиюси тахтыны тутып тура.

Кай сувукътан морарып<sup>2</sup> къалгъан. Лякин о, буны сезмей эди. Къар къыралличесининь опюшлери оны бойле япып ташлагъан. Асылында юрги де бир парча бузгъа дёнген. Кай уджлу буз парчаларынен чешит тюрлю шекиллер ясал ойнай эди, оюннынъ адыйны «акъылнынъ буз оюны», деп адландыргъан эди. Бу шекиллер онынъ козълери оғонде пек дюльбер, оларны тизмек исе гъает муйим ве эмиетли шей олып корюне эди. Козълерининь ичинде тылсымлы кузъгиюнинь парчачыкълары олмагъан олса, эбет, о, бутюн шейлерни башкъаджа корер эди. Кай исе буз парчаларындан сёзлерни тертип эте, лякин джан-юректен истедиги «эбедийлик» сёзюни ич де тертип этип оламай. Къар къыралличеси онъя: «Эгер сен буз парчаларындан бу сёзни тертип этсөнъ сен озъ озюнъе шорбаджы оладжакъсынъ, ве, мен санъя бутюн дюнъяны ве бир чифт янъы конъки багъышларым», деген эди. Лякин Кай не къадар тырышса да, «эбедийлик» сёзюни тертип этип оламай эди.

— Энди мен сыйджакъ улькелерге учып кетеджем! — деди Къар къыралличеси.

О, учып кетти, Кай исе сахра киби уджсыз-буджакъсыз зал ичинде бир озю къалды, буз парчаларына бакъып, тюшонджелерге далды. Тюшонджелерден башы чатлаяязды. О, джансыз адам киби бир ерде къыбырдамайып отура, дерсинъ сувукътан къатып къалгъан.

<sup>1</sup> рузгяр — ель

<sup>2</sup> морармакъ — зияде ушиомек

Герда рузгярлар ясагъан къоджаман<sup>1</sup> къапулардан ичериге аякъ басты. Акъшамлыкъ дуасыны окъуды ве рузгярлар тынчландылар, юкълап къалдылар. Герда къоджаман залгъа кирди. Кайны бир көреден таныды. Чапып келип Кайның бойнуна сарылды, багърина басты ве:

— Кай, джаным-козюм Кай! Ниает мен сени таптым! — деп къычырды.

Лякин Кай буз кесилип къалгъан адам киби, еринден къыбырдамады. Шунда Герда агълады, оның сыйджакъ козъяшлары Кайның кокюсине эндилер, юргине барып еттилер, юргини сарып алгъан бузларны парчалап, кузъгу парчаңгъыны ириттилер. Кай Гердагъа тикилип бакъты. Герда йырламагъа башлады:

Гуллер ача... Бакъынъ, насыл дюльберлик,  
Бакъынъ, насыл дюльберлик...

Кай бирден агъламагъа башлады, о къадар чокъ агълады ки, тылсымлы кузъюниң парчаңкълары козъяшларынен берабер акъып чыкътылар. Парчаңкълар козълеринден чыкъкъанен Герданы таныды ве къуванчыны гизлеп оламады.

— Герда! Меним гузель Гердам!.. Сен бу къадар вакъыт къайда юрьдинъ? Мен озюм къайда эдим? — деди ве этрафына бакъынды.

— Мында пек сувукъ, мында кимсе ёкъ!

Кай Герданың козълерине бакъты. Герда къувангъанындан эм агълай, эм куле эди. Э-э, къуванч о къадар буюк эди ки, атта буз парчалары оюн тёшемеге башладылар, ёрулгъанларындан соң тынчландылар, ятыштылар. Кай ве Герда ятышкъан буз парчаларына бакътылар: «эбединлик» сёзүни окъуп, шаштылар. Къар къыраличесининъ Кайгъа берген вазифеси акъылыныздамы? Къар къыраличеси онъа буз парчаларындан бу сёзни язсань сени озь озюнъе шорбаджы япаджам, бутюн дюньяны ве бир чифт коңки багъышлайджам, деген эди.

Герда Кайның янакъларындан опти, янакълары гуль киби алландылар, козълеринден опти — олар кенди козълери киби парылдадылар; къолларындан, аякъларындан опти — олар кене тендирист ве сагълам олдылар.

Къар къыраличеси эр анги заман къайтып келе биле эди. Кайны сербестликке чыкъараджакъ ферман — парыл-парыл парылдагъан буз арифлеринен язылгъан сёз — мына, аякълары астында ята.

Кайнен Герда къол тутушып, бузлы сарайдан чыкътылар: олар

<sup>1</sup> къоджаман — балабан



биталары акъкъында, озълерининъ гуллери акъкъында лаф эте-этे кетелер, къаршыларына чыкъынан кучылۇ рузгярлар тыналар, коктө кунеш парылдап баштай. Олар къырмызы емишли чалы янына кельгенлеринде, анда энди оларны сыгъын беклей эди. О, озюнен берабер елини сютке толу яш сыгъынны да кетирген. Сыгъын оларны сютнен сыйлады ве Кайнен Герданынъ дудакъларындан опти. Соңра Кай ве Герда фин къадынынынъ эвине кельдилер, ондан эвлериине алып бараджакъ ёлны сорадылар, соңра лапланд къартийини зиярет эттилер. О, оларгъа янъы урбалар тикти, озюнинъ чанасыны тамирледи ве оларны озгъармакъ ичүон ёлгъа атланды. Сыгъынлар да оларны Лапландиянынъ синъырларынадже озгъардылар. Бу ерде Кай ве Герда сыгъынлар ве лапланд къартийинен сагълыкълаштылар. Олар:

— Огъурлы ёллар! — деп къычырдылар оларның артындан.

Мына оларның оғюнде орман тура. Ильк къушлар йырлап башладылар, тереклер ешиль купелерини такътылар. Оларның къаршысына ормандан аджайип бир ат устюнде отурғъан, башында ачыкъ-къырмызы феси, белинде пыштавлары олгъан бир къыз чыкып кельди. Герда къызыны ве бир вакъытларда алтын каретагъа екильген атны бир кереден таныды. Бу — кичкене айдут-къызычыкъ эди. Эвдеки яшайышы оны бездирген ве энди, шимальде булунмакъ, о ерлерни бегенмесе башкъа ерлерни барып корымек истеген. Айдут-къызычыкъ Герданы таныды. Бу корюшовден къуванчлары ичлерине сыгъмай эди.

— Ax, сени серсери!<sup>1</sup> — деди о Кайгъя. — Сенинъ артынъдан дюньяның та о бир четине барып кельдилер, сен бунъя не дереджеде ляйыкъ олгъаныны бильмек истер эдим!

Герда айдут къызычыкътан шахзаде ве меляике акъкъында сорады.

— Олар ят улькелерге кеттилер! — деп джевап берди генч айдут-къыз.

— Я къаргъанен къаргъа-ханий?

— Къаргъа ольди, къаргъа-ханий исе тул къалды. Аля даа яс тута, такъдирине шикялтенип юре. Э, буларның эписи уфакъ-тюфек шейлердир, энъ яхшысы, сен оны насыл барып тапкъаның акъкъында икяе эт!

Герда ве Кай олып кечкен бутюн шейлер акъкъында тафсилятлы икяе этип бердилер.

— Иште, масал да бу ерде бите! — деди генч айдут-къыз, оларның къолларыны сыйкъты ве барып да сизинъ шеэринъизде олсам, мытлакъа сизни зиярет этерим, деп сөз берди. Сонъра о, озы ёлуна, Кай ве Герда озы ёлларына реван олдылар. Олар басып кечкен ёлларда чечеклер ача, отлар ешере. Мына чанъ къакъылды, олар тувгъан шеэрлерининъ чанъларыны, чанъларның хош сеслерини таныдылар. Олар таныш мердивенлерининъ басамакъларына басып юкъарыгъа котерильдилер ве эвлериңе кирдилер. Оданың ичинде эр шей эвелькисидай тура: дивар саати насыл ургъан олса шай да ура, акъреплери насыл джылышкъан олса шай да джылышмакъта эди. Алчачыкъ къапудан ичериге кирежеклеринде эгильмеге меджбур олдылар. Шунда анъладылар ки, олар кечкен вакъыт ичинде баягъы буюгенлер, етишкен къыз ве йигит олгъанлар. Ачыкъ пенджереден тышкъа бакътылар: гуллер, оларның янында балалыкъта отурдыкълары скемлечиклери турғанлары киби

<sup>1</sup> серсери — эвсиз, ёлларда юрген адам

туралар. Кай ве Герда озь скемлечиклерине отурдылар, бири-бириниң къолуны туттылар. Къар къыраличесининъ сувукъ, мухтешем сарайы агъыр тюш киби чекилип кетти.

Кай ве Герда эппейи вакъыткъадже ян-янаша отурдылар, олар энди уйкенлер сафындан ер алгъан олсалар, юреклери ве къальблери балаларныңки киби эди. Азбарда исе джыллы, аджайип яз укюм сюрмекте эди.

*Рус тилинден терджиме эткен Ю. Къандым*



1. Къар къыраличесининъ сарайында Кайның вазиетини тасвирленъиз.
2. Герда насыл сёзлер ве арекетлернен Кайны буз эсирлигиден къурттарды?
3. Буз сарайындан чыкъкъан Кай ве Герданы сыгъын насыл къаршылай? Сыгъын оларгъа не ичюн ярдым эте?
4. Кай ве Герданың Къар къыраличесининъ сарайындан къуртулыш, дөгъмуш шеэрлери ве әвлери къайткъанларыны тасвирленъиз.



Сиз насыл тюшонесинъиз, бу масал не акъкъында? Догъру, достлукъ, садыкълыкъ, мераметлик акъкъында. Сиз Герданың арекетлерине насыл къыймет кесесиз? Оның насыл инсан олгъаны, насыл табиат чизгилери ачыла? Гердагъа расткельген адамлар, айванлар онъа ярдым этелер. Аджеба, не ичюн ойле ола? Герда ве Кай оларгъа ярдым эткен Лапланд къарттийине, фин къадынына, сыгъынгъа, айдут къызычыкъыа озълерининъ миннетдарлыгъыны насыл бильдирелер? Олар кимсени унутмайлар. Герданың козъяшлары Кайның козълери ве юргиндеки бузларны ирите, Герданың эр бир арекети Кайгъа джан бере. Сиз насыл тюшонесиз, не ичюн ойле ола? Догъру, акъикъий севги, достлукъ, садыкълыкъ пек кучълюдир. Демек, масал акъикъий севги, достлукъ, садыкълыкъ акъкъында.

Сиз омюрден бойле мисаллер кетире билесизми? «Меним энъ якъын достум» серлевасында икяе язынъыз.



*Догъру ёлнен кеткен ёрулмаз.*

*Дост къадрини дост билир.*

*Достуна уръмет эткен, озюне сайгын къазаныр.*

*Достунънен сырдаш ол, япъан ишине ёлдаш ол!*

# КЪЫРЫМТАТАР ЭДЕБИЯТЫНЫНЬ ТАРИХЫНДАН



УСЕИН ШАМИЛЬ ТОХТАРГЪАЗЫ

(1881 – 1913)

Къырымтатар халкъынынъ белли шири Усеин Шамиль Тохтаргъазы 1881 сенеси 14-юнджи февраль куню Къырымнынъ энъ дюльбер койлерининъ биринде, Коккозде койлю къорантасында дөгъды. Шамиль балалықтан фукъарелернен берабер зенгинлерни азбарларында, чайырларында 20-25 капик куньделикке чалыша. Бабасы Тохтаргъазы акъай агъач ишлеринен огъраша эди. Лякин Шамиль, даа яш чагъында олгъанда, бабасы вефат эте, ве къоранталарынынъ алы агъыр ола. Шамиль эм чалыша, эм окъуй. Биш вакътында кой оджапчесине къатнай, окъув, язувны огрене. Сонъра, 1892 сенеси кой медресесине<sup>1</sup> кире.

Шамиль окъувгъа пек авеслене, тапкъан китапларыны, «Терджиман» газетини окъуп, бильгисини арттыра эди. Он алты яшларында олгъанда, оджалықъ этип башлады. О, Харджибие коюнде мектеп ача ве кой балаларыны окъутып башлай. Кой джемааты яш оджаны урьмет эте эди. Лякин зенгинлер, мырзалар койлюернинъ окъугъаныны, бильгили олгъанларыны истемей эдилер.

Онынъ ичюн олар халкъ оджасыны озылерине хызмет эттиргемеге тырыша эдилер.

Шамиль Тохтаргъазы эм бильгили оджа, эм истидатлы шаир эди. О, озюнинъ эсерлеринде яшларны, балаларны окъувгъа, бильги

<sup>1</sup> медресе – окъув юрту

алувына чагъыра эди. Чюнки о эмин эди — сербест, бахытлы яшайыш къурмакъ ичюн, окъумыш, бильгили олмакъ керек.

Халкъымызының севимли шаири ве оджасы Шамиль Тохтаргъазы къысқа омюри ичинде чокъ эйи ишлер япты, чокъ къыйметли шиирлер, пьеса, повесть, макъалелер язды.

1913 сенеси Шамиль Тохтаргъазы хызмет эткен Харджибие коунде буюк фаджия олды — шаирниң душманлары онынъ атешин юргине къара пычакъ сапладылар. Къырымтатар халкъы озюнинъ садыкъ оғълуны гъайып этти. Онынъ зенгин яратыджылыгъы къырымтатар эдебиятының алтын хазинесине кирди, онынъ яшларгъа берген насиатлары бугунъ де озъ эмиетини джоймады.

## О НЕДИР?

Бундан сонъра онсуз аят олмаяджакъ,  
Онынъ иле ачылан гуль солмаяджакъ,  
О олан ерде зулума ер къалмаяджакъ,  
О — окъувдыр ки, чоджукуларның<sup>1</sup> малдыр,  
О — илимдир ки, инсанның кемалыдыр!<sup>2</sup>

Нерде олса, онынъ иледир сеадет<sup>3</sup>,  
Эр шейден артыкъ онъя вардыр риает,  
Онсуз миллет махв оладжакътыр<sup>4</sup>, нияет,  
О — окъувдыр ки, инсанларның малдыр,  
О — илимдир ки, миллетнинъ кемалыдыр!

Онынъле япылды телефон, телеграф,  
Демир ёллар, пароходлар, тюрлю низам,  
Онынъ ичюн яратмыш бизлери табиат,  
О — окъувдыр ки, чоджукуларның малдыр,  
О — илимдир ки, инсанның кемалыдыр!

<sup>1</sup> чоджукулар — балалар

<sup>2</sup> инсанның кемалы — инсанның кучю-къувети

<sup>3</sup> сеадет — бахыт

<sup>4</sup> махв оладжакъ — гъайып оладжакъ

Дюнья онынъ элинде дёнер-доланыр,  
Джумле халкы кенди элинде къулланыр,  
Онсуз адам нерее варса хорланыр,  
О — окъувдыр ки, чоджукъларнынъ малыдыр,  
О — илимдир ки, инсаннынъ кемалыдыр!

Америка онынъле къазанды шурет,  
Авропалы олды бар дюньяя ибret<sup>1</sup>,  
Недир электрик, аджайип бир къувет,  
О — окъувдыр ки, чоджукъларнынъ малыдыр,  
О — илимдир ки, инсаннынъ кемалыдыр!

Одыр бизим раат олмамыза себеп,  
Чалышырсакъ, оны бизе верир мектеп,  
Фенден эйи олмаз ич бир башкъа меслек,  
О — окъувдыр ки, чоджукъларнынъ малыдыр,  
О — илимдир ки, инсаннынъ кемалыдыр!



**мал** — зенгинлик

**шурет** — шан

**меслек** — эсас, темель



1. «О недир» шири не акъкъында?
2. Ш.Тохтаргъазы илимге, окъувгъа насыл къыймет кесе?
3. Инсангъа илим, окъув не ичюн керек?
4. Илим, окъув адамларны неден къорчалай?
5. Не ичюн шаир балаларны, яшларны окъувгъа, бильги алувгъа чагъыра?



О — окъувдыр ки, чоджукъларнынъ малыдыр,

О — илимдир ки, инсаннынъ кемалыдыр!

сатырларынынъ манасыны насыл анълайсыз? Не ичюн шаир оларны сыкъ текрарлай?



Балалар, эвинъизде, мектепте, яшагъан еринъизде этрафынъызгъа бакъынъыз. Сиз илимнинъ насыл эйи нетиджелерини коресиз? Илим адамларнынъ яшайышы баҳытлы, къолайлы ве зевкълы олмасына насыл хызмет эте? Шимдики вакъытта илимнинъ енъишлери акъкъында икяе этинъиз.

<sup>1</sup> олды ибret — нумюне олды

## МЕМЕТ НУЗЕТ

(1888 — 1934)



Мемет Нузет 1888 сенеси Кезлев этрафында ерлешкен Айдаргъазы коюнде барлықұлы къорантада дөгъды. Кой мектебини битирген соң Кезлев медресесинде, соңра Багъчасарайда «Зынджырылы медресе»де оқыуды, намлы оджалардан бильги ве тербие алды.

Мемет Нузет балалықтан халкъ ағызы яратылжылығына авеслене. Чокътан-чокъ йырлар, чынъ ве манелер, аталар сёзлери, масал, эфсане, риваєтлерни әзберден биле. Бу онынъ ичюн буюк мектеп олды. Халкъ яратылжылығына авеслиги келеджекте онынъ шаир олмасына да себепчи олды.

1905 сенеси Мемет Нузет Русие бойлап сеяткъа кете. Мусульман халкълары яшагъан ерлерде чокъча булуна, оларнынъ яшайышынен таныш ола. Бир къяч вакъыт Уфа шеэриндеки медреседе оқуу. Къырымгъа къайтып кельген соң омрюнинъ соңуна къадар Къырым койлеринде оджалыкъ япа.

Мемет Нузетниң ильк шири «Терджиман» газетасында 1912 сенеси басылды. Шаир озюнинъ шиирлеринде ве икяелеринде къырымтатар халкъынынъ яшайышыны, урф-адетлерини акс этти. Онынъ эсерлери халкъ тилинде язылгъандыр. Мемет Нузет халкъ тилини ве зенгин ағызы яратылжылығыны терен ве темелли бильген шаирдир.

Мемет Нузет балалар ичюн де чокъ меракълы шиирлер язды. Кой мектеплеринде чалышкъанда, балаларға бағышлап язғын шиирлери ве икяелерини оларгъа оқуу әди. Мемет Нузетниң шиирлери ифадели, зевкълы, кимериси исе кулькюли, юмористик шекильде язылгъандыр. Онынъ зенгин яратылжылығы оқуула ве оғрениле.



**сеят** — кезинти (*руссча*: путешествие)


**акс этти** — косытерди, ифаде этти

## ОЗЕН

Талгъын акъып, узакълардан келем мен,  
Чокъ ер корем, чокъ да шейлер билем мен.  
Айдын куньлер, пек къаранлыкъ геджелер,  
Йылдызычыкълар сувны менден ичелер.

Багъчалардан, дерелерден отем мен,  
Чечеклерниң алын сорап, кетем мен.  
Мени корьсе, эп чечеклер ачалар,  
Къарылгъачлар, бетим сыйпап, къачалар.

Балачыкълар менде балыкъ туталар,  
Сувсагъанда сувумдан да юталар.  
Яшлар, къызлар, мени бойлап, юрелер,  
Ашап, ичиp, зевкъ-сефалар сюрелер.





**талғын** — яваш

**айдын** — ачыкъ, кунешли

**отем** — мында: кечем



1. Озен инсан киби озю акъкъында окъуыйджыларгъа икяе эте. Бу насыл ифаделик вастасыдыр? Не ичюн шаир бу тасвирий вастаны къуллана?

2. Озен озю акъкъында нелерни икяе эте? Озен онынъ ёлунда расткельген осюмликлер, айванлар, инсанларгъа не бере?

3. Сиз озенлерни не ичюн севесиз? Озенлер инсанларгъа не бере? Къырымда насыл белли озенлер бар? Оларнынъ адларыны язынъыз ве харитада оларны тапынъыз.



Севимли озенинъиз акъкъында шиир язынъыз.



Сиз бегенген бир де-бир табиат манзарасынынъ ресимини япынъыз.

## АНА ИЛЕ БАЛА АРАСЫНДА

Ана:

Бу китапны ким йыртты?

Бала:

Абу элим.

Ана:

Не шай эттинъ, я балам? А, гузелим?

Китапны ич йыртмазлар, тек окъурлар,

Окъугъанлар гуллердайын къокъурлар.

Я бу череп не олды?

Бала:

Авдарылды.

Ана:

Я о джамгъа наптынъ сен?

Бала:

Шай къырылды.

Пенджереден къолларым джамгъа етти,

Мени корип, череп де тайды кетти.

Ана:

Я долапны ким ачып, къанфет алды?

Бала:

Элим алды, кетирип (*агъызыны косътере*) мында салды.

Ана:

Ялан, ялан! Къабаат козълеринъде,  
Янълышлыкъ бар, балайым, сёзлеринъде.  
Я бу хошаф не олды? Айт, корейим.

Бала:

Агъызым эткен, анайым, мен бильмейим.

Ана:

Къабаатынъ чогъала<sup>1</sup>, тургъан сайын,  
Мен бир бала корьмедин ич сендайын.  
Козюнъ корыген, эль алгъан, аякъ юрьген,  
Хошаф, къанфет зевкъыны агъызынъ сюрген.

Бала:

(*Анасынынъ къуджагъына атылып*)  
Бакъма козъге, анайым, тийме къолгъа!  
Багъышлайыкъ оларны, биз бир ёлгъа!  
Энди бир даа козь корымез, къол да тутмаз,  
Бизден изин олмаса<sup>2</sup>, агъыз да ютмаз.



**череп** — чечек сачылгъан бардачыкъ (савут)

**долап** — дивар ичинде къапакълы рафлар

**беян ола** — ачыла, корюне

**тазир** — насиат, огют



1. Япкъан къабаатларындан озюни акъламакъ ичон, бала насыл айнеджилик уйдур? Бу уйдурмаларда баланынъ насыл олгъаны беян оламы?

2. Анасы баланы тазирлегенде, насыл охшайыджы сёзлерни къуллана?

3. Анасынынъ тазирине бала насыл джеваплана? Ана иле бала арасында насыл дүйгүлар олгъаныны коремиз? Джевапларынызыны шиирнинъ сатырларынен исбатланыңыз.

<sup>1</sup> чогъала — чокълаша, арта

<sup>2</sup> изин олмаса — разылыкъ олмаса

## НОМАН ЧЕЛЕБИДЖИХАН

(1885 – 1918)



Номан Челебиджихан, къырымтатар халкъынынъ садыкъ ве улу оғылу, 1885 сенеси Джанкой якъынында ерлешкен Сонакъ коюнде дөгъды. Кой мектебини битирген соң Номан Акъчора ве Багъчасарайдаки Зындышырлы медреселеринде окъуй. Соңра Номан Челебиджихан окъувыны Тюргиеде, Станбул университетинде девам эте.

Бу девирде чокъ къырымтатар яшлары Тюргиеде окъуйлар. Олар Истанбулда «Ватан» адлы гизли джемиетни тешкиль этелер. «Ватан» джемиетининъ азалары Номан Челебиджихан ёлбашчылыгъында Къырымны Русие зулумындан къурттарув ве миллий мустакъиль девлетни мейдангъа кетириов ичюн курешке азырланалар.

1912 сенеси Номан Челебиджихан, Тюргиеде окъувыны битирип, Къырымтъа къайтып келе. Озюнинъ якъын досту Джәфер Сейдаметнен бирликте Къырымда къырымтатар миллий девлет къурлыш арекетининъ программасыны тизе.

1917 сенеси инкъиляптан соңки къарсанбалы девирде Номан Челебиджихан миллий арекеттинъ башында тура ве биринджи миллий Къуруттайны азырлав ве кечириов ишлерине ёлбашчылыкъ япа. Шу йылы олып кечкен Къуруттайда, Номан Челебиджихан Къырым миллий укуметининъ башы оларакъ сайланды.

Номан Челебиджихан истидатлы шаир эди. Онынъ «Ант эткенмен» шири къырымтатар халкъынынъ гимнине чевирильди ве бугунь де озъ мустакъиллиги ичюн курешкен халкъымызынынъ рухуна рух, къуветине къюшмакъта.

1918 сенеси январь айынынъ соңларында къутургъан большевиклер Номан Челебиджиханы якъаладылар. Февраль 23-те Акъяр тюрьмесининъ азбарында къуршунлагъан соң, джеседини Къара деньизге котерип аттылар. Къырымтатар халкъынынъ садыкъ оғылу, атешин курешчи озъ халкъынынъ азатлыгъы оғырунда эляк олды.

Февраль 23 куню къырымтатар халкъынынъ тарихында даа бир къара кунь олып къалды. Эр йыл бу куньде Къырым джамилеринде Челебиджиханнынъ рухуна дуалар окъула. Джемаат мейданларда топланып, онынъ хатырасына багышлангъан мерасимлер кечире.

Дерсликке кирсетильген «Къарылгъачлар дуасы» серлевалы икяесинде Челебиджихан озюнинъ балалыкъ ве осымюрлик йылларыны хатырлап, эм зевкълы, эм гъамлы теэссуратларыны тасвир эте.



**зулум** — зорбалыкъ

**мустакъиль** — сербест, бир кимсеге бойсунмагъан

**мерасим** — тедбир

**теэссурат** — хатырасында къалгъан адиселер

## КЪАРЫЛГЪАЧЛАР ДУАСЫ

(икяе)

(къыскъартылгъан)

### I

Он дёрт яшында эдим. Атларны пек севердим, окъумадан къачар, джылкъыгъа чапардым; джылкъыда бир ат коръдимми, бир аркъан атар, тутар, ялынына япышыр, джуген салар, минердим! Асав<sup>1</sup>, арслан киби къалкъар, энер, сычраарды... Асав урькер, фышкъырырды, башыны кениш мейдан чёллерге чевирир, ешиль тюзем орюшлерде осъкен сары чечеклер, лялелер, гелинджееклер, мондалакълар түйкъларынынъ алтында эзилир, соларды. Соңыра ёрулыр, терлер, явашяваш ятышыр, алышыр, къамчыдан аньламагъа башларды.

Кой мектебине пек коп къатнадым. Бу къаранлыкъ, джампик<sup>2</sup> бала зинданына кой балалары къатнар эдик. Мектепке къушлукъ<sup>3</sup> тан бурун кетер, кеткенде эпимиз бирер парча экмек алырдыкъ, экmekke аналарымыз тазе кубудан бираз май, беяз джылкъы къаймакъ ягъы сурерди. Буны уйле вакъты дагъындыкъта<sup>4</sup> ашардыкъ. Уйлеге къадар кой мектебининъ эски, делик кийизлери, къасырлары устюнде къарылгъач явруларыдайын тизилир, тиз чёker, отурырдыкъ. Сабакълар огюмизде, япракълар ачыкъ, козълеримиз юкъа-

<sup>1</sup> асав — минильмеген ат

<sup>2</sup> джампик — алчакъ

<sup>3</sup> къушлукъ — саба ве уйле арасы (вакъты)

<sup>4</sup> дагъындыкъта — тенеффюсте

рыда. Чатыгъа юва ясагъан къарылгъач палапанларыны саярдыкъ. Къачан къанатланаджакъ, учаджакъ, дуаларыны окъуйджакълар?.. Буны биз билир, бир-биризиге аньлатырдыкъ. Учкъан сонъ дердик: «Истедиклери къадар гезеджек, куледжек, ойнайджакълар; ойнаша-ойнаша, авелене-авелене коклерге, булутларгъа, ышыкъларгъа юкселеджеклер!» Оларны эпимиз куньлердик...

«Вельмурселят» суресини окъугъанда, оджа енгем буны бизге де огretken, бу къарылгъачлар дуасыдыр деген эди. Буны аман эпимиз огрендик, эзберледик.

Биз сабакъларымызны эджалар, агълар, таякълар астында эзберлер экенмиз, къарылгъачлар мектебин делик джамсыз пен-джересинден кирер, рафларгъа къонар, явруларына бакъя-бакъя, къувана-къувана дуасыны окъур, кучюк, йымшакъ, сары гъагъалы палапанларына да огretип, севе-севе, эджасыз, таякъсыз огretириди. Бизлер де огрендик. Бу гузель, севимли къарылгъачлар окъугъанда, бизлер де джанымыzman, къулагъымыzman динълер, динъледиктен сонъ эпимиз севинир, окъурдыкъ. Кимерде къарылгъачлар окъур, биз сусар, динълердик.





**джылкъы (йылкъы)** — ат сюрюси  
**ялын** — атының бойнундаки сачлары  
**орюш** — отлакъ  
**сабакъ** — мында: китап, дефтер  
**чаты** — таван агъачлары  
**палапан** — къарылгъач балалары



1. Икяеджи йылкъыда, орюштеки зевкълы куньлерини насыл тасвир эте?
2. Мектеп ичинде юва къургъан къарылгъачлар не ичюн балаларны меракъландыра эдилер? Оларны сейир эткенде, балалар нелерни тюшюне эдилер?
3. Мектеп бинасы насыл эди?
4. Талебелер окъув кунюни насыл кечире эдилер?
5. Балалар сербест учкъан къарылгъачларны не ичюн куньлер эдилер?
6. Не ичюн икяенинъ серлевасы «Къарылгъачлар дуасы»?



Табиат сизге насыл тесир эте? Сиз яшагъан ердеки табиат левхаларыны сёзлернен, сонъра ресимде тасвир этинъиз.

## II

Рушдие<sup>1</sup> дедилер, бир мектеп ачылды, эшиттим, къоркътым, тюшюндим. Мектеп, эбет, мектеп...

Рушдиеге мени де яздырдылар... Кой балалары текрага топланып. Девелерни, къойларны башкъа чобанларгъа ташладыкъ; чёллдерден, сюрюлерден, беяз памукъ къозулардан айрылдыкъ.

Мектебин буюк, чифте къанатлы, акъ боялы къапуларындан ичери кирдик. Кирдигим заман юрегимде бир енгиллик, бир къуванч дүйдым. Юксек, беяз бир бина, кениш, буюк пенджерелерден парыл-парыл ышыкълар тёкюле эди. Сыралар<sup>2</sup> сыра-сыра тизильген, къаршыда къара, ялпакъ, эки тұякълы бир тахта тура эди. Къара къалпакълы, къырмызы бетли бир йигит джуре, кезине: джурьенде сёйлей, окъуй, окъута, анъата эди.

Бу рушдиенинъ баш оджасы эди. Эртеси күнү эпимизге бир бичимде урбалар кестирди, янъы-янъы гузель кягъытлы китаплар берди. Къалем, дефтер, бор дагъытты. Эм окъута, эм яздыра эди. Кимерде къара тахтагъа чыкъара, бизге эр тюрлю окъувларны

<sup>1</sup> рушдие — орта мектеп

<sup>2</sup> сыралар — мында: ралелер



бу кениш къара тахтада окъута, огрете эди. Бираз окъутыр, соң ойнатыр, тынышландырырды. Оюн ичюн мектебин гузель, темиз, сары къумларман безенген кениш бир бағъчасы бар эди. Бағъчада кунешшинъ сыйджакъ, алтын нурлары арасында чапар, сыйчар, салынджақъ тепер, топ ойнардыкъ. Оджамыз да ойнарды. Бизге бильмединиз, корьмединиз оюнлары огретир, ойнамагъя алыштырырды. «Яшамакъ — ойнап онъмакътыр», — дерди. Эпимиз кулер, ойнар, ойнай-ойнай ёрулыш, терлер, безердик. О заман: «Айды, мектепке!» әмрине къувана-къувана, севине-севине окъумагъя башлардыкъ.

Оджамыз бизни север, охшар, окъутыр, окъуткъанда биз язар, динълер, джан къулагъымызнен динълердик. Биз шимди оджамыздан къоркъмаз, оны севердик. Сабакъларымызны севе-севе окъур, огредирдик. Эсап, тарих, эндесе, джогърафия огрендик. Тарихтан темелимизни, союмызны, буюк аталарымызны, эски татарларны таныдыкъ. Джогърафия бизге отурдыгъымыз, ойнадыгъымыз, яшадыгъымыз топракъларын, кездигимиз къулан чөллериң кенарларыны огредти. Чагълая-чагълая, юварлана-юварлана акып кеткен чайырларны, озенлерни, толкъунлана-толкъунлана, копюрген,

ташкъан денъизлерни... денъизлерни<sup>1</sup> теренлигини, дагъларнынъ буюклигини огretти... Яраданнынъ<sup>1</sup> буюклигини огretти.

Биз шимди эм окъуй, эм ойнай эдик. Ойнай-ойнай, къувана-къувана яшай, огрене эдик. Окъудыгъымызынъ анълай, биле, бильдигимиз ичюн оджамызынъ пек севердик. Соңра бабаларымызынъ, аналарымызынъ севе, башкъя бир бильги, башкъя бир дуйгъуман севе эдик. Китапларымызынъ севердик.

Къалем, кягъыт, тебеширимизни<sup>2</sup> севе, сыраларны севе, къара тахтаны биле севе эдик. Мектепнинъ багъчасыны севе, бутюн коюмизни, кой татарларыны севе эдик...

Бильгенден, анълагъандан, таныгъандан соң ташларны, чайырларны, бутюн дюньяны севе эдик!..



**эндесе** — геометрия

**чайыр** — экин ве багъ-багъча ичюн къоралангъан ер



1. Янъы мектепни Челебиджихан насыл тасвир эте?
2. Эски мектепке коре Рушдие мектебинде насыл янъылыкълар олды?
3. Рушдие мектебинде талебелер окъувгъа, оджаларына насыл бакъя эдилер? Оларнынъ мунасебетлери насыл денъишти?
4. Не себептен талебелер гонъюллериnde севги дуйгъуларыны сезе эдилер?

### III

Соңки яз эди... Кузьнинъ яланджы кунеши куле эди. Узакъта къара къаргъалар къалын къаба давушларыман къычкъыра эдилер. Чечеклер, солукъ япракълар сарагъанды. Коклерге, бошлукъларгъа узангъан мавы дагъларнынъ мунарлы башларында къара булатлар къайнаша эди.

Ава сувукъ... Сувукъта бузлагъан, кучюк къушчыкълар, сыйырчыкълар багъчада, агъачларда джыйылгъанлар, сессиз-солукъсыз оте эдилер.

Мектепке кирдим. Киргенде мектепни, сыраларны, дуварларны, эр ерни, эр кошени мунъ коръдим. Оджа далгъын-далгъын отура эди. Бенъзи<sup>3</sup> солукъ, козълери ренксиз, тюшюне, тасалана эди. Янында эсмери, сакъаллы бириси бар эди. Бу къады эди. Отурдыгъы ерде къыбырдады, бир кягъыт чыкъарды, оксюрди:

<sup>1</sup> Ярадан — Алла-Тааля

<sup>2</sup> тебешир — бор (*русча*: мел)

<sup>3</sup> бенъзи солукъ — юзю гъамлы



— Буюклерден эмир вар: татар тили окъутылгъан мектеплер къапатыладжакъ...

Эр ер тынды, эпимиз индемей эдик. Мектеп бир дженазе эвине ошагъан эди. Эр ер къара, бош. Кимсе бир шей айтмай эди; ялынъыз багъчада бир къарылгъач кесик-кесик дуасыны окъуй эди.

Кучюк, гузель козьлеримен бутюн аркъадашларым къадыгъа бакътылар. Сувукъ, тонукъ, агълагъан бакъышларман къадыны, буюклерни къаргъай эдилер.

Сонъра оджа къавий, тик омузларыны котерди, аякъъа къалкъты, къарыкъ, титрек бир сесмен:

— Къардашларым! — деди. — Сизге мен сонъки дерсими де айттайым. Сиз баба ве ананъызыны, Яраданынъызыны северсенъиз, татар тилини де севинъиз...

Даа айтаджакъты, сеси битти, нефеси тыкъылды, бөгъукъ-бөгъукъ лафлары дудакълары арасында оле, эшитильмей эди. Агълагъаныны бизден сакъламакъ истеди. Сакълады. Къанлы козь яшларыны юргенине акъытты. Мен агъламакъ, бу буюк татарнынъ бойнуна сарыллып козь яшлары тёкмек, бошанмакъ истей эдим.

Мектептен чыкътыкъ, къады эфенди мектебин беяз, лекесиз къапысына бир къара килит урды, кетти...

Бутюн балалар агъладылар. Агълагъанда мен козълеримден бир тамла яш акъытмай эдим. Мен шимди урмакъ, девирмек, эзмек, енъмек... мектепниң къапусына асылгъан агъыр къара килитни къопармакъ, атмакъ истей эдим. Къопармакъ бойнумның борджу олсун дий эдим...

Дамарларымдаки къара къанлар копюре, козълерим къаара, къулакъларымда юреклерге къоркъу берген угъултылар эшите эдим, бусана эдим<sup>1</sup>...



**сыйырчыкъ (сыгъырчыкъ)** — къуш (*russa*: скворец)

**мунъ** — гъам, къасевет

**къады** — дин хадими

**эмир** — къаарар, буйрукъ

**тонъмакъ** — ушомек



1. Икяеджи сонъки кузьни насыл тасвир эте? Не ичюн этрафтаки табиат онъя гъамлы, мунълу олып корюне?
2. Бир кунь мектепке киргенде, о, оджасыны насыл алда коре?
3. Къады насыл къара хаберни кетирди?
4. Не ичюн мектепте тарих, эсап, джогърафия фенлерини окъутмагъа разылыкъ бермей эдилер? Кимлер разылыкъ бермей эди?
5. Мектеп къапатылгъан сонъ, оджа талебелернен насыл сагълыкълашты? Балалар насыл алда къалдылар? Икяеджини насыл дүйгүулар сарып алды? Балалар не ичюн агълайлар?



*Къанлы козъяшларыны юргегине акъытты джумленинъ манасыны анълатынъыз. Мектебинъиз акъкъында икяе язынъыз.*



Не ичюн девлет бойле гузель мектепни къапатув къааралыны чыкъарды? О девирде девлет башында кимлер тура эди? Шимдикى девирде девлет мектеплерге насыл бакъя? Сизинъ мектебинъизде йыл йылдан насыл эйи денъишмелер ола? Мектеп сизге не бере? Мектебинъизде насыл меракълы тедбирлер кечириле? Сиз сыныфынъызынъ ишлеринде иштирак этесинъизми? Сиз мектебинъизде насыл янъылыкъларны корымеге истер эдинъиз? Сиз мектебинъиз ве сыныфынъыз гузель ве ярашыкълы олмасы ичюн нелер япасынъыз? Мектебинъизде къырымтатар талебелери эписи ана тилини огределерми? Къырымтатар тилинде насыл дерслеклер ве китаплар бар? Сиз ана тили, къырымтатар эдебияты дерслери меракълы олмасы ичюн оджанъызгъа насыл ярдым этесиз?

<sup>1</sup> бусана эдим — мында: ичим-багърым ачуу тола

## АМДИ ГИРАЙБАЙ

(1901 — 1930)



Амди Гирайбай 1901 сенеси Къарасувбазар шеэриндеки Енъисала куюнде дөгъды. Къарасувбазарда мектепни битирген сонъ бир къач вакъыт, яш олгъанына бакъмадан, Амди кой мектеплеринде чалышты. О, балалықтан окъувгъа пек авес эди. Бу авеслик оны 1917 сенеси Акъмесджитте ачылғыан яныы Рушдие мектебине алыш кельди. Амди яныы мектепнинь биринджи талебелерinden бири олды.

Мектепни битирген сонъ Амди Гирайбай чешит ишлерде чалыша, чокъ койлерде булуна. Агъыр вакъытта халкъкъа элинден кельген ярдымны япмагъа тырыша эди.

1923 сенеси Амди Гирайбай Тюргиеге кете ве Станбул университетининъ тиль ве эдебият болюгине кире. Станбулда о, Къырымнынъ тарихыны огрене ве чокъ меракълы малюмат топтай. 1926 сенеси, окъувыны битирген сонъ, Къырымгъа къайтып келе.

Амди Гирайбай эдебиятнен пек эрте меракъланып баштай. О, даа он эки-он учь яшларында олгъанда, шиир язып баштай. 1915 сенеси матбуатта<sup>1</sup> илькиде онынъ бир сыра шиирлери басылды.

1921 сенеси язгъан «Тайчыгъым» ширинде балалыкъ арзуларыны ифаде эте. О, тез-тез осип йигитлер сырасына кечювни арз эте. Балабан олып, Ватаны огърунда, баҳытлы келеджек огърунда курешке къошуулмагъа ашыкъа.

Лякин Амди Гирайбайнынъ арзу-истеклери сонъуна къадар ерине кельмеди. 1928 сенеси бефтан ерде тюрьмеге къапатылды. Къырымтатар халкъынынъ садыкъ эвляды, улу шаири Амди Гирайбай Москвадаки Бутырка тюрьмесинде хорланып, мушкюль азаплар чекип, 1930 сенеси эляк олды.

Амди Гирайбайнынъ зенгин эдебий асабалыгъы къалды. Онынъ ифадели, халкъ тилинде язылгъан шиирлери бугунь де бизге кучь ве рух берелер, халкъымыздынъ келеджеги огърунда курешке, окъувгъа, бильги алмагъа чагыралар.

<sup>1</sup> матбуатта — газета, журналларда



**ерине кельмек** — омюрге кечмек  
**азап** — чекишию  
**эляк олмакъ** — ольдюрильмек

## ТАЙЧЫГЪЫМ

Меним тайым джийрен къашкъа, къамыш къулакъ, ал аякъ,  
Онынъ ичон бар бир къамчым сапы къатты чум таякъ<sup>1</sup>,  
Саба сайтын агъам мени тайчыгъыма минсете,  
Башын джете, къора бою яваш-яваш джурсете.

Бабам барса базардан бир эгер сатын аладжакъ,  
Тепреч<sup>2</sup> куню о эгерни джоргъа тайгъа саладжакъ,  
Минеджек те мен тайымны, кетеджекмен къошугъа,  
Чёльде явлукъ ойнайджакъман аллы-гуллю пошугъа.



Акъшам устю джоргъалатып<sup>3</sup> копюк къускъан тайымны,  
Сукъландырып къарап тургъан той буюги дайымны,  
Киреджекмен кочюрмеден айдамакъдай тикленип,  
Ат устюнде онъгъа-солгъа къурма джайдай букленип.

Манъа буны огretken соңъ бабам сыйпай башымны,  
«Джигит ол да, кендже оғълум, силь меним козъяшымны».  
Мен де емин этемен<sup>4</sup> соңъ: «Ат устюнде олермен,  
Батырларман талашырман, джигит борджун төлермен».

<sup>1</sup> чум таякъ — къызылчыкъ чубугъы

<sup>2</sup> тепреч — баарь байрамы

<sup>3</sup> джоргъалатып — чаптырып

<sup>4</sup> емин этемен — сёз берем



**джийрен** — сарылы-къырмызы тюс  
**къошу** — ат ярышы  
**пошу** — явлукъ  
**айдамакъ** — батыр



1. Шайр тайчыгъыны насыл сёзлернен тасвир эте?
2. Шайрнинъ козю огюнде насыл зевкълы левхалар джанлана? О, нелерни арзу эте?
3. Шайр озюнинъ балалыкъ чагъыны насыл дуйгъуларнен хатырлай?
4. Баба нелерге ынджынып, оғылуна «...силь меним козъяшымны» дей?
5. Оғыланчыкъ не ичюн тез-тез балабан олмагъа истей? О, бабасына насыл сёзлер айтып, емин эте? Бу сёзлерни дефтеринъизге язып алышыз.



1. Шиирде насыл шиве сёзлери расткеле? Оларнынъ эдебий шеклини тапып языныз?
2. Шиирде къулланылған ифадели сёзлерни ве ибарелерни дефтеринъизге язып алышыз.



Сиз ким олмакъны арз этесинъиз? Халкъымыз огюнде борджунызынъ неде коресинъиз? Сиз насыл зенаатларны зияде бегенесиз? Чешит зенаатлар акъкъында икяе этинъиз.

Ватанына къайтып кельген къырымтатар халкъынынъ огюнде насыл вазифелер турған? Миллий мектеплер, сыныфлар ачылмасы, ана тилимизни сакълав, оғренюв — бугуньки куньде эсас меселелер. Сизлер бу ишлерде насыл иштирак эте билесинъиз? Тюшюнип, джевап беринъиз.

## ***Ифадели оқыумагъа оғренемиз***

### **Манаджа токътавлар акъкъында**

Токътав ишаретлеринен бағълы токътавлардан гъайры манаджа токътавлар да пек муимдир. Эсерни ифадели оқыуғъанда, айры сёзлер, джумлелер, нутукъ болюклери манаджа токътавларнен къайд этильмеси керек.

Манаджа токътавлар ифадели окъувнынъ муим бир вастасы олып, монотонгъа ёл къоймайлар. Олар къыскъа ве девамлы ола билелер:

- / сзыкъ — къыскъа токътав;
- // сзыкъ — девамлы токътав;
- /// сзыкъ — чокъ девамлы токътав.

Ашагъыда кетирильген парчада манаджа токътавларны бельгилейик:

Меним тайым / джийрен къашкъа, / къамыш къулакъ,/ ал аякъ, //

Онынъ ичюн/ бар бир къамчым/ сапы къатты/ чум таякъ, ///

Саба сайтын/ агъам мени/ тайчыгъыма минсете, //  
Башын джете,/ къора бою/ яваш-яваш джурсете. ///.



Манаджа токътавлар окъувда неге хызмет этелер? Девамына коре насыл олалар?



Ашагъыда берильген шиирде манаджа токътавларны бельгилендиз. Бельгиленген токътавларгъа риает этип, шиирни ифадели окъуньыз.

## ОЗЕН

Талгъын акъып, узакълардан келем мен,  
Чокъ ер корем, чокъ да шейлер билем мен.  
Айдын куньлер, пек къаранлыкъ геджелер,  
Йылдызычыкълар сувны менден ичелер.

Багъчалардан, дерелерден отем мен,  
Чечеклерниң алын сорап, кетем мен.  
Мени корьсе, эп чечеклер ачалар,  
Къарылгъачлар, бетим сыйпап, къачалар.

*Мемет Нуэт*



## ХХ АСЫР КЪЫРЫМТАТАР ЭДЕБИЯТЫНДАН



### МАМУТ ДИБАГЬ

(1905 – 1942)



Мамут Дибагъ 1905 сенеси Багъчасарайда дөгъды. О, чокъ йыллар матбуат ишлеринде чалышты. 1938 сенеси илян этильген эдебий конкурста Мамут Дибагънынъ «Концерт» икяеси экинджи ерни къазанды. Бу икяе онынъ эдебияткъа аткъан биринджи адымы эди.

Къыскъа вакъыт ичинде яш истидатлы языджынынъ бири-бири артындан икяелери газета ве журналларда басыла. «Эдебият ве культура» журналында Мамут Дибагънынъ «Гизли нишан» пьесасы басыла. Соңра бу пьеса Къырым девлет драма театринде чокъ кере санагъа къююла ве сейирджилернинъ севимли пьесасы ола.

Мамут Дибагъ озюнинъ эсерлеринде къырымтатар халкъынынъ тынч омюрини, эмегини, койлерде олып кечкен эйи денъишмелерни меракълы шекильде косытерди. О, ватанпервер, мераметли, бильгиге, окъувгъа авес, халкъына садыкъ инсанларнынъ сымаларыны яратты. Озю де ойле адамлардан бири эди.

1941 сенеси амансыз дженк башлангъанынъ биринджи күнүнден Мамут Дибагъ, къолуна силя алыш, джебэгэ кете. Акъядада олып кечкен дешетли урушларнынъ биринде 1942 сенеси эляк ола. Ватанымыздынъ азатлыгъы оғырунда эляк олгъан он эки къырымтатар языджылары сырасында Мамут Дибагъ да бар. Оларнынъ мукъаддес хатырасы тарихта эбедий къалыр.

Мамут Дибагъ меракълы эсерлер яратты ве къырымтатар эдебиятынынъ осовине къыйметли иссе къошты.

«Балкъуртлар» икяесинде Мамут Дибагъ балкъуртларнынъ башына тюшкен чешит белялар ве фелякетлер акъкъында икяе эте.

Саран ве ачкозъ къаравул балкъуртларгъа хиянетлик япа, оларны къышта ач къалдыра, хорлай ве аджыныкълы алгъа къоя. Балкъуртлар дагъда да чешит беляларгъа огърайлар.

Бахытларына, оларгъа мераметли адам, къуртчу Амет акъай расткеле ве оларны къуртара.



**силя** — *мында:* тюфек

**джебэ** — *русча:* фронт

**азатлыкъ** — сербестлик, душмандан къуртулув

**мукъаддес** — азиз, къыйметли

## БАЛКЪУРТЛАР

(икяе)

Таш ёл кенарында саран ве топал бир къаравул яшай эди. Онынъ бир сыгъыры бар эди. Къаравулнынъ къарысы исе сюттен къатыкъ уюта, пенир кесе, май ясай эди.

Къаравулнынъ эви янында чалы-чырпынен къоралангъян огородчыгъы бар эди. Огородчыкъта о, къартоп, къапыста, балабан сары къабакълар, мысырбогъдай етиширие ве шай этип къышлыгъыны топлай эди.

Лякин къаравул солакъ балы да ашамакъ истеди. Истеди, эм яз битип тургъанда бир сепет балкъурт сатын алды.

Эв этрафында чокътан-чокъ чөль чечеклери бар эди. Балкъуртлар чечектен-чечекке учып, аз вакъыт ичинде баягъы бал топладылар.

Топал къаравул балкъурт бакъмагъа бильмесе де, къурт сепетлерининъ кеткен сайын агъырлашкъаныны дуя, балкъуртчы олдым, деп къопая эди.

Кузъде бир кунь, о, башына чильтер бетлигини кийип сепетлерни ачты. Бакъса, не корысюн — дёрт рамка топма-толу солакъ. Саран къаравул пек къуванды. О, яваштан бир рамканы, онынъ артындан экиндjisини, соң учонджи рамканы да чекип чыкъарды. Дёргүндже рамка солакъны о, балкъуртларгъа къышлыкъ къалдырмагъа истеди. Амма эли бармады<sup>1</sup>.

<sup>1</sup> эли бармады — *мында:* къызгъанды, къалдырмагъа истемеди

— Джаным, бу бир зерре къуртчыкъларға солакъ балы неге керек? Мен оларгъа энъ яхшысы шекер шербети ясап бериirim, — деди де, дёртюнджи рамка солакъны да чекип алды.

Чокъ кечмедин ягъмурлар, соң къар ягъып башлады. Сувукътан бузламасынлар деп, къаравул балкъуртларны эви тюбюндеки магъазгъа авуштырды. Къаравул оларгъа шекер шербети бере турса да, балсыз къалгъан балкъуртлар ачлықътан ве ачлықътан да зияде магъазнынъ дымлыгъындан пек чекиштилер. Балкъуртлар пусюрликни, агъыр къокъуны, илле дымлыкъыны ич де севмейлер. Дым магъазда оларнынъ ярысындан чокъу яшап оламады.

Амма топал къаравул бутюн къыш бою солакънен чай ичиp кейфленди ве эки сепет балкъурт даа алмагъа азырланды.

Лякин баарьде баhtсызлыкъ олды: къаравул сепетни магъаздан чыкъартъаны киби, балкъуртлар авагъа котерилип къачмагъа башладылар. Топал къаравул абына-сюрюне оларнынъ артындан чапса да, сызгъырып чагъырса да, балкъуртлар къайтмадылар.

Эппейи узакъча байыр артында буюк орман бар эди. Балкъуртлар бу ормангъа учып кельди ве озылерине юва къыдырмагъа башладылар. Олар тереклернинъ арасында баягъы долангъан соң, къарт ве къамбыр бир эмен терегининъ устюнде къара бир шей корьдилер. Бу — терек къувушы экен. Балкъуртлар терек къувушына кирди ве оны бегендилер. Балкъуртлар бутюн яз бою юрекнен чалышып номай бал топладылар. Олар: «Терек къувушында олса да, къышта бал ашап яшармыз», — деп севиндилер.

Лякин чалышкъыр балкъуртлар мында даа буюк белягъа огърадылар.

Къарт эменден бираз авлакъта терен бир чукъур бар эди. О чукъурда пек балабан бир аюв озюнинъ уфакъ огъулчыгъынен берабер яшай эди. Олар юкълагъанда чукъурдан сыйджакъ був чыкъа ве балабан аювнынъ хырылтысы эшитиле эди. Уфакъ аювчыкъ хырылдамай эди.

Бир кунь балабан аюв аш къыдырмакъ ичюн кетмеге азырланды. О, огъулчыгъына:

— Бакъ, къобадан чыкъма сакъын. Къашкъырлар сени тутып таларлар, — деди. Аюв шай деди де саллана-саллана кетти.

О, къалын тереклер арасында козъден гъайып олгъаны киби, уфакъ аювчыкъ къобадан чыкъып чапа-чапа кезмеге кетти. О, орманны чокъ вакъыт доланды, соң бирден къулагъына балкъурт

вызылдысы кельди. Балкъуртлар о якъ бу якъ уча, терек къувушына де кире, де чыкъалар.

Аювчыкъ аман къарт эменге якълашты. Онынъ бурнуна шу дакъкъасы бал къокъусы урды. Аювчыкъ озъ-озюне: «Бал истейим!» — деп чар-чабик къамбыр эменге тырмашып чыкъты. Чыкъты да озюнинь къыскъа ве юньлю ог аягъыны къаранлыкъ деликке сокъмагъа башлады. Терек къувушында теляш къопты: «Вз-вз-з, вз-вз-з».

Бу арада атик бир балкъурт ачувиен терек къувушындан чыкъып, аювчыкъынынъ бурнуна зеэрли инесини бар кучюнен санчты.

Аювчыкъ чыйкъылдап къычырды, козълерине къаранлыкъ чёкти ве бирден, эменден ашагъы атылып кетти. Ерге о пек къолайсыз тюшти ве бир аягъыны къырды.

О учь аякъ устюнде секириклеп, агълай-агълай эвге къайтты.

Балабан аюв оны энди чокътан берли беклей эди. Бир даа бакъса, огъулчыгъы келе, амма эм топаллай, эм де агълай.

Балабан аюв ачувиен:

— Санъа не олды? Аягъынъны ким къырды? Бурнунъда о насыл шишик? — деп джекирди<sup>1</sup>.

Аювчыкъ къарт эмен устюнде балкъурт тишлегенини фыркъылдап-фыркъылдап айтты.

Балабан аюв пек океленди<sup>2</sup> ве окюре-окюре дөгъру къарт эменге барды.

Балкъуртлар тынчланмай, аля вызылдаша эдилер. Къоркъунчлы джанаварны<sup>3</sup> корип, олар даа зияде вызылдаштылар, «вз-з-з, вз-вз-з, вз-з-з».

Аюв оларнынъ вызылдысына къулакъ асмай, чурюк эменни къучакълап алды да, оны шытырдынен ерге йыкъты.

Энди къаардан зияде ачувлангъан балкъуртлар эписи балабан аювнынъ устюне атылдылар. Лякин оны тишлеп оламадылар: аювнынъ бутюн тени ве бети къалын ве серт юннен къаплы эди, бурнунынъ териси исе аякъып гоню киби къас-къатты эди.

Кучълю аюв слойрю тишлери ве тырнакъларынен къувуш эменни парлап, бутюн балны алды ве саллана-саллана къобасына къайтты.

Артыкъ кузъ эди. Балкъуртлар эм ач, эм ювасыз къалдылар. Энди не япсынлар? Олар юксек бир терек устюне къонып, чокъ вакъыт вызылдашты, сонъ къара булутчыкъдай топнен учып кеттилер.

<sup>1</sup> джекирди — ачувлы къычырды

<sup>2</sup> океленди — ачувланды

<sup>3</sup> джанавар — йыртыджы айван



Дагъынъ артында шалфей тарласы бар эди. Яз вакъты балкъуртлар анда барып шалфей чечегинден бал топлай тургъян эдилер. Шимди олар кене шалфей чёлюне тараф кетти ве уча-уча, тап сонъ, койнинъ четинде бир армут терегине къондылар. Олар яныкълыяныкълы вызылдай, санки агълай ве ярдым истеп ялвара эдилер.

Терек пытағында балабан бир къумрал къалпакъ<sup>1</sup> киби асылы тургъян балкъурт обасыны эр кестен эвель уфакъ бир балачыкъ

<sup>1</sup> Къумрал къалпакъ — къаверенки тюсте къалпакъ

корьди. О: «Балкъурт къачкъан, балкъурт къачкъан», — деп чапты. Буны эшиткен балкъуртчу Амет акъай аман етиши<sup>1</sup>.

Балкъуртчу шу saat армут терегине келип, балкъуртларны сакътлыкъынен пытакътан алды. О, ювасыз къалгъан балкъуртларны янны тахталардан ясалгъан дюльбер бир эвчикке къойды ве оларгъа чокъ<sup>2</sup> бал берди. Бу бал тыпкъы саран<sup>2</sup> къаравул ве тюзтабан аюв тутып алгъан солакъ балы киби къокъулы эди.



**магъаз** — подвал

**дым** — серс, сылакъ

**эмен** — *русча:* дуб

**къувуш** — терек ичиндеки оюкъ, бошлукъ

**теляш** — къоркъу



1. Къаравул насыл яшай эди? О, насыл адам эди?
2. Балкъуртлар къаравулнынъ эвинде не себептен хор олдылар?
3. Не ичюн баарьде балкъуртлар къаравулнынъ азбарындан къачтылар?
4. Олар узакъ дагъда озылерине насыл юва таптылар? Балкъуртларнынъ арекетлеринде биз оларнынъ насыл олгъанларыны коремиз?
5. Гъарип балкъуртлар дагъда насыл белягъя огърадылар? Бу белядан олар насыл къуртулдылар? Оларны аджыныкълы алдан ким къуртарды?



Сиз балкъуртлар акъкъында не билесиз? Олар балны насыл ве неден джыялар? Не ичюн бал пек файдалы ве шифалы сайыла? Бал инсангъа насыл файда бере? Сиз, бал джыймакътан гъайры, балкъуртларнынъ инсанлар ичюн нумюне ола биледжек къайсы чизгилери ве хусусиетлерини уйгъун деп саясыз? Сиз насыл тюшюнесиз, адамлар балкъуртларгъа насыл мунасебетте олмакъ кереклер? Оларны насыл бакъмакъ, асрамакъ ве айбетлемек керек? Къуртчылар диккъатлы олмалылар, балкъуртларны севип, мукъайтлыкъ ве урьметнен бакъмалылар. Уфачыкъ балкъуртлар бирлешселер, озылерини ярамаз адамлардан, чешит белялардан къорчалай билелер. «Балкъуртлар» икяесинде тасвирленген адисе буны ачыкъ-айдын косытере.

<sup>1</sup> аман етиши — тез-тез кельди

<sup>2</sup> саран — къызгъанч

## ЭШРЕФ ШЕМЬИ-ЗАДЕ

(1908 — 1978)



Къырымтатар халкъынынъ белли шири Эшреф Шемьи-заде 1908 сенеси Къырымнынъ энъ къадимий шеэрлерининъ биринде — Кезлевде оджа къорантасында дөгъды. Бутюн тюрк дюнъясына намы кеткен улу шаиримиз Ашыкъ Умер XVII асырда бу азиз шеэрде дөгъды, осъти, иджат этти ве дефн олунды. Эшреф Шемьи-заде улу шаирнинъ издеши оларакъ, Кезлевнинъ шаныны сакълады.

Эшреф Шемьи-заденинъ балалыгъы ве осъмюрлик деври Кезлевде кечти. О, он учъ яшында олгъанда, бабадан оксюз къала. Балабан къоранталары чокъ хорлукъ чеке. Кезлевде орта мектепни битирген соңь Эшреф Акъмесджитте окъувыны девам эте. 1930 сенеси исе Москва кинематография институтынынъ сценарий болюгине кире. Институтны битирип, Къырымгъа къайтып келе ве «Козьайдын» журналында чалыша. Бу девирде Эшреф Шемьи-заде белли языджы, алимлернен: Бекир Чобан-заде, Абдулла Лятиф-заде, Умер Ипчи, Мемет Нуゼт ве дигерлеринен корюше ве якъындан таныш ола. Бу корюшювлөр онынъ хатырасында эбедий из къалдыралар ве терен тесир этелер.

Эшреф Шемьи-заденинъ биринджи шиирлери басылгъанда, он беш яшында эди. Лякин Эшреф докъуз-он яшында олгъанда, шиир язып башлай. Балалыкъ шиирлерини кимсеге косътермей, сакълай эди. Бу шиирлер онынъ биринджи мектеби олып къалдылар.

Эшреф даа осъмюр олгъанда, байрамларда, джыйын ве дерви-заларда яшлар арасында булунып, халкъ йырларыны, чынъ ве манелерни, масалларны меракънен динълей эди. Буюген соңь Эшреф Шемьи-заде халкъ яратыджылыгъыны топтай ве огрене. «Мен шиир язмакъны халкъымыздан огрендим», — дей эди о. Энъ къыйметли эсери «Аслыхан» дестаны халкъ эфсанеси эсасында язылгъандыр.

Эшреф Шеми-заде чокъ шиирлер, дестанлар язды. Халкының джесюр къызы Алиме Абденнанова акъкъында «Алиме» дестаныны яратты.



**къадимий** — пек эрте заманда, эски девирде  
**дефи олунды** — комюльди

## ГЕДЖЕ

Къазмер кунеш авушты  
Баты эвине,  
Лейлясына къавушты  
Куле, севине.

Геджелик деньиз ортюнди  
Орьме шалыны,  
Къучагъына ясланып  
Ёргүн ялынынъ.

Орталықъ шенъ,  
Йылдызлар сувны опелер.  
Айны алыш ортагъа  
Къоран тепелер.

Уфукъта бир кок булут  
Пайнозю гезе.  
Тынч гедженинъ рухунда  
Гузеллик сезе.

Далгъа суса, ай бата,  
Йылдызлар сёне.  
Ильхамым да шай этип,  
Шиирге дёне.

Назик далгъа чынъ айта,  
Къальп окесинен.  
Янъгызларны мугъайта  
Мунълу сесинен.

Сонъ чевирип сесини,  
Къайтарма чала.  
Мевзузыны курешли  
Омурден ала.

Мен динълейим, о йырлай,  
Ильхамым ойнай.  
Ильхамымга эш ола,  
Лимон бетли ай.

Үйрюлелер, учалар,  
Сувгъа далалар.  
Коп оюндан ёрула,  
Тыныш алалар.



**ёргүн** — болдургъан; талгъан  
**мунълу** — гъамлы  
**уфукъ** — ернен кокнинъ къошуулгъан ери  
**ильхам** — рухий котеринклек  
**oke** — ачуу



1. Гедже левхасыны тасвир эткен дёртлюклерни тапып окъунъыз.

2. Гедже левхасы шаирнинъ гонълюнде насыл дүйгүларны дөгъура?

3. *Кунеш, денъиз, булут, далгъа, ай* ве *йылдызларның* арекетлерини шаир насыл инсан арекетлерине ошата?



1. *Ильхамым да шай этип, шиирге дёне сатырларның* манасыны насыл анълайсыз?

2. Ашагъыда берильген сөздөрдө синонимлер тапып язынъыз: *ясланып, шенъ, сезе, мунълу, ёрула, дёне.*

## Джанландырув акъкъында

Эшреф Шемьи-заденинъ «Гедже» ширинде пек меракълы сатырлар бар: ...*денъиз ортюонди оръме шалыны; Йылдызлар сувны опелер; Айны алып ортагъа Къоран тепелер...* Денъиз, ай, кунеш, йылдызлар джанлы, инсанлар киби тасвирленелер.

Табиатны ве неснелерни джанлы киби тасвирлев усулына джанландырув дейлер.

Джанландырув эсернинъ тилини зенгинлештире, онынъ ифадели ве тесирли олмасына хызмет эте.

Джанландырув масалларда, эфсанелерде, тапмаджаларда, шиирлерде кенъ къулланыла.

## АКЪШАМ ДЕНЬИЗ ЯЛЫСЫНДА

Мавы кок денъизнинъ тюсюмен къарышып,  
Сынъырсыз уфукътан сувунмакъ истей.  
Айнынъ мор шавлеси, далгъаман барышып,  
Мудавмет денъизде джуувунмакъ истей.

Этекли булатлар манолий гулодай,  
Кедайгъа корюнмей ачылмакъ истей.  
Окели толкъунлар опкыын дагъ селидай,  
Фышкъырып, копюрип сачылмакъ истей.



Шунынъчюн бу гедже, табиат сырларын,  
Севдалы юрегим анъламакъ истей.

Къалемим уджундан тёкюльген йырларын,  
Федакяр яшлыкъкъа чынъламакъ истей.



1. Акъшам деньиз левхасы шаирге насыл олып корюне?
2. Шиирде къулланылгъан къыясларны ве эпитетлерни къайд  
этинъиз.
3. Деньиз левхасы шаирге насыл тесир эте?



Деньиз левхасынынъ ресимини япинъыз.

## ЮСУФ БОЛАТ

(1909 – 1987)



Юсуф Болат 1909 сенеси Кырымнынъ эйъ дюльбер кошесинде, Алуштада, фукъаре къорантада дөгъды. Башлангъыч мектепни битирген соңъ техникумда окъуй, соңра Кырым педагогика институтынынъ кырымтатар тили ве эдебияты болугине кире ве оны мувафакъиетнен битире.

Юсуф Болат балалыкътан эдебияткъа авеслене, гизлиден шиирлер яза эди. Кырымнынъ дюльбер табиатыны, Алушта этрафындаки эфсаневий ве айнурлы къоджаман къаяларны, дагъларны, сынъырсыз Къара денъизни сейир этип, Юсуф зекъланана, эеджанлана ве хаялларгъа дала эди. Бу дүйгүуларны шиирлеринде ифаде этмеге тырыша эди. Хусусан, баарьде эр ер ешерип, чешит чечеклер ачкъанда, онынъ гонъю тувгъан юртуна севги дүйгүуларынен толыш-таша эди. О, бойле дюльбер диярда дөгъып яшагъанына къувана эди. Алуштанынъ къаршысында мас-мавы олып корюнген, уджсуз-бужакъсыз Къара денъиз оны айрыджа озюне тарта эди. Юсуф бу адтайип манзарагъа бакъып тоялмай эди. Къыш айларында ялыгъа чыкъып Къара денъизнинъ ачувлы бир девдай ялыгъа атылгъаныны, юксектен-юксек далгъаларнынъ дешетли-дешетли къаяларгъа, ташларгъа урунгъаныны къоркъу ве айрет иле saatlarнен сейир эте эди. Бу манзара Юсуфнынъ тасавурында, хаялында эбедиен къалды.

Юсуф Болат буюген соңъ озюнинъ эсерлеринде Кырымнынъ адтайип табиатыны, Къара денъизни тасвириледи. «Арзы кызыз» эфсанеси эсасында Ю. Болат «Арзы кызыз» пьесасыны язды. Али-баба эфсаневий Кырым дюльбери Арзыны ялыдан алыш къача. Арзы исе ватан асретлигине даянып оламай, озюни денъизге ата ве эбедин сув анасы олып Къара денъизде яшай. Чокъ йыллар девамында Юсуф Болат халкъ агъыз яратылжылгъыны топлай ве оғрене. О, чокътан-

чокъ чынъ ве манелер, аталар сёзлери, айтымлар, ривааетлер, эфсанелер, масаллар топлады ве неширге азырлады. Озюнинъ яратыджылыгъында Ю. Болат халкъ агъыз яратыджылыгъындан кенъ файдалана. Бу дерсликке кирсетильген «Туфанда къалгъан къой сюрюси» икяеси де халкъ ривааети эсасында язылгъандыр. Юсуф Болат халкъ ривааетлерини, эфсанелерни озюндже терен ишлеп, яраштырып, ифадели тильнен язды. Демек, ана тилимизни яхши бильмек ичюн, онынъ сёз зенгинлигиндөн файдаланмакъ ичюн, халкъ агъыз яратыджылыгъыны терен оғренмек керек.

Юсуф Болат белли кырымтатар языджысы. Онынъ эдебий яратыджылыгъы кырымтатар эдебиятында муим ер алды.



**айнурлы** — аджайип

**дияр** — мемлекет

**дешетли** — къоркъунчлы

**эбедин** — даима, омюрининъ сонъуна къадар

**муим** — эмиетли, керекли

## ТУФАНДА КЪАЛГЪАН КЪОЙ СЮРЮСИ

(икяе)

Чобан Асанны билесизми? Бильмесеньиз, динъленъиз. Чобан Асан Алим айдамакъынъ<sup>1</sup> досту, Аванес агъанынъ<sup>2</sup> чобаны, Къарабий яйлянынъ лячини эди. Эй-эй, онъя нафиле Лячин Асан демегенлер.

Лячиннинъ йигитлиги бир тарафта турсын, озю де ай киби айдын, гуль киби корьгем, далвидан бойлу, пост мыйыкълы бир бойдакъ экен. Йигит-йигит олмаса, дёрт пара койнинъ дживан-къызлары юкъуларыны джояр эдилерми, нафиле ах-вах чекер эдилерми? Чеккенлер амма, бизим бойдакъынъ кокрегиндеки джузданларындан, янбашындаки кумюш саплы къамасындан, аякъларындаки къатранлы чызмаларындан башкъа бир шейи олмагъан. Бир шейсизге ким къыз берир? Къыз алмакъ ичюн джиез керек, джиез ичюн акъча керек. Я акъчаны лячин Асан къайдан алсын? Осьмюргибинде bogъaz

<sup>1</sup> Алим айдамакъ — XIX асырнынъ биринджи ярысында чар забитлери, мырза ве байларгъа къаршы амансыз куреш алыш баргъан халкъ къараманы

<sup>2</sup> Аванес агъа — Иван Константинович Айвазовский. О вакъытлары Кефеде яшагъан мешур рессам, кырымтатарлар онъя буюк урметтисен Аванес агъа дей эдилер

токълугъына чалышкъан, эки якъасы бир кельмеген<sup>1</sup>, мал дегиль, чёп биле пейдаламагъан.

Бойдакъ Асаннынъ бахты мыйыкълары къаара башлагъан соң юрьген. Геджелерден бириnde Алим айдамакъ оны Аванес агъанынъ эвине алыш баргъан. Шу гедженинъ сабасында Лячин Асан Аванес агъанынъ къойларыны Къарабий яйлягъа алыш чыкъкъан. Демек, чобан олгъан.

Къарабий яйляны билесизми? Бильмесенъиз, динъленъиз. Къарабий яйля бинъ бир хасары олгъан ешиль бир чёллюктири. Янъылып адым аттынъмы, думп этип тюпсиз къуюгъа тюшерсинъ. Андан соң сени еди къат ерниң тюбюндөн тапсалар алсынлар. Я къобалары! Кирмеге — киресинъ, амма соңуна чыкъарым деп баш кестирме, башсыз къалырсынъ. Бузлу къобагъа яз чиллесинде кирежек олсанъ да, тонунъны алмагъа унутма, буз кесилирсинъ. Яйлянынъ уджуна да барма. Уджуна барып учурымдан ашагъы бакъсанъ, башынъ айланып, чомпарлас атылып денъизге учкъанынъны дуймай къалырсынъ.

Ондан тек бизим деликъанлы къоркъмай экен. Яйлянынъ уджундаки тим-тик къаянынъ динка тёпесине чыкъа да, къаршысындаки денъизге бакъып, къавалыны чала экен. Эм ойле бир чала экен ки, денъиздеки балыкълар сув устюне чыкъып онынъ чалгъысыны динълей эженлер.

Бу афатлы куню де ойле япкъан. Эм бу кересинде тек бир балыкълар дегиль, къойлары да этрафына топланып устюне асылып къалгъанлар.

Диредиль-диредиль къавалым,  
Фетта меним чобаным...

Лячин Асан зевкъ-сефанен чалгъан. Нечюн чалмасын, ярын Ораза байрамынынъ бириндже куню, чобанлыгъына беш йыл толаджакъ. «Беш йыл толгъан куню эвге кель, — деген Аванес агъа, — тойлугъы да, джиезлиги де менден олур».

Эвлери бар сув башында,  
Бенълери бар сол къашында...

Эйвах-эй, беля деген шей бекленмеген тарафтап келе экен. Козънен эсленмез къузгъунларны къанат давушларындан сезген Лячин Асан бу кересинде гъафлет къалгъан<sup>2</sup>, уфукътан къопкъан туфанны эслемеген, чонки юрги яйляда дегиль, севген тотайында экен. Асан тотайынен эгленмекте олсун, бу тарафта кок къааргъан, денъиз

<sup>1</sup> эки якъасы бир кельмеген — пек фукъаре олгъан

<sup>2</sup> гъафлет къалгъан — дуймай къалгъан



сияргъан, къаранлыкъ чёккен. Бирден ойле бир афат къопты дейлер ки, ернен кок къарышкъан, ягъмур дегиль, таш ягъгъан...

Къойгъа нафиле къой демегенлер, пек ахмакъ бир махлюкътыр. Лячин Асан къойларыны учурымдан къувып айт-уйт эткендже, серке къой<sup>1</sup> сырымдан ашагъы юварлангъан. Серке деркеч, къой сюрюси де онынъ артындан кеткен. Козь ачтым-козь юмдым дегендже, беш юз къойдан эсер биле къалмагъан.

Языкъ санъа бекяр йигит... Тотайынъа да языкъ... Языкъ амма, тек бир языкъсынувдан не файда? Кимден ярдым, кимден имдат?...

О вакъыт дейлер, чобан Асан омюринде биринджи кере агълагъан. Эм ойле бир агълагъан ки, давушы толкъунларны да, коктеки гудюрдилерни де бастыргъан. Бастыргъан амма, ачкозъ

<sup>1</sup> серке къой — сюрюни алыш баргъан эркек къой

денъизге мерамет къайдан кельсин? Джаным-джаным къойларны балыкъларгъа аш эткен.

Бизим Лячин кене пайнозю къалгъан. Ыргъагыны омузына урып, къавалыны къушагъына къыстырып, шорбаджысына келе. Шорбаджысы оны кесерми, ёкъса эки аягъыны бир чызмагъа сокъып Сибирге айдармы, — не япса да акъкы бар.

Азмы кеткен-чокъмы кеткен. Кефеге келип киргенде, орталыкъны козь къаранлыгъы багълагъан. Аванес агъанынъ босагъасындан атлайым дегенде, минареден мазиннинъ акъшам эзаны эшитильген. «Алла экбер, Алла экбер...». Балалар яйгъара къопарып эвлериине чапышкъанлар:

Мазин эзан окъуды,  
Къатламалар къоқъуды...

Ораза битти. Ярын байрам, къуванышалар эбет... Э, ойле я, бирине байрам, бирине матем. Асангъа да матем...

— Хош кельдинь! — деген Аванес агъа.

Я чобан Асан не десин?

— Бар эди, ёкъ олды, — деген чобан Асан, — беш юз къойдан бири де къалмады, учурымдан кеттилер. Тёлемеге не малым бар, не акъчам бар, тек джаным къалды, джанымны алынъыз.

— Чокъ меракълы шей! — деген Аванес агъа. — Къана, отурып бир къаве ич де, къойларнынъ учурымдан насыл учкъанларыны айтчы... Булут къайдан чыкъты?.. Кок сиярдымы?.. Я денъиз?.. Къойлар мунърештилерми?..

Аванес агъа акъыллы бир адам олса да, бу кересинде бир такъым мартавал шейлер<sup>1</sup> сорагъан. Эчки джан дердинде, къасап май дердинде, дей тургъанлар, бусы десенъ малыны да, майыны да унуткъан, тек бир анавы онъмагъыр хышымны<sup>2</sup> сорагъан. Сорагъан да, соравыны битирген соң:

— Бар, къардашым, джемаатнен байрам яп, — деген. — Бир афтадан келирсинъ.

«Байрам яп» экен! Эндилен соң Лячин Асангъа байрам къайда? Къопкъа кетти, къопкъанен йипи де къуюгъа кетти.

Кель заман, кет заман, арадан бир афта кечкен. Чобан Асан не аш ашагъан, не сув ичкен, не юкъу юкълагъан. Афтанынъ соңки куню башыны тёбен алыш, кене Аванес агъанынъ къарагалтысына кельген.

— Аванес агъа, чекиштирменъиз, тез-тез джезамны беринъиз, чыдап олмайым, — деген.

<sup>1</sup> мартавал шейлер — олмайджакъ шейлер

<sup>2</sup> онъмагъыр хышым — буюк фелякет, баҳытсызлыкъ

— О да насыл джезадыр?.. Юрь, санъа косытереджек шейим бар. Экинджи къаткъа чыкъалар. Яп-ярыкъ, арман киби мейдан бир одагъа кирелер.

— Энди мына бу шейге бакъ, — деген Аванес агъа. Деген де, дивардаки пердени чекип алгъан.

Недир, дейсинъиз? Тылсым десем — тылсым дегиль, масал десем — масал дегиль. Валлай, керчек шей! Анда Лячин Асан озы къойларыны, къойларнынъ арасында озюни коръген. Яйляны да, тим-тик къаяны да, сырымдан учкъан серкени де коръген.

— Ошаймы? — деген Аванес агъа.

— Тыпкъы озю! — деген Лячин Асан. — Амма къойлар къыбырдамайлар да?

— Бунъа ресим дерлер, — деген Аванес агъа.

Чобан Асан ресим деген шейни къайдан бильсин? Коръгенлери керчектир беллеген.

— Бу ресимни сенинъ айткъанларынъа коре ясадым, — деген Аванес агъа, — «Туфанда къалгъан къой сюрюси». Саттым. Саткъян парама беш юз къой алдым. Къойлар Джемалетдин байнынъ чайырындадыр. Истесень кене чобаным ол.

Къуванчындан чобан Асанынъ тили тутулгъан, дейлер. Тутулыр я! «Сагъ ол» биле айтамагъан.

Эй-эй, лаф бунынънен де битмеген. Аванес агъа джебинден бир десте чырышлы пара чыкъаргъан да, шатырдата-шатырдата чобаннынъ элине туттыргъан.

— Беш йыллыкъ элял заметинъ ичюн сагъ ол, къардашым, — деген.

Сонъ, насыл олсун да, Лячин Асан къуванчындан акъылыны чылдырмасын! Къапудан юрип дегиль де, учып чыкъты, дейлер. Эй-эй, дюньяда яхшы адамлар азмы я!

О вакъыттан соң афта кечкен, ай кечкен; яз да кечкен, кузь кельген. Кузъде, дейлер, Лячин Асан дёрт пара койден мусафир чагъырып, та Багъчасарайдан чалгъы тутып, балабан бир той яптыргъан. Тойда, дейлер, Алим айдамакъ къайтарма ойнагъан, Аванес агъа онъа зиль туткъан, дедем де шербет сюзген. Эм сюзген, эм ичкен, къурсагъы давулдай шишкен.



**лячин** — шайн (къуш); **мында:** Асанынъ лагъабы

**имдат** — къуртулув

**хасар** — топракъ ичинде буз толу чукъурлар

**къузгъун** — йыртыджы къара къуш



1. Лячин Асан кимге хызмет эткен?
2. Лячин Асанның тышкы корюнишини тасвир этинъиз?
3. Не себептен Лячин Асан фелякетке огърай?
4. Аванес агъаның «Туфанда къалгъан къой сююси» ресими Асангъа насыл тесир эте?
5. Аванес агъа Асанның насыл акълаша?
6. Сиз Аванес агъаның арекетлерине насыл къыймет кесесиз?
7. Сиз къайсы рессамның сергисини зияret эттингиз? Насыл ресимлерни бегендинъиз?



*Эчки джан дердинде, къасап май дердинде; къопкъа кетти, къопкъанен берабер йип де къуюгъа кетти аталар сёзлерини икяеде тапып, маналарыны аньлатыныз.*



Сиз белли рессамлардан кимлерни билесиз? Озюнъиз тасавур эткен туфан манзарасының ресимини яптыңыз.



Эвель-эзельден Къырымның адтайип, дюльбер, тылсымлы табиат манзарапары языджыларны эеджанландыргъан. Пек чокъ эсерлерде Къырымның дагълары, орманлары, къая, къобалары, сынъырсыз яйлялары, озенлери ве ярымаданы дөрт тарафтан сарып алгъан Къара деньзиз манзарасы тасвирленгендер. Музейлерде, китапханелерде Къырымның чешит кошелерини, дюльбер манзарапарыны акс эткен ресимлер сергилерини зияret этесизми? Рессамлар Къырымның муджизевий табиатына севда олып, юзлернен ресимлер яраталар.



**серги** — нумайыш

**зияret этмек** — барып корымек

**муджизевий** — тылсымлы, адтайип


**манзара** — табиат левхасы

**рессам** — ресим яптыджы адам

### Табиат манзарасы акъкъында



Бедиий эсерде табиат манзарасы муим ер ала. Манзара тасвирленген адиселернине вакъыт ве къайда олып кечкенини косытере. Энъ муими шунда ки, эсерде тасвирленген манзара языджының ве эдебий къараманнның дуйгъу, фикирлерини, арзу-истеклерини окъуйыджыгъа сездирмеге, тасавурында джанландырмагъа ярдым эте.



# КЪЫРЫМТАТАР ЯЗЫДЖЫЛАРЫ БАЛАЛАР АКЪКЪЫНДА



**АБЛЯКИМ ИЛЬМИЙ**

(1887 – 1947)

Абляким Ильмий 1887 сенеси Багъчасарай районынынъ Эски-Эль коюнде Аджи Ариф эфендининъ къорантасында дөгъды. Башлангъыч ве орта мектепни Багъчасарайда битирди. Соңра Тюргиеде Истанбул оқъув юртларында оқъувыны девам этти.

1914 сенеси Абляким Ильмий Къырымгъа къайта ве оджалыкъ этип башлай. Бир къач вакъыт «Терджиман» газетасында чалыша.

Тюргиеде оқъугъан вакътында Абляким Ильмий къырымтатар халкъынынъ тарихынен меракълана ве оғърашып башлай. О, Тюргиеде чокъ муим малюмат топтай ве бу саада бильгилерини теренлештире.

1913 сенеси Абляким Ильмийнинъ «Терджиман» газетасында биринджи икяеси басылды. 20-нджи сенелери онынъ балалар акъкъында язған «Ачлыкъ хатирелери» повести ве «Къуртчу Бекирчик» серлевалы колемли икяеси нешир олунды. «Къуртчу Бекирчик» икяесинде осымюр Бекирчик акъкъында тасвирлене. Бу мераметли ве ишкир оғъланчыкъ мектепте яхшы оқъуй, анасына эр вакъыт ярдым этте. Къомшулары къуртчу Амет эмдженинъ зенаатынен меракълана. Бекирчикте бу зенааткъа буюк авеслик дөгъя. О, Амет эмдженинъ ярдымынен гъайретнен огрене. Языджы Бекирининъ ишкир, мераметли, эдепли, гъайретли олгъаныны косьтере.

Абляким Ильмий терен бильгили, истидатлы языджы эди. Ляжин онъя яратыджылыгъыны девам этмек къысмет олмады. 1928 сенеси

Аблаким Ильмий акъсыз оларакъ миллетчиликте къабаатланып бефтан ерде тюрьмеге беш йылгъа къапатыла ве Сибирье ёлланыла. Муддети биткен сонъ Аблаким Ильмий севимли ватаны Къырымгъа къайтып оламай. Чокъ йыллар Украинада ишчи олып чалышмагъа меджбур ола. Сонъра бир ёлларыны тапып Румыниягъа кете ве анда яшай ве иджат эте. 1947 сенеси Месджидие шеэринде вефат эте.



**терджиман** — терджиме этиджи

**колемли** — мында: чокъ саифели, балабан

**муддет** — бельгилентген вакъыт

**миллетчи** — озъ халкъыны севген ве къайгъыргъан инсан

## КЪУРТЧУ БЕКИРЧИК

(икяе)  
(къыскъарттылгъан)

### I

Бекирлернинъ къорантасы пек эскиден берли балкъурт къулланып кельген Амет акъай иле къомшу эди. Амет акъай джыйнакъылы, дикъкъатлы ве ишинде меракъылы бир адам эди. Коре-коре сорай, арай озъ ишининъ устасы олгъан эди. Онъя «балджы Амет» дер эдилер. О бу лагъапкъа ляйыкъ эди.

Балджы Аметнинъ къорантасы бир къадын, бир къоджадан ибарат эди. Оларнынъ йигирми беш юва къурт иле ярым гектар азбар багъчасы бар эди.

О, азбарында алты чешит мейва аспар эди: эрте кираз, эрте къайсы, эрте шефтали, бера Александра, бумажный ранет ве сынап алмасы. Онынъ багъчасындан бу чешитлернинъ эр биринден йигирми бешер терек булуныр эди. О бу алты чешиттен бирини не денъиштирир, не оларнынъ сайыларыны эксильтип арттырыр эди. Онынъ къурт ювалары да йигирми бешни кечmez эди. Артса, арткъаныны я сатар, я да бир доступна багъышлар эди. Балджы Амет къуртчулыкъыны беджерип япкъаны киби, багъчаджылыкъыны да беджерип япа эди.

Балджы Амет къуртчулыкъ ишлерини къадынына да огretкен эди. Амиде енге де къуртчулыкъыны, багъчаджылыкъыны пек гузель аньлай эди. О да балджы Аметдай пек уста ашлай, пек уста джия, пек уста толдура эди. Олар къоджа ве къары азбарда ве багъчада берабер эдилер. Шимди бакъарсынъ, эр экиси де бетликлерини

күйген, азбарда күорт юваларыны бакъалар, анда чалышалар. Шимди бакъасынъ, къолларында чапа, я да сепет багъча чапалай, я да мейва джыялар...

Амиде енге тыш хызметлерде къоджасына насыл хызмет этсе, балджы Амет акъай да онъя эв хызметлеринде шай ярдым этер эди. О, сырасы кельсе, софра къояр, джыяр, атеш якъар, хамур басар ве джаяр эди. Тек о савут ювмагъа севмез эди.

Олар экиси де чокъ сагълам адамлар эди. Балджы Амет элли яшына баскъан бир къарт экеч, чырайындан къан тамлай эди. Амиде енге де сагъламлыкъта, такъатта Амет акъайдан чокъ эксик дегиль эди.



**джыйнакълы** — тертипли

**бетлик** — балкъуртлар тишлемесин деп бетини къапаткъан маҳсус орьтю



1. Бекирчикнинъ къомшусы ким эди? Олар не иле огъраша эди?
2. Амет акъай насыл инсан эди? О, япкъан ишини насыл япа эди?
3. Амет акъай ве онынъ къадыны азбарларыны насыл тута эдилер? Бекирчик не ичюн оларгъа сукъланып эди?

## II

Оларда бала-чагъа ёкъ эди. Онынъ ичюн олмалы, бала пек севе эдилер. Балаларнынъ арасында да энъ зияде Бекирчикни севе тургъян эдилер. Бекирчик факъыр бир тул къадыннынъ огълу эди. Онынъ анасы артель багъасында чалыша эди. Бекирлернинъ къорантасы факъыр яшай эди. Иш заманларында эвде ялынъыз къалгъян Бекирчик мектептен къайткъан соңъ, чокъусы къомшулары балджы Амет агъанынъ азбарында эгленир эди. Олар да Бекирчиктен агъырланмаз, онъя эр заман кулер юзъ косытерир, оны кельген сайын баллы-ягълы локъумлар иле сыйлар ве ашатыр эдилер. Бекирчик оларнынъ эвинде олгъан боллукъыны корип сукъланып ве иштен къайткъан анасына эки бир айтар эди.

— Ана, мен де балабан олсам, балджы Амет эмджеңдай къуртчу оладжагъым.

Бекирчик къуртчулукъынъ керчектен де меракълана эди. Бир къач керелер оны балкъурт талагъан эди. Онынъ башы-козю шишкин эди. Амет акъай Бекирчикни къурт талагъан сайын къадынына айта тургъян эди:

— Амиде, бизим къуртлар Бекирчикни кене пек талады, гъалиба, о энди бизим азбаргъя аякъ басмаз.

Бекирчик исе кене азбаргъя келир, къурт ювалары янына сокъулыр, оларның чалышкъанларыны бакъып отурыр эди. Бу соң дефасында къуртлар бир къачы бирден Бекирчикниң пешине тюшкен, къувалай берип, оны зияде талагъан эди. О заман оны Амет акъай дүйиш, къуртларның зеэрли инелеринден зорнен къурттаргъан эди.

Ачувлы олмагъанда, къуртлар озъ ишлерinden башкъа ич бир шейге къулакъ асмаз, дзылдай-бзылдай чалышып турар эдилер. Ювалары акътарылса, акътарылып баллары алышса, олар къысылса, я да эзильсе, чокъ ачувлана тургъан эдилер. О заман олар къаршыларына не расткельсе, ким расткельсе, онъя уджюм эте эдилер.



**тул** — къоджасыз къалгъан къадын

**боллукъ** — барлыкъ, яхшы яшайыш

**экиде бир** — кимерде



1. Бекир ве онынъ анасы насыл яшай эдилер?
2. Амет агъа ве Амиде енге Бекирчикни насыл къаршылай эдилер? Бекирчик не ичюн чокъусы вакътыны Амет акъайның азбарында кечире эди?
3. Бекирчик не ичюн къуртчу олмагъа истей эди?
4. Сиз Амет акъай ве Амиде енгенинъ Бекирчикнен достлугъына насыл бакъасынъыз? Бу инсанларгъя насыл къыймет кесесинъыз?

### III

Бу соң таланмадан, Бекирчик озю де къоркъылан эди. Заты балджы Амет акъай, о къоркъмаса биле, оны къурт азбарында быракъмай эди. Бекирчикниң гонълю кене джоша, оларның чалышкъанларыны сейир этмек истей эди.

— Шимди не япмалы?

Эвель не япмалы да, оларның янына бармалы? Я даа о юваларның ичлеринде не бар. Бекирчик оларны да даа арув коралмагъан эди. Олар ювада насыл яшай, насыл чалыша экенлер? О буларны корымеге, корип оғренмеге де истей эди. Онъя мурадына ирмек<sup>1</sup> ичюн, бир бетлик этмек керек эди. Ондай бир бетлик олса, о,

<sup>1</sup> мурадына ирмек — истегини ерине кетирмек

къуртлардан озюни къоруяджакъ эди. Амма оны къайдан алмалы? О бу акъта меракъле тюшонди, тюшонди — акълына бетлик япмакъ кельди.

Бекирчик бу тюшондже иле дөгъру Амиде енгенинъ эвине барды. Бекирчик оларнынъ эвине озы эвлерида кирип чыкъа эди. О заман Амет акъай эвде ёкъ эди. Амиде енге атеш тутандырып отура эди. Бекирчик софагъа козь ташлады. Оларнынъ бетликлери софада мыхта иловли тура эди. Бирини алды, чевирип-чевирип бакъты, гузельдже бакъты ве кене ерине ильди. Сонъра Амиде енгеден сорады:

— Къуртларны не вакъыт бакъаджакъсынъыз я, Амиде дудум?

О, Амиде енгеге «дудум», ве Амет акъайгъа да «эмдже» дей эди.

— Кене семирежегинъ келеми? — кулюмсиреп сорады Амиде енге.

— Энди мен оларгъа озюмни тишлетмем, — сарсылмаз бир къанаатле джевапланды Бекирчик.

Бу арада эвге кельген Амет акъай Бекирни корип онъя такъыла<sup>1</sup>:

— Ола, Бекир, насыл олды да, сен къоркъмайып мында кельдинъ? Мен сени энди бизим азбар олгъан якъкъа биле бакъмагъа къоркъар беллеген эдим. Аферин, аферин, сен кене чокъ батыр экенсинъ, Бекир!

— Э... сиз де пек къопайманъыз. Батыр олсанъыз, къуртларны бетлиksiz бакъчыныз, бакъайым.... бетлигим олса, мен де къоркъмам.

— Догъру айтасынъ, Бекир, бетлик олмаса, олар кимсенинъ хатырыны саймаз.

— Эй, сен базаргъа бир баргъанда, онъя да бир бетлик алып кельчи, — деди Амиде енге.

— Мен бетлигин чаресини озюм тапарым, — деди Бекир къанаатле.

— Тек сиз манъя къорт юваларынынъ ичини косътереджегинъизге сёз беринъиз.

— Бакъчы, бакъчы, сен мынавы эрифке, о къадар яман тонанды да, кене къурт мерагты сёнмеген! — деп, шашты онъя Амет акъай.

— О да балджы оладжакъ, коресинъ!

— Бекир, сен бизим зенаатны тутып алма! — деп эришти Балджы Амет Бекирге ве анълатты. — Айса, ярын къушлыкъта кель де, мен санъя юваларнынъ ичлерини де ачып косътерейим. Амиде дудунъ санъя бетликни берир. Берирсинъми, Амиде?

— Яхши даа, — разы олды Амиде енге.

Бекирчик къувана-къувана эвлериине къайтты.

<sup>1</sup> онъя такъыла — онъя эрише



**арув** — яхшы

**къоруяджакъ** — къорчалайджакъ, сакълайджакъ

**къанаатле** — эминлиkle



1. Балкъуртлар Бекирни пек мушкюль талагъан сонъ биле, онынъ къуртларгъа мерагты сёнмеди. Аксине, о даа зияде джошты ве авесленди. Не ичюн?

2. Бекирчик балкъуртларнынъ чалышкъанларыны огренмек ичюн, не япмагъа къарап этти?

3. Амет акъай Бекирнинъ мерагъына ве авеслигине насыл бакъты? Олар арасында насыл субетлерни саналаштырынъыз?



Амет акъай, Амиде енге ве Бекир арасындаки субетлерни саналаштырынъыз.

#### IV

Бекирчик эвге кельди. Анасынынъ эски марамасыны хатырлап, оны къыдырып тапты. Ондан бир къарыш кенълигинде бир парча кесип алды. Сонъра озюнинъ эски кольмегини хатырлады. Оны да козь къарапле кести, бичти, ине ве йип тапыштырып, ондан озюне бетлик тикти. Онъя тал чубукъларындан учь дане де къыршав ясал пекитти.

Мына санъа бир бетлик олды чыкъты.

Бекирчик бир къач saatлер оғърашып ясадыгъы бетликни башына кийди, кузьгүгө бакъты, чокъ яхшы олгъан.

— Амет эмдже базардан манъа бетлик кетиреджек олып турсун, мен оны япып азырладым, — деди Бекир озъ-озюне.

Онынъ акълына шу арада анасынынъ марамасы тюшти ве къасеветленди:

— Бу иш битти амма, анам не айтыр экен? Онынъ марамасы токъалланды, ёкъса...

Бекирчик бир талайлар<sup>1</sup> тюшюнип, анасына да къаршылыкъ азырлады: «Онынъ марамасы пек узун эди. Онынъ уджлары эр ерге илише бере тургъан эди. Шимди даа яхшы — анам раатча юрер. Оны о, бельки де, эслеп де отурмаз».

О бойле кузьгю къаршысында мырылданып тургъанда, анасы келе, шаша. Бекирчик де оны корип абдырай:

— Бу не къияфетти... сен бир тюрлю олдынъмы шу? — деп, шашып сорай анасы.

<sup>1</sup> бир талайлар — бир къач вакъыт



- Бир тюрлю олмадым, анам, къуртчу олдым, къуртчу!
- Башына джарты бир бетлик кечирмекле киши къуртчу оламы...

Къуртчу оладжакъ олам десе...

- Шай, шай анам! Къуртчу оладжакъ олам.
- Я бетликни къайдан алдынъ? — деп, сорады шубеленип анасы.
- Озюм такъыштырып ясадым.
- Къайдан такъыштырдынъ? Гъалиба, меним марамамы чонтукъладынъ...

Бекирчик анасына меселени олгъаныдай, тюшюнгенидай анълатты. Амет эмдженинъ онъа юваларнынъ ичини косътереджегини айтты.

Анасы онъа мараманы чонтукълагъаны ичюн дарылмады. О бугунъ иштен пек зевкъланып къайткъан эди. Оларнынъ артель багъчаларында эвельден балкъурт къулланыла экен. Балкъуртлар

шимди гъайып олса да, магъазда чокътан-чокъ къурт ювалары ята экен. Кечен йыл, яз айы башларындан оларның багъчасына номай бир огъул<sup>1</sup> къонгъан ве артель аркъадашлардан бири о заман бу огъулны тутып, бир ювагъа къойгъан экен. Къурт гузель къышлагъан. Баарьге къавий бир юва къурт олып чыкъкъан. Артельниң бугуньки топлашувында оның лакъырдысы да олгъан. Артель отарның эвельки балджылыгъыны тирильтмени къозгъагъанлар. Тек яхши бир къуртчу керек. О да олса, иш ёнейджең кетеджек.

О, Бекирчигини бетликли корыгенде, бутюн буларны фикирден кечирип, оның бу авеслигини еринде тапып<sup>2</sup> къуванды.

— Бу бетлик санъа шимдилик олып туарар. Ара тапкъанда, мен санъа башкъасыны тикерим. Сен Амет әмдҗени якъасындан быракъма. О зенааты оғрен де, биз сени артельге алып, артель къуртчусы япармыз.

**къыршав** — алкъа

**токъалланды** — мында: къыскъартылды

**къяяфет** — тышкы корюниш

**чонтукъ** — къыскъа

**номай** — пек чокъ

**огъул** — айырылып чыкъкъан балкъурт къорантасы



1. Бекир бетликни неден ве насыл такъыштырып япты?
2. Бетлик азыр олгъан сонъ Бекир не ичюн къасеветленди? О, анасына насыл джевал азырлады?
3. Не ичюн анасы Бекирге дарылмады? Анасы Бекирге насыл насиат берди?

## V

Бекирчик айланыр куню<sup>3</sup> къушлыкътан сонъра, бетлигини башына кечирип, дөгъру Амет акъайларның къурт азбарына атлады. Олар, о заман къадын ве къоджа бетликлери башларында къурт юваларыны акътарып, баарьлик козъден кечире эдилер.

Амет акъай узакътан Бекирчикни бетликли корип зевкъланды:

— Кель, бакъайым, яш къуртчу, якъын кель!

Бекирчик джесаретленди. Дөгъру оларның янына барды.

Къуртлар Амет агъаның ве Амиде енгенинъ башларында

<sup>1</sup> номай бир огъул — пек чокъ балкъурту олгъан огъул

<sup>2</sup> авеслигини еринде тапып — авеслигини дөгъру сайып

<sup>3</sup> айланыр куню — эртеси куню

үйрюльше, къолларына къонса да, тишлемей эдилер. Бу арада бир къурт вызылдаш келип Бекирчикнин къолуна да къонды. Къолуна къонгъанда — абдырап, къолуны силькти. Онынъ бу арекети Амет акъайнынъ козюне чалынгъаны иле о, багъырды:

— Шай этме! Сакъын, къыбырдама!

Бекирчик бу тенбиден сонъ, къол силькмедин вазгече де, къурт ачувланды, оны шу ачувлө инеледи.

— Бекир, инесини чек ал да, сонъ софада сирке вардыр, ал да, къолунъя якъ, — деп Амиде енге онъя ёлны огретти ве Бекирчик де онынъ дегенидай этип къайтып кельди.

— Сакъын-сакъын бир даа шай балалыкъ этме! — тенбиледи Амет акъай къайта баштан. — Къурт ачувланса, къайда къачсанъ, къувалап тишлер. Бакъ, къолумда къач данеси джуре!

Бекирчик оны озю де, кельгениле эслеген эди. О озъ абдыравукълыгъындан озю де утанды ве:

— Эмдже, мен энди шай этмем! — деди.

— Шай этмесенъ, эм таланмазсынъ, эм къуртлары дарылтмазсынъ.

Амиде енге меселени яраштырды:

— Къурт таласа, огъургъя, яхшы дей тургъанлар. Санъя, анълашыла, Бекир, къурт джуреджек<sup>1</sup>...

— Сен, Бекир, — ондай лафларгъа къулакъ асма. Къуртын джурмеген кишиси олмаз. Тек оны бакъмагъа бильмек керек. Иште къусур этмемек керек<sup>2</sup>. Сен оны истесенъ, оджанъдан да сорап бакъ. О да шай айтыр.

— Шай, эмдже, шай, оджам да шай анълата тургъан.

— Булар бир эди, эки олдылар, — Амиде енге къоджасынынъ фикирине къошуулмай, — сен, гъарип, энди бир шейге инанмай башладынъ...

— Мен сендай оладжакъ-олмайджакъ шейге инанмам. Энди вакъыт олмадымы я, сен о иши битирип, бир къаве пиширсенъ, даа яхшы эттер эдинъ.

— Арув я, даа атеш де сёнмегендир, бельки.

Амиде енге эвге къаве азырламакъ ичюн кетти. Бекирчик ве Амет акъай тек-тюк чечеклемеге башлагъан балабан бир кираз тереги тюбюнде топракъ устюне тёшелип отурдылар. Амет акъай сигарыны сарды, якъты. Ве сонъра Бекирчикле лаф да башлады:

— Демек сен, къуртчулыгъы огрендемек истейсинъ, ойлеми?

— Огретсенъиз огрендежегим.

<sup>1</sup> къурт джуреджек — яхшы къуртчы оладжакъ

<sup>2</sup> къусур этмемек керек — къуртларгъа заар кетирмемек керек

— Я сен меним башымы кутсынъ, кутсынъ де, сонъ безип ташларсынъ...

— Сиз огретмектен безмесенъиз, мен огренмектен безмем.

— Мен башласам, дёге-дёге огretиrim.

— Оджам бизге ойнай-куле огretе, биз де ойнай-куле огренемиз.

— Айса, биз де шай этермиз даа. Мен корем, сенде авес вар. Къуртлар сени бир къяч кере тишледи. Сени бу авесликтен айырып оламадылар. Демек, сенде авес зияде. Келип-кечкен авеслерден дегиль. Мен бу койде он йылдан бери къуртчулукъ этем, бир эрифниң баласы келип де, менден бу зенааты огрен-мек истемеди. Бу яхшы зенааттыр, балам.

— Мен де сизге ярдым этерим.

— О да арув амма, сен бизде шимди не япып олурсынъ? Унутмайып да, балабан олгъян сонъ япсанъ бильмем...

Оларның бу лакъырдыларыны табакъле къаве кетирип кельген Амиде енге узакътан эшитип, лафкъа къошула:

— Бекир, этем десе, ярдымы токъунмайджакъ баламы? О бизге чешмедин сув кетирсе, ана санъа балабан ярдым...

— О меним элимден келир, — деп разы олды Бекирчик.

— Шай даа... уфакъ фискичилернен куньге эки ёл сув кетирсенъ, бизге етишир.

— Я ананъ разы олурмы экен? — деп, сорады Амет акъай.

— Манъа анам, чокъ ойнасам, дарыла. Не япсам — япайым, чалышсам — о зевкълана.

— Шай даа, онъа дарылгъан киши оламы, зенаат огренеджек. Биз онъа огъул вакътында бир огъул адайыкъ, эй! — Амиде енге къуванды. Бекирчик де бу баҳышкъа севинип созды:

— Айса, мен сизге ара-сыра одун да кесерим.

— Коръдинъми, Бекир, — деди Амет акъай эришип. — Энди сенинъ ишинъ бир джорукъ олды. Мен де, айса санъа керестеси-ни берерим, косътеририм де, огъулынъя юва япып азырларсынъ, ве къуртчулукъка кереги къадар дюльгерлик огренирсинъ. Энди биз сёз кестик<sup>1</sup>. Шимди, Амиде, сен къавелерни къой да, бирер маҳрадж къавеси ичейик. Сонъ, Бекир, мен санъа бир де къуртчулукъ масалы айтырым.



**сирке** — *ruscha*: уксус

**кересте** — ишленген агъач

**дюльгер** — агъач ишлер устасы

**маҳрадж** — яхшы ишни алгышлав

<sup>1</sup> сёз кестик — бири-бирилизге сёз бердик, бир фикирге кельдик



1. Бекирчик япқын бетлигини башына кийген сонъ къуртлар янында озюни насыл тута?
2. Амет акъай Бекирчикке насыл насиатлар бере? Оны насыл тенбилий?
3. Азбарда Амет акъай ве Бекирчик не акъкъында субет-лешелер?



Амет акъай ве Амиде енге Бекирчикке насыл бакъалар? Олар насыл инсан олгъанларыны коремиз? Сиз ойле меракълы ве мераметли адамларны билесизми?

## VI

- А-на, балам, иш бойле ола. Сен шимди къач яшынъдасынъ? 12-де барсынъмы?
- Октябрь айы кельсе, 12-ге айланаджагъым.
- Шимдиден башлап яваш-яваш азырлансанъ, 25 яшынъа къадар сен де къуртлы, багъчалы бир адам олурсынъ.
- Меним бундай балабан тереклерим, бу къадар чокъ къуртым не вакъыт оладжакъ!..
- Сен осип етишкенджек, багъча да етишир. Къурт да азбарынъа сыгъмаз.
- Къурт юваларыны бакъайыкъмы, эмдже?
- Биз сенинъле оларнынъ астындан кирер, устюнден чыкъармыз. Шимди сен бакъ, о ювалар эп джайыкъ тизильгенлер. Сантырачлап<sup>1</sup> къоюлгъанлар. Ольчеп бакъсанъ да, анъларсынъ, оларнынъ сыра аралары да, юва аралары да учер метродыр...
- Мен метромы кетирип ольчеп бакъарым оны, — деди Бекирчик,
- кетирип бакъайым, эмдже? Менде метро вар, озюм ясадым.
- Оны сен башкъа вакъыткъа ташла да, шимди тюшюн, ювалар не ичюн шай сийрек тизиле?

Бекир тюшюнди ве акълына шу джевап кельди:

- Бир-бирине якъын къоюлса, ашыкъып башкъасынынъ юва-сына кирединдер даа?
  - Э, кирсе не ола? — о да къурт, бу да къурт... эп бир дегильми?
- Бекирчик кене тюшюнди, амма келишикли бир джевап тапалмады. Амет акъай озю анълатты.
- Балкъурт къарынджалай, бош вакъыт кечирмени ич севмез. Олар бутюн яз, марттан башлап, сентябрь сонъларына къадар чалыша, къышкъа азырланалар. Эгер багъда, багъчада тапмасалар,

<sup>1</sup> сантырачлап — шахмат тахтасы киби сыралап

сонъ хырсызлыкъя башлайлар. Бир-бирининъ юvasына далып бал хырсызлайлар.

— Бакъчы сен, о ярамазлар, — деди Бекирчик шашып — айса, олар да хырсыз экенлер да...

— Эм де гизли хырсыз дегиль... ачыкътан ачыкъя, купекуньдюз ювагъя далып, тутып алгъан хырсыз! Эгер къуртчу ачыкъ ағызы олса<sup>1</sup>, онынъ къурт азбарындан хырсызлыкъ ве къавгъя бир кунь эксик олмаз.

— Я манъя багъышлайджакъ оғъулынъызы да ярамаз бир къурт келип таласа, не япармыз экен, эмдже? — сорады Бекирчик къасеветленип.

— Мукъайт олурмыз, талатмамыз, — Амет акъай ишанчлы бир эда иле айтты.

— Я оны къайдан дуярмыз? Онъя не чаре олур экен?

— Меним къурт азбарымда ондай балабан къавгъалар, хырсызлыкълар олмаз ве олмады да...

Айткъаны дайын, онынъ азбарында ондай хырсызлыкълар олмай эди.

Амет акъай онынъ оғюни аладжакъ тедбирлерни биле ве япа эди. Онынъ ювалары бир-бириндөн авлакъ эди.

Амет акъай юваларны ачкъанда, бакъкъанда мукъайт ола, керек ишлерни япа, юва кенарларында балавуз парчалары къалдырмай. Бал тамлатмай, темиз тута эди.

Амет акъай Бекирчикке буларны, къуртчулукъынъ бундай алларыны анълатып айтты.

— Оғъулым олса, мен де шай этерим, э, эмдже?

— Айса, шай этмесенъ, къурт да яшамаз, къуртчу да оламазсынъ.

— Я, эмдже, меним оғъулым не вакъыт оладжакъ я?

— Бугунь не куню шу?

— Джума куню.

— Айнынъ къачы?

— Апрельнинъ он беши.

— Айса, оғъул бир айдан, майыс орталарында чыкъя башлар ве ильки оғъул сенинъ олур, Бекир.

 **джайыкъ** — бир-бириндөн авлакъ, сийрек  
**тедбир** — иш, чаре, арекет

<sup>1</sup> ачыкъ ағызы олса — *мында*: керек ишни озь вакътында этмесе



1. Амет акъай Бекирчикке къуртчулукъынъ насыл инджелик-лери акъкъында икяе этти?
2. Яхшы къуртчу олмакъ ичюн нелерни бильмек керек? Насыл чалышмакъ керек?
3. Бекир Амет акъайнынъ насиатлары, тенбилиерине насыл бакъя? Бекир Амет акъайдан нелерни огренди?

## VII

— Бекирчик! Бекир, къайдасынъ? Кельчи мында! — балджы Аметтинъ къаба давушы Бекирчикни агъыр тюшүнджеден къуртарды.

— Шу будакъъ бақъчы бир!

Бекирчик джалп этип бақъса, не коръсюн? Алма терегининъ будагъында көгерген бир балабан салкъым юзюм шекилинде бир оба къурт асылып турал.

— Бекир, мына къардашым, — бу сенинъ оғъулынъ оладжакъ. Баҳтынъя яхшы бир оғъул чыкъты.

— Ювагъа къапайыкъымы, эмдже? — Бекирчик абдырап сорады.

— Эбет, эбет къапатмакъ керек. Ал да кель, ювасыны такъыштырайыкъ, — деп, бағырды Амет акъай Бекирчикниң артындан.

— Оғъул къапкъаныны да унутмат!

Бекирчик ель-епелек оғъул къапкъаныны кетирди. Амет акъай онынъ къапагъыны ачып, оғъул къонгъан будакъынъ астына дөгъру тутты да, будагъыны къуветле силькти. О балабан салкъым къурт будакътан узюлип къапкъан ичине тюшти. Къуртлар аман къапкъаныны аркъалыгъы артына пекитильген балавузларгъа сарылмагъа башладылар. О заман Амет акъай къапкъаны баш ашагъы чевирди де, кене де о будакъъ асты. Бундан макъсат шу сарсынты арасында дагылгъан къуртларны да къапкъантай топламакъ эди.

— Айды, олар топлана турсунлар, биз барып юваны азырлап, ерине ерлештирийик.

Амет акъай юванынъ ичине бир дане солакълы, беш дане бош черчиве ерлештириди, сонъра Бекирчикке:

— Энди юва да азыр. Бар оғъулынъны кетир де ерлештирийик! Мукъайт тут, сарсылмасын!

Бекирчик оғъулны кетирди. Амет акъай онынъ къолундан оғъулны алыш, юванынъ оғюнде тёшевличувал устюне къуветле силькти. Сонъра о, бинълердже къуртнынъ ичинден ананы сайлап, оны къанатчыкъларындан тутып, юванынъ къонағындан сокъты.



Ичери киргенлеринден сонъра, ана юваны бегенсе керек, «той, туй, туй» деп йырлап къуртларны ювагъя чагъырды. Бу сесни эшиткени киби, къуртлар ювагъя толдулар.

Олар къуртларның ерлешип ювагъя толушкъанлырыны сейир эткенде, Амет акъай деди:

— Огъулның машалласы бар. Йыл къургъакъ кельмесе, Бекир, бу оғыул санъа 10 кило къадар бал да топлар.

— Эмдже... айса, меним балым да оладжакъмы?! — Бекирчик тааджипленип сорады.

— Олур, Бекир, олур, — ишанч иле текrar этти Амет акъай.

— Юванъ ёкъ эди — олды. Огъулның ёкъ эди — олды. Балынъ да олур. Яваш-яваш эписи олур.

Койде Бекирчиктен башкъа огъулы олгъан бала ёкъ эди. Къуртчулукъ япмагъа башлагъан балалардан ильки — Бекирчик эди. Бекирчикниң де огъулы бар эди.

Бекирчик бу йыл огъулындан он кило бал алса, оның он рублелик келири бар демек. О, балының ярысыны къышлыкъ сакъласа, ярысыны сата биледжек эди. Бекирчик о акъчаның ярысыны сакълап, ярысына китап алса, оның да китаплары оладжакъ эди.

Шу дакъъаларда оның хатрына келип кечкен шундай тюшюнджелер эди ки, оны джоштургъан, къувандыргъан ве эмджесининь бойнұна сарылып къуванчлы козъяшлары акъытмагъа меджбур эткен эди...



**когерген** — мавылашкъан, мораргъан

**ель-епелек** — тез-тез, чапа-чапа

**черчиве** — *русча:* рама

**солакълы** — балы олгъан черчиве

**къургъакъ** — къуру, ягъмурсыз



1. Балкъуртлар юваларындан огъулны йылның къайсы мевсимиnde чыкъаралар? Огъул ювадан насыл чыкъа?

2. Амет акъай огъулны насыл тутып ювагъа ерлештириди? Бекирчик онъа насыл ярдым этти?

3. Огъулы олгъан сонъ Бекирчикниң акъылына насыл фикирлер келе? О нелерни арз эте?

4. Бекирниң гонълюнде Амет акъайтъа ве Амиде аптеге насыл дүйгүлар догъа? Оларның арекетлерине сиз насыл къыйимет кесесинъиз? Олар насыл инсанлар?

### **Умумий вазифелер:**

1. «Къуртчу Бекирчик» икәесини окъугъан сонъ эр бир къысмына серлевалар къюонъыз ве дефтеринъизге язынъыз.

2. Бекирниң мераметлиги, ишкүрлиги, зенааткъа мерагъы, авеслигини косытерген парчаларны айры окъуп чыкъынъыз ве озюнъиз ичюн нетидже чыкъарынъыз.



**Зенаат — алтын билезликтір** деген мевзуда беян язынъыз. Сонъра беянларгъа эсасланып сынығынъызда субет кечириңиз.



Сиз насыл зенаатларгъа авесленесиз? Шимди эвде, азбaryнызыда ана-бабаларынъызгъа насыл ярдым этесиз? Нелерни оренесиз? Сыныфынъызда чешит зенаатлар акъкъында субетлер кечиресизми? Яшагъан еринъизде меракълы зенаат саиплери бармы? Оларнен корюшувлер, субетлер кечиресизми?



*Балкъурткъа таланмай, бал асралмаз.*

*Унерли къолда берекет бар.*

*Баба унери балағъа мирас.*

*Зенаатсыз адам — мейвасыз теректир.*

*Унерсизге дюнъя тар.*

*Зенаат — инсанның байлыгъы.*

### Монолог ве диалог акъкъында

Монолог ве диалог сёзлери грек тилинден алынгъан. монолог сёзю эки къысымдан ибарттири. *Монос* — бир, *логос* — сёз, нутукъ. Демек, **монолог** — **бу бир адамның нуткъу. Бедиий эсерде бир иштиракчи шахысның озь-озюне я да янында булунмагъан шахысларгъа айткъан нуткъуна монолог** дейлер. Диалог сёзю де эки къысымдан ибарттири. *Диа* — эки, *логос* — нутукъ. Демек, **диалог эки адам арасындаки лакъырдысы демектир. Бедиий эсерде эки ве экиден зияде иштиракчи шахыс арасындаки лакъырдыгъа диалог дейлер.**

Монолог ве диалог чокъ эсерлерде расткеле. Санада ойналгъан эсерлер исе монолог ве диалог шеклинде язылалар. «Къуртчу Бекирчик» икяесинде диалогларны сыныфта роллерге болип окъунъыз.



## ИБРАИМ ПАШИ

(1918 – 2008)

Ибраим Къуртумер огълу Паши 1918 сенеси Алушта районынъ Тувакъ коюнде койлю къорантасында дөгъды. Тувакъ кою Къырымнынъ энъ дюльбер кошелерининъ биринде ерлешкен. Ялы боюнынъ ярашыкълы манзарасы, ешиллик ичинде комюльген дагълар, къоджаман къаялар Ибраимнинъ хатырасында, козю оғонде эбедий сакъланып къалдылар. Сюргюнликте чокъ йыллар тувгъан коюнинъ, Къырымнынъ асретлигини чекип яшады, озюнинъ эсерлеринде Къырымнынъ аджайип табиат левхаларыны тасвир этти.

Ибраим Паши орта мектепни битирген сонъ Къырым девлет педагогика институтынынъ къырымтатар тили ве эдебияты болюгине кирди. Лякин агъыр хасталанғыдан себеп, институтны битирип оламады. Онынъ биринджи макъалелери район газетасында 1936 сенеси басылды. Биринджи икяеси исе 1939 сенеси шу газетада нешир этильди.

1944 сенеси Ибраим Паши къырымтатар халкъынен берабер сюргюн олунды. О, Озъбекистанда яшады ве яратыджылыгъыны девам этти. Бу девирде Ибраим Паши чокъ очерклер, икяе ве повестьлер языды. Языджы озюнинъ икяелеринде балалар омюринден муим ве зевкълы адиселер, арекетлерни тасвир этти.



**эбедий** — омюрлик, омюрининъ сонъуна къадар

**къоджаман** — пек балабан

**нешир этильди** — басылыш чыкъты

## ФЫНДЫКЪ ДЖЫЙГЪАНДА

(икяе)

### I

Ашир меним энъ якъын достум. Мен онынънен бир сыныфта окъуй ве бир раледе отурам. Эвлеримиз кыыр тёпесинде, ян-янашадыр. Бир де биримиз олмасакъ, аш биле ашамаймыз. Дерслеримизни де бирге азырлаймыз. Аширнинъ башы эсаптан чакъа<sup>1</sup>, манъа ярдым эте. Ойнамагъа кельгенде де шай, бирге ойнай, бир чанада таямыз.

Бугунь эрте яттым. Саба танъда турмакъ керек. Бойле вакъытларда да козюме юкъу кирмей. Чокъ раатсызландым. Сагъыма-солума айлана берем. Хораз кычыргъанда, аякъта олам. Яваштан Аширнинъ омузындан тартам ве:

— Тур, кетмек керек, — дейим.

Кой тынч, эр кес татлы юкъуда. Тынчлыкъны копеклернинъ, хоразларнынъ отыкор сеси боза. Гедженинъ къаранлыкъ пердеси котериле башлай. Та узакъта Къара-Тав дагъларынынъ кольгеси корюне. Тюрлю къоқъулар кетирген хафиф яз ели юзюмизни сыйрап кече. Биз кокреклеримизни ачып, ельге къаршы кетемиз.


Бу сефер де кунеш къызарып, дагъайым деп тургъанда, дагъыга келип еттик. Салкъын чокъракъ башында отурдыкъ. Отъмеклеримизни сарымсакълап, сувгъа батырып-батырып ашадыкъ. Башымызнынъ тёпесинде джайрап яткан гурь терекнинъ япракълары ель эскен сайын шувулдай. Бирараз раатлангъан сонъ, турып орман бою кеттик. Фындыкъ тереклери янында келип токътадыкъ. Тереклерде фындыкъ чокъ эди. Башта ерге салынгъан пытакъларындан джыйдышкъ, сонъ терекке тырмаштыкъ.

Ашагъыдан, «Танъ» колхозынынъ тарлаларындан, тракторларнынъ хош сеслери келе. Мен экинджи пытакъкъа алмаштым. Эки балабан таш арасындан манъа бакъып тургъан кийикнинъ джам киби парылдагъан козълерини эследим. Башымда сачларым тикленди, къоркътым. Къоркъкъанымны Ашир дуйса керек:

— Не коръдинъ, йыланмы? — деп сорады.

— Ёкъ, къашкъыр, — дедим мен ве къолумнен ишарет этип, косътердим.

<sup>1</sup> башы эсаптан чакъа — эсапны яхшы анълай



Ашир индемеди. Кульди.

— О къашкъыр дегиль, къочкъар, — деди.

Мен диккъатнен бакътым. Япракълар арасындан онынъ бойнузларыны, беяз бурнуны эследим. Ичиме джаным кельген киби олды.<sup>1</sup>

Торбаларымызны терекниң турь пытакълары арасында багълап, ерге тюштик. Бизим якъын баргъанымызны корыген къочкъар, ерни тепе башлады. О якъ, бу якъ фырлангъан козълеринде теляш, къоркъу бар эди. О артына чекилип, сарп къаягъа даянды. Онъа къачмагъа ер ёкъ эди. Ашир къолунда азыр туткъан йипниң алқасыны къочкъарның бойнузларына кечирди. О, буны апансыздан, буюк бир чеберликнен япты. Къоркъудан сескенген айван бойнуны бурды, арт аякълары устюне турмагъа ынтыларакъ, төпеге атылды. Соң, Аширни сюйреклеп, дагъ бою тартып кетти.

<sup>1</sup> Ичиме джаным кельген киби олды — джанландым, тынчландым

Ачыкъ чименлик ерге келип чыкъкъанда, Ашир йыкъылды. Лякин йипни ташламады. О, беш-он метр къурсакъ устюнде сюйрекленди. Чапып оларның янына бардым. Аширниң къолундан йипни алып терекке сардым. Инат къочкъар бирден токтталды. Ашир аякъкъа турып, асабийликтен манъа бакъты. Штанының тизлери, кольмегинин тирсеклері йыртылгъан, сыйдырылгъан тенинден къан акъа эди. Зор-белянен чокъракъ башына еттик.

Къочкъарның аякъларыны багълап, ерге яткъыздыкъ. О, теренден нефес ала ве къоркъу толу козьлеринен бизге бакъа эди. Кенъ, балабан къуйругъындаки яра къуртламагъа башлагъан. Ашир агъачтан къуртлавуч ясады. Къуртларны бирер-бирер темизледи. Салкъын сувнен яраны ювды. Къайдандыр йымшакъ, беяз таш кетирди. Оны тюйди.

— Нафталин олмагъанда, — деди о, — бабам бу ташның тозуны яра устюне сепе тургъан эди.

Бираzdан соңъ ёлумызны девам эттик. Къочкъар эп инатлыкъ этти. Ёлумыз ташлар, дерелер ичинден отип кете эди. Йипни тарта-тарта авучларымызның ичи къызыарып, къан къускъан эди. Мен бу эзиетке чыдаялмадым.

— Етер, энди тутмайджам, барсын кете берсин. Къой сюрюсими озю тапар, — дедим.

Ашир манъа тикильди. Юзүнде эеджан, кин бар эди.

— Батырлыгъынъ бу эдими? — деди. Мен шашмаладым. Демек, къоркъакъым... Ёкъ, мумкцион дегиль. Аркъадашларым буны эшилселер, «бакъса о къоркъакъъ» деп, айтмазлармы? Мен оларның козюне насыл корюнирим?

Тенимде къырмыскъа кезген киби олды. Йипке къавийдже япыштым. Ёрулгъанымны, къолларымның сызлагъаныны унуттым. Огге ынтылып:

— Айды, юрь кетейик, — дедим Аширге. О, йипни къолумдан тартып аладжакъ олды. Лякин бермедим.

Чокъ кечмеден, къыр тёпесине келип чыкътыкъ. Огде юксек дагълар джайрап ята эди. Къайдандыр чанъ сеси эшитильди. Орманлыкъта къой сюрюси корюнди. Сырлы, къара, семиз копеклер улып бизге таба чаптылар. Бу арада башына къара къалпакъ кийген, чалманлы, къолунда ыргъагъы олгъан чобан пейда олды. Мен оны бизге якъын кельген соңъ таныдым. Коюмизнин айтувлы чобаны Раим агъа эди. О севингениндөн кульди ве:

— Сабадан берли оны къыдырып юре эдим, чокъ сагъ олунъыз,

балалырым, аферин сизге, — деп бизни бирер-бирер къучакълап опти.

Орталыкъкъа акъшам къаранлыгъы чёккенде<sup>1</sup>, буюк бир шадлыкънен ве аркъамызда бирер торбачыкъ фындыкънен эвге къайттыкъ.



**тена** — тынч, кимсесиз

**хафиф** — енгиль

**сарп** — тёпеге дөгъру

**чименлик** — от ве чалылар осъкен ер

**эзиет** — къыйналув



1. Эсерде тасвиrlenген вакъиалар кимнинъ адындан икяе этиле?

2. Ашагъыдаки план боюнджа эсерни З-юнджи шахыс адындан икяе этинъиз:

- а) Якъын достлар;
- б) Фындыкъ джыйтъанда;
- в) Къочкъарнен расткелюв;
- г) Чобаннынъ севинчи.

3. Балаларнынъ еринде олсантызыз, сиз не япар эдинъиз?



1. Ашагъыдаки аталар сёзлерининъ маналарыны анълатынъиз:

*Достсуз адам* — къанатсыз күүш.

*Эйилик япсанъ* — сонгунаадже яп.

Бу ибарелерни икяенен насыл багъламакъ мумкун? Достлукъ ве яхшылыкъ акъкъында даа насыл аталар сёзлери билесиз?

2. Ашагъыдаки сёзлерге антонимлер тапып язынъиз: *танъатты*, *акъшам къаранлыгъы чёкти*, *хафиф ель*.



*Бетке дегилъ, юрекке бакъып дост ара.*

*Достуна урьмет эткен, озюне сайгъы къазаныр.*

*Адам* — иш башында белли олур.

*Унер* — эрнинъ къанаты.

<sup>1</sup> акъшам къаранлыгъы чёккенде — къаранлыкълашкъанда

## ЭМИЛЬ АМИТ

(1938 — 2002)



Эмиль Амит 1938 сенеси Акъмесджит шеэринде дөгъды. Онынъ бабасы, белли къырымтатар шаири Осман Амит, Ватан дженки башлангъанда, гизли тешкилятта къалдырылгъан эди. 1942 сенеси Осман Амит гестаподжыларның къолуна тюшип, эляк олды.

Эмиль Амиттинъ балалыгъы Озъекистанды Самаркъанд янындаки Чорхин къышлагъында кечти. Орта мектепни битирген соңъ, Эмиль Кустанай учуджылар окъув юртуна кире, чонки балалықтан учуджы олмакъыны арз эте эди. Лякин яшайышлары агъыр олгъанындан себеп, окъувны таштай ве бир къач вакъыт чиленгир олып чалыша. Бу вакъыт Эмиль бабасы акъында малюмат топлай, эдебиятнен меракълана ве озю язып баштай. Бу авеслик оны Ташкентке педагогика институтына алыш келе. Институтта окъувгъан йыллары «Ленин байрагъы» газетасында биринджи эсерлери басыла.

Онынъ эсерлерини белли языджы Шамиль Алядин бегене ве истилатлы яшкъя иджадий ишлеринде ярдым этмеге тырыша.

Озъекистан языджылар бирлиги истилатлы яшлар сырасында Эмиль Амитни де Москвадаки М. Горький адына Эдебият институтына окъувгъа ёллай. Институтны битирип, Эмиль Амит Ташкентке къайта ве «Ленин байрагъы» газетасында, соңра исе Москвада нешприятта<sup>1</sup> чалыша.

Эмиль Амит, бабасының изинден кетип, эдебиятымызның осүвине салмақълы иссе къошты<sup>2</sup>. О, балаларгъа багъышлап бир сыра икяелер язды: «Учурымлы ёл», «Къырмызы сарыкълар», «Анамнынъ умюти», «Чанта» ве дигерлери.



**чиленгир** — *русча:* слесарь

**иджадий (ишлери)** — яратыджылыкъ (ишлери)

<sup>1</sup> нешприят — китаплар азырланып чыкъарылгъан меркез

<sup>2</sup> иссе къошты — чокъ меракълы эсерлер язды

## ЧАНТА

(икяе)  
(къыскъартылгъан)

Сервер азбардаки арабачыкъ устюне отурып, пыркъ-пыркъ буруныны чеке. Элиндеки тазе ешиль чубукънен къумны сызгъалай.

— Эр вакъыт, эр шейниң эскиси манъа келип тюше, — деп, бурну астындан мырылдай ве козъашлары чыбырайым деп тургъан козълерини кирли эллериңен окъалай. — Китаплар, дерсликлер Левизадан къалалар, юз йыл яткъандан сонъ манъа... Энди чантасы да эскирди, онъа кереги ёкъ, манъа берелер...

Анасы йипке асылы bem-бөяз чамашырларны элинен тутып бакъа.

— Вазгеч энди, шыншыкълай берме! — дей о, артына айланып.

— Левиза бешке окъуй эди, сен исе беш дегиль, энди эки биле ала башладынъ... кузьге къалдынъ.

— «Эки» экен! Эльбет де, чантань эски олса, «эки» олур. Башкъа балаларның чанталары янъы, менимки исе...

— Етер энди! — анасы сертие, чырайы сыйтыла. — Сениң янъы формань бар. Левиза сендей экенде мектепке чабланып баргъан вакъытлары да ола эди... Шимди де мына, бакъ, достлары тогъайлыкъта ойнап-чапып юрелер, чечек джыялар. Энди мектепни битирип, китап-дефтерлерден къуртулдыкъ деп, къуваналар. Левиза исе мал фермасына кетмеге азырлана. Чалышмагъа огрендемек истей, бильгисини арттыраджакъ ола... Анасына ярдым этмек истей.

Анасы къуругъан чамашырларны топтай ве тахталары къуракъшыгъан мердивенден чардақъкъа котериле.

Сервер козъ къыйыгъындан<sup>1</sup> Левизаның пенджересине бакъа: аптеси озюнинь бөяз халатыны утюлей. Бу халат анасыныңки эди, шимди оныңки олды. Омюринде биринджи кере акъ халатнен ишке кетмеге азырлана.

Сервер аптесине бакъты. Аптеси онъа энди балабан къызы олып корюнди. Дюльберлиги де ойле... Койде ондайын дюльбер къызы ёкътыр. Лякин Левизаның къалын сачлары арасында къыстырылгъан пападие чечеги согъан, бурюшкен... Сервер аптесини адъыгъан киби олды. Банадаки джан агъыртысыны да унұтты. Еринден сыйрап турды, озеннинь о тарафында джайылгъан ешиль тогъайлыкъка козъ ташлады, этрафта чешит ренкте чокътан-

<sup>1</sup> козъ къыйыгъындан — дүйдурмайып бакъмакъ



чокъ чечек джайрап ята, ойле бир дюльбер манзара ки, гуя оны тылсымылы эллериңен насылдыр бир адҗайип рессам япкъан.

Сервер сонъки сефер буруныны чекти де, къоранынъ устюндөн секирип, о тарафкъа чапып кетти.

... Левиза эм йырлай, эм де уюлей. Пенджередеки чөль чечеги дестесини эслемей. Къашан ельчик чечеклерниң япракъларынен ойнай, ельпирете, гуя тогъайлышының къокъусыны Левизагъа сездирмек истей. Левиза пенджередеки чечеклерни корыгенинен, шашып къалды. Атта къолуны биле пишириди<sup>1</sup>. Чечеклерни элине алды, къокълады, багърына басты<sup>2</sup>. Соң пенджереден башыны чыкъарып,

белинедже эгилип, о якъкъа, бу якъкъа бакъты.

- Сервер, Серверчик! Бу ерден ич кимсе кечмедини?
- Ёкъ, корымедин, — деди Сервер ве аптесине тилини косытерип, озен ялысында ойнагъан балалар бетке чапмагъа ынтылды.
- Сервер, кадым, бу якъкъа кельчи. Санъа гизли бир шей айтаджам.

Сервер, тиль косытергеним ичюн къулакъларым бурулмазмы экен деп, къоркъа-къоркъа пенджере янына кельди.

— Мен санъа, кадым, бириңжи айлыгъымдан янъы чанта алымым, — деди Левиза Серверниң къулагъына пысылдал. Деди де, айткъанларындан утандыр киби, шу saat башыны кери чекти.

— Худжур къызы, бу бизим Левиза, — деди озъ-озуне Сервер. — Чечеклерни мен шай, олмайджакъ бир шей деп, кетирдим, о, исе манъа чанта... Бар да анъла, бакъайым, къызы баланы.

<sup>1</sup> къолуны пишириди — къолуны якъты

<sup>2</sup> багърына басты — коксюне басты



**сертиймек** — ачувланмакъ  
**чырай сыйтмакъ** — ачувлы олып бакъмакъ  
**тогъайлыш** — отлар осъкен ер  
**пападие** — беяз тюсте яз чечеги (*русча*: ромашка)  
**худжур** — анълашылмагъян  
**эйи** — яхши



Икяени окъуп, суаллерге джевап беринъиз:

1. Сервер неге кусытى?
2. Не себептен Сервер аптесини аджыды?
3. Чечек дестесини корип, Левиза не япты?
4. Не ичюн Левиза бу чечек дестесине бойле севинди?
5. Левизанынъ джиддий, эмексевер къызы олгъаны къайсы левхада кориуне?



Сиз Серверинъ къайсы табиат чизгилерини бегендинъиз?

Сизинъ агъа, аптенъиз я да къардашларынъиз бармы?

Сиз оларнен муаббетсинъизми? Керек вакътында биребиринъизге насыл ярдым этесиз? Къорантанъызда бирлик, муаббетлик ве меракълы яшайыш олмасы ичюн нелер япасыз?

Сиз омюринъизде якъын дост, дөгъмушларынъызгъа эйи иш яптынъызмы? Бойле ишлеринъиз акъкъында икяе этинъиз.

## АНАМНЫНЪ УМОТИ

(икяе)

(къыскъартылгъан)

... Мен багъча ичинде гурь осъкен отларнынъ арасында юрем.

— Эй, Энвер, бакъчы мында!.. — кенарадан кимниньдир сеси эшитильди. Бакъсам, бираз авлакъта Бахтияр тура. Бардым.

Биз Бахтиярнен биринджи сыныфта берабер окъуймыз. Мен энди озъбекчени баягъы билем ве балларнен лакъырды этип, анълашып олам.

- Къайда кетесинъ? — деп сорады Бахтияр.
- Бир ерге...
- Юр бизге барайыкъ. Анам бутунь пите пиширеджек...
- Ёкъ, — дедим мен. — Меним анам да пите пиширеджек...

Биз чанталарымызыны саллай-саллай баягъыт лаф этмей юрдик. Багъчанынъ о бир башындаки тереклерниң арасындан корюнген дувал тарафттан созукъ сес эшитильди:

— Бах-ти-я-ар!

Бахтиярнынъ чырайы сытылды.

— Аптем чагъыра, — деди де, ачувланып аякъ устюне турды.

— Не ке-ер-ек? — деп, багъырды.

— Бахтиярджан! Тез ол, чап эвге. Буюк байрам... Джэнк биткен!..

Гъалебе!..

Бахтияр омузларыны къысты, шашмалап, манъа бакъты. Соң бир кереден еринден сыртырылды ве, табана къувет<sup>1</sup>, аптеси тараф къа чапты.

Мен шу ань анамны ойладым. О эшиткен экенми, аджеба? Эшитмеген олса даа яхшы!.. Бабамны башта озюм къарышылап алым. Эгер бабамнынъ къолундан тутып, апансыздан босагъадан берабер келип кирсек — ана къуванч къайда олур!.. Догъру станциягъя чапмалы... Шу ерден сыртырылып, багъчанынъ ичинден кестирип, ёлгъа чыкътым. Нефесим тутула. Богъазым къуруй... Мен исе эп чапам. Кунь къонгъандже станциягъя барып етишмели. Бабамнынъ кокрги орденге толудыр. Мен билем, о манъа бирисини берир.

Орталыкъыны къаранлыкъ баса башлады. Тереклерниң арасындан телюкели бир шытырды эшитильди. Мен энди къоркъа башладым. Артыма къайтайыммы экен?

Бираздан огюомде ат адымлары эшитильди ве атлынынъ кольгеси корюнди. Онъа ёл берип четке чекильдим.

— Къайда, огълум? — деп сорады атлы, атыны токътатып. Мен бизим почтальонны таныдым.

— Станциягъа! — дедим мен. — Бабамны къарышыламагъа!

— Оны санъа ким айтты, — деп, тааджипленди почтальон.

— Я джэнк битти де! Эшитмедиңизми? Энди эр кес эвлериине къайтаджакъ...

— Мен шимди станциядан келем. Бугунь энди поезд олмайджакъ,

— деди о, эеджанлы давушнен. — Кель, огълум, биз эвге къайтайыкъ. Анань анда сени къыдырып шашмалагъандыр...

— Мен станциягъя бараджагъым, — деп инатланам.

— Сенинъ анань мен бугунь мектюп кетирдим. Бельки, мектюп бабанъдандыр. Къачан къайтып келеджегини язадыр? Юр, кетейик!

<sup>1</sup> табана къувет — пек тез чапмакъ

— О, эгилип, манъа къолуны узатты. Мен чапып, онынъ къолуна япышкъанымнен, атнынъ терли аркъасында пейда олгъаным бир олды.

— Бель бавумны яхшы тут, — деди о, манъа айланып.

Анам исе, бутюн къышлакъыны айланып чыкъкъян, мени тапамай ве даа къаерде къыдыраджагъыны бильмей, янъычыкъ эвге кирген. Ат, тапырды котерип, биз отургъан эвнинъ огунде токътады.

Абдырап, къапугъа чыкъкъян анама: «Мына, оджапчем, алынъыз йигитинъизни», — деди де, яваштан мени ат устюндөн тюшюрди.

Анам мени сёгер деп къоркъкъанымдан, башымны ашагъы алыш, онынъ янына бардым. Анам исе, терен кокюс кечирип, меним башымны сыйпады. Соң яныма чёкти де, мени къучакълап, багърына басты, анамнынъ юргеги «дук-дук» ургъаныны, янакъларынынъ сылакъ олгъаныны дүйдым.

— Бар, огълум, къолларынъны юв, — деди о, басыкъ давушнен. — Мен бугунь санъа лезетли аш пиширдим. Шимди берабер ашармыз.

Мен софагъа чыкътым, элимни, бетимни ювдым. Ичери къайтып киргенде, софранынъ устюнде бир чанакъ пишкен къартоп бувланып тира эди. Онынъ къокъусы бурнума ойле лезетли олып урулды ки, мен, сабыр эталмай, аман бир къартопчыкъ алыш къапайым деп, пармакъларымны пиширдим. Анам, мысырбогъдай питесини экиге болип, чокъча кесегини манъа узатты. Соң биз, сары чёльмек пиалалардан къайнагъан сув ичиш, индемей отурдыкъ.

Мен зияде ёргъун олгъанымдан, юкъум кельди. Аякъларымны ювып яттым. Ничюн бильмем, бугунь анам, дерсинъни азырладынъмы деп, сорамады. Озюнинъ насылдыр тюшюнджелири бар, бельки унуткъандыр. Анам софраны джыйыштырды, сюртти, соң омузына меним кичкене фуфайкамны ташлап, дефтерлерни тешкермеге башлады.

Ниает, козълерим юмулды, юкъугъа далдым. Юкъу арасында япракъларнынъ серин шытырдысы ве олардан саркъып тюшкен чыкъ тамчыларынынъ сеси эштильди...

...Козълерим ачып, бель устюне турдым. Анам янымда. О, башыны ястыкъя комген, индемей ята. Лякин, не ичюндири омузлары силькине. Анама бакъып, меним де агълайджагъым кельди. Амма мен шу ань озюмде яны бир дуйгъу ис эттим, бу дакъкъада манъа озюмни къолгъа алмакъ керек олгъаныны анъладым. Къолумнен яваштан анамнынъ башыны сыйпап юкъулы, лякин къатты давушнен:

— Юкъла, тынч юкъла. Мен янынъдам, анам... — дедим.



1. Икяеде къайсы девирдеки вакъиалар тасвирлене?
2. Гъалебе акъкъында эшиткенде, Энвер шу ань кимни ойлады?
3. Энвер анасынынъ яныгъыны аньлап, озюни насыл тутты?

## Икяе акъкъында

Икяе несир эдебиятнынъ энъ кенъ даркъалгъан ве окъунарлы шекилидир. Икяени эм буюклер, эм балалар севип окъуйлар. Икяеде эсас къараманынъ омрюндөн муим ве меракълы бир я да бир къач адисе тасвирлене.

Икяе колемине коре балабан олмагъан, меракълы, мундериджели эсердир. Икяеде бир эсас къараман ве бир къач иштиракчи шахслар ола биле.

Джиан эдебиятында чокътан-чокъ икяелер яратылгъан. Чешит тиллерде язылгъан икяелерниң ады-эсабы ёкъ. Къырымтатар эдебияттынъ да муим бир къысмыны икяелер тешкиль эте.

Къырымтатар языджылары да балаларгъа багъышлап, балалар акъкъында чокътан-чокъ меракълы икяелер яздылар. Сиз бу эсерлерниң чокъусынен энди таныш олдынъыз ве даа чокъ икяелерни окъуп, эм зевкъланырсыз, эм тюшүнджеge даларсыз, озюнъиз ичюн файдалы нетиджелер чыкъарырсыз.

Йыл девамында сиз дерсликке кирсетильген икяелернен таныш олурсыз, икяелерни окъугъанда, сиз хаялланып озюнъизни эсерлерниң къараманлары Осман, Бекирчик, Сервер, Энвер, Лячин Асан, Амет агъа, Том Сойер, Шахзаде, Къуртнезир ве дигерлеринен тасавур этерсиз, оларнен берабер сынавлардан кечерсиз. Олар сизинъ якъын достларынъыз киби олып къалырлар.



## ЭРВИН УМЕРОВ

(1938 – 2008)

Эрвин Умеров 1938 сенеси Кырымда, Янджу коюнде дөгъды. 1944 сенеси Умеровларның къорантасы бутюн кырымтатар халкынен бирликте Озбекистангъа сюргүн этиле<sup>1</sup>. Эрвиннинъ балалыгъы ве осьмюрлик деври Фергана виляетининъ Алты арықъ къасабасында кечти.

Орта мектепни битирген сонъ, Эрвин алий окъув юртуна кирмеге ашыкъмады. Омюрни огренмеге тырышты. О, ана-бабасына ярдым этмек макъсадынен нефть заводына ишке кире ве бир-къач йыл чиленгир олып чалыша.

Эрвиде эдебияткъа авеслик эрте уяна. Орта мектепте окъугъан вакъытта о, бедиий эдебиятнен джиддий меракълана ве озю де икяечиклер язмагъа башлай. Истидатлы осьмюрниң эльязмалары белли кырымтатар языджысы Шамиль Алядиннинъ къолуна тюше ве онынъ дикъкъатыны джельп эте. Шамиль Алядин истидатлы яшкъа чокъ ярдым эте ве Эрвиннинъ биринджи эсерини неширге азырлай.

«Адам озъ ерини тапты» серлевалы биринджи икяесини язғанда, Эрвин Умеров он беш-он алты яшында эди.

1965 сенеси Эрвин Умеров Москвадаки М. Горький адына Эдебият институтыны битирди. Бир-къач йыл о, «Ленин байрагъы» газетасында чалышты. Сонъра Москвадаки «Бала эдебияты» нешриятына ишке авушты.

Эрвин Умеров балалар ичюн де чокъ эсерлер язды. Онынъ «Эрдайм кунеш олсун» китапчыгъы балалар ичюн язылгъан икяелер джыйынтыгъыдыр. «Омюрде ильк кере» икяеси де бу китапкъа кирген эсерлерден биридир.



**осьмюрмик деври** – 12-13 яшындаки девир  
**виляят** – *руска:* область

<sup>1</sup> сюргүн этиле – зорбалыкънен кочюриле

## ОМЮРДЕ ИЛЬК КЕРЕ

(икяе)

### I

Энвер бугунь эрте уянды. Козюни ачкъанынен пенджереге бакъты. Саат докъуз олгъанына бакъмадан, кунеш корюнмей. Къара булутлар азбардаки тереклеринъ пытакъларына асылгъандай эгильгенлер.

Энвер, сыджакъ ёргъаны астындан чыкъмагъа кыймай, ашхане беттен кельген савут-саба тасырдысына динъленип ятты, бираздан соң чыплакъ аякъларыны ёргъан тюбюнден чыкъарып, кроваттан ашагъы саркъытты. Бедени чимирдеди, тавукъ тени киби тюклери тикленди. Аякъка тургъанынен огундеки пенджере, урба долабы къайдадыр учкъан киби корюнди. Башы айланды, козълери огунде чешит ренкли тёгереклер пейда олды. Къайтып тёшекке ятты. Бир саниеден соң озуне кельди. Агъызынынъ ичине дерсинъ къум толдургъанлар, башы патлайджакъ, юрги дук-дук ура. «Не олды шу манъя? Ич бойле олмай эдим де?!» деп, тюшюнди. Оны къоркъу басты.

— Ана, ана! — деди къарыкъ давушнен ве «сесимни анам эшитmez» деп ойланды, лякин къычырмагъа алы олмагъанындан, динъленип ятты.

Анасы кирди.

— Не турмайсынъ, не олды, балам? — деп онынъ манълайына элини къойды. — Вай, балам, сыджагъынъ бар, токъта ольчейим.

Анасынынъ чырайы денъишти, козълеринде къоркъу атеши янды, къалтыравукъ эллеринен долапны ачып, бир шейлер къыдырып башлады.

— Тюф-тиоф, балам, санъа не олгъан экен? Я тюневин чапкъалап юре эдинъ де...

Сыджагъы отуз докъузгъа якъын эди.

— Анифе! Анифе!

Анифе анасынынъ янында, пармагъыны агъызына сокъып, ири къара козълерини де агъасына, де анасына тике, озундже бир шейлерни ойлана эди. «Бу ярамаз Энвер даа насыл оюн тюшюнин тапты экен? — дей эди ичинден. — Илле бир шей чыкъарыр. Бир кере сачакъта маяк ясады. Эвимиз яна язды. Бир кере де парашют ясайджакъ олып, анамнынъ антерликке алгъан басмасыны парчакесек этти. Даа бир кере «Индстангъа» къачты, анавы Зульфатнен.

Оларны учь кунь къыдырылар. Анам, гъарип, агълай-агълай бир олды... Сонъ милиция тапып кетирди. Устю-башы кир, чамур, ачлыкътан козълери айлангъан, бир бутон отъмекни ютты йиберди...»

— Акъыз, не джевап бермейсинъ? Эшитмейсинъми?

— Эшитем, — деди Анифечик.

— Эшитсень, чап, тизенъе бар, хастаханеге телефон этсин, эким чагъырсын. Тез ол!

Анифе эки бант багълангъан саччыкъларыны силькитти де, козъден гъайып олды.

Энвер меджаласыз козълерини анасынынъ юзюне тикти: юзюнинъ териси сааргъан, джакъ суеклери сюйрелип чыкъкъан, козълери тюбюнде, манълайында терен бурюшиклер бар. Къансыз дудакълары чатлагъан. Башына байлалгъан юнь шалынынъ астындан чал тюшкен сачларынынъ уджу корюне...

Энверниң юргине пычакъ санчылгъан киби кельди, анасыны адкыгъанындан, омюринде ильк кере козюндөн ири козъяш тамчылары тыгъырды. Энвер юзюни дивар тарафкъа чевирди.

«Анам бир озю эки баланы кийиндирмек, ашатмакъ керек. Эвге одун, комюр алмакъ, электрик ве квартира ичюн пара бермек керек. Буларнынъ эписи — анамнынъ бойнунда. Бабам бизни, Анифечик учь айлыкъ олгъанда, ташлап кеткен. Анама насыл агъырлыкъ кетиргенимни бильмей, мен оны эр кунь раатсызлай, къаарылendirе эдим. Къач керелер мектепке чагъырдылар. «Огълунныз бойле чая олса, мектептен къувармыз», — дедилер, къач керелер къомшулар шикает эттилер. Бириниң копегини ургъан, дигериниң пенджере джамыны сындыргъан...

Энверни бойле тюшонджелер сарып алгъан арада, Анифечик эвге чапып кирди, кескин сеснен:

— Шимди эким келеджек! — деди.

— Явашча олса, балам, дагъда дегильсинъ де. Сабыр эт, эр шей дарма-дагъын...

Анасы о бир одагъа чыкъкъан сонъ. Анифе агъасына якъынлашты.

— Санъа не олды? — деди о. — Тюневин сен Керимниң «пармагъыны» тартып алгъанынъны корьдим.

— О да насыл «пармакъ», — Энвер манълайыны бурюширди. Бу балаачыкътан эр шей беклемек мумкүн. Хаста олсань да, раатлыкъ берmez.

— Аnavы мотоцикл «пармагъы» даа. Керим «пармагъымны бер» дегенде, чектинъ. Мен эписини корьдим...

Энвер абдырап къапугъа бакъты. «Ана санъа къара йымырта! А намнынъ энди ич бир вакъыт джаныны агъырттырмайджакъ олгъанда, Анифе шу «пармакъыны» тапып чыкъарды. Анам Керимни ургъанымны бильсе, кене ачувландыр, раатсызланыр...»

Энвер татлы сёзнен къардашыны оплады.

— Билесинъми не? — деди о, — кроватнынъ ортюсини котерчи...

Анифе агъасынынъ айткъаныны авеслиknен япты. Кроват астында насылдыр тёгерек демир парчалары ята эди.

— Корьдинъми? — деди Энвер къоркъунчлы давушнен. — Ну бомбадыр. Эм озю де сенинъ кроватынъ астында ята. Эгер кене Керимчик акъкъында айтаджакъ олсанъ, ястыгъым тюбюндеки кнопкани басарым, экимиз де кокке савурылырмыз, парча-кесек олурмыз.

Анифе козълерини тёгереклендирип, арткъа чекильди.

— Ана, шойле, — деди Энвер. — Сакът ол. Зырылдасанъ, — экимиз де сагъ къалмамыз. Анавы олмайджакъ демир «пармакъыны» исе, бар, магъаздан ал да, Керимге алып кетип бер. О манъа керекмей.

— Я не ичюн тартып алдынъ?

— Бильмейим. Алдым иште. Севмейим мен о Керимчикни. Ойле тирнекли, китапханеден чыкъмагъан балаачыкъларны севмейим. Дерсинъ, ондан акъыллысы ёкъ...

— Керим яхшы бала, — деди Анифе. — О бизге чамурдан айванчыкълар ясап берди. Соң къардашынен мени «Хатабыч къартбабай» киносина алып барды. Эскимо да алып берди.

— Пек яхшы экен, мен исе оны севмейим.

— Сенинъ Зульфат достунъны мен де бегенмейим. О, сени ёлдан чыкъара<sup>1</sup>...

— Охо! Зульфат-акъай огълу! Дост! Сен даа бойле шейлерни бильмейсинъ?

— О, ярамаз бала. Мышыкъ баласынынъ къуйругъыны ким кести? Зульфат! Насибанынъ къокъласынынъ козюни ким чыкъарды? Зульфат! Ана шойле, агъам! Мен сенинъ бомбаньдан да къоркъмайым! Керимни ургъанынъны да шимди анама айтаджам...

Анифе ачувландымы, дюнъяны башына киер<sup>2</sup>.

— Тишишиши! — деди Энвер. — Эшитесинъми, чыкъылдай. Къыбырдадынъ — паттайджакъ!

<sup>1</sup> ёлдан чыкъара — боза, ярамай ишлер яптыра

<sup>2</sup> дюнъяны башына киер — кимсе токтатып оламаз

Анифе козълерини агъасына тикип динъледи, ич бир шейнинъ чыкъылдысыны эшитмесе де, яваштан:

— Айды, айтмам, хастасынъ, — деди. — Яхшы олгъан соң айтырым, башкъаларның джаныны нафиле агъырттырмазсынъ.

— Яхшы, яхшы... — деди Энвер башыны къыбырдатып. «Амма да бала, бойлесинен хасталыгъынъны да унутырсынъ...».



**чая** — ярамаз

**нафиле** — себепсиз, акъсыз ерде

**эким** — доктор

**сание** — бир ань

**сачакъ** — мында: эвнинъ тёпеси



1. Икяенинъ биринджи къысмындан сиз, Энвер ве оларның къорантасы акъкъында не бильдинъиз? Энвернинъ япкъан «ишлери» акъкъында икяе этинъиз. Онынъ «ишлерине» насыл къыймет кесесинъиз?

2. Энвер анасының юзюне ильк джиддий бакъкъанда, онынъ юргини насыл дуйгъулар сарып алды?



*Къоркъу басты, озюне кельди, бедени чимирдеди ибарелеринен джумлелер тизинъиз.*

## II

Ярым saatten Айболитке бенъзеген эким кельди. Къартбабай-чыкъ Энвернинъ агъызыны ачып бакъты, пармакъларынен къабургъаларына урды, Энвернинъ къытыгъына тийип, кульди, соң фонендоскопыны чыкъарып, онынъ къафесини динъледи.

— Огъланчыкъынъ хасталыгъы къоркъунчлы дегиль — адий грипп. Лякин онынъ джигерлеринде кичкене тамгъа бар. Вакътында бакъылмаса, озюнъиз билесинъиз...

Энвер экимнинъ айткъаныны анъламады, анасына бакъты. Анасының козълеринден тыгъыргъан козъяшлары янакъларында сылакъ из къалдырып, къара антери устюне тюше эдилер.

— Пек янмагъа адже ёкъ<sup>1</sup>, — деди эким. — Бу хасталыкънен күрешмеге бизим кучюмиз ете, огълунъыз бир бучукъ-эки айдан яхшы олур! Раатсызланманъыз.

<sup>1</sup> янмагъа адже ёкъ — къасеветленмеге себеп ёкъ

\* \* \*

Эким дөгърусыны айтты. Энвер хастаханеде эки ай ятты. Бу вакъыт ичинде чокъ шейлерни корьди ве анълады. Биринджи куньлери Энверге анасыны биле йибермедилер. Анасыны эр кунь, атта гедже уянса биле, корип алышкъан Энвер, анасыз къалса, алы не оладжагъыны ойланды. Ана къыйметини даа терен ис этти<sup>1</sup>.

...Хастаханеге тюшкенининъ экинджи афтасы эди. Энвер азбаргъа бир озю турып чыкъты, къарт эрик терегинде чапкъалагъан такътакъкъушнынъ арекетлерини сейир этти. Бу вакъыт хастаханенинъ тахтанен къоралангъан еринде насылдыр бир давуш эшилти. Бакъса, не корьсин: тахта арасындан Анифе, юзюкъоюн сюйрекленип, ичке киреята. Устю-башы тоз-топракъ, куле-куле агъасына тараф адымлады. Энвер омрюонде ильк кере къардашыны къучакълады, йымшакъ, сарышын сачларыны сыйпады, опти.

Анифе исе агъасына дикъкъатнен бакъып:

- Бомбанъ эп чыкъылдай, — деди.
- Насыл бомба о? — Энвер о яланны чокътан унуткъан эди.

Ярамазлыкълары, дерсинъ, дигер бир дюньяда къалгъан.

— Анавы бомба да, шу... кроват тюбюндеки. Гедже яткъанымнен динъленип бакъам: эп чыкъылдай. Саат киби. Башта патлар деп къоркътым, энди къоркъмайым, агъа къардашыны патлатырмы?

— Ах, меним ахмакъ кадячыгъым! О бомба дегиль де. Олмайджакъ демир парчасы. Мен олардан гантель ясайджакъ эдим. Сени къоркъузмакъ ичюн бомба дедим. Дарылма<sup>2</sup> манъя, яхшымы?

— Яхшы, — разы олды Анифе. — Керим де санъа дарылмай. «Пармагъыны» къайтарып бердим, къуванды. Озю де башкъасыны тапкъан экен.

— Яхшы, яхшы... Анифе, анам айттымы санъа, анавы Зульфаткъа барып, китап ал, деп?

- Айтты, — Анифе башыны кедернен саллады.
- Къана?..
- Бермеди. «Китаплар долапта, анахтары джоюлды», — деди.
- Соң мен чевирилип, чыкъып кеттим. Араба къапугъа еткенде, анасы Зульфатны сёггенини эшилти: «Энвернинъ юкъунчлы хасталыгъы бар! Асыл, онъа барайым, онынънен лаф этейим деме, аякъларынъны сындырырым!» — деп къычырыкълады.

Анифечик юмручыкъларынен козь яшларыны сюртти.

<sup>1</sup> ис этти — сезди, дүйды

<sup>2</sup> дарылма — джанынъ агъырмасын

— Насыл ярамай хасталыкъ о, агъа, я сен тезден чыкъмайджакъсынъмы? — деди.

— Эбет, Анифечик, эбет, тезден чыкъаджагъым, — деп, Энвер кадясынынъ кумюш сачларыны сыйпады.

— Китапларны эписи бир кетирдик, — деди Анифе бирден кулюмсиреп.

— Къана?

— Анда, — Анифе дивар тарафкъа эль саллады, — Керим де, чагъырсанъыз, тахта арасындан кечерим, деди, чагъырайыммы?

— Эбет, эбет, чагъыр. Эй, Керим, Керим...

Тахта арасындан Керимнинъ тозлу, кулер юзю корюнди. Онынъ элинде бир десте китап бар эди.

Энвер хастаханеден чыкъкъанда, оны анасы, къардашы ве досту Керим къаршылап алдылар. Энвер энди ана, къардаш ве дост не экенини яхшы анълагъян эди.



**тамгъа** — мында: хасталыкъ иллеси

**юзюкъоюн** — юзю ашагъы



1. Энвер ана къыйметини не вакъыт ис этти?
2. Энвер къардашы Анифе, досту Зульфат ве Керимге озы мунасебетини денъиштирдими, не себентен?
3. Не ичюн бу икяе «Омюрде ильк кере» деп адландырылгъан?



«Акъиккүй дост насыл олмалыдыр?» Бу мевзуда субет кечириңиз ве беян язынъыз.



*Акъ дост къара кунъ ичюн.*

*Ямандан къач, яхшигъа къучакъ ач.*



## ВАТАН ДЖЕНКИ АҚЬҚЫНДА ЭСЕРЛЕР



### ДЖЕВДЕТ АМЕТОВ

(1917 – 1995)



Балалар ақьқында меракълы эсерлер язған къырымтатар языджыларындан бири Джевдет Аметовдыр. О, Къырымның энъ дюльбер кошелерinden бири, бутюн дюньягъа белли олгъан Ялта янларында ерлешкен Лимена коюнде дөгъды. Оның балалыгъы ве осымюрлик йыллары бу аджайип ерде кечти. Та кой мектебинде окъугъанда, Джевдет эдебияткъа авеслене. Соңра Акмесджитте Къырым педагогика институтының къырымтатар тили ве эдебияты болюгинде окъугъанда о озю де шиирлер, икәелер язып башлай. 1941 сенеси Джевдет Аметов институтны битире ве оджа олып чалышмагъа азырлана. Лякин, апансыздан башлангъан дженк, тынч аятны тар-мар эте. Институтны битирген яшлар эписи джебәге ёлланыла. Дженкниң биринджи куньлерinden гъалебеге къадар Джевдет Аметов дженкте булуна. О бир сыра дженкявер медаллернен такъдирлене.

Дженкten соң Джевдет Аметов Озбекистанда Андижан шеэринде сюргүнликте халкъымызnen берабер яшай. Дженкни башындан соңунадже кечкен аскер, яш оджа тувгъан халкъына япылгъан акъсызылыкъкъа къаршы чыкъа ве озъ фикирлерини гизлемей. Буның ичюн оны он йылгъа апске къапайлар. Тек Сталин ольген соң Джевдет Аметов бу акъсыз джезадан къуртула.

Истидатлы языджы озюнинъ эсерлеринде башындан кечирген

фаджиалы вакъиалар, акъсызлыкълар акъкъында тасвир эте. Дженк ве сюргүнлик йыллары балалар да агыр, аджыныкълы алларгъа къалдылар. Языджы озюнинъ эсерлеринде адамларның мераметлилигини, чыдамлылыгъыны, инсаниетлилигини косытере.

Джевдет Аметов чокъ йыллар Ташкентте къырымтатар тилинде радиоэшиттировлерни азырлады ве алыш барды. Ана тилимизни сакъламагъа хызмет этти. Онынъ чокъ китаплары нешир этильди. Эксерий эсерлеринде Ватан дженки ве дженктен соңки йыллар акъкъында тасвирлене. Языджы озюнинъ хатырлавларынен пайлаша, дженк акъибетлерини косытере. Соңки йыллары языджы тувгъан юртунда Къырымда яшады ве иджат этти.



**такъдирленмек** — муқиятланмакъ

**джинаает** — мында: зулум, хиянетлик

**акъибет** — мында: дженктен соң инсанларның баҳыт-сызлыгъы, къыйналувы

## ДЖЕДВЕЛЬГЕ КЬОЮЛМАГЪАН ДЕРС

(икяе)

### I

Бизим мектебимизде пек чокъ миллетлернинъ оғыул-къызлары окъуй эдилер.

Кочип кельгенлер арасында Волга немселери де барлар. Оларгъа кимерде бир къыйыш козынен бакъкъанлар да тапыла.

Бу мунасебетнен мен бизим мектебимизде олып кечкен бир вакъиа акъкъында икяе этмек истейим.

7-нджи «Б» сыныфында Альберт Шандра деген сепкили бет, сары немсе баласы окъуй эди. О талебе бир шейден урьккен киби, дайма этрафына бакъына, дерсинъ умут этильмеген ерден онъа уджюм этеджеклер. Оюнларгъа къошуулмай, эм оны кимсе де къошмай эди. Онъа дайма: «Отурма меним яныма, ёкъ ол козюм оғионден, хаин фриц!» — дей эдилер. О да, джевап береджек олып ынтыла, тишлерини сыкъа, этрафкъа козъ эткен соң, озюнинъ ялынъыз олгъаныны анълат, четке чекиле тургъан. Озю дерслеринден яхшы, хусусан математиканы мукеммел биле эди.

Экинджи куню соңки эки дерске озюм кирдим. Джедвель

боюнчада шу күнү сыныфта язма иш отыкемек керек олса да, мен дерсни шай башладым:

— Язма ишни келеджек афтагъя къалдырамыз, даа яхшы азырланып келирсінъиз, бугунь джедвельден тыш дерс отыкериледжек, — дедим. Балалар тааджипленип бир-бирине ве манъя бакътылар.

— Я бугуньки дерсимииз насыл мевзуда, оджам? — деди бириси.

— Бугуньки дерсимиизде мен сизге дженкнинъ соңыки куньлеринде шахсен корип-кечирген бир вакъианы айтмакъ истейим, — дедим. Балалар, шубесиз, юректен севиндилер, оларгъя тек дженк акъкъында айт, гедже-куньдюз динълемеге азырлар.

— Бизим батальонымыз девамлы ве къанлы уджюмден сонъ, бир буюк шеэрge кирди, — деп башладым мен. — Эр ер патлатылгъан, янгъан, йыкъылгъан. Орталықъ там-такъыр. Даа чокъ ерлерден тютюн чыкъып тура. Бу ерде джанлы бир шей къалгъандыр деп акъылынъа да кельмей.

Яры йыкъыкъ бир сачакъ тюбюнде секиз-он яшлар къаарын-даки бир оғыланчыкъ козюме илинди<sup>1</sup>. Мен дераль автоматыма япыштым (дженкте шай оғренип къалгъанмыз), бала шу ань көзден ёкъ олды<sup>2</sup>. Мен яваштан сачакъкъа якъынлаштым, о якъ, бу якъны къыдырдым. Оны таптым. Лякин оғыланчыкъ мени корыгенинен, къапкъангъа тюшкен киби, къалтырап башлады, эм ағълай, эм де манъя бир шейлер айта.

Ачуывым бирден сёndи. Бу терисинен кемиклери къалгъан бичаре баланы корыгенде, не япаджагъымны да бильмей къалдым, онынъ башыны сыйапат:

— Ағълама, — дедим.

О, мени аньламаса да, бираз юрекленди ве шинелимнинъ енъинден тутып: «Ком, Иван!» — деди. Мында шашмагъя шей ёкъ, биз оларгъя фриц, олар исе бизге Иван, дей эдилер. «Токъта, — дедим мен озъ-озюме, — демек, бу баланы аселең ёлладылар, мени тындыраджакъ олалар». Амма бала мени аньламай, кене де манъя къайгъы ве ишанчнен бакъя. О, баланынъ темиз, гунасыз көзлери мени кене тынчландырды, ачуывымны сёндюрди. «Бунъа не керек экен? Итимал, биревлерге аджеle ярдым керек олгъандыр?! Айды, не олса-олды», — деп баланынъ пешинден кеттим. Бала мени, токътамадымы, къайтып кетмедиими дер киби, айланып-айланып бакъя эди.

<sup>1</sup> козюме илинди — козюме корюнди

<sup>2</sup> шу ань көзден ёкъ олды — корюнмей къалды



**уджюм** — уруш

**юрекленмек** — джесаретленмек

**итимал** — бельки



1. Икяеде тасвиrlenген вакъиа не вакъыт олып кече?
2. Бу вакъиа акъкъында талебелерге ким икяе эте?
3. Альберт ким? Альбертке сыныфдашлары насыл бакъалар?
4. Дженк олып кечкен ерлерде шеэрлер насыл алгъа кельген эди?
5. Аскерге ким расткеле? Аскерниң акъылына насыл фикирлер келе?



Ашагъыдаки сөзлерге синонимлер тапып, джумлелер тизинъиз:

*къувет* — ..., *юрекленди* — ..., *козьге илинди* — ... .

## II

Ниает, бир яры чёккен әвнинъ янына келип еттик. Эвнинъ арттаки кошелери йыкъылмагъан, бесе-белли анда яшайлар. Ичери кирдик, козылерим къаранлыкъыа алышқыан сонъ, ортада обалангъан тёшеклер устюнде дёрт-беш яшында бир къызычыкъыны, башы уджунда, анасы олса керек, хастаджан, орта яшларында бир къадын, этрафта исе багълангъан богъчалар, бала оюнджакълары, чул-чубурларны эслеп алды.

Мен оларгъа дөгъру юреджек олдым. Къадын абдырады, сонъ баласынынъ башы уджуна отурып, эллеринен оны сакълагъан киби олды. Бир шейлер айткъан сонъ, анасы къызыны яткъан еринден котерип отуртты. Ана-бала эм къоркъу, эм де имдат беклеп, меним козылериме бакъылар. Къызычыкъыны ольмеге бир куню къалгъан, зорнен нефес ала, къуру кемиклерини балавуз тюсте териси орткен, манълайчыгъы бурюшкен, эльчиклери джансыз киби саркъып туралар.

Анасы эллеринен къызыны косытерип, къызы ачтан олеяткъаныны, ашамагъа бир шейлери олмагъаныны аньлатмакъ истей. Мында лафсыз да эр шей аньлашила. Топ, бомба атешинден сагъ къалсалар да, энди ачлыкъ оларнынъ богъазларына япышкъан<sup>1</sup>.

Мен озюме келип, дераль аркъамдаки торбамны алыш, ондан отымек, эт консервасы, шекер чыкъарып, скемлеге бошаттым. Олар учеви де козылерини меним къолларымдан алмай. Джебимден чакъымны чыкъарып, къутуны ачтым, этрафкъа эт къоқъусы яйрады.

<sup>1</sup> ачлыкъ оларнынъ богъазына япышкъан — ачлыкътан оле яткъанлар

— Буюрынъ, алынъ, битте! — дедим. Олар, десенъ, тылсымлангъан киби ерлеринден къыбырдамайлар. Шу ань бир тилим отьмек кесип, устюне къутудан эт якъып, къызычыкъя узаттым. Онынъ сёнюк козълеринде къыгъылчымлар пейда олды, отьмекни алыш, тез-тез ашай башлады. Соңъ огълуна ве анасына да бердим. Ниает, бу тюш, олмагъаныны анълап, олар буюк иштианен ашап башладылар.

Баталонымызнынъ разведка болюгинде айтувлы разведкаджы Мюллер адлы бир немсе йигити бар эди. Экинджи куню мен оны ве эки аркъадашымны алыш кене шу эвге бардым. Тапылгъан отьмегимизни, шекер ве ягъымызны да алыш бардыкъ. Анда да деньишме олгъан. Сагъ къалгъанлар (чокъусы къадын ве балалар) шу эвге топлангъан эдилер. Мюллерниң ярдымынен биз кимге къаршы курешкенимизни оларгъа анълаттыкъ. Мюллер топлангъанларгъа:

— Мен де немсем. Бизим макъсадымыз — немселерни ольдюрмек дегиль де, фашизмни ер юзүндөн ёкъ этмектир, — дегенде, динълекенлер севингенлеринден чокъусы агълап йиберди.

— Дюньяда инсанлар, насыл миллет олгъанына бакъмаздан, сербест, тенъ олып догъалар, эм шай да яшамакъ кереклер.



Бизим Ватанымызда пек чокъ миллетлер яшай, буюк бир аилем киби омюр этемиз. Сиз, талебелер, буны акылыныңыздан чыкъармамақъ керексинъиз. Адамның яхшы-яманлыгъыны онынъ миллети не бакъып дегиль де, япкъан ишинде, озюни алыш барувында, халкъ ичюн япкъан хызметинде корымек керек, — деп битирдим мен озынкыемни.



**адалетли** — додгъру, акълы

**сербест** — мында: озюне саип, эркин

**къыгъылчым** — мында: атешли нур нокъталары

**макъсат** — ниет, истек



1. Немсе баласы аскерни не ерге алыш кельди?
2. Аскернинъ козю оғынде насыл бир мушкюль левха джанланды? Оны насыл кедерли тюшонджелер сарыш алды?
3. Бу аскер ичюн дженк не вакъыт битти? Не ичюн?
4. Икяенинъ къысымларына серlevа къюнъыз.
5. Икяени учонджи шахыс адындан сейлеп беринъиз.



Халкълар арасындаки достлукъ акъкъында сыныфынъызда субет кечириңиз.



Аскерлер не ичюн немсе балалары ве къадынларына ярдым этелер?

Адамның яхшы-яманлыгъы неде билинир? Яхшылыкъ ве яманлыкъ акъкъында аталар сёзлери ве айтымларны топланызыз.

Сиз насыл тюшонесинъиз, бу дерстен соңь балаларнынъ Альбертке мунасебети денчиширми?

Ер юзүнде дженк олмamasы ичюн, халкълар насыл чарелер корелер?

Дженк акъкъында насыл икяелер окъудынъыз? Насыл кинофильмлер корыдинъиз? Дженк не себептен башлана ве инсанларны насыл вазиетке къоя? Дженк олмamasы ичюн, адамлар насыл олмалы ве нелер япмакъ кереклер?



*Яхшылыкъ яманлыкътан къуветлиdir.*

*Яхшыдан багъ къалыр, ямандан дагъ къалыр.*

*Яхшыдан нам къалыр, ямандан къан къалыр.*

*Яхши иши озын макътар.*

## АЙДЕР ОСМАН

(1938 — 1997)



Айдер Осман 1938 сенеси Кырымда Бешкъурткъа Вакъуф коюнде оджа къорантасында дөгъды. Онынъ балалыгъы ве яшлыгъы къыйын девирге расткельди. 1941 сенеси Кырымны немсе фашистлери басып алды, 1944 сенеси исе бутюн къырымтатар халкъы озь ватанындан сюргүн этильди. Айдерлерниң къорантасы Озыбекистангъа Алтыарыкъ районында бир къышлакъкъа тюшти. Пек агъыр вакъыт олгъанына бакъмадан, Айдер едийыллыкъ мектепни битирди. О, балалыкътан оджа олмакъны арз эте эди. Онынъ ичюн мектепни битирген сонъ, о оджалар техникумына кирди. Сонъра арбий хызметте булунды. Бу йыллар Айдер Осман макъалелер язып чешит газеталаргъа ёллай. Онынъ эдебияткъа авеслиги кет-кете арта. Арбий хызметтен къайткъан сонъ о, Ташкент девлет университетинъ журналистика факультетине кирди. Окъувыны битирген сонъ, къырымтатар тилинде чыкъкъан «Ленин байрагъы» газетасында чокъ йыллар чалышты. Айдер Осман чокъ макъалелер, икяе, повестьлер язды. О, сюргүнлик девринде къырымтатар халкъының медениети, эдебияты сакъланып къалмасына ве осювине хызмет эткен языджылардан бириди.

1979 сенеси Айдер Осман «Йылдыз» меджмуасында чалышып башлай. Омюрининъ сонъки 12 йылы исе бу къырымтатар тилинде екяне меджмуаның баш муаррири олды.

Айдер Осман чокъ меракълы эсерлер яратты. Корюмли рус, озыбек, тюрк языджыларының бир сыра эсерлерини къырымтатар тилине терджиме этти. «Балалар эви янында» икяесинде экинджи джиан дженки йылларында олып кечкен вакъиалар тасвирлене. Айдер Осман озюнинъ икяесинде инсанларның мераметлигини косътере.

Балалар эви янында яшагъан койлюлер эвде тапкъан ашайтны, озылеринден къытып, ач къалгъан балаларгъа кетирелер. Айдер

Осман бир сыра эсерлеринде дженк йыллары ве сюргюнлик вакътында балаларның хорлугъы, аджыныкълы такъдирлерини тасвирледи.



**арз это** — пек истей

**техникум** — орта окъув юрту

**меджмуа** — журнал

**екяне** — бир дане

## БАЛАЛАР ЭВИ ЯНЫНДА

(икяе)

Аязлы къыш геджесининъ тынчлыгъыны балалар эвининъ азбарында къакъылып башлагъан чанъынъ сеси бозды: кимдир бирев, чам терегине асылгъан демир парчасыны шиддетнен дёгмекте. Бу чанъ адette, саба турмакъ, линейкагъа тизильмек я да ашкъа бармакъ керек олгъанда, къакъыла тургъан эди. Шимди исе яры гедже...

— Балалар, турынъыз, эрзакъ анбарымыз яна! — бу дженкten бир аягъынынъ уджуны гъайып этип кельген къаравулымыз Къабул эмдженинъ теляшлы сеси эди. О дайма арбий урба кийип юре ве акъшамлары балаларны озюнинъ будкасы янында топлап, дженк акъкъында меракълы вакъиалар икяе эте эди.

Башта уйкен группанынъ балалары чапып чыкътылар. Соң кучюклер де...

Акъикъатен де, бизим эрзакъ малларымыз — татлы къанфетлер, лезетли консервалар, эт, отьmek ве дигер емеклер сакълы тургъан анбарымыз шатырды-гудюрдинен янмакъта эди.

Къабул эмдже, таягъына таянмакъын унутып, о ян бу ян секириклей, озюнинъ къарыкъ давушынен балаларгъа ашханеден савут-саба алып, хавуздан сув ташымакъыны эмир эте, айны заманда атешке пек якъын баргъан кичкенелерни багъырыкълан къува эди.

Балаларнынъ кимиси къопкъанен, кимиси чайникнен, кимиси чанакъынен сув ташып башлады. Къабул эмдже савутлардаки сувны шиддетнен атешке сепе ве турмадан балаларны ашыкътыра: «Дженкчилер, джесаретли олунъыз, биз оны енъермиз!». О, балаларны опламакъ истегенде, оларгъа «дженкчилер», «разведкаджылар» деп мураджаат эте эди.

Лякин атеш сув дегиль де, керосин сепильген киби, эп къувет-



ленди. Артыкъ Къабул эмджеge атеш сёндирмекни быракъып, балаларны къорчаламакънен огърашмакъ керек олды, чюнки ча-нақънен атешке сув тёкеджек олгъан бир къызычыкъының сачлары туташты. Къабул эмдже оны аман ерге йыкъты ве башыны къаргъа комъди.

— Кимсе атешке якъын кельмесин! — деп къычырды о теляшлы сеснен ве топаллай берип, янайткъан анбарның ичине чапып кирди. Бир къач дакъкъадан соң, о анбар ичинде къап-къара ве тюшкүн бир къыяфетте къайтып чыкъты<sup>1</sup>. Бу бир къач дакъкъа ичинде онынъ бутюн гъайрети, дженкавер руху атеште янып кеткен киби эди. О ёргъунлыкънен мердивен устюне отурды ве эллери-нен юзюни къапатты. Бираздан соң, онынъ эллери арасындан: «Я рабби! Анда бир шей ёкъ!» деген бөгъукъ сес эшитильди. Къабул эмдже хайли вакъыт омузларыны салландырып, шатырдал янайткъан атешке бакъып отурды. Янгъын энди оны меракъландырмай эди.

Уйкен группаның балалары бинаның янып биткен къысымыны козъден кечире ве анбарның тыш диварындаки буюк бир делик-

<sup>1</sup> тюшкүн бир къыяфетте — аджыныкълы, гъарип бир алда

ни косытерип, янгъынның себебини бири-бирлерине аньлаттылар. «Бу немселернинъ япқан иши, — дей бириси. — Даа дөгърусы оларның шпионлары келип бизим анбарымызды, якътылар». «Самолёттеннен десант тюшюрген олмалылар, — дей дигери эминликнен. — Эбет, олар бизим анбарымызды якъын сонъ, кене самолётларына минип, учып кеткендирлер». Кимдир анбар бетте насылдыр шытырдылар эшиткенини, анда насылдыр адамлар аньлашылмагъян тильде лакъырды эткенлерини айтты. Даа сонъ исе, гедже къуршун сеслерини эшиткенлер де тапылды. Бойле лафлардан сонъ, балаларның теляшы, къоркъусы даа зияде артты. Кучюклер шыншыкълап, ағылап башладылар. Беш яшлар къаарындақи бир къызычыкъ бар сесинен анасыны чагъырды ве оқюрип ағылап йиберди. Уйкенлер, озълерининъ къоркъуларыны гизлеерек, кучюклерни тынчландыраджакъ олдылар.

Ниает, Къабул әмдже яныкълы давушнен: «Булар немселер дегиль, балалар. Булар хырсызлар. Эр шейни алгъян сонъ, анбарны якъалар. Къурсакълары патлагъайды, арамтамакъларның», — деди.

Эки ат екильген арабанен атеш сёндириджилер кельгенде, саба ачылгъян, янгъын исе, озюнинъ къара ишини яптып битирген эди. Анбар артыкъ янмай, тек тютей эди.

Танъда балалар эвининъ директоры, тербиеджилеримиз етип кельдилер. Олып кечкен вакъианы аньлагъян сонъ, олар да теляшландылар. Тербиеджи къадынларның козьлери яшланды.

Табиий ки, шу куню балаларға сабалыкъ аш берильмеди. Директорымыз уйле ашы мытлакъ оладжагъыны айтып, бедеркасына минди ве къаякъкъадыр кетти.

Тербиеджилеримиз исе, директор къайтып кельгенинен аш бериледжегини айтып, бизлерни чешит оюнларнен эглендирмеге чалыштылар. Лякин бираз вакъыттан сонъ, энъ кучюклер «къарым ачыкъты» деп, шыншыкълап башладылар. Даа сонъ исе, оларға буюкчелери де къошулдылар. Тек уйкен группаның балалары сусмакъталар. Эбет, оларға ағыламакъ ярашмай. Олар дайын дженк оюнлары ойнай ве гизлиден джебәге кетмеге азырлана эдилер.

Бизим уйлелик ашайджакъ вакътымыз олды, директор исе кельмей. Базы балалар, тербиеджилерининъ ясакъ эткенлерине бакъмадан, анбарымыздан къалгъян куль обасыны къарыштыра, баҳытлылар ирип, къатып къалгъян шекер кесеклерини тата, дигерлери исе, арт къапудан балабан ёлгъя чаптып чыкъа ве ёл-

дан арабалардан морковь, чукюндири я да согъан хырсызлай, эльде этильген шейлер, дераль болюштириле ве буюк бир иштианен аш-къазангъа ёлланыла.



**эрзакъ** — ашайт маллары, ашарлыкъ  
**теляшлы** — къоркъунчлы



1. Яры геджеде балаларны насыл вакъиа уянта?
2. Къабул эмдже кимдир?
3. Янгъын акъкъында балаларда насыл фикирлер пейда ола?
4. Къабул эмдженинъ арекетлерине насыл къыймет кесе билесинъиз? О насыл адамды?
5. Анбарны кимлер ве не ичюн якъкъян эди?
6. Саба кельген директор ве тербиеджилерге янгъын левхасы насыл тесир эте? Олар не япмагъя тырышалар?
7. Бу вакъиа къайсы вакъытта олып кече? О вакъыт акъкъында не билесиз?

## II

Бу куню базар эди. Балалар эвининъ эрзакъ анбары янгъанындан тек район меркезинде яшагъанлар дегиль, атта этраф къышлакълардан базаргъа кельген адамлар да хабердар олгъанлар.

Үйле авгъан сонъ<sup>1</sup>, азбар къапудан бир къартийчик кирип кельди. О Къабул эмджеге бир дане джугара питеси беререк: «Балалар саба ашамагъан экенлер, аз олса да, улештиринъиз», — деди. Сонъ чонъкъайып отурып<sup>2</sup>, дуа окъуды ве шалынынъ уджунен козълери ни окъалай берип кетти. Бу арада, элине бардакъ туткъан, даа бир къартий кельди. О базаргъа къатыкъ сатмагъа кете экен. Бардагъыны биз кетирген къопкъагъа бошатып: «Аш олсун, балаларым», — деди. Бундан сонъ, келиджилерниң сайысы артты. Кимиси къургъан мейва кетире, кимиси — эки дане чукюндири, кимиси пенир, кимиси пите кетире. Сонъ-сонъуна олар о къадар чокълаштылар ки, адамлар невбетке турып башладылар. Къабул эмдже балаларнынъ ярдым этювлерине бакъмадан, шашмалап къалды. О емек кетиргенлерге тешеккюр биле айттып етиширилмай. Адамлар исе, онынъ тешеккюрини беклемейлер. Балалар эви янындан бир сюрю ат ве эшек екильген арабалар пейда олдылар. Базаргъа кеткен, базардан къайткъан да бу ерде токътап кече. Оларнынъ эр бири ашаладжакъ

<sup>1</sup> үйле авгъан сонъ — уйледен бираз вакъыт кечкен сонъ

<sup>2</sup> чонъкъайып отурып — чёкип отурып



шеш къалдырып кете. Кимдир бири бир торба богъдай узаткъан эди. Къабул эмдже алмайджакъ олды. О адам дарылды: «Мен буны санъа дегиль, балаларгъа берем, — деди. — Бу отьмек, оны эр анги вакъытта ашамакъ мумкун». Къабул эмдже тезден эрзакъ кетириледжегини айтса да, о адам къаиль олмады<sup>1</sup>.

Директорымыз къайтып кельгенде, къапумыз огюнде невбетчилерниң сафы тап ёлгъадже созулған эди. Адамлар оны танытмайып: «Невбетке турынъыз, эр кесниң бир береджеги бар», — дедилер. Директорымыз, меселени анълагъан сонъ, озюни танытты ве адамларгъа бакъып: «Ярдымынъыз ичюн сагъ олунъыз. Лякин энди керекмей. Шимди ашайт юклю машина келеятыр», — деди. Адамлар директорның бу сёзүне къулакъ асмадылар<sup>2</sup>. Эр кес элиндекисини теслим этмеге ашыкъа эди<sup>3</sup>.

Акъшамгъа якъын эрзакъ юклю машина кельди. Шай исе де, адамларның арды узюльмеди. Адамлар атта экинджи куню де кельдилер. Къабул эмдженинъ итиразына, анълатувына бакъмадан: «Бу бала ашыдыр. Балагъа пек файдалыдыр», — деп, бир де-бир

<sup>1</sup> къаиль олмады — разы олмады

<sup>2</sup> къулакъ асмадылар — динълемедилер

<sup>3</sup> теслим этмеге ашыкъа эди — бермеге ашыкъа эдилер

ашаладжакъ шей къалдырып кете бердилер. Оларнынъ ич бири, атта бизим мушкюль алымызынъ там себебини бильгенлери биле, балалар эвининъ эрзакъ анбарларындаки маллар хырсызлангъаны акъкъында лям-мим демедилер<sup>1</sup>. Эр кес анбар янгъан экен, дей. Олар ойле истедилер.

Бу вакъия узакъ ве агъыр къыркъ дёргүнджи йылда олып кечкен эди. О куню чешит адамлар кетирген ашларны ашагъян балалар бу вакъианы ве о адамларны бир заман унутмазлар.

Биз о куньлерде дженк кетеяткъаныны, эр ерде къытлыкъ экенини бу адамлар озылерининъ я да, озь балаларынынъ къысметини бизге берегяткъаныны анълай эдик.

Йыллар текерленди. Биз осип-буюдик. Мен балалар эвиндеки достларымнен сыкъ-сыкъ корюшем. Субетимиз неден башланса да, о куньге, о вакъыткъа барып ете. Биз ич бир заман, о адайип адамларны хатырламайып дагъылмаймыз. Олар бизим къартбабаларымыз ве къартаналарымыз, ана ве бабаларымыз, аpte ве агъаларымыз эдилер.

 **хабердар этмек** — хабер бермек

**бардакъ** — савут

**итираз** — къаршы чыкъув, къаршылыкъ

**текерленди** — мында: кечти

**къытлыкъ** — ачлыкъ, ашайт етишмемезлиги



1. Бойле мушкюль вазиетте балаларгъа ярдымгъа кимлер кельди?


2. Койлюлер балаларгъа нелер кетирдилер?

3. Не ичюн языджынынъ хатырасындан бу вакъия ич бир вакъыт чыкъмай?

4. Улу Ватан дженки йылларында къардаш халкъларнынъ озыара ярдымы акъкъында сиз не билесинъиз? Икяе этинъиз.

<sup>1</sup> **лям-мим демедилер** — бир шей айтмадылар

**СОВЕТЛЕР БИРЛИГИНИНЬ  
ЭКИ ДЕФА КЪАРАМАНЫ  
АМЕТ-ХАН СУЛТАН  
(1938 – 1997)**



Амет-Хан Султан 1920 сенеси Алупкада дөгъды. Миллети кырымтатардыр. Акъмесджитте ФЗО мектебинде окъуды. Бундан соң, устанынъ шегирди оларакъ, паровоз депосында чалышты. Айны вакъытта аэроклубъя къатнап окъуды. Арбий учуджы олмакъ истеги оны Акъяр якъынларындаки Качи авиация мектебине алыш кельди. Он докъуз яшында бу мектепнинъ курсанты олды.

Амет-Хан Качи мектебини Экинджи джинки башламаздан бир йыл эвель битирди ве мемлекетимиздинъ гъарбындаки къысымлардан бирине хызмет этмеге ёлланды.

Амет-Хан ве онынъ силядашлары къувети къат-къат арткъач<sup>1</sup> олгъан ава душманына къаршы куреште акъраны олмагъан эрлик, джесарет ве къараманлыкъ косътердилер.

**АВАДА АМЕТ-ХАН!**

Къызыл байракълы гвардия истребитель авиаполкунынъ эскадрилья командири Амет-Хан Султан учъ юз элли докъуз урушта булунды. Шахсен озю он бир душман самолётыны урып тюшорди. Группа иле олгъан ава чатышмаларында исе он докъуз душман самолётыны гъайып этти. Бундан гъайры, Сталинград джебэсинде юз он дженкявер урушта булунды, шахсен озю алты самолёт урып тюшорди ве группа иле олгъан ава дженкинде еди душман самолётыны гъайып этти.

Бу федакярлыгъы ичюн Амет-Ханға 1943 сенеси август 24-те, укюметтинъ къаары муджиби иле, Советлер Бирлиги Къараманы унваны берильди.

<sup>1</sup> къувети къат-къат арткъач — пек кучълю

Амет-Хан ава дженкининь буюк устасы ве акъиқкий совет ассы<sup>1</sup> олды. 1942 сенеси майыс 31-де Ярославль тёпесинде «Юнкерс-88» самолётynы озь самолётynынъ кевдеси иле урып ерге тюшюргенде, экипаждан эки фашист учуджысы эсир алынды, экиси самолёт ичинде янды. Амет-Хан озю исе авадан ерге парашют иле тюшип къуртулды. О, Шаркый Пруссияда алты самолёт урып тюшюрди. 1945 сенеси январь 18-де дёрт бинъ метр юксекликте йигириими беш немсе самолётynиң къаршы бир озю чыкъып, учь самолётны урып тюшюрди.

Бу батырлықтары ичюн Амет-Хан Султангъя 1945 сенеси июнь 29-да Советлер Бирлигининъ Эки дефа Къараманы унваны берильди. Мисли ёкъ джесюргилиг<sup>2</sup> ичюн Амет-Хан Султан дженкининь сонъунда Девлет мukяфаты лауреаты унваныны алды.

Урушларда Амет-Хан озюниң усталыгъы, пишкىнлиги, джесюргилиг иле ойле юксек шурет къазанды ки, ондан козълери къоркъ-къан немсе авиация командаңлыгъы бир чаре тапып Амет-Хан Султанны якъаламакъ ве ёкъ этмек укюмини чыкъарды. Амет-Хан исе къоркъмады. «Мен Амет-Хан Султаным! Мен Амет-Хан Султаным! Немсе баскъынджыларына олюм!» — дей эди радио иле. Онъа джевап оларакъ немселерниң эфирде: «Ахтунг! Ахтунг! Дикъ-къат! Дикъ-къат! Авада Амет-Хан! Уруштан чыкъынызы!» — деген эмирлери эшитиле эди.

Девримизниң адайип адамы, халкъымыздың ифтихары Амет-Хан Султан 1971 сенеси февраль 1-де яныы самолёт сынавы вакътында эляк олды.

III. Алядин  
(«Корюшов» очеркінден)



**федакярлыкъ** — садыкълыкъ

**эсир алмакъ** — тутмакъ, якъаламакъ

**ифтихар** — гъуур

<sup>1</sup> асс — озь зенаатыны пек яхши бильген адам

<sup>2</sup> мисли ёкъ джесюрглик — къаарарсыз, сынъырсыз къараманлыкъ

# СОНЬКИ ДЕВИР КЫРЫМТАТАР ЭДЕБИЯТЫНДАН



**РИЗА ФАЗЫЛ**

(1929 с. д.)

Риза Фазыл Кырымның медений меркези олгъан, дюльбер шеэрлерinden бири — Кырасувбазарда дөгъды. Бу ердеки гурь орманларда кырымтатар халкъының севимли къараманы джесюр Алим Азamat оғылу гизленип юрьген.

Риза Фазыл яшлыктан эдебияткъа авеслене эди, халкъ агъыз яратыджылыгъыны топлады ве темелли огренди. «Къайда бирлик — анда тирилик» серлевалы аталар сёзлери китабы, «Манелер ве чынълар» топламыны неширге азырлады.

О чокъ шиир, икяе, повесть, очерк ве макъалелер язды. Ватан дженкинде къараманлыкъ косытерген джесюр кырымтатар къадын-къызлары акъкъында «Аналар яш экенде» очерклер китабыны нешир этти.

Риза Фазыл Лютфие Софунен бирликте «Амет-Ханның йылдызы» повестини язды. Повестте кырымтатар халкъының федакяр оғылу, Советлер Бирлигининъ Эки дефа Къараманы Амет-Хан Султанның балалыгъы, яшлыгъы ве Ватан дженкинде косытерген къараманлыкълары тасвирлене.

Риза Фазыл кырымтатар эдебиятының осювине ве огенилювине дегерли иссе къошты. О, улу шаир Ашыкъ Умерниң эсерлерини земаневий кырымтатар тилине чевирип, неширге азырлады. Кырымтатар халкъының севимли къараманы Алим Азamat оғылу

акъкъында пек чокъ малюматлар, эсерлер топлап, китап азырлады ве нешир этти. Языджы эдебий яратыджылыгъы ве халкъына хызметини девам этмекте. Шимди Риза Фазыл къырымтатар языджылар бирлешмесинин ёлбашчысыдыр.

## АМЕТ-ХАННЫНЬ БАЛАЛЫГЪЫ

(«Амет-Ханнынъ ийлдизы» весикъалы повестинден парча)

Амет энди он яшында эди. Эр вакъыттаки киби, саба анасы оны, азбар къапудан тышары чыкъарып, мектепке озгъарды. Чантасы элинде ёл бою ашыкъмай кете. Ёлда оны, адети узьре, эр шей меракъландыра, беязлы-морлу глициниялар оны, гуя, озълерине чагыралар, къанатчыкълары сырлы-сырлы кобелеклерниң пешинден чапа. Ёл янындаки тереклер арасында къушчыкълар, «чивиль-чивиль» этип, бир пытакътан дигерине учып къоналар. Тосат-тосат токъталып, къушларның чивильдисини динълей. Иште, о, бойле этрафтаки табиат адиселеринен меракъланып, сейир этип, мектеп азбарына келе.

Мектепте Амет яхшы окъуй, дерслерини енгиль менимсей.

Ярын раатлыкъ куню. Ёлда олар сабадан дагыгъа одунгъа кетмеге анълаштылар.

Амет кельгенинен, балалар зый-чув олып, дагыгъа догъру ёнедилер. Шеэрнинъ тёпесинде, шималь тарафта мешур Ай-Петри дагы тикленип тура. Оның даа чокъ чепшит ады бар. Лякин энъ къадимий ады — Чатал-Къая олса керек. Бу ад онъа шу къоджаман бир сыра дагының меркезинде тикленип турған чаталлары ве тишлери ичюн берильгендер.

Баягъы ёл юрьген соң, шаматалы балалар чамлыкъ дагына келип чыкъты. Мында къалын-къалын, юксек чам тереклери тюбюнде пек чокъ къуругъан чам карпасиналары дагылып ята. Балалар якъарлыкъ ичюн иште шу къуру карпасиналарны топлайлар.

Балалар, адети узьре, янына эки чувал алалар. Амет чувалларыны эр кестен эвель толдурды. Энди бираз раатланмакъ мумкүн. Лякин о, балалар арасында яшى кичик олгъян Сейдаметтинъ экинджи чувалының даа яры экенини эслеп къала. Балалар арасында эр вакъыт зайдыларның, кичиклердинъ тарафыны тутып, оларгъа ярдым этип алышкъан Амет, барып Сейдаметке ярдымлашты. Башкъалары азыр олгъангъа къадар, оның чувалыны да толдурдылар.

Чувалларны эр кес аркъаларына тарттырып багълады да, сыранен тизилип, эвлериине ёл алдылар.

Амет эвлери янына Абдураманнен берабер кельди. О, азбаргъя кирип, аркъасындаки чувалыны ерге къойды. Соңь барып чешмеден сув ичти. Абдурамангъя да бир мешребе сув кетирди. Бу арада эвден анасы Насибе апте чыкъты. О, чувалларны корип, севинип, балаларны макътады:

— Аферин ярдымджыларгъя! Машалла сизге, огъулчыкъларым! Сиз бизни севиндиргенинъиз киби, Алла да сизни шойле севиндирсин, эвлятларым! Бабань келип корье, ким насыл севинир.

Бойле алгъыштан соңь балаларның юреклери ат башы къадар олды, олар ёрулгъанларыны унуттылар. Абдураман чувалыны кене аркъасына урып, эвлериңе таба кетти. Амет ёлгъя чыкъып, оны озгъарды.

*Риза Фазыл  
Лютфие Софу*



**сейир этмек** — бакъмакъ, козъден кечирмек

**менимсемек** — оғренмек

**къадимий** — эски девирден къалгъан



1. Амет мектепте насыл окъүй эди?
2. Мектепке кеткенде Аметни этрафта нелер меракъландыра эди?
3. Раатлыкъ куню балалар къайда бардылар?
4. Ай-Петри дагъының даа насыл къадимий ады бар эди? Бу ад онъя не ичюн берильгендер?
5. Бу икәеде Аметниң даа насыл табиат чизгилери косытериле? Олар къайсы арекетлеринде корюне?



Советлер Бирлигининъ Эки дефа Къараманы Амет-Хан Султан акъында икәе ве шиирлерни хатырлап, «Халкъымызының къараманы» мевзуда къыскъа икәе азырлантыз. Къырымда Амет-Хангъя багъышлангъан насыл абиделер бар? Сиз оларны зиярет эттинъизми? Алупка шеэринде Амет-Ханның эйкелинден гъайры онъя багъышлангъан даа нелер бар? Немсе фашистлери Амет-Ханның джесюргилигine насыл къыймет кесе эдилер?



*Батыр куреш мейданында белли олур.*

*Алтын атеште сыналыр, йигит — куреште.*

*Къараманлыкъ иште, куреште корюнир.*

## ШАКИР СЕЛИМ

(1942 – 2008)



Шакир Селим 1942 сенеси апрель 10 куню Къырымның шималь чөллериндеки Буюк-Ас адлы күчүк койчикте дөгъды.

1944 сенеси къырымтатар халкъы ватанындан сюргүн этильгенде, о, даа яш бала эди. Сюргүнлик ве Ватангъя асретлик азабыны бутюн омрю бою чекти.

Биринджи тасильни Шакир Селим озыбек тилинде алды. Самаркъанд виляетининь бир къышлагында орта мектепни битирди ве Самаркъанд шеэриндеки педагогика окъув юртуна кирди. Соңра Самаркъанд университетининь рус тили ве эдебияты болюгини битирди. Чокъ йыллар оджалыкъ япты ве журналистика саасында чалышты.

Шакир Селимнинь биринджи шиирлери 1963 сенеси «Ленин байрагъы» газетасында басылды. Онынъ чокъ шиирлер джыйынтыкълары нешир олунды.

1989 сенеси Шакир Селим севимли Къырымгъа къайтып кельди. Бу вакъия онъя терен тесир этти ве рухландырды. Шакир Селим чокъ янты эсерлер язды ве халкъ шиари намыны къазанды.

Чокъ йыллар девамында къырымтатар языджылар бирлешмесининь реиси, «Йылдыз» меджмуасынынъ баш муаррири (редакторы) оларакъ чалышты. 2007 сенеси шиирнинь «Къырымнаме» дестаны Бекир Чобан-заде намындаки мукиятатны къазанды.

Шакир Селим иджадий енъишлери иле бутюн тюрк аленине<sup>1</sup> танылды ве юксек халкъара мукиятларнен такъдирленди.



**джыйынтыкъ** — эсерлер топламы  
**реис** — ёлбашчы, етекчи  
**рухланмакъ** — къуванмакъ  
**такъдирленмек** — мукиятламакъ

<sup>1</sup> тюрк алени — тюрк дюньясы, тюрк девлетлери

## СЕИТНЕН ВЕЛИ

Али агъа къомшумыз,  
Пек муаббет яшаймыз.  
Азбарымыз бир бизим —  
Бир къазандан ашаймыз.<sup>1</sup>

Онынъ эки огълу бар,  
Экиси де аля яш.  
Бир-бирине урьметнен  
Яшайлар агъа-къардаш.

Не олды, не олмады,<sup>2</sup>  
Бир кунь даргынлаштылар.  
Оларнынъ бу ишине  
Ана-баба шаштылар.

Али агъа — бабасы  
Не япмагъа бильмеген.  
Гульсюм апте — анасы  
Кедерленген, кульмеген.

«Къавгъаларын» себебин  
Бильменичюн, бельким,  
Ана-баба ойлайлар:  
«Къабаат кимде? Акълы ким?»

Баба иштен къайткъан соң,  
Чагырттыргъан балларын.  
Экисини де отуртып,  
Соң сорагъан алларын.

— Ишим яхшы, — дей Сеит, —  
Мен даа эки алмадым.  
— Мен де ойле, — дей Вели, —  
Мен агъамдан къалмадым.

— Ойле олса я ничюн  
Чырай сытып юресиз?<sup>3</sup>  
Мына олды бир къач кунь  
Айры чыкъып, киресиз —

Сеит Велиге бакъкъан,  
Вели чырайын сыйткъан,  
Сен озюнъ айт дегендай,  
Экши къатыкъ егендей.

Вели энъсесин къашып,  
Яваш-яваш сёз баштай:  
— Агъамны мен ынджыттым,  
Менден эвель дөгъдынъ, — деп. —

Сен адымнынъ ярысын  
Алып, Сеит олдынъ, — деп. —

Экимизге бир адны,  
Бабам, ничюн къойдышынъыз?  
Джаным-джаным бир адны  
Эки болип джойдышынъыз, —

Деген Вели окюнип,  
Козьчиклери яшлангъан.  
Бу иште тек къбаатны  
Бабасына ташлагъан.

— Бир ад къойдым мен сизге,  
Сизде бирлик олсун, — деп.  
Бирлик олгъан эр ерде  
Эльбет, тирилик олур деп.

Сеит, Вели къошулса,  
Керчектен де бир аддыр.

<sup>1</sup> бир къазандан ашаймыз — мында: муаббет яшаймыз

<sup>2</sup> не олды, не олмады — апансыздан

<sup>3</sup> чырай сытып юресиз — мугъайып юресиз

Эки инсан бир олса  
Эм баҳтлы, эм де шаддыр.

Огъулларым, бир олунъ,  
Адынъыз бир олгъандай.  
Тек достлукъиен инсанынъ  
Омрю гульге толгъандай!

\* \* \*

Инанынъыз, балалар,  
Вели яман утангъан.  
Ботен ерде агъамны  
Ынджыттым деп, янгъан.

Шу куньден сонъ къомшумыз  
Къайтса иштен эвине,  
Дост-муаббет дерс бакъкъан  
Балаларына севине.



**аля** — мында: пек яхшы  
**даргынлашмакъ** — джаны агъырмакъ  
**ынджыттым** — джаныны агъырттырдым  
**джаным-джаным адны** — пек яхшы адны



1. Шириңни ифадели окъунъыз.
2. Сеитнен Вели не ичюн давалаштылар?
3. Бабасы огъулларына насыл огютлер бере?
4. Шаир ширинде насыл аталар сёзлерини къуллангъан?




Достлукъ ве бирлик акъкъында даа насыл аталар сёзлерини билесиз? Хатырлап дефтерлеринъизге язынъыз. Акъикъий достлукъыны насыл тасавур этесиз? Акъикъий дост не вакъыт билине? Садыкъ дост олмакъ ичюн, адам насыл олмалы?



*Яманға етекчи олғандже,  
Яхшынынъ артындан кет.*

*Бетке дегиль, юрекке бакъып дост ара.*

*Достуна урьмет эткен, озюне сайгъы къазаныр.*



## ТАИР ХАЛИЛОВ

(1940 с. д.)

Таир Халилов 1940 сенеси Эски Къырым больгесинде Къарабай коюнде белли тютюнджи Бекир агъанынъ къорантасында дөгъды. 1944 сенеси Халиловларнынъ къорантасы бутюн къырымтатар халкынен бирликте Озъбекистангъа сюргүн этильди.

Сюргүнлик йыллары Таир балалыкъ ве осьмюрлик чагъыны Наманган больгесининъ чешит къышлакъларында кечирди. Орта мектепни битирген соң, окъувгъа авеслиги олса да, яшайыш агъыр олгъанындан себеп, чалышмагъя меджбур олды. 1964 сенеси Таир Халилов озъ арзусыны ерине кетире ве Ташкент кой ходжалыкъ институтына кире. Институтны битирген соң о, аграном оларакъ чалыша. Лякин эдебияткъа олгъан авеслиги Таир Халиловны иджатчылыкъ саасына алыш келе. О, балалыктан чокъ окъуй ве озю де бедий эсерлер язып башлай. «Йылдыз» меджмуасында Таир Халиловнынъ биринджи эсери «Эски кемане» икяеси басылды. Белли языджы Шамиль Алядин истидатлы яшкъа чокъ ярдым этти, онынъ иджадий ёлunu козетип турды.

«Янъы дюнья» газетасында ве «Йылдыз» меджмуасында Таир Халиловнынъ чокъ икяе, повестьлери басылды. Онынъ эсерлери айры джыйынтыкъ олып нешир этильдилер: «Фесильген къокъусы» ве «Биринджи къар». Шимди Таир Халилов Къырымда яшай ве иджадыны девам эте. 1995 сенесинден о, Украина языджылар Бирлигининъ азасыдыр.

Онынъ янъы эсерлери, икяе ве повестьлери «Йылдыз» меджмуасында басылыш тура. Языджы халкъымызынынъ сюргүнликте чеккен хорлукълары, чекишовлери, аджыныкълы алларыны буюк къайгъынен тасвирлей.



**больге** — район

**иджатчылыкъ** — яратыджылыкъ

**коzетип турмакъ** — бакъып турмакъ

**къайгъы** — яныкъ, аджынуv, кедер

## АКЪБАРДАКъ

(икяе)

Насибе апте адетиндже эрте уянды. Тышкъа чыкъты. Ягъмур даа сепелей эди. Къамышнен къоралангъан азбар ичинде эки къазыкъ бою чекильген тельден, акъшамдан унутылып къалгъан чамашырларны йыгъды ве кене одагъа кирип, шыр-сув шейлерни бирер-бирер сыйкып соба тщёпесиндеки йипке яйды.

Сувугъан дым ода онынъ кейфини бозды<sup>1</sup>. Къыйыш-къонъур тахталарнен къуруулгъан сетнинъ устюнде чаршафсыз, ямавлы екяне ёргъан тюбюнде къалачланып юкълагъан докъуз яшында огълуна мазун, севгинен назар ташлады<sup>2</sup>. Юрги ташты. Онынъ башы уджуна тиз чёкип, сачларыны сыйпады, эппейи вакъыт элесленип, къаарыленип отурды. Соңъ дёрт аякълы демир собагъа гъозапая толдурып, туташтырды. Чай къайнатты. Не къадар къыймаса да,<sup>3</sup> огълуны уянтмагъа меджбур олды.

— Ач козълеринъни, къозучыгъым, саба олды, — деди анасы огълунынъ перчемини назик-назик чыбалтып. — Къалкъ, огълум, вакъыт олды.

Къуртнезир козълерини ачты, кулюмсиреби ве янагъыны анасынынъ элине къойып:

- Ана, аначыгъым. Меним кунешим, — деди.
- Тур, тосуным, кийин, юзюнъни юв. Чай ичейик де, тарлагъа барып, гъозапая кетирейик. Одунымыз битти.
- Ана, тюшюмде билесинъми кимни корьдим?
- Кимни, джаным? Эйилекке олсун.
- Бабамны. Сакъалы осъкен, тап кокюсине къадар тюшкен...
- Тюшюнъ пек яхши. Бельгисиз гъайып олгъан, сагъ къалгъан аскерлер аля даа къайтып келелер. Иншалла, бабанъ да сагъдыр, — деди анасы.
- Ана, бабам, бельки, бизни тапалмай юредир, — деп шубеленди огълу.
- Эр шей олмалы, дюнья буюк. Алла белясыны алгъайды шудженкнинъ, эпимизни шашырды... Амма энди къоркъмагъа шей ёкъ, яшайыш денъишир, къысмет этсе,<sup>4</sup> эр кес истегине къавушыр. Джэнк битти, балам.

<sup>1</sup> кейфини бозды — озюни ярамай дуйду

<sup>2</sup> назар ташлады — бакъты

<sup>3</sup> не къадар къыймаса да — не къадар истемесе де

<sup>4</sup> къысмет этсе — Алла ярдым этсе

Ода текаран къызгъан эди. Къуртнезир штаныны, кольмегини, анасы тиккен елекни, орыген чорапларыны кийип, балабан, бол калошларны сюйреклеп, тышары чыкъты. Къора къазыгъына мыхлы савуттан бетини ювды.

Шу вакъыткъадже анасы софра донатты. Отъmekке сары ягъ силип, сыджакъ, татлы чайнен сабалыкъ емеклерини ашадылар.

Бабасыны софра башында да анъдылар. Соңра джошкъун, севинч беклер бир алда экиси де тарлагъа кетти.

Тазе топракъ къокъулы, баарь авасы кокюс къафесинъни толдурға, о тап къан дамарларынъадже синъе, гонълюнъи хош эте, джоштура.

Олар сабан тиймей къалгъан чет сыралардаки къаверенки памукъ тереклерини бирер-бирер оракънен орып алдылар ве эки топ гъозапаяны йипнен сыйкътырып багълагъан соңъ, бири-бирининъ ярдымынен аркъаларына урып, зар-зорнен аякъ устюне къалкъылар.

Койге аз къалгъанда, олар арыкъ боюндаки тёпечикте осъкен терек тюбюнде аз-бучукъ раатланмакъ ичюн токъталдылар.

— Къысмет этип, бабам къайтып кельсе, биз бабамнен гъозапаягъа къатнармыз. Сен исе эвде аш пиширип, бизни беклеп отурырсынъ, яхшымы, ана? — деди оғылу.

— Ай-ай, балам, бабанъ тез-тез кельсейди, биз де алем киби<sup>1</sup> яшар эдик, — деп ич чекти<sup>2</sup> аны.

— Ана, ана, бакъ! Бакъ, анат! — деди Къуртнезир айретли давушнен.

— Не о?

— Акъбардакъ! Сенинъ севген чечегинъ.

— Вай, балам! — Насибе апте учь-дёрт адым четте былтырки отлар арасындан bem-beяз, сабий къальби киби темиз-пак, ер тюбюнден баш котерип, дюнья юзюне бакъып тургъан чечекни корьди.

— Балам, замет де олса, о чечекни манъя алыш бер.

Оғылу къолтукъларыны йиптен бошатып, элине сюйрю бир таякъ алды да, акъбардакъны тюбю-тамырынен къазып чыкъарып, анына узатты.

— Сагъ ол, эвлядым. Омрюнъ узун, бу чечек киби темиз, тазе олсун, — деди аны. — Буны эвде бир бош къутучыкъя отуртырмыз.

<sup>1</sup> алем киби — эр кес киби

<sup>2</sup> ич чекти — яныкънен, къайгъынен айтты



Олар къалкъып, акъырын-акъырын кене ёлгъа чыкътылар.

Бу кунь ягъмурлы, сылакъ олса да, олар ичюн гъает хайырлы кунь эди.

Ана-бала эвге етер-етmez, азбарларында насылдыр бир къалабалыкъ корьди. «Не олды, аджеба?» — деп тургъанда, къаршыларына къомшу бала чапып чыкъты.

— Насибе апте, козьайдын! Сеитнеби агъа сагъ-селямет кельди!  
Эвге кирмей, сизни беклеп тура.

— Не дейсинь шу?!

— Керчек, Насибе апте. Козьайдын!

Насибе апте сыртындаки юкнен чалкъасына авдарылды ве булутлы кокке бакъып, акъбардакъ тузып тургъан эллеринен бетини ортти.

Шашып къалгъан баласына:

— Бар, балам, чап, балам, бабанъ кельген, — деп зорнен дудакъларыны къыбырдатты.

Къуртнезир омузларыны сыйкып тургъан йиплерни чезип,

гъозапаяны ерге ташлады да, дюньясыны унутып, аякъ тюбюндеки балчыкъны чевре-четке сыгратып, эвлерине таба чапты.

Узун бойлу, пилоткасы тюбюндөн гурь, сим-сия сачлары корюнип турған бир адам, элиндеки шинелини чемодан устюне ташлап, койлюлер арасындан чыкъты ве балагъа къаршы тез-тез юрьди. Бир къач адым къалгъанда, о эллерини къартал къанатлары киби керди, чамур устюне тиз чёкти, янып-пишип чапып кельген огълуны къучакълап багърына басты.

— Огълум! Меним огълум!

Къуртнезир тавшан киби къалтырап, бабасынынъ бойнуна сарайлы, онынъ ири, сыйджакъ козъяшларыны озюнинъ чересинде исэтти.

— Бабам! Кельдинъми, бабам! Мен сени гедже-кунъдюз бекледим, сагъындым!...



**екяне** — бир дане

**мазун** — кедерли

**меджбур олмакъ** — *мында:* лячаре

**шубелемек** — эмин олмамакъ

**джошкъун** — эеджанлы

**козъайдын** — къуванчлы хабер

**чере** — бет, юзь

**ис этмек** — дүймакъ

**хайырлы** — огъурлы, яхшы, эйи



1. Насибе апте ве онынъ огълу Къуртнезирнинъ яшайышы насыл эди? Ана-бала арасындаки мунасебетлерни косытерген сатырларны къайд этинъиз.

2. Акъбардакъ чечеги Насибе аптеге нелерни хатырлатты?

3. Ана-бала бу кунни не ичюн огъурлы деп сайдылар? Керчектен, шу кунь ойле олдымы?

4. Ана-бала бири-биринен къонушувда къайсы сёзлерни къулланалар? Бу сёзлер нени косытере?



*Джошкъун, айретли, хайырлы сёзлерине синонимлер тапынъыз ве оларнен джумлелер тизинъиз.*



## ДЖИАН ЭДЕБИЯТЫНДАН



### ОСКАР УАЙЛД

(1854 – 1900)



Оскар Уайлд Ингилтереде (Англияда) Дублин шеэринде белли эким аиласинде дюньягъа кельди. О балалыкътан окъувгъа авес эди. Мектептен соң Оскар Лондан ве Париж шеэрлерининъ окъув юртларында тасилини девам эте. Шу девирде о, чешит жанрларда эсерлер язып башлай.

Оскар Уайлд дюньяджа танылгъан языджыдыр. Онынъ яратыджылыгъы медениет хазинесининъ къыйметли бир къысмыдыр. Онынъ роман, пьеса, икяелери чокъ тиллерге терджиме этильди. Хусусан онынъ масаллары меракълыдыр. Тылсымлы шейлер, тылсымлы дагълар, арекетлер, инсан тилинде сёйленген айванлар — масалларгъа аит олгъан хусусиетлерден языджы усталыкънен файдалана. «Бахытлы Шахзаде» масалында эйкель джанлы инсан киби озюни дуя, агълай, къасеветлене, фукъарелерни аджый ве оларгъа ярдым эте. Уфачыкъ Къарылгъач исе эйкельни аджый, севе, онынъ садыкъ досту олып къала. Языджы масал жанрынынъ, хусусиетлерinden файдаланып, омюрдеки акъсызлыкъларны<sup>1</sup>, адамларнынъ чешит табиат чизгилери ве арекетлерини косытере. «Бахытлы Шахзаде» масалында садыкъ достлукъ, мераметлик киби инсан арекетлерининъ омюрде къыйметли олгъаныны косытере. Алла-Тааля эйкельнинъ демир юргини ве ольген Къарылгъачны шеэрнинъ энъ къыйметли шейлери деп, озюни Дженнет багъчасына ала.

<sup>1</sup> акъсызлыкъ — адамларнынъ агъыр вазиетте, укъукъсыз олгъаны

## БАХЫТЛЫ ШАХЗАДЕ

(масал)

(къыскъартылгъан)

Шеэрниң юксек къулле узеринде Бахытлы Шахзадениң эйкели бар. Эйкель бутюнлей индже паалы алтыннен ортюльген, козълери эки парлакъ сафириден<sup>1</sup> яптылгъан, къылыштында сапында балабан къанташ<sup>2</sup> бар. Эйкельни эр кес бегене эди.

Къарылгъач бутюн кунь учты ве акъшам маалинде бир шеэрge келип чыкъты.

«Геджелемеге къайда токътар экеним? — деп тюшонди. — Умют дюньясы, иште шеэр меним ичюн бир шей азырлагъандыр». Соң юксек къулле устюнде эйкельни корьди.

«Мен, иншалла, мында къалырым — деп, къуванды. Бу пек яхши ер, авасы да тазе».

Бойлеликнен, о Бахытлы Шахзадениң аякълары арасында ер тапып, къонды.

«Алтын тёшегим де бар экен» — деп, озь-озюне яваштан сомурданды ве, юкъламагъа азырланып, чевре-четини айланып бакъты, лякин башыны къанатлары арасына сакълап етиширамады, балабан сув тамчысы устюне тамды.

«Насыл аджайип ава. Кокте бир булутчыкъ биле ёкъ, йылдызлар ачыкъ, ярыкъ; къайдан да бильмем ягъмур ягъды! Авропаның шималь тарафында ава, керчектен де, пек худжур. Соң бир тамчы даа тамды.

«Эйкельниң не файдасы бар экен, ягъмурдан да къорчаламаса? — деп, тюшонди о. — Яхши бир оджакъ борусы тапмасам, олмаз», — деп, учмагъа азырланды. Къанатларыны ачып етиширамады — учюнджи тамчы тамды, о, тепеге бакъты, билесинъизми, не корьди? Бахытлы Шахзадениң козълери козъяш толу эди ве олар алтын янакъларындан тамчы-тамчы акъя эдилер. Ай ярыгъында онынъ юзю о къадар дюльбер эди ки, уфачыкъ Къарылгъачының юрги кене яныкъкъа толды.

- Сен кимсинъ? — деп, сорады о.
- Мен Бахытлы Шахзадем.
- Ойле олса не ичюн агълайсынъ? Сен мени бус-бутюн сыйлатынъ да.

<sup>1</sup> сафир — кок тюсте къыйметли таш (*русча: сапфир*)

<sup>2</sup> къанташ — къырмызы тюсте къыйметли таш (*русча: рубин*)



— Мен бу дюнъяда сагъ олып яшагъанда, юрегим адам юрги эди, — деди эйкель. — Сан-Суси Сарайында яшагъанда, козъаш не олгъаныны бильмез эдим, къарылгъачларгъа анда кирмеге олмай эди. Куньдюзлери аркъадашларымнен багъчаларда кезип зевкълайыры, геджелери исе Буюк Салонда оюнгъа тюшер эдим. Багъчаның чевресинде юксек исар бар эди, онынъ артында не бар экен деп сорамагъа акъылымга биле кельмей эди, чевре-четим о къадар дюльбер эди. Сарайда яшагъан хызметчи достларым манъя Бахытлы Шахзаде дер эдилер ве, керчектен де, мен баҳытлы эдим, эгер зевкъ сюрьмеси баҳыт олса! Бойле этип омюрим кечти ве бойлеликнен манъя олюм кельди. Шимди мен ольген сайылам, мени мында тиклеп къойдылар ве бу юксек къулле тепесинден шеэrimnin бутюн чиркинлигини ве перишанлыгъыны корем, ве меним къальбим демирден япылса да, ағъламакътан гъайры чаре тапып оламайым.

«Не... темиз алтындан дегильми?» — деп, тюшонди Къарылгъач. О пек тербиели эди онынъ ичюн де дос-догърудан сорап оламады.

— Узакъта... — назик, алчакъ сеснен девам этти эйкель, — уфа-чыкъ сокъакъта бир эвчик бар. Онынъ бир пенджереси ачыкъ ве андан маса узеринде отургъян къадынны корем. Онынъ бети индже ве ёргъун, къоллары къырмызы ве къаба, пармакъларында инеден

тешиклер корюнип тура, чонки бу къадын — тикиджи. О, якъында оладжакъ Сарай Байрамына, къыралличенинъ энъ якъын къыз аркъадашы киеджек атлас геджелик антерине, севги чечеклери нагъышлай. Эвнинъ бир кошесинде исе, онынъ кичкене оғылу тёшекте хаста ята. Баланынъ сыйджагъы бар, о портакъал истей. Лякин эвлеринде озен сувундан гъайры башкъа бир шей ёкъ ве анасы токътамадан агълай. Къарылгъач, Къарылгъач, уфачыкъ Къарылгъач, сен онъа къылычымнынъ сапындан къанташны чыкъарып беремезсинъми? Меним аякъларым пекитильген, еримден къыбырданып оламайым.

— Мен Мысыр<sup>1</sup> тарафкъа учмагъа азырланам, — деди Къарылгъач.

— Къарылгъач, Къарылгъач, уфачыкъ Къарылгъач, сен меннен бир гедже даа къалып, эльчим оламазсынъмы? Хаста бала сувсызлыкътан янды, анасы да пек яныкълы! — деди Шахзаде.

— Догърусыны айтсам, мен оғылан балаларны пек севмейим, — дераль джевап берди Къарылгъач. — Кечкен яз, мен озен янында раатланмагъа токъталгъанда, дегирменджининъ эки тербиесиз оғылу, манъа дайма таш атып тура эдилер. Олар манъа тийип оламаз эдилер, къарылгъачлар пек чевик, ондан да гъайры, айлемизниң чевиклиги эр кеске белли; насыл да олса, мен буны урьметсизлик, деп саям.

Лякин Шахзаденинъ корюниши ойле кедерли эди ки, Къарылгъач оны аджыды

— Айды, сувукъ олса да, мен сенинъ янынъда бир гедже даа къалып, эльчинъ олайым, — деди Къарылгъач.

— Чокъ сагъ ол, уфачыкъ Къарылгъач, — деп къуванды Шахзаде. Бойлеликнен, Къарылгъач Шахзаденинъ къылычындан буюк къанташны гъагъасынен сувурып алды, ве эвлерниң дамлары устюндөн учып кетти. О беяз мермер шеклинде япылгъан эйкеллер устюндөн, оюн авалары эшитильген буюк Сарай устюндөн де учып кечти.

«Бу гедже мен Мысыргъа учаджам», — деп, тюшүнди Къарылгъач ве бу къуванчлы умуттен руху котерильди.

О шеэрде бутюн эйкеллерни сейир этип чыкъты ве кильсенинъ чанъ къакъъан къуллесининъ устюнде баягъы вакъыт отурды. Къайда бакъса торгъайлар бири-бирине бакъып, чивильдеше эдилер:

Ай чыкъъан соңъ, о Бахытлы Шахзадеге учып барды.

<sup>1</sup> Мысыр — Египет (мемлекет)

— Мысырга бир аваленъиз бармы? — деп, кескин давушнен сорады, о. — Мен шимди ёлгъа чыкъаджам.

— Къарылгъач, Къарылгъач, уфачыкъ Къарылгъач, сен мennen бир геджечик даа къалмазсынъмы? — деп, ялварды Шахзаде кене.

— Мени Мысырда беклейлер, — текрарлады Къарылгъач.

— Къарылгъач, Къарылгъач, уфачыкъ Къарылгъач, шеэрниң дигер тарафында, чардакъта, бир Яш огъланны корем. О кягъыт толу маса устюне буқленген, янында стакан, стакан ичинде бир топ солукъ мелевише. Онынъ сачлары кестане тюсте, дудакълары нар киби ал, балабан козьлери арзу-умают толу.

Театр мудири ичюн пьеса язып битирмеге тырыша, лякин ушюгенинден язып оламай. Собасында исе атеши ёкъ, ачлыкътан эсини джояжджакъ.

— Мен сеннен бир гедже даа къалырым, — деди Къарылгъач, чонки о, пек мерхаметли эди. — Мен онъа бир къанташ даа алыш барайыммы?

— Чокъ языкъ! Менде башкъа къанташ ёкъ, — деди Шахзаде.

— Тек козьлерим къалды. Олар пек сийрек тапылгъан сафир ташындан япылгъан, бинъ йыл эвельси оларны Хиндистандан кетирген эдилер. Бир данесини ал да, шу яшкъа бер. Паалы ташны базиргяңгъа сатар, одун алыр ве пьесасыны битирир, иншалла.

— Шахзаде, джаным, мен бойле шей язып оламам, — деди Къарылгъач ве, агълап йиберди.

— Къарылгъач, Къарылгъач, уфачыкъ Къарылгъач, мен санъа айткъанымны яп, — ялварды Шахзаде. Бойлеликнен Къарылгъач Шахзадениң бир козюни чыкъарып алды ве студентниң чардагына учып кетти. Чардакъкъа учып кирмеси пек енгиль эди, чонки эвниң дамында тешик бар эди. Генч, башыны къолларының ичине комип, отура эди, ве къүшниң къанат давушыны биле дуймады, о, башыны котергенде, солукъ мелевшелер янында дюльберден-дюльбер бир сафир ташы турған.

— Мен, гъалиба, мешур олып башладым, бу эдие эсерлеримни бегенген адамдан олса керек. Энди пьесамны битирмеге имкяным олур, — деп тюшюндө студент. Ве озюни баҳытлы ис этти.

Экинджи куню Къарылгъач гемилер турған лимангъа ёл алды.

О буюк бир геми мачтасына къонды ве гемиджилер агъыр сандыкъыны геми анбарындан чыкъаргъанларыны корьди. Олар эр бир сандыкъыны чыкъаргъанда: «Эпимиз бирден!» — деп, къычыра эдилер.

— Мен Мысыргъа бараджам, — деп, къуванчындан къычырды Къарылгъач. Лякин онъа бир кимсе айланып бакъмады. Ай чыкъ-къанынен, Къарылгъач Бахытлы Шахзаденинъ эйкелине учып кельди.

— Мен сеннен сагълыкълашмагъа кельдим, — деди, о.

— Къарылгъач, Къарылгъач, уфачыкъ Къарылгъач, сен менин бир гедже даа къалып оламазсынъмы, — деп, Шахзаде кене ялварды.

— Къыш кельди, тезден сувукълар башлар, — деп, тепренди Къарылгъач. — Мысырда кунеш ешиль пальма тереклерини къыздыра, тимсах чамур ичинде ятып, чевре-четини ашыкъмайып сейир эте. Меним аркъадашларым Баальбек Ибадетханесинде юва къуралар, беяз ве гульгули гогерджинлер оларгъа бакъып, бир-биринен севишлер. Джаным Шахзаде, мен сени ташлап кетмеге меджбурым, лякин мен сени ич бир вакъыт унуттам ве келеджек баарыде, сен берип йиберген къыйметли ильван ташларынъ ерине, эки дюльбер паалы таш кетирерим. Къанташ, къысмет олса, ал гульден де ал олур, сафир ташы исе, мавы денъиз киби, кок олур.

— Ашада Мейданда, серник саткъан къызычыкъ отура, о серниклерни пис сувгъа тюшюрди ве олар бозулды. Эгер эвге пара кетирмесе, бабасы оны дёгер, шунынъ ичюн де къызычыкъ агълай. Аякъларында чораплары ёкъ, башы да чыплакъ. Меним экинджи козюми чыкъарып ал да, къызгъа бер, бабасы оны дёгмесин, — деди Бахытлы Шахзаде.

— Айды, мен сеннен бир гедже даа къалайым, лякин мен сенинъ экинджи козюни чыкъарып оламам, — деди Къарылгъач.

— Къарылгъач, Къарылгъач, уфачыкъ Къарылгъач, мен санъа эмир этем, — деди Шахзаде. Бойлеликнен, Къарылгъач Шахзаденинъ экинджи козюни чыкъарып алды ве учып кетти. Йылдырым киби къызнынъ янына учып, авучына къыйметли ташны къойды.

— Не къадар дюльбер джам парчасы! — деп, къызычыкъ къуванып, эвине чапып кетти. Ондан соңъ Къарылгъач Шахзадеге учып барды.

— Сен сокъурсынъ, мен сени ташлап кетип оламам; мен дайма сеннен къалырым, — деди Карылгъач.

— Ёкъ, уфачыкъ Къарылгъач, санъа Мысыргъа кетмек керек, — деди бичаре Шахзаде.

— Мен сеннен дайма яшарым, — деди Къарылгъач ве Шахзаденинъ аягъы уджунда юкъламагъа ерлешти. Экинджи куню бутюн кунь Шахзаденинъ омузында отурды ве эджнебий мемлекетлерде корыген шейлери акъкъында икяе этти.

— Джаным, уфачыкъ Къарылгъач, сен манъа аджайип шейлер акъкъында икяе этесинъ. Джаным, Къарылгъач, ялварам, шеэрge учып бар да, корыгенинъни манъа келип икяе эт, — деп, ялварды Шахзаде.

Бойлеликнен, Къарылгъач шеэр узеринде учып, зенгинлернинъ дольбер эвлеринде шенъленгенлерини, фукъарелернинъ азбар къапулары янында отургъанларыны корьди. О къаранлыкъ сокъакъларгъа учып кирди, ве ачлыктан бетлери bem-beяз, сес-солукъсыз къара сокъакъларда отургъан балаларны, копюр тюбюонде эки уфакъ балачыкъ къызынмакъ ичюн къучакълашып яткъанларыны корьди.

— Биз ойле бир ачмыз! — дедилер олар.

— Мында ятмагъа олмай! — деп, къычырды ачувлы къаравул, ве балалар, къайда бараджакъларыны бильмейип, ягъмур тюбюоне, ёлгъа чыкъып кетмеге меджбур олдылар.

Къарылгъач Шахзадеге эп корыгенлерини айтты.

— Меним устюм бутюнлей аджайип алтыннен ортюоли, сен оларны парча-парча къопарып ал да, фукъарелерге бер.

Къарылгъач алтынны Шахзаденинъ устюнден парча-парча къопарды; ахыр-сонъу Шахзаде сёнюк ве корюмсиз алда къалды. Алтын парчаларыны бирер-бирер фукъарелерге даркъатты. Бойлеликнен балаларнынъ чырайлары ачылды, ве олар кулип сокъакъларда ойнашып башладылар.

«Бизим энди ашамагъа отьмегимиз бар!» — деп, къуванышы къычырыштылар олар.

Сонъ, бир кунь къар ягъып башлады, къардан сонъ сувукълар кельди. Сокъакъларгъа санки кумюш сепильген, олар йылтыравукъ ве тайгъакъ олды, узун буз тамчылары исе, эвлернинъ дамларындан асылып къалды бутюн халкъ тонларына сарылды, кичкене балалар кырымызы феслерини кийип, буз устюнде тайып ойнадылар.

Бичаре уфачыкъ Къарылгъач ушуп башлады, лякин Шахзадени ташлап кетип оламады, чонки оны пек севди. Отьmek тюкяны къапусы артында отьmek уфачыкъларыны тапып чёплей, ве къызынмакъ ичюн къанатчыкъларыны къакъып турмагъа меджбур эди. Ахыр-сонъу джан береджегини<sup>1</sup> анълады.

Сонъки кере Шахзаденинъ омузына къонмакъ ичюн такъатыны топлады.

— Сагълыкъынен къал, севгили Шахзадем, къолунъны сонъки кере опьмеге мумкционми? — деп, зар-зорнен мураджаат этти Къарылгъач.

<sup>1</sup> джан береджегини — оледжегини

— Къарылгъач, Къарылгъач, уфачыкъ Къарылгъач, санъа мен ағызыздан да опьмеге разылыкъ берем чонки сени пек севем, — деди Шахзаде.

— Мен Олюм Юртуна азырланам, Олюм исе Юкъунынъ бир чешити, дегильми? — деп, Къарылгъач Бахытлы Шахзаденинъ ағызыздан опты ве аякълары уджуна йыкъылып, джан берди.

Шу ань эйкельнинъ ичинден аджыныкълы давуш кельди, санки дерсинъ бир шей чатлады. Керчектен де, демир юрек экиге болюнген. Эльбетте, аванынъ да тесири олгъандыр, чонки о куньлери ава пек сувукъ эди.

— Шеэрден эки энъ кыйметли шейни манъа тапып кетириң! — деп, эмир этти Алла-Тааля озь мелеклерине.

Мелеклер онъа демир юрекнен, ольген къушны кетирдилер.

— Сиз пек догъру сечип алдынъыз, чонки меним дженнет Багъчамда бу уфакъ къушчыкъ эбедий отеджек, ве меним алтындан япылгъан шеэримде Бахытлы Шахзаде манъа эбедий ибадет этеджек<sup>1</sup>, — деп, Алла-Тааля васиет этти.

Инглиз тилиндөн тердҗиме эткен Л. Сейтхалилова



**къулле** — *русча:* башня

**эльчи** — векиль

**мешур** — танылгъан, белли

**отымек** — *мында:* йырламакъ

**әдие** — бахшыш

**кедерли** — гъамлы

**авале әтмек** — буйрукъ бермек

**тимсах** — *русча:* крокодил

**бору** — баджа (*русча:* дымоходная труба)




1. Бахытлы Шахзаде омюрини къайда ве насыл кечирди? Не ичон онъа Бахытлы Шахзаде дей эдилер?
2. Ольген сонъ Шахзадеге къайда ве насыл эйкель къойдылар?
3. Эйкельнинъ тышкы корюнишини тасвир этинбиз.
4. Бахытлы Шахзаденинъ эйкели юксек къулледен шеэрge бакъып, нелерни коре, нелер узеринде тюшюне?
5. Шахзаде кимлерни аджый ве кимлерге ярдым этмеге тырыша?
6. Эйкель Къарылгъачкъа насыл вазифелер буюрды?
7. Сиз насыл тюшюнесиз, не ичон уфачыкъ Къарылгъач Мысыргъа учып кетмей, эйкельнинъ янында къала?
8. Не ичон Алла-Тааля эйкельнинъ демирден япылгъан юрегини ве уфакъ къушчыкъны озюнинъ дженнет Багъчасына ала?

<sup>1</sup> ибадет этеджек — дува окъуйджакъ

## **МАРК ТВЕН (Сэмюэль Клеменс)**

(1835 – 1910)



Марк Твен (акъикъий ады Сэмюэль Клеменс) Америка Къошма штатлары Миссури штатынынъ Флорида виляятинде орта барлыгъы олъян къорантада дюньягъа кельди. Апансыздан бабасы ольген сонъ, къорантанынъ вазиети агъырлаша. 12 яшындаки Сэмюэль, мектепни ташлап, басмаханеге ишке кирмеге меджбур ола. Марк Твен иш араштырып чешит шеэрлерде булуна ве чокъ йыллар девамында зорлукъларгъа чыдай.

Балалыгъындан лоцман<sup>1</sup> олмагъа авесленген Сэмюэль 22 яшына кельгенде, Миссисипи озени бойлап юрьген гемиге лоцманнынъ талебеси оларакъ ишке къабул этильди. Сонъра исе лоцман оларакъ чокъ йыллар девамында гемилерни юргизди.

Марк Твен сёз ибареси лоцманларнынъ тилинде — эр шей яхшы, ёл ачыкъ деген мананы бильдире. Сэмюэль Клеменс эдебий эсерлер язып башлагъан сонъ, бу сёз ибаресини озюне эдебий лагъап этип алды. Марк Твен адынен бутюн дюньягъа танылды.

«Том Сойерниң сергүзешлери» серлевалы эсеринде Марк Твен къорантада балаларнынъ буюклернен ве озъара мунасебетлерини инджеликнен тасвирлей. Эсерниң эсас къараманы Том Сойер — муреккеп табиатлы, джесаретли оғъланчыкъ. О, омюрдеки адалетсизликке къаршы озюндже куреше, эр вакъыт озюни къорчаламагъа, акъламагъа азыр ола. Эбет, о чокъ янълышлар япа, яланлар уйдурға, лякин онынъ гонъюли темиз, о эйи ишлер япмагъа да арекет эте. Окъуыштылар Том Сойерниң эйи ве адалетли адам оладжагъына инанаалар.



**адалетсизлик** — инсафсызлыкъ  
**эйи** — яхшы

<sup>1</sup> лоцман — деньиз, озенлерниң телюкели ерлеринден гемилерни кечирген капитан ярдымчысы

# ТОМ СОЙЕРНИНЬ СЕРГУЗЕШТЛЕРИ

(парчалар)

## БИРИНДЖИ БАБ

— Том!

Джевап ёкътыр.

— Том!

Кене джевап ёкътыр.

— Къайда гъайып олып кетти бу огъланчыкъ?.. Том!

Кимсе джевап бермеди.

Къартый козълюклерини бурунынъ уджуна кетирди ве козълюклери устюнден оданы козъден кечирди, сонъра козълюклерини манълайына кетирди ве козълюклери астындан оданы бир даа сюзьди. Асылында къартийге козълюклеринъ кереги де ёкъ, онъя бир де-бир шейге бакъмакъ керек олса козълюк де, собанынъ къыршавы да бир. Ильк дақъыттарда, о шашмалагъан киби олды ве эшъялар эшите биледжек къадар сесини чыкъарып, сертче сёйленмеге башлады:

— Токъта, сен элиме бир тюш, бакъайым! Мен санъя...

— Айгиди сени, огъланчыкъ! Онынъ къурназлыкъларына алышмакъ кереким, эльбет. О манъя аз шакъалар япамы? Бу кереси бираз акъыллыджа олмакъ керек эдим. Догъру, мен озъ боюн-борджумны эда этип оламайым, Алла мени багъышласын. Мен исе бойнума гунялар алам, оны эркелейим, шунынъ ичюн де бу дюнъяда эм мен чекишем, эм о. Билем, о, турушы-юрюшинен бир шейтанчыкъ кесильген, лякин мен не япа билем? О, меним раҳметли татамнынъ оғылу да! Гъарипчик даа кичкене, оксюз балачыкъны насыл этип урайым. Эр кереси оны джезалайджакъ олгъянымда мен онъя къачып кетмеге имкян берем, сонъундан исе видждан азабы чекем. Не айтаджагъымны да бильмейим. Ураджакъ олсам меним къарт юречигим парча-кесек олып кете. Мукъаддес китапта: инсан омюри къыскъя ве яныкъ-гъамларгъа толу, деп дөгъру язылгъан экен. Пек дөгъру язылгъан! Бугунь о, мектепке бармаз, акъшамгъадже копек суварып юреджек<sup>1</sup>, меним боюн-борджум исе оны джезаламакътан ибарат, мен борджумны одерим — ярын мен оны чалышмагъа меджбур этерим. Бу, эльбette, къараардан зияде къаттылыкъ олып корюнир, чонки ярын бутюн огъланчыкълар байрам нишанлайджакълар, лякин мен не япа билем, онынъ бу дюнъяда энъ севмеген шейи —

<sup>1</sup> копек суварып юрьмек — бир файдалы иш япмайып, бошуна юрьмек

чалышмакъ. Бу кереси оны джезаламасам олмайджакъ, акс алда мен сабийчикни текмил бозарым.

Том керчектен де бутунь мектепке бармады. Вакътыны пек шень кечирди. Акъшам устю эвлерине зар-зорнен етишип кельди, Джимге акъшам емегинедже Том одун кесмеге, ёнгъа азырламагъа ярдым этмек керек эди. Даа дөгърусы, Джим ишнинъ дёртте учь пайыны япкъандже озюнинъ кунь девамында олып кечкен сергузештлерини айтып етиштирмек керек эди. Томнынъ кичик къардашы Сид (огей къардашы) айтылгъан ишлерни эписини энди чокътан беджерген — ёнгъаларнынъ бирини къалдырмайып, джыйыштырып, ерине алып кетип къойгъан эди. Сид юваш, сёз динълеген огъланчыкъ, чешит тюрлю къурназлыкълар япмай, олур-олмаз шейлер япып, уйкенлерни чокъ раатсызламай.

Том чешит тюрлю онъайтлы фурсат булып, шекер парчачыгъыны айындыраджакъ олып, акъшамлыкъ емегини ашаркен, Полли апте бутюн кунь къайдаларда юргенини бильмек истеп онъа чешит суаллер бере. Эр анги бир саде гоньюлли инсан киби, Полли апте озюни уста бир дипломат, деп сая ве озюнинъ адий арекетлерини буюк бир усталыкъ деп таный.

- Том, — дей о, — бугунь мектепте пек сыджакъ олгъандыр, э.
- Эбет, м<sup>1</sup>.
- Пек сыджакъ олды, ойлеми?
- Эбет, м.
- Том, бу къадар сыджакъ ола турып, сен озенде юувунмакъ истемединъми?

Том бир шейлер дүйды, гъалиба, къальби къоркъу кольгесинен ортюльди. Полли аптенинъ бетине дикъкъатнен бакъты. Лякин онынъ бетинде ич бир шей окъуп оламады. Ве:

— Ёкъ, м... deerlik истемедим, — деп джевап берди.

Полли апте элинин узатып, Томнынъ кольмегини тутып бакъты.

— Терлемегенсинъ биле, — деди о.

Полли апте Томнынъ кольмеги къуру олгъанына эмин олып, насылдыр бир мемнюниетликнен тюшонджеге далды: онынъ мийинде насыл бир айнеджилик гизли олгъаныны кимсе аньлап оламады. Лякин Том меселени бир кереден чакъты, ель анги тарафкъа эскенини аньлады ве бериледжек суаллерни огюни алмагъа тырышты:

— Салкъынланмакъ ичюн башымызыны насос астына туттыкъ. Меним сачларым аля даа сылакълар. Коресинъизми? — деди.

Полли аптенинъ джаны агъырды: мына шу гъает муим себепни

<sup>1</sup> м — мадам сёзюнинъ биринджи ве сонъки арифи

насыл этип коре бильмеди! Лякин шу ань онъа янъы бир фикир кельди.

— Том, я башынъны насос астына тутмакъ ичюн санъа коль-мегинъниң якъасыны тамам мен тиккен еринден чезмек керек эди де? Къана-а, куртканъның огюни ач, бакъайым!

Томның теляшы бирден гъайып олды. Курткасының огюни ачты. Кольмегинъниң якъасы тикильген эди.

— Айды, айды. Сени ич бир вакъыт анъламазсынъ. Сен мектепке бармадынъ, ювундынъ, мен бунда эмин эдим. Яхшы, мен санъа сертиймейим: сен айнеджисинъ, амма къаарардан зияде айнеджи дегильтисинъ.

Полли апте Томны айнеджиликнен алалмагъанына бираз ынджынды. Лякин бу кереси Том озюни яхшы тарафтан косытергегине къуванды.

Лакъырдыгъа Сид къошуулды.

— Хатырамда, сиз оның якъасыны беяз йипнен тиккен эдинъиз, — деди о, — якъасының тикиши къара йипнен тикильген!

— Эбет, беяз йипнен тиккен эдим!.. Том!..

Лякин Том субеттинъ девамыны беклеп отурмады. Одадан чапып чыкъып кетеяткъанда явашчыкътан:

— Энди менден корерсинъ, Сидди!..

Яз акъшамлары узунджа ола. Орталық даа ярыкъ эди. Том бирден сыйзгырмасыны токъттатты. Къаршысында Томдан бираз къалкъымджа, таныш олмагъан бир оғълан турмакъта эди. Къадынмы, эркекми, уйкенми, баламы — ким олса олсун — эр анги янъы бир сымы Сент-Питерсберг киби кичкене шеэрчиктеки сакинлернинъ дикъкъатыны шу ань джельп эте. Бундан да гъайры оғъланчыкъынъ устюнде кишилик урбалары бар эди. Бу гъает тааджипли шей эди! Башында гузель шляпа, устюнде мавы басмадан тикильген куртка, тыпкы шу басмадан тикильген яп-янъы ве тер-темиз штан. Даа джума куню олгъанына бакъмадан, аякъларында башмакълары, бойнунда ачыкъ тюстеки шериттен яптылгъан галстугы да бар. Умумен алгъанда оның козыге чарпкъан<sup>1</sup> шеэрли къаяфети Томны ачувландырды. Том оғъланчыкъынъ усть-башына бакъкъан сайын озюниң урбалары аджыныкълы олып корюнди. Къаршысындаки оғъланнның къаяфетинен нефретленгенини косытереджек олып, онъа усттен бакъмагъа тырышты. Эки оғъланчыкъ да индемейип, бири-бирине бакъып турдылар. Бириси бир адым четке атса, экин-дженеси де ата, бири-бирининъ этрафында айланалар. Бири-бирининъ

<sup>1</sup> козыге чарпкъан — козыге корюнген

козълеринден козълерини алмайлар. Эппейи вакъыткъадже шайтип турдылар. Ниает Том:

- Сени яхшы этип дёггенимни<sup>1</sup> истейсинъми? — деди.
- Дёг, бакъайым!
- Эм дёгерим!
- Дёгип оламазсынъ!
- Истесем ойле де бир дёгерим!
- Дёгип оламазсынъ!
- Дёгерим!
- Дёгип оламазсынъ!
- Дёгерим!
- Дёгалмазсынъ!

Экиси де сусты. Ниает Том:

- Сенинъ адынъ не? — деп сорады.
- Меним адымдан санъя не?
- Не олгъаныны шимди санъя косътеририմ!
- Косътер, бакъайым. Не косътермейсинъ?
- Даа эки сёз айтсанъ — косътеририм.
- Эки сёз! Эки сёз! Эки сёз! Мына санъя! Къана-аа!
- Бакъса сен онъя! Эгер мен истесем, бир къолумны аркъама багъласалар биле, сени бир къолумнен урып йыкъарым!
- Я не урып йыкъмайсынъ? Урып йыкъарым, дейсинъ де!
- Эгер манъя тийсенъ урарым!
- Ай-яй-яй! Биз бойлелерини чокъ коръдик!
- Киббар хораз<sup>2</sup> киби форса сатсам эр кес къоркъар, деп беллей-синъми? Вай, онынъ шляпасына бакъынъыз!
- Бегенмейсинъми? Ур да тюшюр башымдан, шунда сен менден озь пайынъны алышынъ.
- Ялан айтасынъ!
- Озюнъ ялан айтасынъ!
- Озю къоркъакъ олып, къоркъузмагъа вакъыт тапа!
- Айды, деф ол ёлумдан!
- Эй, эй, динъле: эгер озюнъни басмасанъ, башынъны урып эзерим!
- Эзеджек эмиш! Ой-ой-ой!
- Эм эзерим, бакъ!
- Я не беклеп турасынъ? Тек къоркъузмагъа билесинъ, амельде исе элинъден бир шей кельмей. Демек къоркъасынъ, ойлеми?

<sup>1</sup> дёгмек — урмакъ

<sup>2</sup> киббар хораз — къопай хораз

- Къоркъмайым!
- Ёкъ, къоркъасынъ!
- Ёкъ, къоркъмайым!

Огъланчыкълар кене сустылар. Бир ерде таптанып туралар, козълеринен бири-бирини ашайджакълар. Ниает, олар омузларыны бири-бирине тиредилер. Том:

- Деф ол мындан!
- Озюнъ деф ол!
- Деф олмайджам!
- Мен де деф олмайджам!

Шай этип, олар бирер адым огге берип, бет бетке турдылар. Бири-бирине нефретнен бакъып, итеклешмеге башлайлар. Лякин кимсе гъалип чыкъмай. Эппейи вакъыткъадже бири-бирини тюртип турдылар. Олар къызышмагъа башлайлар, арекетлери зайыфлашкъанына бакъмадан, озълерини муқъайт тутмагъа тырышалар Шунда Том:

— Сен къоркъакъ кучелексинъ! Мен агъама айтайым — о сени чинатий пармагъынен котеклер. Мен онъа мытлакъа айтырым — о сени урап! — дей.

— Сенинъ агъанъдан къоркъмайым! Меним де агъам бар. О сенинъ агъанъдан да буюк. Меним агъам сенинъ агъанъны анавы исарнынъ артына котерип атар (Агъалар — темиз уйдурма).

- Ялан айтасынъ!
- Сен аз шей айтасынъмы!

Том аягъынынъ баш пармагъынен топракъ устюнде чызыкъ чыза ве:

— Мынавы чызыкътан атлайым, деме сакъын! Мен сени ойле де бир дёгерим ки, еринъден турып оламазсынъ. Ким де ким бу чызыкътан атласа, онынъ ишлери гъает фена оладжакъ! — дей.

Ят огъланчыкъ шу ань чызыкътан атлайджакъ ола:

- Къана-а, бакъайым, сен мени насыл ураджакъ экенсинъ.
- Быракъ! Быракъ шуны дейим!
- Сени дёгерим, деп озюнъ айттынъ да! Не ичюн дёгмейсинъ?
- Эгер сени эки цент ичюн дёгмесем, алыма шайтанлар агъласын!

Ят огъланчыкъ джебинден эки дане бакъыр капик чыкъара ве куломсиреп Томгъа узата.

Том онынъ къолуны къакъып йибере ве бакъыр капиклер ерге тюшелер. Бир дакъкъа кечер-кечmez эки огъланчыкъ ерге йыкъыла ве мышыкълар киби курешелер. Бири-бирининъ сачларындан чекелер, курткаларындан, штанларындан тарталар, бири-бирини чимчилейлер, бири-бирининъ бурунларыны тыртайлар. Ниает, бельгисиз

юмакъ озъ чизгилерини алыш башлай, куреш тозаны арасындан бойле бир манзараны корымек мумкүн эди: Том душманның устүнде отура ве юмрукъларыны душманының узерине келиши гузель ягъдыра эди.

— Афу сора!<sup>1</sup> — деп талап эте Том.

Лякин ят оғъланчыкъ ондан къуртулмакъ ичюн ачувнен къычыра.

— Афу сора! — ве котек девам эте.

Ниаэт ят оғъланчыкъ сомурдана: «Етер!», дей, ве Том оның якъасыны бошай:

— Бу санъа бир дерс олсун! Келеджекте билирсинъ кимнен иш корыгенинъни.

Ят оғъланчыкъ костюмчигининъ тозуны къакъып, агъламсырап, шыншыкълап, кяде бир артына айланып бакъып, башыны саллап, «бир даа Томны тутсам, яхшы этип дёгеджем» деп ёлуна реван олды. О, эвлерине кеч къайтып кельди ве ичериге пенджереден киреяткъанда тузакъкъа тюшкенини анълады: къаршысында тизеси тура эди. Полли апте оның курткасының, штанының алышы корыгенинен оның байрамыны агъыр ишлернен денъиштиргемеге кесен къаарар берди. Къаары эльмаздан къатты эди.

**къурназлыкъ** — айнеджилик

**азап** — чекишиов, къыйналув

**теляш** — къоркъу

**мукъаддес** — къыйметли

**деф ол** — гъайып ол

**ят** — таныш олмагъан

**фурсат** — имкян, келишкен вакъыт

**айындырмакъ** — дуйдырмай алмакъ, хырсызламакъ



1. Томны бакъкъан ве тербиелеген къартый оның къурназ-лыгъы ве сергүзештлери акъкъында нелер тюшоне?
2. Полли апте ве Томның арасындаки диалогны дикъятынен окъунтызы. Томның джеваплары ве арекетлерине къыймет кесинъ.
3. Шеэрде Томгъа расткельген ят оғъланчыкъының тышкъы корюнишини тасвирлененъиз.
4. Том ве ят оғъланчыкъ арасында насыл дава олып кече ве ненен бите? Сиз насыл тюшөнесиз, не ичюн Том ят оғъланчыкъыны корыгенинен бегенмеди ве ачувланды?
5. Эки оғъланчыкъының давасы ве арекетлерине къыймет кесинъиз.
6. Сиз кимнинъ тарафыны тутасызы?

<sup>1</sup> афу сора — кечирип сора, къабаатыны таны

## ЭКИНДЖИ БАБ

Джумаэртеси. Яз тазе, къайнакъ аятнен парылдамакъта эди. Эр бир къальпте йыр янъгъырамакъта, эгер де бу яш инсаннынъ къальби исе, йыр дудакълардан тыгъырып тюшмекте эди. Адамларнынъ чересинде къуванч, адамлар тендирист-тендирист адым аталар. Беяз акациялар чечекке комюльгенлер, этрафкъа мис-къокъу сачмакъталар. Шеэр артындаки Кардиф дагъы ешилликлерге комюльген. Дагъ аджайип, гъамсыз, озюне джелъп этиджи бир мукъаддес ер киби корюнмекте.

Том бир къопкъа киреч ве узун фырчыны алыш, сокъакъкъа чыкъты. Исарагъа назар ташлагъанынен къальбинде юва къургъан къуванчы бир аньде гъайып олып кетти, къальби эфкяргъа толды. Отуз ярд<sup>1</sup> узунлыгъында, докъуз фут<sup>2</sup> юксеклигинге тахта исар! Яшайыш агъыр юк олып корюнди. Терен кокюс кечирип, фырчыны киречке батырды, энъ юксектеки тахтанынъ устюнде юргюзди, сонъра бу арекетини текрарлады ве токътады: сыланмагъан къоджаман исарнынъ тахталары янында мынавы беяз ёлачыкъ не! Кейфи сонъ дөредже бозулгъан Том терек астына отурды. Шу арада ёл къапудан Джим чапып чыкъты. Онынъ къолунда тенеке къопкъа бар эди. О «Буффалонынъ къызылары» тюркюсини йырлай эди. Том шеэр насосына барып сув кетирмекни олмайджакъ бир иш деп сая эди, лякин шимди о, бу ишке башкъа козынен бакъты. Насос башында эр дайм адам чокъ ола: акътенлилер, мулатлар<sup>3</sup>, къаратенлилер; оғыланчыкълар ве кызычыкълар невбет беклеп отуралар, раатланалар, оюнджакъларынен алыш-вериш япалар, къавгъа этелер, котеклешелер, чаяланалар. Насос оларнынъ эвинден олса-олса юз элли метр авлакътадыр, амма Джим анда бир saat къадар алдана, эр кереси оны барып чагъырып кельмек керек ола.

— Эшитесинъми, Джим, — деди Том, — истесенъ, исарнынъ мынавы ерчигини сыла, мен исе сувгъа барып келейим.

Джим башыны саллады:

— Олмаз, мистер Том! Ханым-эфенди ёлда-изде кимсенинъ янында токътама, дос-догъру насоскъа барып кель, деди. Даа о деди ки: «Мен билем, масса Том сени исар сыламагъа чагъыраджакъ, сен оны динълеме, озъ ёлунънен кете бер». О деди ки: «О, исарны насыл сылагъаныны озюм барып бакъаджам».

— Сен онынъ айткъанларына къулакъ асма Джим! О, агъзына не

<sup>1</sup> ярд — узунлыкъ ольчиоси, 91 сантиметрге якъын

<sup>2</sup> фут — узунлыкъ ольчиоси, 30,5 сантиметрге якъын

<sup>3</sup> мулатлар — зенджилер ве беяз тенлилернинъ къарышыкъ никяхларындандоғылганлар

кельсе, айта бере! Бер къопкъанъны, мен бир аньде барып келирим.  
О бир шей бильмез.

— Вай, къоркъам, масса Том, ихтияр ханым-эфендиден къоркъам!  
О, меним башымны сувурып атар, валлайы, сувурып атар!

— Омы! Кимсеге пармакъ тийсетмез, урса-урса, башынъа  
оймакъынен ураг! Эм де бу шейге ким къулакъ аса? Керчек, о лаф  
этсе, ачувлы-achuвлы лаф эте. Эгер агъламаса, онынъ сёзлеринден ич  
бир еринъ агъырмай. Джим, мен санъа шарик береджем. Мен санъа  
бяз алебастры шаригимни беририм.

Джим шашмаламагъа башлады.

— Беяз шарик, Джим, гъает гузель, беяз шарик!

— Ойле олмагъа ойледир, чокъ гузель шей! Лякин мен, кене де,  
масса Том ханым-эфендиден къоркъам.

Джим олгъаны оладжагъы инсан баласы, Томнынъ татлы сёзлери  
астында ирип кетти. Лякин Полли аптени корыгенинен къопкъасыны  
алып чапып кетти.

Ана-мына дегендже, эр анги иштен азат олгъан огъланчыкълар  
сокъакъъча чыкъаджакълар, кезинеджеклер, ойнайджакълар. Олар  
ишишт-турлю шенъ оюнларны ойнайджакълар, ве эписи келип, агъыр  
ишинен огърашкъан Томнынъ устюндөн күледжеклер. Бу фикирниң  
озю биле оны атешлерге якъымақта эди. О, джебиндеки къыйметли  
шайлерни чыкъарып, козьден кечирди: къырыкъ оюонджакъ  
парчалары, шариклер ве бунъа бенъзеген олур-олмаз шайлер;  
буларны биревге берип учъ-дёрт дақъкъа чалыштырмакъ мумкүн,  
лякин ярым saatлик сербестликни буларгъа сатын алалмазсынъ,  
эбет. О, мал-мулькюни джебине ерлештириди ве бу фикиринден  
вазгечти. Огъланчыкълардан ич бириси онынъ бу малына къызмаз.

О, элине фырчысыны алыш, ишини девам эттириди. Мына, узакъта  
Бен Роджерс корюнди. Том энъ зияде онынъ къылынувларындан  
къоркъа эди. Бен адымламай, аксине атлап-атлап кельмекте эди.  
Онынъ кейфи еринде эди. Бен Томнынъ янына келип турды.  
Къолундаки алманы корыген Томнынъ силекийлери акъты, лякин  
кене де, ич бир шей олмагъан киби ишини исрарлыкъынен девам  
эттириди. Бен:

— Эй, къардаш, кене чалыштыралармы сени? — деди.

Том бирден онъа айланып бакъты:

— А, сенсингъим, Бен! Сени корымегеним.

— Билесингъим, мен шимди ювунмагъа... эбет, ювунмагъа кетем!

Сен де ювунмакъ истейдирсинъ, э? Санъа исе мумкүн дегиль,  
чалышмакъ керексинъ. Эбет, эм де насыл чалышмакъ керексинъ!  
Том онынъ бетине тикилип бакъты да:

— Сен нени иш деп саясынъ? — деп сорады.

— Я не бу иш дегильми?

Том исарны сыламакъны девам эттирикен, джевап къайтарды:

— Бельки бу иштир, бельки де ёкъ. Мен тек бир шейни билем: бу иш Том Сойернинъ гонълюне ята.

— Айтмаса? Бу иш сенинъ ичюн хош бир эглендже, демек истейсинъми?

Фырчы исар узеринде эп кезмекте.

— Хош эглендже дейсинъми? Не ичюн бу эглендже хош олмасын?

Огълан балаларгъа исар сыламакъ эр кунь къысмет этеми?

Меселенинъ янъы джеэти ачылды. Бен алма кемирмесини токъттатты. Том реssамнынъ ихтирасынен фырчысыны арткъа-огге кездире, бир къач адым арткъа чекиле, сонъра кене исаргъа якъынлаша, бир къач штрих къоша ве япкъан ишини тенкъидий козынен бир даа бакъып чыкъа, Бен исе онынъ эр бир арекетини козете, Томнынъ иши оны да озюне чеке. Ниает:

— Билесинъми, Том, берсе, мен де бираз сылайым! — деди.

Том тюшюнджеge далды ве разы оладжакъдай олды, лякин сонъки дақъыасында:

— Ёкъ, ёкъ, Бен... Бундан бир шей чыкъмаз. Билесинъми, Полли тизе мынавы исар меселесинде пек титизлик япа, чонки исар сокъакъкъа бакъа. Бинъ дане... атта эки бинъ дане огълан баладан кереги киби сылай биледжек бир бала тапылмаз.

— Айтмаса? Исар сыламакъ бу къадар джиддий бир иштир, деп беллемеген эдим. Берсе, азачыкъ олса да... сылайым. Мен сенинъ еринъде олгъян олсам, бир сание биле тюшюнит отурмаз эдим. Э, Том?

— Бен, сёзюм сёздир, фырчыны санъа къувана-къувана берир эдим, лякин Полли тизе... Мына, демин Джим да сыламакъ истеди, лякин Полли тизе онъа бу ишни ишанмады. Сид де сыламакъ истеди — онъа да изин бермеди. Санъа бу ишни ишанып оламагъанымны энди анълагъандырысынъ? Сен сыламагъа башласанъ, барып да бир де-бир шей чыкъып къалса...

— Олмайджакъ шей! Мен сенден ярамай сыламам. Мен тек сылап бакъынакъ кереким. Мен санъа алма бериrim.

Том истер-истемез, фырчыны онъа туттырды. Амма къальби гизлиден къувана эди. Сабыкъ «Буюк Миссури» гемиси куннинъ сыйджагъында терлеп-пишип чалышыр экен, истифагъа чыкъынан реssам онынъ янында, кольгеде янбашлап ята, аякъларыны саллап, ята эди.

Хайли вакъыткъадже Том еринден кыбырдамады; аятында юз берген салмакълы денъишмелер узеринде тюшюнмекте эди. Соңра адымларыны баш штабгъа — иш биткени акъкъында рапорт бермек ичюн дөгърутты.



**къайнакъ** — къызгъын, джанлы

**аят** — омюр, яшайыш

**къалып** — гонъюль

**эфкяр** — гъам, къасевет

**исрарлыкъ** — тирнеклик, гъайретлик

**исар** — дувар

**хайли вакъыт** — баягъы вакъыт, чокъ вакъыт



1. Полли тизе Томгъа исар сылавны не макъсаднен буюрды?
2. Аджайип яз левхасынынъ тасвирини Томнынъ дүйгъулары ве тюшюнджендеринен къяяс этинъиз.
3. Том насыл сёзлер ве бахшышларнен Джимни ишке, исар сылавуна къоймагъа тырыша?
4. Том ве Бен Роджер арасында олып кечкен субетни дикъкъатнен окъунъыз. Томнынъ акъылы, айнеджилиги ве усталыгъыны косытерген суаль, джевапларнынъ манасыны анълатынъыз.

### УЧИОНДЖИ БАБ

Том эвге къайтып кельгенде Полли апте эм ятакъ одасы, эм мусафир одасы, эм ашхане, эм кабинет вазифесини беджерген арттаки шырныкълы оданынъ ачыкъ пенджереси янында отура. Кейфинье кейф къошкъан яз авасы, сукюнет, чечеклернинъ къокъулары ве балкъуртларнынъ выз-выз учмасы онъа тесир эткени корюнип турғанынъ узеринде бурнуны саркъыткъан, юкъусырай, онынъ екяне субетдеши олгъан мышыкъ биле онынъ тизлери устюнде юкъусырай эди. Телюкесизликке риает этип, Полли апте козълюклерини башынынъ тёпесине кечирген.

Том, эльбетте, чокътан къачып кеткенине эмин олгъан Полли апте Томны корип шашты: къатты джеза алмакъ ичюн бу къадар джесарет онъа къайдан кельди!

Том ичериге кирди ве:

- Энди исе, тизе, ойнамагъа кетмек мумкюнми? — деп сорады.
- Айтылгъан ишни яптынъмы? Битирдинъми? Не къадар япып етиштиридинъ?
- Эписини, тизе!

- Том, ялан айтма. Мен ялан севмейим.
- Ялан айтмайым, тизе. Эр шей азыр.

Полли апте онъя инанмады. Томның япқын ишини озь козълеринен барып коръмек истеди. Эгер де Томның сёзлерининъ энъ олмагъанда йигирми файызы акъикъат олгъан олса, о пек къуванаджакъ эди. Лякин о, исар яхшы этип сылангъаныны, ве тек сылангъан дегиль де, бир къач къат киречнен орътюльгени, ве атта исар бойлап ерде беяз ёлакъ къалдырылгъаныны корип пек тааджипленди...

Акъшамлыкъ емек вакътында о, ойле де бир ихтираслы эди ки, заваллы Полли апте балагъа бир шей олмадымы экен, деп къасеветке далды. Сиднинъ устюне топракъ томарлары аткъаны ичюн яхшы тазир ашады, лякин бу шей Томның кейфини ич де бозмагъангъа бенъзей. О, тизесининъ буруны астындан шекер кесегини айындыраджакъ олды ве шу ань эллерише шамар тюшти, лякин бунъя оның джаны ағырмады ялынъыз:

- Тизе, Сид шекер хырсызлагъанда не ичюн оны урмайсынъыз, — деп ташлады.
- Сид адамларны сен киби чекиштирмей. Эгер сенинъ пешинъден козетмесенъ, сен шекерлик ичинден чыкъмаз эдинъ.

Мына Полли апте ашханеге чыкъты ве, Сид, тазирленмегенине къуванып, Томны эриштирген киби, элини шекерликке узатты. Бунъя даянмакъ мумкүнми! Лякин шекерлик Сиднинъ пармакълары арасындан сыйты, ерге тюшти ве къырылды. Том о къадар къуванды, о къадар къуванды ки, къуванчындан тилини тутып оламады, къычырып йиберди. О, ағызыны ачып бир сёз айтмамагъа, атта Полли апте къайтып кельгенде биле яваш ве тынч отурмагъа къарап берди. Полли апте ким къырды деп эписи бир сорайджакъ! Ве, шунда о, шекерликни ким къыргъаныны айтыр — Сидни, мынавы нумюнели огъланчыкъыны насыл этип тазирлегенини шенъ-шерамет сейир этер. Бундан да яхшы зевкъ олурмы! Том ичи къарапалыкънен индемейип, тизеси кельгенге къадар отура берди. Полли апте шекерликни къырыкъ парчаларына козълюклери устюнден бакъып ачув йылдырымларыны ягъдырмакъта эди. Том озь озюне: «Мына, башланаятыр!..» деди. Лякин экиндже дакъкъасында о, энди ерде ята эди! Тизесининъ ағыыр къолу бир даа онынъ узерине энмек ичюн авагъа котерильди. Шунда Том козъяшларыны туталмайып, къычырды:

- Токътанъыз! Токътанъыз! Сиз мени не ичюн урасынъыз! Шекерликни Сид парлады!

Полли апте утангъанындан токътады. Том шимди тизеси оны

аджыр ве озь къабаатыны бир де-бир шейчикнен ювар, деп бекледи. Лякин Полли апте озюни эльге алгъанынен, ялынъыз шуны айта бильди:

— Хм! Эписи бир санъа ботен ерде тюшмеди. Бельки мен одадан чыкъкъанымда эписи бир ярамазлыкъ япкъандырсынъ.

Шу арада оны видждан азабы тутты. Полли апте огъланчыкъъ насылдыр джыллы, муляйим сёзлер айтаджакъ олды. Лякин айтмады, къоркъты: эгер де оны эркелетмеге башласам, о, тизем къабаатыны таныды, деп тюшонир, тербиеде исе бойле шейлерге ёл бермек мумкүн дегиль. Шай да о, бир шей айтмады, юргини таш эзсе биле, адettеки ишлеринен мешгъуль олды. Том кошеде мусюр киби шишип отура, яраларыны тешкере. О, биле: шимди тизеси къальбен онынъ къаршысында тизлери устюнде тура. Буны о, белькемигинен ис это, ве бу ис-дуйгъу оны къара къуванчларнен сарып ала эди. Полли апте Томнынъ козюне киреджек ола<sup>1</sup>, лякин огъланчыкъ онынъ ичен чеккен азапларыны корымемезликке ала. Том биле: тизе вакъты вакътынен онъа яныкълы бир бакъыш ташлай, козълери яшкъя толу, лякин огъланчыкъ онъа дикъкъят этмей, озюни олюм тёшегинде хаста яткъаныны тасавур эте<sup>2</sup>, тизеси исе онынъ узерине эгилип ондан афу сорай, багъышла, деп ялвара. Том исе бетини диваргъя чевире ве ич бир сёз айтмайып, оле. Эгер Том ольсе онынъ алы не оладжакъ? О кене тасавурларгъя комюле: устю-башы, сачлары сым-сылакъ, даа демин онынъ джесидини озенден чыкъаргъанлар да, эвлерине алып келелер, онынъ азап чеккен юрги эбедин тынчлана.

Том, адetti узъре огълан балалар топлашкъан ерлерде дегиль де, олардан авлакъта юрьди. Оны кендиси юрги киби, эфкярлы, кимсе олмагъан ерлерде булунмакъ истеди. Озен саилинде тургъан къайыкъынъ четине отурды, сувнынъ кенъ алалыгъы узеринде козъ кездирди ве шимди бир аньде, ич бир шей дуймадан, кендисини ич бир тюрлю онъайтсызлыкъларгъа огъратмадан сувгъа бөгъулсам не къадар яхшы олур эди, деп тюшюнди. Бираз сонъра акъылына къойнундаки чечеги тюшти, солгъан ве эзильген чечекни къойнундан чыкъарды. Чечек онынъ татлы яныгъыны даа зияде арттырды. Къальбимде олгъан агъыр юкни тизем бильген олса мени аджыр эдими? Агълар эдими, мени тынчландыраджакъ олып эллериинен бойнума сарылыр эдими? Я да мына шу бош ве сувукъ алем киби, айланып кетерми? — деп сорады озюнден. Ве

<sup>1</sup> козюне киреджек ола — озюни мераметли косытереджек ола

<sup>2</sup> тасавур эте — козъ огюне кетире

бу акътаки тюшонджелер онынъ ичини хош эфкярнен толдурды. Том кенди эфкярыны эп эзмеледи, сонъки йипинедже орьселеди. Ниает, о, кокюс кечирип, еринден турды ве къаранлыкълар ичине далды.

Том эвлерине кельди, союнды чыракъ ярыгъында турып, сылакъ урбаларыны козъден кечиреяткъанда Сид уянды. Шу дақъкъаларда онда кеченде олып кечкен анълашылмамазлыкълар хусусында бир къач сёз айтмакъ истеги пейда олды, лякин бу фикиринден тез вазгечти: Томнынъ козълеринде ачув къыгъылчымларыны абайлагъанынен, сес-солукъ чыкъармайып ятты.

Том ятсы дуасыны окъумайып, тёшегине кирип ятты. Сид ичинден: ятсы дуасыны окъумады, деди ве онынъ бу эдепсизлигини къафасынынъ бир кошечигине къайд этип къойды.

*Рус тилинден терджиме эткен Ю. Къандым*



**ботен** — нафиле, зая

**мусюор** — *ruscha*: индюк

**ис этмек** — дуймакъ, сезмек

**къыгъылчым** — атеш парчалары, учкъун

**абайламакъ** — корымек

**ятсы** — эрте акъшам вакъты



1. Шекерлик парланувынен багълы адисени талиль этинъиз. Томнынъ арекетлерине къыймет кесинъ.

2. Полли аптенинъ дуйгъу, фикирлери тасвирленген парчаны дикъкъатнен окъунъыз.

3. Полли тизенинъ насыл инсан олгъаны беян ола? Сиз онынъ фикирлеринен разысынъызы?

4. Томнынъ озъ омюри акъкъында тасавурлары, козю огюнде джанлангъан аджыныкълы левхаларны тасвир этинъиз.

5. Том нелерни арз эте? Полли тизенинъ онъа насыл бакъкъаныны истей?

6. Томнынъ арзу-истеклерини тасвир эткен сатырларны тапып окъунъыз.

### **Умумий сүаллер ве вазифелер:**

1. Сиз Томны насыл тасавур этесиз?

2. Томнынъ дуйгъу, фикирлери ве арзу-истеклерини тасвирлеген сатырларны къайд этип, текрар окъунъыз. Томгъа умумий къыймет кесинъиз.

3. Томнынъ яхшы, догъру арекетлерини къайд этинъиз. Томнынъ къайсы табиат чизгилерини ве арекетлерини бегендинъиз?

4. Том Сойерни насыл тасавур эткенинъизни сёзлернен тасвирленъиз.

## ЭРНЕСТ СЕТОН-ТОМПСОН

(1860 – 1946)



Канада языджысы, рессам ве табиатшынас Эрнест Сетон-Томпсон Англия девлетининъ Сауд-Шильде шеэринде дөгъды. Соңра оларнынъ къорантасы Канадагъа авуша. Эрнесттинъ балалыгъы ве яшлыгъы Торонто шеэринде кечти.

1879 сенеси Эрнест Торонто шеэриндеки тасвирий санат кол-леджини битирген соңъ, окъузыны Нью-Йорк, Лондон, Париж шеэрлеринде девам этти ве табиатшынаслыкъ, рессамдожылыкъ саесинде терен бильгилер алды. Сетон-Томпсон чокъ мемлекетлерде сяятларнен булунды. Шу ерлердеки табиатны ве кийик айванларнынъ яшайышыны оғренмеге арекет этти.

Сетон-Томпсон терен бильгили ве пек ишкір, гъайретли языджы эди. О, айванлар акъкъында къыркътан зияде китап язды. Бу китаплар оны бутюн дюньягъа таныттылар.

Языджы кийик айванларнынъ яшайышыны меракълы, джанлы, окъузыджыны авеслендириджи шекильде тасвирлей.

Эрнест Сетон-Томпсон эм языджы, эм истидатлы рессам эди. Языджы озю япқын меракълы ресимлер, китапларнынъ мундериджесини зенгинлештире ве яраптыра, окъузыджыда табиат ве айванлар алемине меракъ ве авеслик дөгъура.

Дерсликке кирсетильген «Лобо» икяесинде языджы къарт ве кучьлю къашкъыр Лобонынъ фаджиалы такъдирини тасвирлей. Чокъ йыллар къашкъыр Лобо этрафтаки айванларны парчалай, озюнинъ залымлыгъы, айнеджилигинен бутюн джемаатнынъ джаныны якъа. Шу ернинь фермер ве чобанлары чешит усуулларнен Лобоны тутмагъя, ольдюрмеге тырышалар. Лякин Лобо эр вакъыт къуртула. Онынъ айнеджилиги, акъыл, зеин чевиклиги эр кесни шашыра эди. Лобонынъ досту, къашкъыр Бланка, ольдюрильген соңъ, доступна янгъян Лобо оны къыдыргъанда къапкъянгъа тюше. Лобо бир тюрлю къаршылыкъ косытермей, давушсыз озюни теслим эте, къараман киби менлигини сакълап, оле.

# ЛОБО

(икяе)  
(къыскъартылгъан)

## I

Нью-Мексиконынъ шималий къысмындаки айванасравджылыкъ виляетининъ ады Куррумподыр. Бу — отлар бол осъкен яйлялар, балабан багъчалар, юксек байырлар ве Куррумпо деръясына акъып кельген темиз сувлу озенлер диярыдыр. Бу ернинъ ады деръянынъ адындан алынгъан. Улькеге къашкыр укюмдарлыкъ эткен.

Къарт Лобо Куррумпо вадийсине энди чокъ йыллардан берли уджюм этип кельген къашкырлар сюрюсининъ етекчиси эди. Чобан ве айванасравджыларнынъ эписи оны пек яхшы бильгенлер. О пейда олгъан ерде эр кес къоркъкан, къой сюрюлерининъ саиплери не япаджакъларны бильмей, шашмалагъанлар. Къарт Лобо пек балабан къашкыр олып, онынъ айнеджилиги ве кучю исе даа да балабан эди. Ерли сакинлер оны улугъанындан таныгъанлар. Адий бир къашкыр чобанлар къошарынынъ янында бельки saatлернен улур, лякин кимсе онъа къулакъ асмаз. Амма къарт етекчининъ кучлю сеси чобанларны титрете, олар ярын сюрюдеки гъайышлар акъкъында хабер аладжакъларны билелер.

Къашкырларнынъ омюри айванасравджыларнынъ омюринен багълы олгъан. Олар къашкырларны къувана-къувана ёкъ этер, Лобо сюрюсинден ольдюрильген эр бир къашкырнынъ башы ичюн чокъ-чокъ яш бугъаларны да бермеге азырлар. Лякин къашкырларны ольдюрмек къолай дегиль. Олар санки авджыларнынъ устюнден кульген киби, ич бир тюрлю зеэр ве тузакътан къоркъмадан, Куррумпо чобанларындан эр кунь бирер сыгъыр алгъанлар. Демек, къашкырлар энъ аздан эки бинъ айваннынъ башына еткенлер. Эм сюрюнинъ ичинден энъ яхшы сойларыны сайлап алғанлар.

Лобонынъ башы ичюн пек буюк мукяфат бельгилени. Онинъ ичюн эр ерге зеэрленген эт парчаларыны къойгъанлар, амма къашкыр зеэрнинъ къокъусыны бирден сезип, дайма сагъ къалгъан. О тек бир шейден — атеш фышкыргъан тюфектен къоркъкан. Бу виляетте эр кес янында тюфек алыш юрьгенини бильген къашкыр инсанларгъа уджюм этмеген ве оларнен корюшмемеге тырышкъан. Инсанны узакътан корыгенлеринен къачкъанлар. Лобо къашкырларына тек озълери ольдюрген айванларны ашамагъа изин бергени

иҷион де сюрюси ни сакълап къалгъан. Онынъ сезгири бурну инсан къолунынъ къоқъусыны алыш, анда зеэр олгъаныны анълагъан.

Балабан къашкъыр къоркъусы эп артаберген, онынъ башы иҷион бериледжек пара да арта-арта бинъ долларгъа еткен. Бу къадар пара даа ич бир къашкъырнынъ башы иҷион берильмеген эди.

Бойле буюк муқяфаткъа къызгъан техаслы авдже Теннерей атында Куррумпо дересине етип келе. Къашкъыр авламакъ иҷион онынъ аджайип тюфеклери, ельаякъ атлары ве къашкъыр парчалагъан копеклери бар эди. Техаста озъ копеклеринен о нидже къашкъырны ёкъ эткен, шунынъ иҷион де бир къач куньден къарт Лобонынъ башы онынъ эгерининъ уджунда салланаджагъындан ич шубелемеген.

Иште, яз куньлеринден биринде танъ атар-атмаз авдже авгъа чыкъа. Тезден онынъ балабан копеклери из алгъанларыны бильдирип, афыралар. Эки миль биле чапмадылар, мешур Лобо сюрюсининъ къуйругъыны корелер. Къашкъыр йыртыджы копеклеринъ иши къашкъырларны токътатмакъ, артларындан етип кельген авджеигъа оларны атмакъ къала. Техаснынъ ачыкъ тюземлигинде буны япмасы къолай, мында исе эр шей бам-башкъа.

Къарт Лобо ер сайламагъа биле. Куррумпо озенининъ къаялы дерелери ве ирмакълары тюземликни эр бир тарафына чыкъа. Къарт къашкъыр шу дерелеринъ бирине ёл ала ве сувны кечип, авджеидан къуртула. Онынъ сюрюси эр тарафкъа дагыла, копеклер де шу къашкъырларнынъ артындан дагылалар. Къашкъырлар, копеклеринъ бир къысмы артта къалгъанындан файдаланып бир ерде топланып буларны парчалайлар.

Акъшам Теннерей копеклерини топлагъанда, оларнынъ тек алтысы къайтып, араларындан экиси исе пек яраланып кельгенини коре. Амма авдже ниетинден къайтмай, къашкъырнынъ башыны алмакъ иҷион даа эки кере арекет этип бакъса да, бир де-бир нетидже эльде эталмай. Сонъки кересинде онынъ энъ яхшы аты йыкъылып, шу ерде джан бере. Бундан сонъ авдже умюдини кесе ве Техаскъа къайта. Лобо исе кене Куррумпода укюмранлыгъыны девам эте.

## II

Ковбойларнынъ икялерине пек чокъ инанмадым. Амма 1893 сенеси бу ярамазнен якъындан танышкъан ве эр кестен зияде бильгенимден сонъ фикиримни денъиштирдим. Бу байыр ве дерелер ичинде Лобоны копек ве атларнен къуваламакъынынъ файдасы олмагъаныны анъладым. Бунынъ бир чареси кене де къапкъан ве зеэрдир.

Бу ачыкъ козъ<sup>1</sup> къашкъырны алдатмакъ ичюн насыл усул ве айнеджиликлерни ишлеткенимни айтып отурмайым. Лобо ичюн зеэр япмакъ ичюн нелер-нелер къарыштырмадым. Къапкъангъа емлеме сыфатында тек насыл айванларның этини къоймадым! Лякин эр саба нетиджесини корьмек ичюн барып, бутюн япкъанларым бошуна кеткенини коре эдим. Къарт къашкъыр къарадардан зияде акъыллы эди, оны ич алдатып оламадым.

Оның не къадар зекий олгъаныны исбатламакъ ичюн бир мисаль кетирмек етерлидир. Экиндже куню саба мен тюшюнип тапкъан айнеджилигимнинъ нетиджесини бильмек ичюн кене ёлгъа чыкътым. Лобо етеклеген сюрюнинъ излерини корьдим. Оның излерини бир кереден айырмакъ мумкүн, башкъа къашкъырларның изинден баягъы балабанджа. Мен артымдан сюйреклеп кеткен емлеменинъ къокъусыны къашкъырлар сездилер. Лобо бириндже олып якъынлашты, яхшы этип къокълады ве ахыр-сонъу ютып йиберди.

Къуванчым чексиз эди.

— Ахыр-сонъу тутулдынъмы! Тезден ольгенинъни корерим, — деп къычырдым мен ве огге чаптым. Козълеримни къашкъыр къалдыргъан излерден алмайып кетем. Экиндже емлемени ташлагъан ериме келип, оның да ашалгъаныны корьдим. Ёлумны девам этип, учондже емлеме де ёкъ олгъаны, излер исе дөртюнджисине алып баргъаныны корьдим. Кельсем не корейим — Лобо оларның ич бирисини ашамагъан, тек агъызының ичинде ташыгъан ве сонъкисинен берабер обалап, устюни пислеген ве бойлеликнен меним айнеджилигиме нефретини ифаде эткен. Буны япкъан сонъ башкъа якъкъа бурулып, мукъайтлыкъынен къорчалағъан сюрюсини де артындан етеклеп алып кеткен.

Бир кере акъшам, ноябрининъ сонъунда, къашкъырларның уджюминден эки чобан уяна. Бутюн сюрю еринден къыбырдамайып тургъан акъыллы ве джесюр текелеринъ этрафына топлашкъан. Амма бу уджюмге адий къашкъыр ёлбашчылыкъ япмай эди де! Къарт Лобо сюрюни текелер туткъаныны чобанлардан да яхшы биле ве топлашкъан къойларның устьлеринден атлап текелеринъ эписини йырта. Къойлар тараф-тараф къачалар.

Ниает къашкъыр къапкъанларны кетирдилер ве мен эки ярдым-джымнен берабер бутюн афта оларны къоймакъынен огъраштым. Биз кучь ве арекетлеримизни аямадан мытлакъа бир нетидже кетирерджеек эр анги вастадан къулландыкъ. Къапкъанлар ерлештирильгенининъ сабасына оларны бакъмагъа кеттим. Бакъсам, Лобоның

<sup>1</sup> ачыкъ козъ — эр шейни корьген ве анълагъан

излери бир къапкъандан экиндjisine бара. Бу излер къашкъырнынъ гедже кезинтилерини тариф эттилер.

О къаранлыкъта юргенине бакъмадан яхшы этип сакълангъан къапкъанларнынъ бириндjisини пек тез тапты. Сюрюни токътатып, ерни къазгъалап башлай. Башта къапкъанны, сонъра зынджыр ве агъачны къазып чыкъарды. Бундан соң башкъа къапкъанларны да тапа. Онынъ арекетини козетир экеним, къашкъыр ёлда шубели бир шей корыгенинен четке бурулгъаныны да корьдим. Шу дакъкъасы башымда бир план дөгъды: мен къапкъанны «Н» арифи шеклинде яни ёлнынъ эр эки тарафында къойып, бир къапкъанны ортада къалдырдым. Амма кене де енъильгенимни корымек ичон чокъ беклемек керек олды. Лобо къапкъанлар арасындан кеткенде ортада тургъан бир къапкъанны корип къалды ве вакътында токъталды.

Анда тузакъ олгъаныны о насыл анълады мен бильмейим. Эр алда Лобо солгъа ве сагъга бурулмайып, артына къайтты. Эм баскъан излеринден къайтмагъа тырышты ве хавфлы ерден чыкъып кетти. Чыкъкан соң къапкъанларны артындан айланып арт панджаларынен топракъ ве ташларны къапкъанлар устюне сюрьди. Бойле этип бутюн къапкъанларны къапатты.

Эм бир чокъ керелерде о айны шу арекетни япа, мен озь усулларымны насыл денъиштирмейим, къашкъыр дайма аман-эсен къала берди. Бельки о, аля бугунье къадар озь уджюмлерини девам эттер эди, эгер де ишангъан аркъадашы аякъ чалмагъан<sup>1</sup> олса. Бойлелик-нен онынъ ады янъгызы олгъанда ич енъильмеген ве тек доступнынъ дикъкъатсызлыгъындан ольген къараманларнынъ джедвелинде ер алды.

### III

Базы бир аляметлер манъя Лобонынъ сюрюсинде худжур шейлер олгъаныны косытерди. Меселя, базыда сюрю етекчисининъ излеринден онынъ огюнде башкъа къашкъыр чапкъаны корюне. Мен буны анъламадым. Бир кере ковбойлардан бири манъя:

— Мен бугунь оларны корьдим. Огде баштакълыкъ эткен Бланка чата, — деди. Мен дераль меселени анъладым, демек Бланка ыргъачы къашкъыр. Чюнки эркек къашкъыр олсайды, Лобо оны йыртар эди.

Къашкъырлар эр бир ольген айвангъа, оны ашамакъ ниетлери ол маса да, якъынджа келип къоқъайлар. Илле шу алышкъанлыкълары саесинде Куррумпо сюрюси меним тузагъыма тюшер, деп умют эттим. Лобо меним арекетимни фаш этип, сюрюни этке якъынлаштырмайджагъына ич шубем ёкъ. Амма, къапкъанынъ янында санки

<sup>1</sup> аякъ чалмакъ — кедер этмек

быракъылгъан башны кечип кеталмаз, деп умoot эттим.

Экинджи куню сабасына къапкъанларны тешкермеге кеттим. Къашкъырларнынъ излерини корем, баш! Къапкъанларны ашыкъ-аджеле бакъып, Лобо сюрюни этке якъынлаштырмагъаныны корьдик. Лякин балабан олмагъан бир къашкъыр четте яткъан башны къокъламагъа келип, тузакъкъа тюшкен. Излеринъ пешинден кетип бу къашкъыр Бланка экенини корьдик. Бизни корьгенинен о тездже чапып башлады. Къапкъандаки тананынъ башы онъя пек кедер этсе де, янымда джаяв кеткен аркъадашымдан тездже кете эди.

О не къадар арекет этмесин, биз артындан етиштик. Чонки тананынъ бойнузлары ташларгъа илиши.

Бланка киби дюльбер къашкъыр ич корьмеген эдим. Онынъ тегиз, къалын териси bem-beяз тюсте эди. О, чарышмагъа азырлангъан киби бизге таба айланды ве улуды. Онынъ улувыны эшилген къарт Лобо онъя теселли берген киби къаршыдаки байырдан сесленди. Лякин бу ыргъачы къашкъырнынъ сонъки улувы эди.

Биз Лобо сюрюсine биринджи кере дарбе яндыргъанымыздан севине-севине Бланканынъ олюсини эвге алып къайтыкъ.

Вакъты-вакътынен Лобо улугъаныны эшитемиз, бес-белли о байырдан-байыргъа ашып, Бланканы къыдыра. Оны къуртарып оламайджагъыны анъласа да, ташлап кеталмай, лякин якъынлашмагъа да къоркъа.

— Бланка керчектен де Лобонынъ досту олгъанына шубем къалмады, — дедим ковбойларгъа.

Экинджи куннинъ тап акъшамына таба бельгиленген ерге етип бардым ве якъынджа кельгенде балабан чал кольге еринден турып къачмагъа тырышкъаныны корьдим. Къаршымда Курумпоны дешетке къойгъан Лобо тура эди. Къапкъангъа тюшкен. Заваллы къарт къараман! О, озь севгилисини къыдыра-къыдыра нияет изини



тапкъан ве шу изден кетип тузакъкъа тюшкен. Дёрт демир онынъ дёрт панджасыны да сыкъкъан.

Биз онынъ аякъларыны къатты этип багъладыкъ, къашкъыр ич бир кере ынъырданмады, башыны котермеди ве улумады. Биз зарзорнен оны меним атыма юкледик. Къашкъыр тегиз нефес алып, козълерини ачты. Олар йылтырай эдилер. Амма о бизге бакъмай, онынъ бакъышы, мешур сюрюси даркъалгъан байырларгъа тикильмекте эди.

Биз ашыкъмадан кеттик ве фермагъа кельдик. Анда Лобоны бойнундан къыскъа зынджаыргъа багълап, аякъларыны чездик.

Мен къашкъырнынъ огюне эт, сув къойдым, амма о айланып биле бакъмады. Къурсагъы устюнде ята, козълери исе даа якъында падишаалыкъ эткен алантъа бакъалар. Мен эллеримни онъя тийдиргенде де асла къыбырдамады. Та кунь баткъангъа къадар отеки байыр ве ормангъа бакъып ятты.

*Рус тилинден терджиме эткен З. Бекирова*



**укюмдарлыкъ этмек** – *руса:* властвовать

**етекчи** – ёлбашчы

**тузакъ** – къапкъан

**изин бермек** – разы олмакъ

**сезигир** – дуйгъулы

**ирмакъ** – уфакъ озенчик

**емлеме** – мында: зеэрленген ем

**алямет** – бельги

**дарбе** – уджюм



1. «Лобо» серлевалы икяени дикъкъатнен окъунъыз. Къашкъыр Лобонынъ Куррумпо виляетининъ джемаатына кетирген заарлары, оларнынъ айванларыны вахшийдже парчалагъаныны айрыджа къайд этинъиз.

2. Шу ернинъ чобанлары, авджылары, ковбойлары къашкъыр Лобоны тутмакъ я да ольдюрмек макъсадынен насыл усуллар къулланалар?

3. Къашкъыр Лобо адамларнынъ къуллангъан чешит усуллары ве арекетлеринден насыл къуртула? Сиз онынъ арекетлерине насыл къыймет кесесиз?

4. Къашкъыр Лобо акъкъында тафсилятлы икяе этинъиз.

5. Айванлар омюринден меракълы вакъиалар тасвиrlenген икяелер, кинофильмлерни хатырлантызыз ве теэссуратларынызnen пайлашынъыз.



Сиз севген айванларнынъ ресимлерини япынъыз.

## ТАЛЕБЕЛЕРГЕ ТЕВСИЕЛЕР

### I. Эдебий эсернинъ мундериджесини айтып берювина азырлыкъ

1. Эсерни дикъкъатнен текrar окъуп чыкъынъыз.
2. Метинде расткельген муим сёзлерни я да манасы аньлашылмагъан сёзлерни дефтеринъизге язынъыз, лугъаттан файдаланып, бу сёзлернинъ маналарыны бельгиленъиз.
3. Эсерде къулланылгъан ифадели васталарны тапынъыз: **эпитет, къыяс, джанландыруүс, метафора** ve дигерлерини.
4. Икяе эткенде, ифадели сёзлерни ве ибарелерни къулланмагъа тырышынъыз.
5. Эсерни я да онынъ бир къысмыны текrar окъуп, план тизинъиз ве бу план боюнчада икяе этинъиз.
6. Эсернинъ мундериджесини айтып бергенде, тасвирлентен адиселерни инсанларны, неснелерни, козъ огуне кетирип, тасавурынъызда джанландырмагъа арекет этинъиз.

### II. Эдебий къараман акъкъында икяе этювге азырлыкъ

1. Эсернинъ серлевасыны ве муэллифини беян этинъиз.
2. Эсернинъ эсас фикрини къайд этинъиз.
3. Эсернинъ эсас къараманыны бельгиленъиз.
4. Эдебий къараман акъкъында икяенъизнинъ планыны тизинъиз:
  - а) тышкъы корюниши;
  - б) дигер иштиракчи шахсларнен мунасебети;
  - в) насыл арекетлерде булуна;
  - г) бу арекетлерде онынъ насыл табиат чизгилери ачыла;
  - д) сиз онынъ арекетлерине ве табиатына насыл къыймет кесесинъиз.
5. Эдебий къараман акъкъында икяе эткенде, эсернинъ мундериджесине эсасланмакъ керек, фикринъизни исбатлагъан мисаллер, эсерден эпизодлар, сатырлар кетирмек керексинъиз.

### **III. Эсер акъкъында не бильмек лязимдир**

1. Эсерниң серлевасыны;
2. Эсерниң муэллифини;
3. Эсерниң мундериджесини;
4. Эсерниң эсас къараманы ве иштиракчи шахсларыны;
5. Эсер акъкъында сизниң фикринъиз (нелерни бегендинъиз, нелер сизни меракъландырды, насыл тесир этти, насыл теэссуратлар къалдырды ве иляхре).

### **Тапмаджаларның джеваплары:**

1. Кунеш.
2. Ай.
3. Чокъракъ ве озен.
4. Ель.
5. Буз.
6. Яшын.
7. Булат. (*12-нджи с.*)
  1. Козь.
  2. Эки къол ве пармакълар.
  3. Юкъу.
  4. Кольге.
5. Афта кунълери. (*12-нджи с.*)
6. Китап.
7. Кемане.
8. Йымырта.
9. Телевизор.
10. Магнитофон.
11. Давул. (*13-юнджи с.*)

## МУНДЕРИДЖЕ

<i>Азиз талебелер!</i> .....	3
<b>Ватансыз адам — къанатсыз къуш</b>	
Ватаным. <i>Нузет Умеров</i> .....	4
Ватан. <i>Идрис Асанин</i> .....	5
<b>Китап — бильги анахтары</b>	
<i>Севинъиз китапны!</i> .....	6
Китап. <i>Юнус Темиркъяя</i> .....	6
<b>КЪЫРЫМТАТАР ХАЛКЪ АГЪЫЗ ЯРАТЫДЖЫЛЫГЪЫНДАН</b>	
Эвель огренгенлеримизни хатырлаймыз	
<i>Саювлар</i> .....	7
<i>Тезайтымлар</i> .....	8
<i>Ифадели окъумагъа огренемиз</i> .....	9
<i>Аталар сёзлери ве айтымлар</i> .....	9
<i>Тапмаджалалар</i> .....	12
<i>Ифадели окъумагъа огренемиз</i> .....	13
<i>Бешик йырлары</i> .....	14
Халкъ агъыз яратыджылыгъы огренювини девам этемиз	
<i>Къыйметли мирас</i> .....	16
<i>Халкъ йырлары</i> .....	17
Бозторгъай ( <i>йыр</i> ) .....	17
Къалайлы къазан ( <i>йыр</i> ) .....	18
Аман, дегирменджи ( <i>йыр</i> ) .....	18
Сычан ( <i>йыр</i> ) .....	19
Айшем ( <i>йыр</i> ) .....	20
Чынъ ве мане .....	21
Чынълар .....	22
Манелер .....	22
<i>Шиир ве несир акъкъында</i> .....	24
<i>Къырымтатар халкъ масаллары</i>	
<i>Халкъ масаллары акъкъында</i> .....	25
Акъыллы кирпинен айнеджи тильки ( <i>масал</i> ) .....	26
Алтын башнен Хыяр баш ( <i>масал</i> ) .....	32
<i>Ифадели окъумагъа огренемиз</i> .....	36
<i>Дюнья халкъларынынъ масаллары</i>	
Къашкъыр, чыкъчыкъбалабан ве кийик къуртлар (франсыз халкъ масалы). Терджиме эткен С. Сулейман .....	37
Денъизджи Синдбад акъкъында масал. Терджиме эткен Э. Бекиров .....	39
<i>Халкъымызынынъ урф-адетлери ве байрамлары</i>	
Джыйин .....	45
Наврез байрамы .....	46
Наврез ( <i>йыр</i> ) .....	46
Наврез. Риза Фазыл .....	47
Хыдырлез байрамы .....	48

<b>ЭДЕБИЙ МАСАЛЛАР</b>	
<b>Эдебий масаллар акъкъында</b>	49
<b>Кырымтатар языджыларының эдебий масаллары</b>	
<b>Эюп Дерменджи</b>	50
Айнеджи тилькининъ олюми ( <i>масал</i> )	51
<b>Зиядин Джавтобели</b>	60
Балыкъчи ве копек ( <i>масал</i> )	61
<b>Ифадели окъумагъа оғренемиз</b>	63
<b>Четэль языджыларының эдебий масаллары</b>	
<b>Ханс Кристиан Андерсен</b>	64
Къар къыраличесеси ( <i>масал</i> ). Терджиме эткен Ю. Къандым	65
<b>КЫРЫМТАТАР ЭДЕБИЯТЫНЫҢ ТАРИХЫНДАН</b>	
<b>Усеин Шамиль Тохтаргъазы</b>	78
О недир? ( <i>шиир</i> )	79
<b>Мемет Нуэт</b>	81
Озен ( <i>шиир</i> )	82
Ана иле бала арасында ( <i>шиир</i> )	83
<b>Номан Челебиджихан</b>	85
Къарылгъачлар дуасы ( <i>икяе</i> )	86
<b>Амди Гирарайбай</b>	93
Тайчыгъым ( <i>шиир</i> )	94
<b>Ифадели окъумагъа оғренемиз</b>	95
<b>ХХ АСЫР КЫРЫМТАТАР ЭДЕБИЯТЫНДАН</b>	
<b>Мамут Дибагъ</b>	97
Балкъуртлар ( <i>икяе</i> )	98
<b>Эшреф Шеми-заде</b>	103
Гедже ( <i>шиир</i> )	104
<b>Джанландырув акъкъында</b>	105
Акъшам деньиз ялысында ( <i>шиир</i> )	105
<b>Юсуф Болат</b>	107
Туфанда къалгъан къой сюрюси ( <i>икяе</i> )	108
<b>Табиат манзарасы акъкъында</b>	113
<b>КЫРЫМТАТАР ЯЗЫДЖЫЛАРЫ БАЛАЛАР АКЪКЪЫНДА</b>	
<b>Аблаким Ильмий</b>	114
Къуртчу Бекирчик ( <i>икяе</i> )	115
<b>Монолог ве диалог акъкъында</b>	129
<b>Ибраим Паши</b>	130
Фындыкъ джыйгъанда ( <i>икяе</i> )	131
<b>Эмиль Амит</b>	135
Чанта ( <i>икяе</i> )	136
Анамның умюти ( <i>икяе</i> )	138
<b>Икяе акъкъында</b>	141
<b>Эрвин Умеров</b>	142
Омпорде ильк кере ( <i>икяе</i> )	143
<b>ВАТАН ДЖЕНКИ АКЪКЪЫНДА ЭСЕРЛЕР</b>	
<b>Джевдет Аметов</b>	149
Джедвельге къююлмагъан дерс ( <i>икяе</i> )	150

<b>Айдер Осман</b> .....	155
Балалар эви янында ( <i>икяе</i> ) .....	156
Советлер Бирлигининъ эки дефа къараманы Амет-Хан Султан .....	162
Авада Амет-Хан! <i>Шамиль Алядин</i> .....	162
<b>СОНЬКИ ДЕВИР КЪЫРЫМТАТАР ЭДЕБИЯТЫНДАН</b>	
<b>Риза Фазыл</b> .....	164
Амет-Ханынъ балалыгъы ( <i>повесттен парча</i> ) .....	165
<b>Шакир Селим</b> .....	167
Сейтнен Вели ( <i>шиир</i> ) .....	168
<b>Тайр Халилов</b> .....	170
Акъбардакъ ( <i>икяе</i> ) .....	171
<b>ДЖИАН ЭДЕБИЯТЫНДАН</b>	
<b>Оскар Уайлд</b> .....	175
Бахытлы шахзаде ( <i>масал</i> ). Терджиме эткен Л. Сейтхалилова .....	176
<b>Марк Твен</b> .....	183
Том Сойернинъ сергүзештлери ( <i>икяе</i> ). Терджиме эткен Ю. Къандым .....	184
<b>Эрнест Сетон-Томпсон</b> .....	197
Лобо ( <i>икяе</i> ). Терджиме эткен З. Бекирова .....	198
<b>Талебелерге тевсиелер</b> .....	204
Тапмаджалаарнынъ джеваплары .....	205

*Навчальне видання*

**Веліулаєва Аліє**

**ІНТЕГРОВАНИЙ КУРС «ЛІТЕРАТУРА»  
(КРИМСЬКОТАРСЬКА ТА СВІТОВА)**

*для загальноосвітніх навчальних закладів  
з навчанням кримськотарською мовою*

**5 клас**

Художники: З. Акімова, Л. Татарісова

Директор І.Б. Чегертма

Редактор Г.М. Дудакова

Коректор Е.А. Ібраїмова

Оператори: А.В. Веселов, Е.Р. Аджалімова

Підписано до друку 20.05.2013 р. Формат 70x100<sup>1</sup>/<sub>16</sub>.

Гарнітура «Peterburg». Умовн. друк. арк. 16,9. Обл.-вид. арк. 12,5.

Обсяг 13,0 друк. арк. Тираж 665 прим. Зам. № 351.



**КП «Видавництво «Кримнавчпеддержвидав»**

95000, м. Сімферополь, вул. Горького, 5.

E-mail: krimuchpedgiz@gmail.com

*Свідоцтво про внесення до Державного реєстру суб'єкта  
видавничої справи ДК № 508 від 26.06.2001 р.*

**Надруковано у ТОВ «Видавництво «Вперед»**

97534, АРК, Сімферопольський район, с. Строгонівка, вул. Лікувальна, 1.